

**DE REPUBLICA  
ECCLESIASTICA  
LIBRI QUATUOR  
CONTRA  
MARCUM...**

---

Martinus Becanus, Giovanni  
Battista Coccini





5-6-2



---

Ex Bibliotheca  
majori Coll. Rom.  
Societ. Jesu

---

54.3.19



DE  
REPUBLICA  
ECCLESIA-  
STICA

Libri quatuor

CONTRA MARCV M AN-  
TONIV M DE DOMINIS, NVPER  
*Archiepiscopum Spalatensem nunc De-  
sertorem & Apostatam,*

AUTHORE

MARTINO BECANO SOCIETATIS  
Jesu Theologo, & in Cæsarea Academia Vi-  
ennensi Professore Ordinario.



*Ex Capite*



*M. C.*

Cum Gratia & Privilegio Cæsar. Maiest.

MOGVNTIÆ

Ex Officina JOANNIS ALBINI

ANNO M. DC. XIIX. +



APPROBATIO R. P. PROVINCIALIS  
*Provincia Rhenana Societatis*  
 JESU.

Hos IV. libros de Repub. Ecclesiastica à R.  
 P. Martino Becano Soc.<sup>tis</sup> nostræ Theologo  
 contra M. Antonium de Dominis conscrip-  
 ptos, atq; à deputatis ad id Theologis lectos  
 & approbatos. Ego Joannes Copperus Soc.<sup>tis</sup>  
 JESU, apud Rhenum Provincialis, concessa  
 mihi facultate ab admodum R. P. N. Mutio  
 Vitalesco, Societatis nostræ Præposito Gene-  
 rali, Typis mandari permitto. Molshemij, an.  
 1618. die 2. Septemb.

Joannes Copperus



# PAULO V.

## PONTIFICI MAXIMO.



Aliquot jam menses elapsi sunt, Beatissime Pater, cùm in Austriam rumore perlatum est, novum Ecclesiæ hostem, Marcum Antonium de Dominis, subito è latebris prodiisse, qui Divi Petri ac successorum ejus Primatum, temerè oppugnare ausus sit. Monitus à bonis viris; & omnino persuasus sum, ut brevi scriptione hominem confutarem. Ac fecissem id sine mora: Sed exemplar voluminis, quod ille conscripsit, habere non potui. Viennæ, nullum erat. Unum tandem aliunde nactus. Feci id, qua

(?) 2 potui

E P I S T O L A

potui brevitate ; totamque confutationem libris quatuor complexus sum ; quos cum eâ , quâ par est , observantiâ , Tuæ Sanctitatis conspectui nunc offero. Hostis, ut dixi, novus est ; sed veterum hæreticorum vestigia sequitur : ac eodem, quo illi, spiritu superbiæ ac rebellionis, ad scribendum impulsus est. Nostro commodo ; suo detrimento. Nam ille quidem, nihil aliud hoc suo conatu , vel assecutus est, vel assequi potuit ; quàm ut veluti membrum putidum ab Ecclesiæ corpore præscinderetur , & omni vitali succo ac spiritu destitutum, penitus exaresceret. Nobis contra accidit. Oblata est occasio benè merendi de Ecclesia ; confirmandi Catholicos in fide ; revocandi seductos ab errore ; confundendi adversarios , ne pergant insolescere. Quam minimè negligendam censeo:

ſeo: præſertim cùm noſtræ Socie-  
 tatis hominibus , id vel maximè  
 commendatum eſſe ſciam à Beato  
 P. N. Ignatio, ut Romanæ & Apo-  
 ſtolicæ Sedis authoritatem omni  
 ſtudio ac induſtria tueamur. Quod  
 quidem hætenus præclarè ab Illu-  
 ſtriſſimo Cardinale Bellarmino , a-  
 lijſque doctiſſimis & præſtantiſſi-  
 mis eiufdem Societatis ſcriptoribus  
 præſtitum eſt. Ego ſanè, qui mini-  
 mus ſum , non patiar voluntatem  
 mihi deeſſe. Faciam, quod illi fece-  
 runt: ſi non pari fructu; certè non  
 minori affectu. Et meritò. Naturæ  
 inſtinctus eo nos ducit. Videmus, in  
 humano corpore, quanta membro-  
 rum omnium cura ac ſollicitudo ſit  
 in conſervando capite. Singula ma-  
 lint in ſeipſis inmiſſam plagam ac-  
 cipere , quàm in læſionem Capitis  
 conſentire. Quid ni? Salvo Capite,  
 membrorum ſalus ſperari poteſt: læ-

so. vix potest. A Capite, cum salvum  
 et derivantur spiritus sensitivi in  
 corpus universum; & singulis mem-  
 bris vitalem vim ac vigorem imper-  
 tiunt. In Capite vigent sensus, ratio,  
 prudentia, memoria, quibus mem-  
 brorum actiones diriguntur. Nemo  
 hoc nescit. At eandem esse propor-  
 tionem in Corpore Ecclesiæ, Chri-  
 stiana fides nos docet. Illius corpo-  
 ris membra nos sumus. Caput pri-  
 marium, Christus; Vicarium, Pon-  
 tifex. A Christo, tanquam perenni  
 fonte ac scaturigine, diffunduntur  
 in nos aquæ salientes in vitam æter-  
 nam. Ab ejus Vicario, in nostris a-  
 ctionibus gubernamur. De utriusq;  
 conservanda authoritate sollicitos  
 nos esse, par est. Si Ariani Christo, si  
 Calvinistæ Vicario illius plagam in-  
 tentant; nos objecto clypeo, excipe-  
 re eam oportet. Præluxerunt nobis  
 in hoc studio antiqui Patres, qui &  
 Christi

Christi Divinitatem contra Arium,  
& Romani Pontificis Primatum  
contra Schismaticos, suis scriptis e-  
gregiè propugnarunt. Nos in eo-  
rum locum successimus. Non debe-  
mus esse filij degeneres; sed illorum  
fidem, ac fervorem imitari. Hæc no-  
stra vocatio est. Ad hanc exequen-  
dam, tarnetsi mea sponte fuerim  
propensissimus, magni viri, suo jure,  
cohortati me sunt. Feci, quod potui.  
Si quid profeci, cedat in bonum pu-  
blicum: sin minus, obedientiæ fru-  
ctus me consolabitur. Quod reliquū  
est, vestram Sanctitatem benè vale-  
re, & in pio promovendi rem Chri-  
stianam studio persistere, ex animo  
precor. Viennæ Austriæ, ex Cæsareo  
Societatis Jesu Collegio, anno Chri-  
sti 1618. mense marito.

*Vestra sanctitatis*

Humillimus in Christo servus

MARTINUS BECANUS.



## LECTORI.

**N**OTVM ex Evangelio est, Scribas & Phariseos, suo quidem iudicio ac opinione, in Scriptura Veteris Testamenti fuisse exercitatisimos: Et tamen Christum de ijs dixisse: Cæci sunt, & duces cæcorum. Nimirum, externum Scriptura corticem videbant; sed sensum sub cortice latentem non videbant. Idem contingit nostris adversarijs. Scripturarum autoritate se tuentur; & illarum intelligentiam consecutos se esse, non solum ipsi existimant, sed etiam palam gloriantur. Et tamen cæci sunt. Non vident in Scriptura, quod boni omnes vident. Quid illud? Ex multis, unum hoc accipe, Non vident, frustra se laborare in oppugnando Pontificis Primatu & autoritate: Non vident, se suo conatu, non Pontifici, sed sibi ipsis interitum confiscere. Nam Pontifex quidem oppugnari potest, sed expugnari non potest. Hac, quia cæci, sane non vident. Et tamen in Scriptura consignatum est. Legimus in Veteri Testamento, quid rebelles moliti sint contra Primatum Aaronis: quo eventu id fecerint: quo miraculo, conatum ipsorum irritum fuisse, & deinceps fore, Deus palam demonstravit.

2. Res gesta describitur Numer. 17. his verbis: Et locutus est Dominus ad Moysen, dicens: Loquere ad filios Israel, & accipe ab eis virgas singulas per cognationes suas, à cunctis Principibus



*Praefatio ad Lectorem.*

capibus tribuum, virgas duodecim, & uniuscujusque nomen supercribes virgæ suæ. Nomen autem Aaron erit in tribu Levi, & una virga cunctas seorsum familias continebit: ponesque eas in Tabernaculo fœderis coram testimonio, ubi loquar ad te. Quem ex his elegero, germinabit virga eius: Et cohibebo à me querimonias filiorum Israel, quibus contra vos murmurant. Locutusque est Moses ad filios Israel: & dederunt ei omnes Principes Virgas per singulas tribus; fueruntque virgæ, duodecim absque virga Aaron. Quas cum posuisset Moses coram Domino in tabernaculo testimonij, sequenti die regressus invenit germinasse virgam Aaron in domo Levi: & turgentibus gemmis eruperant flores, qui folijs dilatatis in amygdalas deformati sunt. Protulit ergo Moses omnes virgas de conspectu Domini ad cunctos filios Israel: videruntque, & receperunt singuli virgas suas. Dixitq; Dominus ad Moysen: Refer virgam Aaron in tabernaculum testimonij, vt servetur ibi in signum rebellium filiorum Israel, & quiescant querelæ eorum à me, ne moriantur.

3. *Hic, qui caci non sunt, manifestè vident, Primatum Aaronis & successorum eius, cõtra querimonias & conatus rebellium, miraculo Virgæ germinantis, à Deo consignatum & confirmatum esse; mortemq; ijs omnibus intentari, qui simili scelere ac temeritate, in posterum obstricturi se essent. Sed quid hoc, inquires, ad Romanum Pontificem? quid ad eos, qui illius Primatui hostes se esse profitentur? Au-*

## *Praefatio*

*di Apostolum, 1. Corinth. 10. 6. Hæc, inquit, in figura facta sunt nostri, ut non simus concupiscentes malorum, sicut & illi concupierunt, &c. Neq; murmuraueritis, sicut quidam eorum murmurauerunt, & perierunt ab exterminatore. Ex quo loco, si cæcus non es, sic ratiocinandum tibi est: Quæ fiebant in veteri Testamento, erant umbra seu figura futurorum in nouo Testamento. At Deus in veteri severè puniebat eos, qui erant rebelles Pontifici: & Primatum Pontificis volebat saluum ac illasum persistere. Ergo idem in nouo facturum est, & re ipsa facit. Quod apertè insinuat Apostolus loco citato, cum ait: Hæc autem omnia (inter quæ erat rebellio) contingebant illis: scripta sunt autem ad correptionem nostram.*

4. *Ut hoc clarius percipiatur, explicanda est figura, quam attuli. Poteest autem sic explicari. Jacob habuit duodecim filios Patriarchas, ex quibus duodecim tribus filiorum Israel exortæ sunt. Vna ex illis tribubus, quæ erat Ioseph, diuidebatur in duas, Ephraim scilicet & Manasse. Sic tredecim effectæ sunt. Principes harum tribuum, erant Primogeniti. Vnus ex illis fuit Aaron, in tribu Levi, cui Primatus Sacerdotis, præ cæteris, à Deo datus est. Obstiterunt illi rebelles: sed à Deo puniti sunt. Et quod solus Aaron, cum suis successoribus, perpetuum esset habiturus Primatum, miraculo virga germinantis demonstratum est.*

5. *Hæc figura est. Sequitur applicatio. Christus habuit duodecim Apostolos, Principes ac primogenitos filiorum Novi Testamenti. His Paulus, decimus tertius adjunctus est. Petrus, præ cæteris Primatum*

*tum*

*ad Lectorem.*

tum à Christo obtinuit, his verbis, *Pasce oves meas. Et ad significandam istius Primatus stabilitatem, dictum est illi, & successoribus eius: Ego rogavi pro te, ut non deficiat fides tua. Quotquot hætenus Primatum Petri & successorum eius oppugnarunt, exterminati sunt: Et qui deinceps oppugnaturi, similipæna subiacebunt.*

6. *Igitur, ut verbo dicam, Jacob fuit figura Christi: Patriarchæ, Apostolorum: Aaron, Petri: Virga Aaronis germinans, fidei Petri non defectura: Rebelles Judæi, rebellium Christianorum: Pæna, quæ illi plexi sunt, pæna, quæ hi plectuntur. Qui hoc non vident, cæci sunt. Cæci igitur Lutherani & Calvinistæ. Cæcus Marcus Antonius de Dominis, qui post irritos tot aliorum rebellium conatus, adhuc non videt, in oppugnando Petri Primatu, oleum ac operam se perdere. Nec perpendit, quod prudenter à Gamaliele dictum est, Act. 5. 39. Si ex Deo est hoc opus, non poteritis dissolvere illud.*

INDEX

# INDEX CAPITUM MAT- TERIAM HORUM LIBRO- rum complectentium.

## LIBRI PRIM I

### De Christo supremo Ecclesiæ Capi- te, seu Monarcha

- Cap. 1. *An Ecclesia Christi, ab ipso Christo fun-  
data & edificata sit?* 8  
Cap. 2. *Quando Christus ceperit esse caput Eccle-  
siæ? 16.*  
Cap. 3. *An Christus sit Caput Ecclesiæ visibile? 20*  
Cap. 4. *Quod sit officium Christi quatenus est Ca-  
put Ecclesiæ? 22*  
Cap. 5. *Annon sit aliud caput Ecclesiæ præter Chri-  
stum? 28*

## LIBRI SECUNDI

### De Primatu Petri

- Cap. 1. Quod Spiritus Sanctus proprie non sit vi-  
carius Christi. 46*  
*Cap. 2. Refellitur Primatus Petri à Marco Anto-  
nio confictus. 51*  
*De Primatu vocationis. 53*  
*De Primatu Charitatis. 67*  
*Cap. 3. Verus Petri Primatus probatur ex scriptu-  
ra. 71*  
*Cap. 4. Primatus Petri probatur ex Patribus. 87*  
*Cap. 5. Primatus Petri probatur ex Augustino. 107*  
*Cap. 6. Primatus Petri probatur ex Prærogativis  
Petri. 119*  
*Prima*

# Index Capitulum.

51

<i>Prima Prærogativa Petri.</i>	121
<i>Secunda Prærogativa.</i>	127
<i>Tertia Prærogativa.</i>	128
<i>Quarta Prærogativa.</i>	130
<i>Quinta Prærogativa.</i>	131
<i>Sexta Prærogativa.</i>	137
<i>Septima Prærogativa.</i>	146
<i>Octava Prærogativa.</i>	155
<i>Reliqua Prærogativa.</i>	156
<i>Nona Prærogativa.</i>	159
<i>Decima Prærogativa.</i>	163
<i>Undecima Prærogativa.</i>	ibid.
<i>Duodecima Prærogativa.</i>	164
<i>Decima tertia Prærogativa.</i>	167
<i>Cap. 7. Diluuntur obiectiones Marci Antonij contra Primatum Petri.</i>	169
<i>Prima. Ecclesia Apostolis omnibus aque fuit com- mendata.</i>	170
<i>Secunda. Evangelium reprobatur Primatum inter Apostolos.</i>	187
<i>Tertia. Ipsi Apostoli in Petro non agnoverunt pri- matum.</i>	190
<i>Quarta. Petrus nunquam exercuit primatum.</i>	192
<i>Quinta. Pauli reprehensio destruit Primatum Pe- tri.</i>	195
<i>Sexta. Pauli scripta destruunt Primatum Petri.</i>	203
<i>Septima. Ex comparatione Petri &amp; Pauli destrui- tur Primatus Petri.</i>	207

LIBRI

*Index Capitulum.*

LIBRI TERTII

De Primatu Romani Pontificis

Cap.1. <i>An Ecclesia Romana à Petro fundata sit?</i>	218
Cap.2. <i>An Petrus fuerit Episcopus Romana Ecclesia?</i>	235
Cap.3. <i>An Pontifex sit successor Petri?</i>	240
Cap.4. <i>An Pontifex sit Caput seu Pastor universalis Ecclesia?</i>	240

Privilegia Pontificis.

<i>Primum. Tota Ecclesia Pontifici gubernanda commissa est.</i>	248
<i>Secundum. Appellatio ad Pontificem.</i>	258
<i>Tertium. Qui in fide non vult errare, debet adherere Ecclesia, &amp; Pontifici Romano.</i>	262
<i>Quartum. Nullum Decretum statui potest pro tota Ecclesia, nisi Pontifice consentiente.</i>	265
<i>Quintum. Pontifex potest sancire leges Ecclesiasticas, quæ obligent universam Ecclesiam.</i>	269
<i>Sextum. Pontifex potest excommunicare Episcopos, Reges, &amp; Principes grauiter delinquentes, si contumaces sint.</i>	272
Cap.5. <i>Diluuntur Objectiones Marci Antonij contra Primatum Pontificis.</i>	276
<i>Prima. Ex Principijs Marci Antonij.</i>	276
<i>Secunda. Ex doctrina Parisiensium.</i>	277
<i>Ter-</i>	

## Index Capitulum.

*Tertia. Ex eo, quod in Ecclesia nulla sit jurisdictio.*

278

*Quarta. Ex dictis Pelagij, & Gregorij Pontificum*

282

*Quinta. Ex Conciliis Oecumenicis.* 289

*Sexta. Ex Episcopis Asianis.* 291

*Septima. Ex Cypriano.* 292

*Octava. Ex Firmiliano Episcopo.* 299

*Nona. Ex Episcopis Orientalibus in Concilio Antiocheno.* 302

*Decima. Ex Athanasio.* 303

*Undecima. Ex Basilio.* 305

*Duodecima. Ex Nazianzeno.* 307

*Decima tertia. Ex Hieronymo & Damaso.* 309

*Decima quarta. Ex Socrate.* 315

*Decima quinta. Ex Ambrosio.* 316

*Decima sexta. Ex Augustino.* 317

*Decima septima. Ex Concilio Africano.* 320

## LIBRI QVARTI

### De Rectoribus & Ministris Ecclesiæ

*Cap. 1. An singuli Episcopi cum plena potestate in solidum regant Ecclesiam?* 323

*Cap. 2. An Ministri Ecclesia iure teneantur ad Cælibatum.* 325

*Cap. 3. An votum continentia sit annexum sacro ordini?* 344

Cap.

*Index Capitulum.*

*Cap. 4. An votum continentia quod sacris  
ordinibus annexum est, dirimat matrimonium?*

347

*Cap. 5. An sacer ordo sit Sacramentum?* 351

*Cap. 6. An Augustinus duo tantum agnoscat Sacra-  
menta?* 382

*Cap. 7. De Monachis & Apostatis.* 385



MAR.



I.  
MARTINI BECANI  
DE REPUBLICA  
ECCLESIASTICA  
LIBRI QUATUOR

Contra Marcum Antonium  
de Dominis.



1. *Libellus tuus, Marce Antoni, quem scripsisti de consilio profectionis tuæ in Angliam, diebus superioribus Viennam Austria ad me perlatus est. In quo promittis decem libros de Republica Ecclesiastica, magno multorum annorum studio ab te elaboratos: 1. De Monarchia Ecclesiæ, & Primatu Petri. 2. De Ministris & Rectoribus Ecclesiæ. 3. De Hierarchia Ecclesiastica. 4. De privilegiis & præeminentia Romane Ecclesiæ, præ aliis Ecclesiis particularibus. 5. De potestate & jurisdictione Ecclesiæ. 6. De potestate & jurisdictione Regum ac Principum in Ecclesiâ. 7. De interna Ecclesiæ directione, quæ fit per fidem. 8. De externo Ecclesiæ regimine per leges, canones & iudicia. 9. De temporalibus Ecclesiæ bonis. 10. De libertate Ecclesiastica.*

2. *Priores quatuor jam exstant, Londini in Angliâ nuper excusi. Quid de posterioribus futurum, nescio. Porro primaria puncta, quæ in prioribus à te pertractantur sunt ferè hæc: 1. Ecclesiâ*

*A*

*Christi,*

Christi, non ab ipso Christo in hac vita, sed ab Apostolis, post Christi ascensionem, adificatam esse. 2. Christū quidē esse caput Ecclesia invisibile; nunquā tamen fuisse caput visibile. 3. Vicariū Christi in regimine totius Ecclesia, nec Petrū, nec Pontificem esse; sed S. sanctum. Petrum reliquis Apostolis; Pontificē reliquis Episcopis parem esse, non superiorem. 4. Episcopos tamē, jure diuino eminentiores esse presbyteris. 5. Sacrum ordinē, quo Episcopi & presbyteri initiantur, nō esse propriē Sacramentum. 6. Ministros Ecclesia ad cælibatum jure non teneri. 7. Votum continentia non esse annexum sacro Ordini: nec ullo tali voto dirimi matrimonium. 8. Monachos non esse ministros Ecclesia: nec fieri Apostatas, si post votum solenne, relinquunt monasterium, & redeant ad vitam secularem. Omitto alia minoris momenti.

3. Ex his duo colliguntur: Unum est, te neque Catholicum esse, neque Lutheranum, neque Calvinistam; sed ab omnibus dissentire, & novum doctrina symbolum, partim ex aliorum scriptis, partim ex tuo cerebro consarcinasse. Alterum, duplici spiritu ad scribendum impulsus te esse: altero odij in Pontificem; altero amoris propria excellentia & cupiditatis. Et quidem in Pontificem, ut passim in tuis libris apparet, amaro & iracundo es animo. Itaque ulciscendi studio, conaris illum de Primatu Ecclesia deturbare, negando Christi Vicarium, & visibile Ecclesia caput esse. Hoc non potes, nisi idem neges de Petro, cujus ille successor est. Et hoc ergo negas. Sed si Petrus non fuit visibile caput Ecclesia, necesse est, vel neque Christum fuisse, vel Ecclesia statum mutatum esse; quippe quæ prius habuerit visibile

visibile caput Christum; postea nullum habuerit. Posterius membrum, de facta mutatione, non audes asserere. Asseris igitur, Christum non fuisse visibile caput Ecclesia. Quo posito, rursum sequitur, vel Ecclesiam à Christo in hac vita visibiliter existente fundatam non esse; vel si fundata est, sine visibili capite fundatam esse. Priori parti insistis. Ecce, quo impellit te odium?

4. De altero spiritu, qui est amoris propria excellentia & cupiditatis, nemo dubitat, qui te novit. Nulli impar, paucis par, plerisque superior esse vis. Dejecto Potifice, nulli impares: Episcopis par manes. Ut reliquis omnibus superior sis; verè quidem, sed ambitiosè contendis, Episcopos presbyteris, jure divino, eminentiores esse. Ex quo futurū speras, ut in Anglia, non nisi cum Episcopis pari passu ambules: Cateri, quicunq, illi sint, honorè & obsequium tibi deferant. Et, ne quis audeat apostasiam tibi objicere, quod deserto statu religioso, ad sæculū redijsti; huic quoq, objectioni putas abunde satisfieri, si neges Apostatas esse, qui ruptis votorum vinculis, quibus erant astricti, ad sæcularem vitam profugiunt. In quo, magnum patronum habes, Lutherum; qui & calamo & exemplo id te docuit. A quo etiā persuasus es, neq, ministros Ecclesia ad cælibatum obligari; neq, votum continentia, quod sacris Ordinibus annexum est, matrimoni contractū dirimere ullo modo posse. Quo concessio, licebit tibi, jam prope sexagenario, uxore ducere, voluptati operā dare. & novos, ne progenies intereat, Marcos Antonios procreare. Et tunc, cantabitur canticum canticorum, quod Apostata occinunt: *Valete & plaudite: Crescite & multiplicamini,*

5. Ex hoc duplici spiritu, nisi fallor, promanavit doctrina, quam prioribus quatuor libris complexus es. Caterum, quia praevides futurum, ut ex Catholicis, vel unum aliquem, vel etiā plures Antagonistas, qui te oppugnent, nactus sis; offers te quidem, ne ignavus videaris, ad certamen; sed tamen frigide, & cū his tantum conditionibus: 1. Ut non quivis Rhetorculus aut Magistellus de trivio, sed vel Episcopus aliquis, vel certē antiquus Theologus, qui tibi par sit, tecum congrediatur. 2. Ut nō agat convitiis, aut confictis in te mendaciis, aut verborum quisquiliis, sed ratione & auctoritate. 3. Ut non paucula quadam diverticula, quae parum ad rem faciunt, hinc inde arrodant aut vellicet; sed totius doctrinae tuae fundamenta, si potest, concutiat. Si haec conditiones serventur, ais te non solum optare Antagonistam; sed etiam percupere, ut quisquis ille futurus est, se vero & exacto examine discutiatur, quae à te dicta sunt. Imo etiam, ut verbis tuis utar, humilibus precibus contendere ab ipso sanctissimo Romano Pontifice, ut non impediat, sed potius urgeat hoc examen: Neque libros tuos igni addicat aut exterminet, sed censura doctorum hominum, praesertim Parisiensium & Patavinorum, subjiciat. Parisiensium acumen, soliditatem, constantiam & libertatem, semper admiratum te esse; eo quod soliti sint, non temporibus famulari, non ad oculum servire, sed veritatem ipsam omnibus praedictis ac perturbationibus humanis anteferre.

6. Bono sis animo, Marce Antoni, Censura Theologorum Parisiensium, quam tantopere urges, tam palam promulgata est. Audi, si lubet. Ajunt doctrinam

*Et rinam tuam esse hereticam, schismaticam, erroneam, falsam, periculosam, temerariam, scandalosam, seditiosam, pacis Ecclesiæ perturbativam, statui Sacerdotali & Episcopali contumeliosam, totius Ordinis Hierarchici subversivam, piarum aurium offensivam. Sic illi pro sua libertate & constantia, quam laudas, Satin severe? Tu ipse iudex esto. Sed, nec desunt alij Antagonistæ, qui instructo agmine te invadent. Ego, quia arbitror magno apparatu opus non esse, solus cum solo congregi paratus sum. Neque de conditionibus sollicitum aut perplexum te esse velim. Servabo, quas exiges. Ac primò, tametsi Episcopus non sim, sed Religiosus Societatis Jesu, qui ejusmodi dignitates, ratione instituti mei, non ambio (utinam nec tu, cum in eodem statu mecum eras, importunè ambiisses) sum tamen Theologus, non planè novitius; & cum multis hostibus, etiam in Anglia, depugnavi. Nec pugnabo convitijs, aut confictis in te mendacijs, aut inanibus verborum quisquilijs, à quibus meritò, semper abhorruì; sed ex Codice Bibliorum, ex antiquis Patribus, ex Canonibus & Concilijs, ex tuis ipsius verbis, tecum dissertabo. Et, quod caput est, ipsa doctrina tua fundamenta, quantum in me erit, conabor concutere & labefactare. Idq; faciam quatuor libris sequentibus, hoc ordine:*

1. De Christo, supremo Ecclesiæ capite ac Monarcha.
2. De Primatu Petri, Vicarij Christi.
3. De Primatu Pontificis, successoris Petri.
4. De Episcopis, Presbyteris, Monachis & Apostatis,

6 *Praefatio Martini Becani ad M. Antonium.*

7. *Non defugies, opinor, hoc certamen. Erunt fortasse alij, qui strictiori jure tecum acturi sunt: Nec admissuri, ut vel ipsis, vel Romano Pontifici conditiones, in hac causa, à te praescribantur: sed in faciem tibi objecturi (quod jam passim objiciunt) nec posse, nec debere Apostatas (qualem te esse ajunt) pro suo arbitrio legem statuere illis, qui in Catholica fide ac religione firmi persistunt. Nec aequum esse affirmant, ut qui ipse conditiones à se positas non servat, ab aliis, quibus tamen imperare non potest, servari velit. Tu vis, ut à convitiis abstineatur. Rectè. At tu ipse, quod pacta dixerim, rō abstines. Quin imò, tam petulanter, protervè ac contumeliose, in Romanum Pontificem debacharis, ut nulli haeretico, in hoc calumniandi ac maledicendi studio, cedere, sed omnibus palmā praripere velle, videri possis.*

8. *Similiter vis, ut procul faceessant mendacia. At tu, ut alij loquuntur, mendacissimus es. Certè in exiguo libello tuo, quem de consilio fuge in Angliam scripsisti, decem luculenta mendacia, ab Annofo Verimentano deprehensa ac notata sunt. Taceo de reliquis. Nec paucis suspectum est, quod speciatim excipis de confictis in te mendacijs. Nimirum, ut ipse interpretantur, ex una parte pertimescis, ne tibi objecturi sint proditiōe, & nescio quæ alia facinora, quorum te reum esse, fama est. Ex altera, ne id faciant, conaris ab hoc proposito eos absterre, insinuando te omnia pro confictis mendacijs habiturum, quacunque in hoc genere objecturi sunt. Verùm ista, cum nihil ad me spectent, alijs relinquo. De doctrina tecum agam, non de moribus. Et jam aggredior.*

LIBER

## LIBER PRIMUS.

*De Christo supremo Ecclesie capite  
seu Monarcha.*

**H**ic partim conuenimus, Marce Antoni, partim discrepamus. In eo conuenimus, quod Christus sit caput seu Monarcha Ecclesie. Hoc enim disertè docet Apostolus Ephes. 1. 22. *Omnia subiecit sub pedibus eius: & ipsum dedit caput supra omnem Ecclesiam, quæ est corpus ipsius.* Et cap. 4. 15. *Crescamus in illo per omnia, qui est caput Christus.* Et cap. 5. 23. *Vir caput est mulieris, sicut Christus caput est Ecclesia.* Et Coloss. 1. 18. *Et ipse est caput corporis Ecclesia.* In his verò discrepamus: 1. An Christus ædificauerit Ecclesiam, cuius ipse caput est. 2. Quando ceperit illius esse caput. 3. An sit caput visibile. 4. Quod sit officium ipsius, quatenus caput Ecclesie est. 5. An solus Christus sit caput Ecclesie. De quibus tu ita statuis: 1. Ecclesiam non esse edificatam à Christo, sed ab Apostolis. 2. Christum cepisse esse caput Ecclesie post ascensionem. 3. Esse caput invisibile. 4. Habere unum officium invisibile; nullum visibile. 5. Nec aliud esse caput Ecclesie, præter Christum. Itaque regimen Ecclesie esse quidem Monarchicum, respectu Christi; non tamen respectu Petri aut Pontificis. Quæ omnia seorsim discutienda sunt.

## CAPUT PRIMUM,

*An Ecclesia Christi ab ipso Christo  
fundata & ædificata sit?*

1. **T**Unegas, M. Antoni, L. I. c. I. n. 22. his verbis: *Non est difficile in doctrina Catholica defendere, Ecclesiam veram primitivam, post Christi ascensum propriè suum mortum habuisse. Et ibidem n. 23. Ecclesia Christi revera per Apostolos fuit ædificata, post Christi ascensionem.* Unde cōsequenter dicis, ut postea videbimus, Christū nunquam fuisse visibile caput Ecclesię, sed invisibile. Nam cū in terra visibilis apparuit, nondum erat Ecclesia ædificata, ex tua opinione. Ergo tunc non potuit esse visibile illius caput. Postea, quando cepit esse caput Ecclesię, non amplius visibilis apparebat.

2. Ego contrā assero, Christum in hac vita fundasse & ædificasse suam Ecclesiam: postea Apostolos eandem auxisse & propagasse. Prior pars assertionis varijs modis probari potest: 1. Quia Christus in hac vita instituit ministros Ecclesię, nempe duodecim Apostolos, & septuaginta duos discipulos; quorū hi Presbyteri fuerunt, illi Episcopi. 2. In hac vita instituit nova Sacramenta. 3. Instituit novum Sacerdotium & Sacrificium. 4. Sancivit novas leges Evangelicas. 5. Condedit novum Testamentum, cujus ipse mediator est. 6. Hęc omnia perfecit & confirmavit per mortem in cruce, cū dixit: *consummatum est.* Deinde post



post resurrectionem, cum hinc discessurus esset, dixit Apostolis suis: *Accipite Spiritum sanctum: Quorum remiseritis peccata, remittuntur eis; & quorum retinueritis, retenta sunt.* Et Petro seorsim: *Pasce oves meas.* Quid amplius requiri poterat ad fundandam & edificandam Ecclesiam?

3. Accedit Auctoritas Augustini, Tract. 50. in Ioannem, propè finem, ubi sic habet: *Secundum praesentiam majestatis semper habemus Christum: Secundum praesentiam carnis, rectè dictum est Discipulis: Me autem non semper habebitis.* Habuit enim illum Ecclesia, secundum praesentiam carnis paucis diebus. Modo fide tenet; oculus non videt. Hic supponit Augustinus, Ecclesiam fundatam jam fuisse, quando Christus in hac vita secundum carnem erat praesens. Et tu ipse alibi id fateris. Nam lib. 1. cap. 1. n. 16. sic scribis: *Facile admittimus necessitatem ministrorum, quibus uti voluit Christus, etiam dum ipse mortalis in terris, in sua Ecclesia versabatur.* Et infra n. 19. *Dicimus Apostolos omnes immediate à Christo assumptos esse, ut essent operarii, & ministri ipsius viventis adhuc & regnantis: Et in fundanda Ecclesia coadiutores.* Quid clarius? Ais Ecclesiam in hac vita à Christo, tanquam principali Authore; ab Apostolis, tanquam coadjutoribus, fundatam esse. Igitur tibi ipsi contradicis: quod & sæpè facturus es in sequentibus.

4. Sed tria objicis (lib. 1. cap. 1. n. 22. & 23.) Primò illud Psal. 2. 8. *Postula à me, & dabo tibi gentes hereditatem tuam, & possessionem tuam ter-*

*minos terra.* Nimirum postquam, *astiterunt Reges terra, & Principes convenerunt in unum, adversus Dominum, & adversus Christum ejus.* Quibus verbis promittitur Christo Ecclesia post mortem & passionem. Quo etiam pertinet illud Isaia 53. 11. *Pro eo, quod laboravit anima ejus, videbit semen longævum,* id est, Ecclesiam suam, te interprete.

5. Respondeo. Aliud est, Ecclesiam fundari & ædificari; aliud augeri & propagari, ut initio dixi. Fundata & ædificata est ante Ascensionem Christi, quando Ministri illius ordinati, Sacramenta instituta, & leges sancitæ sunt. Aucta & propagata, post Ascensionem Christi; quando per orbem diffusa est, & gentiles ad illam admissi sunt. Et hoc significatur, illis verbis: *Dabo tibi gentes hæreditatem tuam, & possessionem tuam terminos terra.* Simile fuit de Synagoga. Nam illa quidem fundata & ædificata est prope montem Sina, quando Aaron, & filij ejus consecrati sunt Sacerdotes, quando Sacramenta & sacrificia Mosaica instituta, quando lex data, & Testamentum effusione sanguinis confirmatum est. Aucta verò & dilatata, post ingressum in terram promissionis, quando per Judæam, Samariam & Galilæam fuit dispersa, & quotidie plures in eam admissi.

6. Quod citas ex Isaia, sic legendum est: *Si posuerit pro peccato animam suam, videbit semen longævum,* id est, si Christus fuerit mortuus

tuus

tuus pro peccato humani generis, videbit multos filios, quos sibi, tam ex Judæis, quàm ex gētibus, per meritum suæ passionis & mortis, acquisiturus est. Quod etiam significatur verbis sequentibus, ubi Deus Pater de Christo loquens, ait : *Ideo disperdiam ei plurimos, & fortium dividet spolia, pro eo, quod tradidit in mortem animam suam, & cum sceleratis reputatus est.* Neque hinc sequitur, Ecclesiam Christi post Ascensionem ab Apostolis fundatam esse. Solum sequitur, Ecclesiam sponsam Christi, quæ ab ipso fundata est, successu temporis, habituram multos filios: qui cum antea fuissent spolia Dæmonum, postea liberandi essent ab illa servitute, & cum Christo regnaturi. ( Vide Lucæ 11. 22.)

7. Secundò objicis, passim dici à Theologis, Ecclesiam de latere Christi fluxisse, id est, post passionem Christi fuisse inchoatam, ut tu interpretaris. Respondeo. Tibi probandum est, post Ascensionem Christi fuisse inchoatam. Hoc inde non probas, sed contrarium. Deinde malè interpretaris sententiam Theologorum. Nam illi nihil aliud dicunt, quàm Ecclesiam Christi, non propriè, sed symbolicè & meritoriè fluxisse, vel formatam esse ex latere Christi. Symbolicè quidem, quia ex latere Christi fluxerunt aqua & sanguis, quæ erant signa, vel symbola, significantia Baptismum & Eucharistiam, præcipua Ecclesiæ Sacramenta. Meritoriè verò, quia  
Sacra-

Sacramenta Ecclesiæ omnem suam vim habent ex merito passionis & mortis Christi. Ita Cyrillus l. 12. in Ioannem cap. 39. Chrysostomus hom. 84. in Ioannem, Cornelius à Lapide, in Commentario cap. 5. ad Ephesios. vers. 20. & alij

8. Tertiò objicis, Christum non dixisse, *super hanc petram ædifico*, sed, *ædificabo Ecclesiā meam*, quod post ascensionem fecit per Apostolos, ut tu ais. Respondeo. Iterum tibi contradicis. Nam paulò ante dicebas, id factum esse in morte Christi, quando sanguis & aqua fluxerunt de ejus latere. Nunc dicis, factum esse post Ascensionem. At ego dico, tunc factum esse, quando Christus ordinavit Sacerdotes, instituit Sacramenta, sancivit leges, cōdidit testamentum, obtulit sacrificium.

9. Ad majorem explicationem, tria tempora distinguenda sunt. Primum, ante mortem Christi. Tunc simul viguit Synagoga verus, & Ecclesiā nova: Simul Baptismus & circumcisio: simul sacrificium Eucharistiæ, & sacrificia Mosaica: simul lex & Evangelium. Alterum, in morte Christi. Tunc expiravit Synagoga cum suis ceremonijs, & sacrificijs: tunc velum Templi scissum est in duas partes: tunc lex Mosaica abrogata est. (Hoc docet Augustinus Epist. 19. ad Hieronymum, & Hieronymus ipse Epist. ad Augustinum, quæ est 11. inter Epistolas Augustini, & D. Thomas in 1. 2. q. 103. art. 3. ad 2. & alij passim.) Tertium, post mortem Christi Tunc Synagoga sepulta est: Tunc

Tunc ceremoniæ & sacrificia Mosaica, quæ jam antè erant mortua, ceperunt foetere: vel, ut Theologiloquuntur, ceperunt esse mortifera. An autem id factum sit statim ac immediate post mortem Christi; an verò post solennem Evangelij promulgationem in die Pentecostes, verus controuersia est. Hieronymus tenet priorem partem; Augustinus posteriorem. Itaque secundum Augustinum, à tempore mortis Christi, usque ad diem Pentecostes, erant quidem mortua sacrificia Mosaica, id est, erant abrogata, non erant utilia ad salutem, non habebant vim & energiam, quam antea habuerant: Sed tamen nondum erant mortifera, id est, nondum adferebant mortem spirituales; adhuc poterant usurpari, sine peccato mortali. At post promulgatum Evangelium, ceperunt mortiferum foetorem exhalare, & quia tunc usurpasset, mortali peccato se obstrinxisset.

10. Ex dictis (semota hac controuersia inter Hieronymum & Augustinum) sumo efficeax argumentum contra te, in hunc modum: Si Synagoga cum suis ceremonijs, sacrificijs & legibus, expiravit in morte Christi, ut omnes fatentur, vel tunc orta erat Ecclesia cum suis legibus & Sacramentis, vel non erat. Si erat orta, falsum est, quod tu asseris, primùm ortam esse post Ascensionem Christi. Si non erat orta, necesse est, Judæos deterioris fuisse conditionis post mortem Christi, quam antè erant. Nam ante habebant Synagoga, Sacerdotes, sacrificia

sacrificia, quæ poterant illis prodesse. Postea, hæc omnia erant abrogata, & inutilia. Nec tamen aliunde poterant habere subsidium, si nulla erat Ecclesia nova, in qua essent novi sacerdotes, nova sacramenta, novum sacrificium.

II. Maneat igitur certum ac indubitatum, Ecclesiam à Christo ædificatam esse in hac vita. Sed tamen obiter notandum est, successivè, & non unico quasi instanti, ædificatam esse. Nam primò, electi sunt Apostoli & Discipuli, (Matth. 4. 18.) Deinde, Baptismus præceptus est, Ioan. 3. 5. *Amen Amen dico vobis, nisi quis renatus fuerit ex aqua & Spiritu sancto, non poterit introire in regnum Dei.* Postea, idem Baptismus usurpatus, Ioann. 4. 1. *Ut autem cognovit Jesus, quia audiverunt Pharisei, quod Jesus plures Discipulos facit, & baptizat, quàm Ioannes (quanquam Jesus non baptizaret, sed Discipuli ejus) reliquit Judæam.* Tandem, in ultima cœna, Sacramentum, & sacrificium Eucharisticum institutum, & Apostoli Sacerdotes ordinati sunt. Denique, cruentum novi Testamenti sacrificium in ara crucis oblatum est: quo peracto, expirarunt omnia sacrificia Mosaica; quia non erant, nisi umbræ cruenti sacrificij crucis. Umbram autem, præsentem lumine, cessare necesse est. Postremò, post resurrectionem Christi, potestas absolvendi à peccatis data est omnibus Apostolis, & Petrus totius Ecclesiæ Pastor constitutus est, loco Christi (Ioann. 21.

17.) Quæ autem postea contigerunt, pertinent ad alteram partem assertionis meæ, quæ jam sequitur. Igitur

12. Altera pars assertionis meæ est, Ecclesiam Christi, quæ ab ipso Christo fundata est, postea ab Apostolis auctam & propagatam esse. Quod etiam successive factum est tribus modis. Primò, quia Apostoli, post acceptum Spiritum sanctum, solenniter promulgarunt Evangelium in Jerusalem, Act. 2. 17. Deinde, admiserunt gentiles ad fidem, & Ecclesiam Christi, Act. 10. 34. Denique, post multos annos, facta divisione, dispersi sunt per orbem terrarum, ut impleretur, quod dictum erat per Prophetam, Psalm. 18. 5. *In omnem terram exiit sonus eorum, & in fines orbis verba eorum.* Et quod tunc factum est, etiam nunc fit. Nam & hoc tempore multi Apostolorum imitatores mittuntur in Indiam, Japoniam, & alias provincias, ut Ecclesia Christi nova semper accessione augeatur & propagetur.

13. Jam vides, Marce Antoni, in Ecclesiam Christi, primò quidem admissos esse Apostolos, Discipulos, & alios plures ex populo Judæorum, vivente adhuc Christo in terris. Deinde, etiam gentiles accessisse post Ascensionem Christi, & accessuros usque in finem mundi. Et hoc constat ex Evangelio, ubi Christus ait, Ioan. 10. 14. *Ego sum Pastor bonus, & cognosco oves meas, & cognoscunt me meæ.* Ergo jam tunc habebat oves in suo ovili, id est, in sua Ecclesia, nempe conversos ex populo Judæorum. Nam  
de

de illis dicebat, *cognoscunt me mea*. Quod de Gentilibus intelligi non potest. Illi enim non cognoscebant Christum eo tempore, id est, non credebant in Christum; non erant in ovili Christi; non erant in Ecclesia. Erant tamē accessuri; quia mox sequitur: *Et alias oves habeo, quae non sunt ex hoc ovili, & illas oportet me adducere*. Q. D. Gentiles non sunt in meo ovili, sed in ovili falsorum Deorum. Ex quo tamen eos adducam in meum ovile, per prædicationem Apostolorum. Et tunc erit unum ovile Judæorum & Gentilium; & unus utrorumque Pastor.

## CAPUT SECUNDUM.

*Quando Christus ceperit esse caput Ecclesiæ?*

1. **T**U ais cepisse post Ascensionem. Sic enim scribis, lib. 1. cap. 1. n. 3. *Regimen super Ecclesiam videtur Christo Domino à Patre donatum post illius glorificationem, & in cælos Ascensionem*. Et hoc necessariò sequitur, ex illo falso principio, quod jam refutatum est, Ecclesiam Christi, post Ascensionem ipsius, ab Apostolis ædificatam esse. Nam si tunc primùm ædificata est, necesse est, Christum tunc primùm cepisse esse illius caput. Quod etiam confirmas ex Apostolo, Ephes 1, 20 ubi de Deo Patre, & Christo sic ait: *Suscitans illum à mortuis, & constituens ad dextram suam in cælestibus, supra omnem principatum & potestatem. Et omnia subjecit sub*



*sub pedibus ejus, & ipsum dedit caput supra omnem Ecclesiam, quæ est corpus ipsius.* Unde concludis Christum factum esse caput Ecclesiæ, postquam constitutus est ad dextram Dei Patris. Ego contra oppono has duas conclusiones.

2. Prima conclusio. Christus cepit esse caput Ecclesiæ, cum adhuc esset in hac vita. Ratio est, quia ipse in hac vita fundavit Ecclesiam, ut jam probatum est: Ergo in hac vita cepit esse illius caput; alioquin Ecclesia fuisset sine capite, quod est absurdum. Quod objicit ex Apostolo, intelligendum est eo sensu, quo illud, Philip. 2.8. *Humiliavit semetipsum, factus obediens usque ad mortem, mortem autem crucis: propter quod & Deus exalta vit illum, & donavit illi nomen, quod est super omne nomen, ut in nomine Jesu omne genu flectatur, cælestium, terrestrium & infernorum: Et omnis lingua confiteatur, quia Dominus Jesus Christus in gloria est Dei Patris.* Quasi dicat: Christus per suam humilitatem & passionem hoc obtinuit à Patre, ut ascendens in cælum, exaltaretur super omnes creaturas, & ab omnibus palàm agnosceretur, quis & quantus esset. Hinc non sequitur, quod tunc primum ceperit esse caput Ecclesiæ militantis, ut tu perperam contendis; sed quod ceperit ab omnibus agnosci & honorari, tanquam caput omnis Ecclesiæ, cælestium, terrestrium & infernorum. Nam antea, cum versaretur in hac vita mortali, tamen si revera esset caput & fundator Ecclesiæ, habebatur tamen abjectus & contemptibilis, ut ipsemet fatetur per Prophetam,

phetam, Psalm. 21. 6. *Ego autem sum vermis, & non homo, opprobrium hominum, & abjectio plebis.* At in ipsa Ascensione cepit exaltari, & gloriosus apparere, & ab omnibus tanquam filius Dei adorari. Tunc dictum est, Psalm. 23. 7. *Attollite portas principes vestras, & elevamini porte aeternales, & introibit Rex gloria. Quis est iste Rex gloria? Dominus fortis & potens: Dominus potens in pralio.* Nimirum, qui dixit: *Ego vici mundum.*

3. Habemus simile exemplum. Nam Christus ante Ascensionem, sedebat ad dextram Patris, id est, habebat æqualem cum Patre potentiam, gloriam & majestatem (ut explicant Athanasius, Basilus, Cyrillus, Chrysostomus, Damascenus, & alij apud Bellarminum l. 3. de Christo cap 15.) Et tamen scriptura non aliter videtur loqui, quàm si primum post Ascensionem cepisset sedere ad dextram Patris. Quare hoc? Quia in hac vita mortali latebat Christi potentia, gloria & majestas, & sub humana carne, tanquam sub vili pallio occultabatur. At per resurrectionem & Ascensionem, cepit fieri manifesta; non solum apud homines in terra, qui videbant illum ad cælum ascendentem (Act. 1. 9) sed etiam apud Angelos in cælo, qui venerabundi & gratulabundi illum ad se venientem excipiebant. (Isa. 63. 1. & Philip. 2. 9)

4. Secunda conclusio. Christus in cælo nunc existens, adhuc manet caput Ecclesiæ militantis, & manebit usque in finem mundi.

Hoc

Hoc concedis quidem, sed non eo sensu, quo nos. Nam ex tua opinione, Christus in cœlo existens, per se exercet omnia, quæ pertinent ad officium capitis, nec utitur operâ ullius ministri. At secundum Catholicos, non exercet omnia per se sed quædam per se, quædam per Vicarios & Ministros suos, quod cap. 4. fusiùs explicandum est.

5. Disputant Scholastici: An Christus, sicut dicitur caput, sic etiam dici possit membrum Ecclesiæ? Aliqui negant; quia membrum videtur includere aliquam imperfectionem, quam non includit caput; nempe participationem virtutis à toto corpore. Hoc autem non convenit Christo, quia nullam virtutem participat à corpore Ecclesiæ. Ita D. Thomas in 3. dist. 13. q. 2. art. 1. ad ultimum.

6. Alij utuntur hac distinctione: Ecclesia duobus modis spectari potest. 1. Pro tota congregatione fidelium, excepto capite. 2. Pro eadem congregatione cum capite. Priori modo, sicut non est pars Ecclesiæ, ita nec membrum. Posteriori, & pars, & membrum, & caput. Ita Antisiodorensis & alij apud Vasquez. 3. p. tomo 1. disput. 48. cap. 1 Et colligunt ex illo 1. Corinth. 12. 27. *Vos estis corpus Christi, & membra de membro*, id est, de Christo, qui est principale membrum. Sed hæc quæstio parvi momenti est.

*An Christus sit caput Ecclesiæ  
visibile?*

1. **T**U ais invisibile esse, non visibile. Et quidem duplici titulo. Primò, quia Christus cepit esse caput Ecclesiæ post Ascensionem. At post Ascensionem, respectu nostri, invisibilis est. Secundò, quia nullum habet actum capitis, nisi internum influxum gratiæ. At hic actus est etiam invisibilis. Verba tua paulo post citabo. Cur autem ita sentias, causa hæc est. Catholici, quando probant Pontificem esse Vicarium Christi, inter cætera, utuntur etiam hoc argumento: Christus dum esset in terris, erat visibile caput Ecclesiæ: Ergo post Ascensionem, quando desijt esse caput Ecclesiæ visibile, debuit esse aliud caput visibile, loco Christi; alioquin forma gubernandi Ecclesiam esset mutata, quod est absurdum. Hoc argumentum te pressit. Itaque ne cogereris admittere, Pontificem esse visibile caput Ecclesiæ, negasti Christum fuisse visibile caput Ecclesiæ in terris. Quid Catholici sentiant, jam dicam.

2. Prima conclusio. Christus in hac vita existens, erat visibile caput Ecclesiæ. Quòd fuerit caput Ecclesiæ, suprà demonstratum est. Quòd fuerit visibile, dupliciter probo: Primò, quia visibiliter Ecclesiam ædificavit, instituendo nova Sacramenta, ordinando novos ministros & Sacerdotes, sanciendo novas  
leges,

leges, offerēdo novum sacrificium in ara crucis. Secundò, quia eandem visibiliter gubernavit, docendo, monendo, increpando, corrigendo.

3. Hanc conclusionem, ut inconstans es, uno loco negas; altero admittis. Negas L. I. c. I. n. 23. his verbis: *Christus nullum capitis visibilis unquam munus in sua Ecclesia exercuit*: Admittis paulo post n. 24. cūm ais: *Ego sanè in Christi visibili regimine ordinario, hac tantū observo: Sacramenta visibilia instituire, Ministros vocare & mittere, evangelizare, Ministros suos errantes corripere & increpare, legem explicare, eamq; à corruptelis vindicare. Alterius generis officia, à capite Christo, ut visibilis erat, prodeuntia, ego certè non reperio.*

4. Si nūc quæram ex te, Antoni, an Christus in hac vita fuerit visibile caput Ecclesiæ, nec ne? Respondebis, Fuit, non fuit: Fuit, quia visibilia Sacramenta instituit, Ministros misit, legem explicavit. Non fuit, quia nullum visibilis capitis munus exercuit. Quæ est aperta contradictio. Quo vitio laborant omnes, qui ab Ecclesiæ unitate recedunt. Taceo, falsum esse, quod ais, Christum non exercuisse alia officia visibilis capitis, quàm quæ à te enumerata sunt. Nam non solum explicavit legem Mosaicam, (Matth. 5. 21.) sed etiam novas leges Evangelicas sancivit de Baptismo & Eucharistia, Ioann. 3. 5. *Nisi quis renatus fuerit ex aqua & Spiritu sancto, non potest introire in regnū Dei.* & Ioann. 6. 53. *Nisi manducaveritis carnem*

*filij hominis, & biberitis ejus sanguinem, non habebitis vitam in vobis.*

5. Secunda Conclusio: Christus in cœlo nunc existens, est caput Ecclesiæ invisibile; quia per se non gubernat Ecclesiam visibili modo, sicut antea fecerat; sed tantum invisibili, per internum influxum gratiæ. Hoc concedis. Ex hac & præcedenti conclusione duo colliguntur: 1. Ecclesiam Christi eo tempore, quo Christus vixit in terris, fuisse gubernatam à visibili capite, nempe ab ipso Christo, qui tunc visibiliter præsens erat. 2. Eandem Ecclesiam nunc etiam debere gubernari à visibili capite: alioquin forma gubernationis esset mutata; & consequenter nō esset nunc eadem Ecclesia, quæ tunc fuit. Sicut non censetur manere eadem Respublica, quando forma gubernandi, prius fuit Monarchica, & postea incipit esse Aristocratica. De quo plura dicam cap. 5.

#### CAPUT QUARTUM.

*Quod sit officium Christi, quatenus est caput Ecclesiæ?*

1. **C**ertum est, Christum non propriè, sed metaphoricè esse caput Ecclesiæ. Itaque explicanda est metaphora seu similitudo, quæ est inter caput & corpus; itemque inter Christum & Ecclesiam.

2. Tria

2. Tria spectari possunt in capite naturali, (ut notat D. Thomas 3. p. quæst. 8. artic. 1.) nempe ordo, perfectio, & virtus. Ordo quidem, quia caput est primum seu supremum inter membra humani corporis. Perfectio autem, quia in capite vigent omnes sensus, tam interni, quàm externi. Virtus denique, quia caput sua virtute gubernat reliqua membra, & vim motivam ac sensitivam illis suppeditat.

3. Hæc tria, servata proportionem, conveniunt etiam Christo, respectu Ecclesiæ. 1. Quia Christus est primus & supremus inter membra Ecclesiæ. 2. In Christo est plenitudo gratiæ. 3. Christus gubernat Ecclesiam, & habet vim influendi gratiam in membra Ecclesiæ, juxta illud Ioann. 1. 16. *De plenitudine ejus nos omnes accepimus.* De duobus prioribus non est inter nos contentio. De tertio est. Nam tu aliter sentis de gubernatione, quàm Catholici. Quod sic ostendo.

4. Duo sunt modi, quibus caput humanum gubernat reliqua membra. Unus, per internum influxum; qui in eo consistit, quòd ex capite, tanquam ex fonte seu principio derivantur spiritus sensitivi in reliqua membra. Unde fit, ut reliqua membra possint vitam conservare, & suas functiones exercere. Alter, per externam directionem; quæ in eo consistit, quod caput per intellectum, voluntatem, visum, auditum, & alios sensus, qui in eo vigent, dirigat reliqua membra in exter-

nis actionibus, ne aberrent: quo pacto per intellectum & voluntatem dirigit manus, ne quid illicitum committant: Et per visum dirigit pedes, ne in foveam incidant; & sic deinceps.

5. Hoc posito, quæstio est, An Christus, quatenus est caput Ecclesiæ, imitetur hos duos modos in gubernanda Ecclesia? Tu admittis priorem tantum modum, qui est per internum influxum gratiæ: negas posteriorem, qui est per externam directionem. Sic enim scribis L. 1. c. 1 n. 3. *Hoc regimen* (Christi in Ecclesiâ) *totum est spirituale, nec eget corporali præsentia sed influxu interna gratiæ peragitur.* Et ibidem n. 12. *Totum ipsius regimen ab eo, ut à capite, divinis influxibus absolvitur.* Et iterum n. 16. *Christus omnia munera capitis obit per se perfectissimè in quibus nullis indiget ministris.* Hic excludis omnia externa munera, & consequenter externam gubernationem: Et solum admittis internam, quæ est per influxum donorum gratiæ.

6. At Catholici admittunt utrumq; modum cum D. Thoma, loco citato. Et meritò. Nam uterque modus in scriptura tam clarè explicatur, ut nullus sit dubitandi locus. Prior quidem (qui est per influxum donorum gratiæ) Rom. 12. 3 *Unicuique sicut divisit Deus mensuram fidei.* & 1 Corinth. 12. 4. *Divisiones gratiarum sunt; idem autem spiritus.* Et Ephes. 4. 7. *Unicuique nostrum data est gratia secundum mensuram donationis Christi.* Et alibi sæpissimè.

7. Pe=



7. Posterior verò ( qui est per externam gubernationem ) Ephes. 5. 22. *Mulieres viris suis subditæ sint sicut Domino : quoniam vir est caput mulieris , sicut Christus caput est Ecclesia.* Ex quo loco constat , Christum esse caput Ecclesiæ , non solum eo sensu , qui jam explicatus est ; sed etiam eo sensu , quo vir est caput mulieris . At vir est caput mulieris per externam gubernationem . Tenetur enim mulier in externis actionibus se dirigere juxta imperium sui viri , qui est quasi Dominus ipsius . Unde etiam Sara , virum suum Abraham vocavit Dominum suum , Gen. 18. 21. *Dominus*, inquit, *meus vetulus est.* Huc spectant sequentia testimonia , Gen. 3. 16. *Sub viri potestate eris , & ipse dominabitur tui.* Et 1. Corint. 13. 34. *Mulieres in Ecclesia taceant ; non enim permittitur eis loqui , sed subditas esse . sicut & lex dicit.* ( loquitur de Lege ex Genesi jam citata ) Et 1. Timoth. 2. 11. *Mulier in silentio discat cum omni subjectione.* Et 1. Petri 3. 1. *Similiter & mulieres sint subditæ viris suis.*

8. Addo , nomen capitis , quando sumitur metaphoricè , pro eo , qui gubernat , usitatè in scriptura sumi pro eo , qui gubernat per externam directionem , ut 1. Reg. 15. 17. *Nonne cum parvulus esses in oculis tuis , caput in tribubus Israel factus es ?* loquitur de Saule , qui factus erat Rex . Et Isaïæ 7. 8. *Caput Damasci Rasin.* Et ibidem : *Caput Samariæ filius Romeliæ.* Ubi Rasin , qui erat Rex Syriæ , vocatur caput Damasci : Et Phacee , filius Romeliæ , qui erat Rex Israel , vocatur caput Samariæ . Utroque autem lo-

co sumitur nomen capitis pro Rege, seu Principe, qui in externo regimine gubernat subditos. Et Isaia 19-15. *Non erit Aegypto opus, quod faciat caput & caudam*, id est, Ægyptij non habebunt Regem, cui subiecti sint. Et Ierem. 31.7. *Exultate in letitia Iacob, & hincite contra caput gentium*, id est, contra Reges & Principes gentium.

9. Igitur Christus vocatur caput Ecclesiæ, non tantum propter internum influxum gratiæ; sed etiam propter externam gubernationem, quo pacto vir est caput mulieris; & Saul caput populi Israel; & Rasin caput Damasci; & Phacee caput Samariæ; & uno verbo, Rex caput regni. Licet Regis gubernatio sit politica; Christi Ecclesiastica. Duo tamen notanda sunt. Unum est, Christum, cum adhuc in terris esset, per se exercuisse utrumque officium capitis in Ecclesia. Nam & per se donabat fidelibus internam gratiam: & similiter per se dirigebat & gubernabat illos in externis actionibus, quæ ad Ecclesiæ statum pertinebant. At nunc, cum in cælis est, per se quidem præstat prius officium: posterius verò per Vicarium. Alterum, Christum dupliciter considerari posse. 1. Quatenus est Deus. 2. Quatenus est homo. Utroque modo, per se præstat prius officium; sed diversâ ratione. Nam quatenus est Deus, per se physicè & effectivè producit gratiam: quatenus homo, per se moraliter & meritoriè illam confert. Prior modus conferendi est illi communis cum Patre & Spiritu

Spiritu sancto : posterior est illi proprius.

10. Hic obiter examinandæ sunt duæ Regulæ à te positæ, Lib. 1. cap. 1. n. 23. Prior est. *Quod Christus mortalis in terra visibiliter exercuit, hoc, & non aliud, mortalibus hominibus, Ministris suis exercendum commisit.* Posterior; *Et quod ipse mortalis visibiliter non exercuit, neque mortalibus commisit; imò nec committere debuit; sed sibi, ut vero capiti & Domino reservavit; internum videlicet spiritualem influxum.* In his regulis, & tibi contradicis ipsi, & quædam falsò asseris. Contradicis tibi, quia in posteriori supponis, Christum in hac vita mortali fuisse verum caput Ecclesiæ, & internum gratiæ influxum sibi reservasse. At alibi dicis, ut suprà notavi, Christum post ascensionem cepisse esse caput Ecclesiæ. Quæ duo non cohærent inter se. Deinde falsum est, quod ais in priori regula, Christum cõmisisse suis Ministris, quicquid ipse visibiliter in terra exercuit. Nam ipse visibiliter instituit Sacramenta, quod ministris suis non commisit. Similiter, è contrario falsum est, Christum nihil aliud commisisse suis discipulis, quàm quod ipse visibiliter exercuit. Nam commisit illis, ut irent in universum orbem, & baptizarent omnes gentes, quod ipse visibiliter non exercuit.

CAPUT

## CAPUT QUINTUM.

*An non sit aliud caput Ecclesiæ præter Christum?*

1. **N**ON disputo jam speciatim de Petro vel Pontifice, de quibus postea dicturus sum; sed generatim inquirō, an sit aliquod visibile caput Ecclesiæ in hac vita, quod Christo sit subordinatum, & illius vicem gerat? Hic in uno consentis mecum; in altero discrepas. In eo consentis, quod nullum sit tale caput, si spectemus internum influxum gratiæ. Nam nullus hominum in hac vita est, qui per modum capitis possit internam gratiam nobis communicare, sicut Christus communicat. In eo autem discrepas, quod ne quidem, quoad externam gubernationem, admittas ullum caput Ecclesiæ, loco Christi. Solum Christum absolute vis esse caput Ecclesiæ; & præter illum, nullum alium, quicumque ille sit. In quo non solum dissentis à Catholicis, qui constanter docent, Pontificem esse caput Ecclesiæ, loco Christi; Sed etiam à Serenissimo Rege Angliæ (ad quem, tanquam ad Patronum confugisti) qui asserit Imperatorem in Imperio, & unumquemque Regem in suo regno, esse Primatem seu caput Ecclesiæ, quoad externam gubernationem.

2. Tribus argumentis te oppugnabo, quibus generatim ostendā, oportere esse aliquod caput visibile Ecclesiæ, præter Christum  
Postea.

Postea diluam objectiones, quas opponis. Primum sumitur ex analogia veteris ac novi testamenti hoc modo: Figura debet correspondere figurato; & umbra, seu rudis delineatio imaginis, debet correspondere ipsi imagini; alioquin illam non repræsentaret. At vetus Testamentum est figura seu umbra novi Testamenti: Ergo debet illi correspondere. Nemo dubitat. Iam vero Synagoga V. T. semper fuit gubernata ab uno visibili capite, nempe à summo Pontifice, cui reliqui omnes erant subjecti: Ergo etiam Ecclesia N. T. debet hoc modo gubernari; alioquin non esset correspondentia & analogia inter hanc & illam.

3. Hic discursus nititur triplici fundamento. Primum est, quòd figura debeat correspondere figurato; & delineatio imaginis, ipsi imagini. Ad quod duo requiruntur. 1. Ut quicquid est in imagine, repræsentetur aliquo modo per delineationem imaginis: Et quicquid est in re figurata, repræsentetur aliquo modo per figuram, seu typum illius. 2. Ut delineatio imaginis, quâ talis, sit imperfectior ipsa imagine; & figura seu typus alicujus rei, quâ talis, sit imperfectior, quàm res ipsa, quæ per figurâ significatur. Unde sequitur à fortiori, quòd quicquid perfectionis est in figura, debeat exactiori modo esse in re figurata. Et quicquid perfectionis est in rudi delineatione imaginis, debeat exactiori modo esse in ipsa imagine. Hoc clarum est.

4. Alterum fundamentum est, quòd ve-  
rus

rus Testamentum sit figura seu umbra Novi Testamenti: Et ea, quæ contigerunt in Veteri Testamento, sint figuræ seu umbræ eorum, quæ contingunt in Novo Testamento. Hoc expressè docet Apostolus 1. Cor. 10. 11. & Heb. 10. 1. Unde speciatim sequitur, Synagogam V. T. fuisse figuram seu umbram Ecclesiæ N. T. Et Moſen, Mediatorem V. T. (Gal. 3. 19.) fuisse figuram seu umbram Christi Mediatoris N. T. (Hebr. 8. 6. & 9. 15. & 12. 24.) quod frequenter docet Augustinus, præsertim l. 83. quæstionû, quæst. 61. & serm. 49. de verbis Domini, cap. 6. & serm. 86. de tempore.

5. Tertium est, quòd Synagoga V. T. semper gubernata fuerit ab uno visibili capite seu Monarchâ, nimirum à Pontifice, cui reliqui omnes erant subiecti. Hoc patet ex libris Exodi, Levitici, & Deuteronomij. Ac præsertim ex illo Deuter. 17. 12. *Qui autem superbierit nolens obedire Sacerdotis imperio, morte morietur.* Hoc admittunt, non solum Catholici, sed etiam Lutherani & Calvinistæ: Sic enim loquuntur Magdeburgenses Cent. 1. l. 1. cap. 7. *In Ecclesia populi Iudaici unus tantum erat lege divina Sacerdos summus, quem omnes cogebantur agnoscere, eique parere.* Vide etiam Calvinum L. 4. Instit. cap. 6. §. 2.

6. Igitur ex his principijs sic concludo: Omnis perfectio, quæ est in figura vel umbra alicujus rei, debet expressius & exactius esse in re ipsa: Ergo omnis perfectio, quæ fuit in Synagoga V. T. debet expressius & exactius esse

esse in Ecclesia N. T. At gubernari ab uno capite seu Monarcha, est quædam perfectio; & quidem major perfectio, quàm gubernari à multis. Hæc autem perfectio fuit in Synagoga, ut ex dictis patet: Ergo exactiori modo debet esse in Ecclesia.

7. Quòd autem major perfectio sit, gubernari ab uno capite, quàm à multis; communis Doctorum sententia est, apud Card. Bellarminum L. 1. de Pontifice. cap. 2. Et confirmatur exemplo; quia perfectius est, mundum gubernari ab uno Deo, & regnum ab uno Rege, quàm si aliter fieret. Nam ubi unus gubernat totam communitatem, ibi faciliùs servatur pax inter subditos; & major est consensus ad resistendum hosti; & regimẽ est magis stabile ac diuturnum. Ubi autem duo vel plures gubernant cum pari potestate, ibi facile oritur dissensio, tum inter gubernatores ipsos, quando quisque proprium sequitur iudicium; tum etiam inter subditos, quorum aliqui sequuntur unam factionem, alij alteram: Ac proinde non potest esse tanta unio & concordia ad resistendum hosti; neque regimen esse tam stabile ac diuturnum, juxta illud Christi, Lucae 11. 17. *Omne regnum in seipso divisum desolabitur.* Et hoc docet quotidiana experientia apud adversarios. Nam Lutherani & Calvinistæ, quia non agnoscunt unum caput suæ religionis, cui se subdiciant, dissecti sunt in varias partes, quæ nunquam componuntur.

8. Di-

8. Dices; Analogia, quæ est inter Synagogam & Ecclesiam, in eo consistit, quod sicut Synagoga habuit unum caput, nempe Pontificem; ita Ecclesia habeat unum caput, nempe Christum. Respondeo. Duplex analogia assignanda est: Una, quoad internum influxum gratiæ: altera, quoad externam gubernationem. Prior in eo consistit, quod sicut Christus, per sua merita prævisa, contulit Synagogæ internam gratiam; ita per sua merita jam exhibita, multo abundantior gratiam conferat Ecclesiæ. Posterior in eo, quod sicut Moses, Mediator veteris Testamenti, fuit primum caput visibile Synagogæ, quoad externum regimen, ita Christus, Mediator Novi Testamenti, fuerit primum caput visibile Ecclesiæ, in externo regimine. Rursum, sicut post mortem Moysis, semper perseveravit visibile regimen Synagogæ; ita post Ascensionem Christi semper perseveret visibile regimen Ecclesiæ.

9. Ex utraque analogia colliguntur hæc:  
 1. Invisibile caput Synagogæ & Ecclesiæ, quoad internum influxum gratiæ, esse idem, nempe Christum. 2. Visibile caput Synagogæ & Ecclesiæ, quoad externam gubernationem, esse diversum. Nam visibile caput Synagogæ, ab initio fuit Moses, cui postea successerunt Pontifices legales. Visibile autem caput Ecclesiæ, ab initio fuit Christus, cujus locum postea supplevit Petrus, & ejus successores.  
 3. Moysen fuisse figuram Christi, quoad externam gubernationem. Nam sicut Moses fuit Legis-

Legis-



Legislator, Mediator & Princeps in Veteri Testamento; ita Christus in novo. 4. Pontifices Veteris Testamenti fuisse typum seu figuram Pontificum Novi Testamenti: Nam sicut illi, in externo regimine, præsidebant toti populo Judæorum; ita hi, toti populo Christianorum.

10. Secundum Argumentum sumitur ex ijs scripturæ testimonijs, ubi Ecclesia comparatur cum exercitu bene ordinato. (Cant. 6 3. *Pulchra es amica mea, suavis & decora, sicut Jerusalem; terribilis, ut castrorum acies ordinata*) Item cum regno (Dan. 2. 44. *Suscipiet Deus cæli regnum, quod in æternum non dissipabitur*) Item cum ovili (Ioan. 10. 16. *Fiet unum ovile, & unus pastor*) Item cum domo (1. Timot. 3. 15. *Ut scias, quomodo oporteat te in domo Dei conversari, quæ est Ecclesia Dei vivi*) Item cum humano corpore (1. Corinth. 12. *Sicut corpus unum est, & multa habet membra; ita & Christus.*) Si ita est, necessario sequitur, sicut exercitus bene ordinatus regitur ab uno Imperatore; regnum ab uno Rege; ovile ab uno Pastore; domus ab uno Patrefamilias; corpus humanum ab uno capite; ita etiam Ecclesiam gubernari ab uno Rectore. Nec satis est, si dicas, hunc unum Rectorem esse Christum. Christus quidem Rector est, quoad internum influxum gratiæ, etiam si absens sit; sed non potest esse, quoad externam gubernationem, quādo absens est. Igitur alius debet esse illius loco. Quod patet ex metaphoris jam allatis. Nam sicut in exercitu,

C

citu,

citu, quando procedit contra hostem, necessariò debet adesse unus supremus Dux, aut in ejus absentia, aliquis illius Vicarius, qui omnia dirigat, & cui omnes reliqui obediant; sic etiam servata proportione fieri debet in Ecclesia. Alioqui non erit unitas, sed divisio, schisma & dissensio.

II. Exemplo rem declarabo. Sint in uno exercitu duo vel tres Imperatores cum pari potestate: quorum unus decernat, pugnandũ esse cum hoste; alter, quiescẽdum; tertius; fugiendum; quid putas facturos milites? Alij cũ hoc, alij cum alio conspirabunt. Tolleretur unitas; orietur schisma; exercitus dissipabitur. Vis applicem? Sint in Ecclesia Christi, quæ unica est, plures Episcopi cum pari potestate, qui nullum in terra superiorem agnoscant; ut tu fingis. Unus eorum decernat, Ecclesiasticos non obligari ad cœlibatum; alius contrarium statuat; tertius in dubio relinquat; quid hĩc faciet populus Christianus? quid Clerici inferiores, qui Episcopis subjecti sunt? Distrahentur in varias sectas & dissidia. Quis rediget illos ad unitatem, si non est unus aliquis superior, cui omnes teneantur obtemperare? An tu ipse, Marce Antoni? At reliqui Episcopi non audient te unum: nec agnoscent te judicem, sed parem. An illi potius? At neque tu illos agnosces, ut judices, sed ut collegas, in æquali tecum potestate constitutos. Quis ergo? An generale Episcoporum Concilium? Sed quis illud sua autoritate indicet? Quis omnes

omnes Christiani orbis Episcopos ad conciliū convocabit? Quis, si venire abnuant, legitime compellet? Nemo, si omnes pares sunt. Sed veniant sanè. Quis concilio præsidebit? Quis sententiam, cui omnes acquiescere debeant, pronuntiabit? Certè, vel unus aliquis, vel plures, vel omnes simul, vel nullus. Si unus aliquis, vel plures; non parebis: alioqui, cur Pontifici, & multis alijs Episcopis illi adhærentibus non pares? cur refractarius es? Si omnes simul, quid si dissentiant? Si nullus, controversia non finietur. Nullum igitur in Ecclesia, si omnes pares sunt, remedium est. Necti aliud, præter fugam, reperisti.

12. Tertium argumentum sumitur ex institutione Christi, hoc modo. Primū regimen, quod Christus in Ecclesia instituit, fuit visibile & Monarchicum, quoad externā gubernationē. Nā ipsemet Christus, ut supra ostensum est, etiam ex tua concessione (in qua tamen inconstans es) tanquam supremum caput & Monarcha, visibiliter suam Ecclesiam fundavit & gubernavit. Vel ergo post Ascensionem Christi, mansit visibile & monarchicum regimen, vel mutatum est. Si mansit, necesse est, Ecclesiam post Christi Ascensionem, semper gubernatam fuisse ab uno visibili Capite seu Monarcha, quod nos contendimus. Si mutatū est, planè sequitur, Ecclesiam ipsam mutatā esse, nec eandem nunc esse, quæ olim fuit. Sicut enim quælibet Respublica censetur mutari, teste Philosopho, quando modus, seu

forma gubernandi mutatur; sic etiam de Ecclesia statuendum est. Atqui absurdum est dicere, Ecclesiam Christi mutatam esse: Ergo absurdum & illud, ex quo hoc sequitur.

13. Hoc argumento, quo usi sunt Nicolaus Sanderus, & Cardinalis Bellarminus, sentiste te premi. Et conaris dupliciter occurrere. Primò ais, semper mansisse eandem Ecclesiam, & eandem gubernandi formam. Quod declaras hac similitudine. Si Rex terrenus, peregrè proficiscens, posset suis ministris animo & cōsilio adesse, eosq; singulis momentis instruere ac per eos totam regni gubernationem exercere, non secus, quàm si corpore præsens esset; certè in tali casu non indigeret Vicario, sed ipse per se diceretur gubernare suum regnum, sicut prius gubernabat, cùm præsens erat. Nec ullo modo censeretur facta mutatio in gubernatione. At sic fit in Ecclesia. Nam Christus, tametsi post Ascensionem corpore absens sit, animo tamen ac directione præsens est: Et non minus instruit ministros suos, quàm olim, cùm præsens esset.

14. Hæc responsio non valet. Primò, quia falsum est, in tali casu, quem tu fingis, non mutari formam gubernandi. Nam prior forma est visibilis & externa: posterior invisibilis & interna. In priori, Rex per externam vocem & directionem gubernat Ministros & subditos: in posteriori, per internam inspirationē. Quæ duæ formæ valdè inter se discrepant. Nam subditi, in priori, si oriatur aliqua controversia,

fia, possunt ad suum Regem visibiliter recurrere, & clarè ipsius sententiam audire. In posteriori, tenentur manere suspensi; quia Ministri Regis nihil aliud possunt litigantibus respondere, quàm se, per internam inspirationem humanam, scire mentem Regis absentis; quod non sufficit ad tollendas controversias. Imò, meritò possent subditi dubitare, an Ministri Regis non sint malitiosi; & fingant se scire, quod nesciunt. Secundò, falsum quoque est, Christum absentem (sublato Vicario visibili, qui ipsius loco sit) non minus instruere suos ministros, quàm si præsens esset. Nam si præsens esset, clarè & rotundè diceret, vel M. Antonium errare in doctrina de coelibatu; vel certè alios Episcopos, qui ab eo dissentiant. At nunc, cùm absens est, hoc non facit. Aut, si facit, quæro ex te, an te solum instruat, an alios solum Episcopos, an utrosque? Si te solum, Monarcha es, quia solus. Si alios solos, teneris illos audire. Si utrosque, cur dissentitis? *Non est dissensionis Deus, sed pacis.*

15. Dixi, *sublato Vicario visibili*. Nam illo admissio (sicut nos illum admittimus) fatemur Christum absentem non minus instruere ministros suos, quàm si præsens esset. Non quidem immediatè per se, sed mediante suo Vicario, quem in terris habet. Nam per illum ita dirigit Ministros suos, ut in doctrina errare non possint, si ipsius sententiam sequantur. Hoc sensu scribit D. Hieronymus, epist. 8. ad Demetriadem cap. 9. *Illud te pio charitatis affe-*

*Et ut pramonendam puto, ut sancti Innocenti; qui Apostolica cathedra successor est, teneas fidem: ne peregrinam, quamvis tibi prudens callidaq; videaris, doctrinam recipias.*

16. Vide bashanc tuam responsionem nō subsistere: ideoq; aliā adhibes, quæ priorem evertit. Ais, Ecclesiam Christi ædificatam esse post Christi Ascensionem, & ab eo tempore, semper mansisse eandem formam gubernandi. Christum semper fuisse illius Monarcham seu caput invisibile, per internam directionē: nunquam visibile, per externam gubernationem. Sed hoc figmentum cap. 1. satis fusè refutatum est. Nunc solum addo hoc dilemma. Vel Christus ab initio rexit suam Ecclesiam visibiliter, vel non. Si rexit visibiliter, falsa est posterior tua responsio. Si non rexit visibiliter, inanis est prior.

17. Multa objicis (lib. 1. cap. 1. n. 2. & sequentibus) quorum aliqua jam refutata sunt; reliqua hīc refutanda. Primò objicis illud Rom. 12. 5. *Multi unum corpus sumus in Christo; singuli autem alter alterius membra.* Ubi Apostolus (ut tu argumentaris) nullum aliud caput agnoscit, nisi Christum: Et inter membra corporis, non minus includit Petrum, quā alios fideles. Imò omnes fideles vult esse membra, non solum respectu Christi, sed etiam respectu ipsorum inter se. Quod probas ex illis verbis, *Singuli autem alter alterius membra.* Igitur & Petrus, & Pontifex sunt membra corporis Ecclesiæ; non solum, si con-

feran-

ferantur cum Christo, sed etiam si conferantur cum alijs fidelibus. Non sunt ergo caput Ecclesiæ. Respondeo, Apostolus disertè ibi loquitur de Christo, quatenus est caput Ecclesiæ per internum influxum donorum gratiæ: Et sic verum est, omnes fideles, etiam Petrum & Pontificem, esse membra, non caput. Omnes enim accipiunt gratiam à Christo, tanquam à capite: nullus à Petro vel Pontifice. Si autem sermo sit de Christo, quatenus est caput Ecclesiæ per externam gubernationem, tunc non solum ipse, sed etiam Petrus est caput: ille quidem primarium, & propria virtute; hic verò secundarium, & virtute ab illo participata.

18. Dices, Ergo Ecclesia erit biceps, quia habebit duo capita. Respondeo. Nihil hinc novum. Nam & Regnum Angliæ, posset hoc sensu, esse biceps, si Rex peregrè proficiscens, relinqueret domi Vicarium, qui tantisper Regnum administraret. Et de facto, Regnum Lusitaniæ biceps est, quia Regem absentem habet, & Proregem præsentem: Utrunque, ut caput in externo regimine; sed alterum alteri subordinatum. Idem dico de Ecclesia. Biceps est, quia habet duo capita, primarium & secundarium. Accipe aliud exemplum ex Apostolo, Ephes. 5. 23. *Vir, inquit, caput est mulieris. At mulier præter virum, qui caput ipsius est,*

C 4 habet

habet etiam naturale caput in suo corpore. Igitur biceps est. Et tu ipse, M. Antoni, tria habes capita. Unum in tuo corpore, naturale: alterum in directione spirituali, Christum: tertium in directione politica, Regem Angliæ. Nec ullum horum negare audes. Triceps igitur es. Non miraris?

19. Secundò objicis Sicut caput & reliqua membra hominis constituunt unum integrum corpus naturale; ita Christus & Ecclesia constituunt unum integrum corpus mysticū, quod conflatum est ex capite & membris, (1. Corinth. 12.) Ergo omnes, præter Christum, qui caput est, sunt membra corporis Ecclesiæ: Ergo nullus, præter Christum, est caput Ecclesiæ. Respondeo. Hæc objectio solvitur eodem modo, quo prior. Nam caput potest dupliciter conferri cum membris. Primò, quoad internum influxum, qui procedit à capite in reliqua membra: Et sic unius corporis unum est caput. Secundò, quoad externum regimē: Et sic unius corporis possunt esse duo capita. Quo pacto corpus mulieris habet unum caput, à quo recipit influxum spirituum sensitivorum: habet duo, à quibus regitur in externis actionibus. Nam & à proprio capite naturali, & à viro, qui caput ipsius morale est, gubernatur. Idem est de Ecclesia. Habet unum caput, quoad influxum gratiæ: habet duo, quoad externam gubernationem, quorum unum supplet vices alterius. Et priori modo, solus Christus est caput; reliqui omnes sunt mem-



membra: posteriori, non solum Christus, sed etiam Petrus est caput; qui tamen priori modo erat membrum, & non caput.

20. Quando ergo objicis ex Apostolo, quod Christus & Ecclesia constituent unum integrum corpus mysticum, quod ex capite & membris conflatum est; hoc intelligi debet priori sensu. Nam Apostolus loco à te citato, disertè loquitur de Christo, quatenus est caput Ecclesiæ, quoad internam divisionem donorum gratiæ, ut in textu patet. Et sic concedo, ut jam antè concessi, omnes, præter Christum, esse membra Ecclesiæ: Et nullum, præter Christum, esse caput Ecclesiæ. Quod si similem objectionem facias de Christo, quatenus est caput Ecclesiæ per externam gubernationem; primò quidem, te ipsum oppugnabis, quia tu negas Christum esse ejusmodi caput. Deinde, facillimè dissolvetur objectio ex nostra parte. Nam Christus cum suo Vicario erit Caput: reliqui omnes, membra. Sicut fit in regno Lusitaniæ. Rex cum suo Prorege est caput regni: alij membra.

21. Tertiò objicis. Patres non agnoscunt ullum caput Ecclesiæ, nisi Christum, ut Augustinus lib. de Unitate Ecclesiæ, cap. 2. & 4. & Tract. 108. in Ioannem. & lib. de Pastoribus, cap. 13. Gregorius in Psal. 5. pœnitentialem, & lib. 4. epist. 38. & Chrysostomus hom. 11. in Epist. ad Ephesios. Et probant ex illo Eph. 4. 15. *Crescamus in illo per omnia, qui est caput Christus: ex quo totum corpus compactum & connexum per*

*omnem juncturam subministrationis, secundum operationem in mensuram uniuscujusque membri, augmentum corporis facit in adificationem sui in charitate.* Respondeo. Eadem est solutio. Nam Apostolus loquitur de Capite Ecclesiæ, quod internam gratiam influit in alia membra. Et tale Caput est solus Christus. Idem docent Patres à te citati. Non negant tamen, quin præter Christum sit aliud Caput visibile, quod in externo regimine gubernat Ecclesiam. Imò expressè affirmant, ut sequenti libro c. 4. videbimus.

22. Quartò ebjicis. Christus est sacerdos in æternum, ut passim docet scriptura, (Ps. 109. 4. & Heb. 7. 17.) *Quid ergo necesse est, inquis, dare illi Vicarium, vel successorem in terris? Cur summum hic Pontificem quarimus, si Christus Sacerdos & Pontifex noster sempiternum habet sacerdotiũ, & Pontificatum sempiternum?* Respondeo. Si ex eo præcisè, quòd Christus dicatur esse Sacerdos in æternum, contendis probare, nullum esse Pontificem, nisi Christum; poteris similiter probare, nullum esse Sacerdotẽ, nisi Christum. Ubi ergo tuum sacerdotium? Ubi tuus Episcopatus? Sed ad rem. Apostolus loco citato, ostendit Christum, qui est Sacerdos & Põtifex Novi Testamenti, dupliciter differre à Sacerdote & Pontifice Veteris Testamenti.

1. Quia Pontifex Veteris Testamenti erat mortalis; Christus post Resurrectionem, immortalis.
2. Pontifex Veteris Testamenti, quãdo moriebatur, indigebat Successore; Christus,

itus, quia non moritur, non indiget Successore. Neq; nos Catholici, ut tu invidiosè fingis, damus illi Successorem, sed Vicarium & Ministrum. Quæ duo valdè distinguuntur. Nam successor, succedit cum pari potestate; ut successor Regis in regno, successor Imperatoris in Imperio, successor Aaronis in sacerdotio legali. Nemo autem succedit Christo cum pari potestate. At Vicarius aut minister non habet parem potestatem cum eo, cujus Vicarius aut minister est, sed delegatam. Sicut ergo nō pugnat, Christum habere Sacerdotes, tanquam Ministros in oblatione sacrificij Eucharistiæ; ita non pugnat, habere Ministros & Vicarios in externa Ecclesiæ gubernatione. Inter hos ministros unus supremus est, qui dicitur Pontifex. Quid hîc mali est? Nihil penitus.

23. Ex his tuis objectionibus propono hoc dilemma: Vel aliquid probant, vel nihil. Si nihil, frustra à te adferuntur. Si aliquid, æquè procedunt de Rege, ac de Pontifice. Si ergo convincunt Pontificem non esse caput Ecclesiæ, eo quòd solus Christus sit Caput Ecclesiæ; etiam convincunt Regem non esse Caput Ecclesiæ, propter eandem causam. Si autem hoc convincunt, jam iterum tibi contradicis. Una pars contradictionis est hæc: Solus Christus, & nemo præter Christum, est Caput Ecclesiæ. Altera est hæc: Non solus Christus, sed etiam quilibet Rex in suo regno, est Caput Ecclesiæ. Priorem habes in objectionibus jam allatis. Posteriores lib. i. cap.

#### 44 De Republica Ecclesiastica Liber Primus.

cap. 12. n. 43. his verbis: *In quolibet regno, Rex potest meritò, in bono sensu Catholico, dici esse Caput id est, supremus gubernator Ecclesia totius regni sui.* Quod tamen negant Tookerus & Burhillus Theologi Anglicani. Vide, quid illis in Anglia respondere debeas.

24. Hæc generatim dicta sint de Capite Ecclesiæ. Ex quibus constat, Christum esse Caput Ecclesiæ, tam visibile, quàm invisibile. Visibile quidem, quia vel per se, vel per Vicarium suum visibiliter gubernat Ecclesiam. Invisibile, quia per internum influxum fidei, spei, charitatis, & aliorum donorum spiritualium invisibiliter vivificat & vegetat membra Ecclesiæ. Deinceps speciatim quærendum est, an Petrus fuerit visibile caput Ecclesiæ, præ alijs Apostolis.

LIBER

# LIBER SECUNDUS DE PRIMATU PETRI.

I.



*Hæc tria, ut nosti, M. Antoni, pro eodem usurpari solent: 1. Petrus est visibile caput totius Ecclesie, loco Christi. 2. Petrus est Vicarius Christi in regimine totius Ecclesie. 3. Petrus habet Primatum totius Ecclesie. Quæ omnia bilem tibi movent: & velles sublata esse, ne cogaris Pontificem, Petri Successorem, pro tali agnoscere. Itaque sic statuis. 1. Nullum esse caput Ecclesie, præter Christum. 2. Spiritum sanctum propriè esse Vicarium Christi in regimine Ecclesie, non Petrum. 3. Petrum non habere Primatum Ecclesie. Ne tamen planè videaris exorbitare, tribuis illi aliquem Primatum: non illum, quem nos illi tribuimus, sed alium, qui à te confectus est. Nos dicimus, Petrum habere Primatum Ecclesiastica potestatis & jurisdictionis. Tu dicis, habere Primatum ætatis, vocationis & fervoris. Nec alium agnoscis. Et omnia argumenta, quæ à nostris adferuntur ex Scriptura, Patribus, Conciliis, & Canonibus, pro Primatu Petri; putas per Primatum à te confectum, dissolvi, vel saltem eludi posse. Primatus autem iste, te interprete, in eo consistit, quòd Petrus omnes Apostolos præcesserit ætate, vocatione ad Apostolatam, & fervore Charitatis.*

2. De primopuncto jam dictum est: & clarè demonstratum, aliud caput visibile, præter Christum,

*stum, admitti oportere. Dereliquis duobus hic agendum, hoc ordine. 1. Demonstrandum, Spiritum sanctum non esse propriè Vicarium Christi, in regimine Ecclesiæ, sed Petrum cum suis successoribus. 2. Refellendus est Primatus Petri, quem tu fingis. 3. Afferendus, verus Primatus ex Scriptura, Patribus, & aliunde. 4. Diluenda objectiones contraria.*

## CAPUT PRIMUM.

*Quod Spiritus sanctus propriè non sit Vicarius Christi.*

1. **T**U quidem, lib. 1. cap. 4. n. 2. disertè asseris, non Petrum, sed Spiritum sanctum propriè esse Vicarium Christi in Regimine Ecclesiæ, sed Theologi Parisienses hanc tuam assertionem cēsent esse erroneam, periculosam, & hæresin Macedonij expressè redolentem. Et sic est. Nam Vicarius, *propriè loquendo*, (sicut tu loqueris) minor seu inferior est eo, cujus est Vicarius. Si ergo asseris, Spiritum sanctum propriè esse Vicarium Christi, sicut revera asseris; consequenter debes asserere, Spiritum sanctum, esse minorem Christo. Hæc autem est hæresis Macedoniana.

2. Quòd autem Vicarius, *propriè loquendo*, minor sit eo, cujus est Vicarius, certum est ex communi hominum usu & conceptu; non solum apud Catholicos, sed etiam apud Adversarios. Nam quando Calvinus ait, Christum esse Vicarium Dei Patris; Calvinistæ

vinistæ hoc interpretantur de Christo, secundum humanitatem, non autem secundum Divinitatem: Ne cogantur concedere, Christum secundum Divinitatem, minorem esse Patre, quæ est heresis Ariana. Supponunt ergo, Vicarium propriè loquendo, minorem esse eo, cujus est Vicarius. Quod & tu expressè supponis lib. 4. cap. 1. n. 4 ubi citas testimonia quorundam Patrum, qui Pontificem appellant Vicarium Petri. Et inde concludis, Pontificem Petro inferiorem esse. Vel ergo benè concludis, vel malè. Si malè, nihil efficis. Si benè, supponis Vicarium minorem esse eo, cujus Vicarius est; & consequenter, si Spiritus sanctus propriè est Vicarius Christi, minorem esse Christo. Hic non potes evadere, nisi te ipsum neges.

3. Addam duo dilemmata. Unum; vel Spiritus sanctus propriè est Vicarius Christi secundum humanitatem, vel secundum Divinitatem. Si prius, sequitur Spiritum sanctum minorem esse Christo homine: Et similiter Deum esse Vicarium hominis; quod est planè absurdum. Si posterius, sequitur Christum secundum Divinitatem, & non secundum humanitatem esse caput Ecclesiæ; quod est æquè absurdum. Est enim Caput secundum eam naturam, secundum quam meritis est exaltari, & caput Ecclesiæ agnosci, ut suprà dictum est. At meritis est exaltari secundum humanitatem. Ergo secundum humanitatem est Caput Ecclesiæ. Unde Augustinus lib. 1. de Trinitate c. 12.

ait:

ait: *Christus secundum formam Dei, primogenitus omnis creatura: secundum formam servi, caput corporis Ecclesiae.*

4. Alterum; Vel Spiritus sanctus proprie est Vicarius Christi in externo & visibili regimine Ecclesiae, vel in interno & invisibili. Non prius, quia non gubernat Ecclesiam per se visibiliter, sicut Christus in hac vita gubernavit. Nec posterius, quia internum regimen Ecclesiae consistit in interno influxu donorum gratiae, ut tu ipse fateris. Hunc autem influxum praestat Christus, vel meritorie, quatenus est homo: vel physicè & effectivè, quatenus est Deus, ut lib. i. cap. 4. §. 9 dictum est. At Spiritus sanctus, neutro modo potest esse ipsius Vicarius. Non priori, quia non meretur nobis gratiam. Imò, cum purus Deus sit, mereri non potest. Nec posteriori, quia tametsi effectivè producat gratiam, tamen illa productio est communis tribus personis, juxta axioma Theologorum: *Opera Trinitatis ad extra sunt indivisa.* Ergo nulla causa est, cur in tali productione Spiritus sanctus sit potius Vicarius Filij, quàm Pater, aut Filius sit Vicarius Spiritus sancti.

5. Quod sic clariùs explico. Productio donorum gratiae non procedit à Patre, quatenus Pater est; nec à Filio, quatenus Filius est; nec à Spiritu sancto, quatenus Spiritus sanctus est: sed procedit à Patre, Filio, & Spiritu sancto, quatenus sunt unus Deus. Itaque non sunt tria principia illius productionis, sed unū. At unum principium, quā tale, non potest dici pro-



proprie Vicarius sui ipsius. Ergo nec Spiritus sanctus, quatenus est Deus, potest propriè dici Vicarius Christi, quatenus ille similiter est Deus. Nam uterque est unus & idem Deus.

6. Objicis illud Ioan. 14. 26. *Paraclitus autem Spiritus sanctus, quem mittet Pater in nomine meo, ille vos docebit omnia, & suggeret vobis omnia, quaecunque dixero vobis.* Et cap. 16. 7. *Si non abiero, Paraclitus non veniet ad vos: si autem abiero mittam eum ad vos.* Hinc infer, Spiritum sanctum missum esse, ut esset loco Christi, seu ut esset Vicarius Christi. Respondeo. Non rectè hoc infer. Missus quidem est, ut doceret Apostolos; non tamen, ut propriè esset Christi Vicarius. Hoc satis clarè paulo antè ostensum est. Et tu ipse, ut soles esse incòstans, idem fateris lib. 1. cap. 1. n. 16. ubi de Christo, in cœlo jam existente, sic scribis: *Omnia munera capit & Regis obit per se perfectissimè.* Certè, si omnia per se obit, non obit per Vicarium. Ecce in quantas angustias te conjicis.

7. Fortè urgebis illam particulam, *in nomine meo*, id est, ut sit Vicarius meus. Respondeo. Varia est explicatio illius particulæ. Prima, Pater mittet Spiritum sanctum, *in nomine meo*, id est, in gloriam nominis mei. Ita Theophylactus in illum locum. Et colligitur ex illo Ioan. 16. 14. *Ille (Spiritus sanctus) me clarificabit; quia de meo accipiet, & annuntiabit vobis.* Altera, in nomine meo, id est, propter meritum meum. Ita Toletus annotat. 26. in cap. 14. Ioannis. Quo sensu etiam dictum est. Ioan. 14. 13. *Quod-*

D

cunque

*cunque petieritis Patrem in nomine meo, hoc faciam.* Tertia, in nomine meo, id est, ad opus vel negotium meum perficiendum. Ita Tolerus ibidem. Dux priores explicationes nihil te juvant. Circa tertiam notandum est, Christum multa per externam vocem dixisse Apostolis de sua passione, morte, resurrectione, & alijs mysterijs, quæ ipsi tunc non intelligebant (Lucæ 18.34. & alibi) At postea, quando per internam vocem Spiritus sancti, illustrati sunt, ceperunt intelligere, & toti mundo promulgare. Et hoc est, quod ait Christus: *Spiritus sanctus, quem mittet Pater in nomine meo, ille vos docebit omnia, & suggeret vobis omnia, quaecunque dixerò vobis.* Græcè est, *Quaecunque dixi vobis.* Sensus est: Quæ à me externa voce dicta sunt, & à vobis non intellecta, intelligentis ex interna suggestionem Spiritus sancti, qui à Patre mittendus est in nomine meo, id est, ad perficiendam doctrinam, quam ex me audistis. At hinc non sequitur, Spiritum sanctum propriè esse Vicarium Christi (non enim est minor Christo) sed perfectiori modo docuisse Apostolos per internam suggestionem, quæ ipsi audierant à Christo per externam vocem.

\* \* \*

CAPUT

## CAPUT SECUNDUM.

*Refellitur Primatus Petri à Marco Antonio confictus.*

1. **T**U fingis, Primatum Petri in eo consistere, quòd fuerit primus ætate, vocatione & fervore, inter omnes Apostolos. Sic enim scribis li. 1. cap. 5. n. 7. *Invenio ego Petrum, Primatum aliquem, circa tamen Principatum potestativum, & jurisdictionalem, esse consecutum; nimirum ex ætate, ordine vocationis, amoris fervore, & propriis virtutibus.* Etn. 18. *Cur itaque Petrus multa, primaria quadam authoritate, ageret aut diceret, in Primatu ipsius referunt Patres, quia nimirum primus erat ætate, vocatione, ac virtute.* Etn. 19. *Atque huic solum Primatum convincunt, & non alium majorem, plurima divina scripturæ & sanctorum Patrum loca, que postea recensebimus.* Et cap. 9. n. 1. in fine. *Caput Apostolorum fuit Petrus, quia primus erat ætate, vocatione & dignitate; non authoritate & jurisdictione.* Etn. 2. *Petrus & ætate, & vocatione, & familiaritate cum Christo, erat primus, & quasi Apostolici Collegij Decanus, Præses & caput.* Etn. 20. *Erat primus ætate, primus in ordine Apostolorum, primus fervore & Zelo.*

2. Ego contrà contendo. Primò, majorem illi Primatum deberi, qui còsistit in potestate, & jurisdictione. Quod sequèntibus capitib<sup>9</sup> demonstrandù est. Secundò, Primatù, què tu fin-

D 2      gis,

gis, partim incertum, partim falsum, partim insufficientem esse. Quod sic demonstro.

3. Primò, incertum est, an Petrus fuerit ætate senior, quàm alij. Nam multi putant Andream fuisse seniore, ut Epiphanius hæresi 51. Baronius tomo 1. Annalium, anno 31. §. 23. Lorinus in cap. 1. Act. 5. 13. Serarius in Tractatu de Apostolis, & plures alij. Tu quidem citas pro te Cassianum & Chrysostomum, sed eos citando, non efficis rem certam, quam ego incertam dixi. Quod tu ipse fateris his verbis: *Quis enim diem Nativitatis horum duorum fratrum notatum vidit? Quis interrogavit eorum parentes?* Rectè Si ergo incertum est, etiam te astipulâte, An Petrus fuerit senior ætate, quàm Andreas; certè Primatus ætatis, quem tu Petro tribuis, certus esse non potest. Et æquè promptum erit mihi asserere, Andream fuisse seniore, quàm tibi, Petrum, fuisse seniore. Unde sequitur, te in arena, non in petra, Primatum Petri ædificare: ac proinde, non prudentem, sed stultum architectum esse (Marth. 7. 22.)

4. Porro Cassianus, quem tu citas, tibi contrarius est. Tametsi enim asserat, Petrum ætate seniore esse; non tamen Primatum Petri ponit in ætate, sed in Principatu. Sic enim scribit lib. 3. de Incarnatione Domini cap. 12. *Interrogemus, nō incipientem aliquem puerulum, cujus institutio rudis, sed summum illum, & inter Discipulos Discipulum, & inter Magistros Magistrum, qui Romana Ecclesia gubernaculum regēs, sicut*

sicut fidei habuit, ita & Sacerdotij Principatum. Dic nobis ergo, Princeps Apostolorum Petre, dic quemadmodum Ecclesie credere Deum debeant; Aequum est enim, ut doceas nos doctus à Domino, & aperias nobis januam, cujus clavem accepisti. Interroganti ergo Domino, quem cum crederent Discipuli, respondit primus Apostolorum Petrus, unus utique pro omnibus. Idem enim habuit unius responsio, quod habebat omnium fides. Sed primum decuit respondere ut idem esset ordo responsionis qui erat honoris: & ipse antecederet confessione, qui antecedebat ætate. Hæc quidē postrema verba tu citasti, quia videbantur tibi patrocinari: Sed priora omisisti, quia apertē tibi contraria sunt. Nam ex illis constat, Primatum Petri, ex sententia Cassiani, non consistere in ætate, sed in sacerdotij Principatu.

5. Nec Chrysostomus à te citatus tibi favet. Nam & ille Primatum Petri non tribuit prærogativæ ætatis, sed potestatis & jurisdictionis, quod tu ipse conquereris lib. 1. cap. 9. n. 19. cum ais: Chrysostomus plurimum inclinare videri potest in supremum Petri Principatum. De quo plura cap. 4. & 6.

### **D** Primatu vocationis.

**I**Am verò de Primatu vocationis sic scribis lib. 1. cap. 5. n. 10. De ordine vocationis neminem habemus, qui sese nobis opponat. Omnes enim facile concedunt, ad Apostolatū primum omnium Petrum fuisse à Christo vocatū & admissum. Quod

confirmas ex Evangelio, Matth. 4. & Lucæ 5. sed triplex mendacium committis. Unum in assertionem: Alterum in confirmationem: Tertium in citationem Patrum. Quæ omnia constabunt ex ijs, quæ jam dicturus sum.

7. Triplex quasi vocatio distinguenda est. Prima, qua Andreas, Petrus, Philippus, & Nathanael, non quidem propriè vocati, sed tamen admissi sunt ad Christum, tanquam familiares auditores: non eo animo, ut cum ipso constanter manerent; sed visuri, ubi habitaret, & quid diceret. Et in hac vocatione, vel potius admissione, Andreas præcessit Petrum, Philippum & Nathanaelem, ut expressè habetur, Ioan. 1. 41. Et omnes Patres, te etiam consentiente, idem sentiunt.

8. Secūda, qua propriè vocati sunt à Christo, tanquam Discipuli cum illo permanaturi. Et sic Petrus & Andreas simul, seu, eodem tempore vocati sunt: Et post illos Jacobus & Joannes simul. Matth. 4. 18. *Ambulans autem Jesus juxta mare Galilææ, vidit duos fratres, Simonem, qui vocatur Petrus, & Andream fratrem ejus, mittentes rete in mare (erant enim piscatores) & ait illis: Venite post me, & faciam vos fieri piscatores hominum. At illic continuo, relictis retibus, sequuti sunt eum. Et procedens inde, vidit alios duos fratres, Jacobum Zebedæi, & Joannem fratrem ejus in navicula Zebedæo Patre eorum, reficientes retia sua. & vocavit eos. Illi autem statim, relictis retibus, & patre secuti sunt eum.* Ex hoc loco, quem tu citas pro Primatu vocationis Petri, aperte colligitur

colligitur, Petrū & Andream simul fuisse vocatos; & non prius Petrum quàm Andream. Itaq; falsò citas hoc testimonium pro Primatu Petri astruendo. Nec ullus Patrum in hac re tibi astipulatur.

9. Tertia, qua propriè vocati sunt, tanquam Apostoli: vel, quod idem est, qua ex numero Discipulorum electi sunt ad Apostolatū, veluti ad altiore gradum. Sic omnes duodecim simul, seu, eodē tempore, electi sunt. Lucæ 6. 13. *Et cum dies factus esset, vocavit Discipulos suos, & elegit duodecim ex ipsis, quos & Apostolos nominavit.* Sine dubio, eodem tempore illos elegit. Et hoc sensu Patres dicunt, omnium Apostolorum electionem fuisse parem. Melchisedes in Epist. ad Episcopos Campaniæ: *Licet cūctorum Apostolorum paresset electio; Beato tamen Petro concessum est, ut alii præmineret.* Et Julius I. in Epist. ad Episcopos Orientales. *Quoniam & inter beatissimos Apostolos in similitudine honoris, fuit quadam discretio potestatis: Et cum omnium paresset electio, uni tamen datū est, ut ceteris præmineret.* Certè, hi duo Patres non ponunt præminentiam Petri in vocatione, ut tu facis; sed in discretionē potestatis. Nam in vocatione volunt omnes Apostolos esse æquales.

10. Vides ergo, Marce Antoni, nusquā Petrum ante omnes alios, prius tempore vocatum esse. Sed objicis, id factum esse, Lucæ 5. 10, ubi Christus in navicula Petri docens turbas, & faciens miraculum in captura piscium, primò vocavit Petrū, deinde Jacobū & Joā-

nem: Et mox additur: *Et subductis ad terram navibus, relictis omnibus sequuti sunt eum.* Respon-  
 deo. Hic locus nihil te juvat. Primò, quia tu  
 conjungis hunc locum cum loco Matth. 4,  
 quasi eadem historia utrobique, & apud Mat-  
 thæum, & apud Lucam descripta sit. Si ita est,  
 necessariò sequitur, nō Petrum solum, sed Pe-  
 trum & Andream simul, eodem tempore vo-  
 catos esse. Hoc enim expressè habet Matthæ-  
 us, ut jam ante ostensum est. Quamvis ergo  
 Lucas non exprimat nomen Andreæ, sed so-  
 lius Petri, tamen quia Matthæus expressè po-  
 nit utriusque nomen, consequens est, utrum-  
 que eodem tempore vocatum esse, si eadem  
 apud Lucam & Matthæum historia est. Si au-  
 tem non est eadem (quod probabilius est) ni-  
 hil penitus ex loco Lucæ convinces. Nam ibi  
 non legimus, à Christo vocatos, sed viso mira-  
 culo captorum piscium, sponte eum secutos  
 esse, ut bene advertit Augustinus lib. 2. de cō-  
 sensu Evangelistarum cap. 17. circa finem, &  
 Maldonatus in cap. 4. Matthæi v. 18. Nec ta-  
 men secuti sunt, ut tu loqueris, *cum perfecta ad-  
 hasione ad latus Christi*; sed cum animo rever-  
 tendi ad piscationem, ut loquitur B. Pater I-  
 gnatius in libello exercitiorum spiritualium,  
 (quem utinam melius legis & observasses.  
 Intelligis, quid velim) Neq; obstant illa ver-  
 ba, *Relictis omnibus secuti sunt eum*; quia non si-  
 gnificant perpetuam abdicationem rerum o-  
 mnium (de qua loquitur Petrus Matth. 19. 27.  
*Eccē nos reliquimus omnia & secuti sumus te*) sed  
 tem-



temporariam sequelam, ut sensus sit, *relictis omnibus*, id est, desertis tantisper navibus ac re-  
tibus, *sequeuti sunt eum*. Quo sensu intelligitur  
etiam illud de muliere Samaritana Ioann. 4.  
28. *Reliquit ergo hydriam mulier, & abiit in civi-  
tatem, & dicit illis hominibus: Venite & videte ho-  
minem, qui dixit mihi omnia, quacunque feci: nun-  
quid ipse est Christus.* Vide Maldonatum in il-  
lum locum.

II, Quòd autem Patres interdum asserāt,  
Petrum fuisse primum in ordine Apostolorū,  
hoc eo sensu debet intelligi, quo illud Matth.  
10.2. *Duodecim autem Apostolorum nomina sunt  
hæc: Primus Simon, qui dicitur Petrus, & Andreas  
frater ejus.* Ubi particula, *Primus*, non signifi-  
cat Petrum fuisse primum ordine vocationis,  
sed ordine dignitatis & eminentiæ. Sicut in si-  
mili exemplo explicat Augustinus, serm. 10. de  
verbis Domini, cap. 3. circa illud Apostoli Pau-  
li. 1. Timoth. 1. 15. *Christus venit in hunc mundū,  
peccatores salvos facere, quorum primus Ego sum.*  
Sic enim loquitur: *Ante Paulum non erant pec-  
catores: Certè, vel ipse Adam ante omnes: & ple-  
na peccatoribus terra deleta diluvio. Et deinceps,  
quam multi? Unde ergo verum est, Ego primus  
sum? Primum se dixit, non peccatorum ordine, sed  
peccati magnitudine. Quomodo inter Ad vocatos  
primus est iste, non quia plures annos habet, ex quo  
causas egit; sed quia, ex quo cepit, ceteros superavit.*  
Idem dico de Petro. Primus est Apostolorum  
non annorum spacio, sed officij dignitate: non

quia diutius vixit in Apostolatu sed q̃a, ex quo cepit, cæteros superavit. Et sic sentiunt Patres.

12. Sed objicis, quosdã Patres aliter sentire, nempe, Petrũ ordine temporis fuisse vocatum ante omnes alios Apostolos. Sunt autẽ hi Patres, quos allegas pro hac sententia: Epiphanius, Cyprianus, Clemens, Hilarius, Gregorius, Hieronymus, Augustinus, Cyrillus, Chrysostomus. Respondeo. Ut ostendas hos Patres pro te esse, duo tibi præstanda sunt. Primò; quod dicant Petrum, ordine temporis, ante alios vocatum esse. Secundò, quòd in eo constituent Primatum Petri, ut tu facis. Si in alterutro deficis, frustra laboras. Audiamus ergo, quid dicant Patres.

13. Ex Epiphanio, heresi 51. citas hæc verba: *Occursus Andrea primò contigit: cum minor esset Petrus tempore ætatis. Postea enim rursus, quando perfecta renunciatio facta est, ipse fratrem suum præcessit.* Respondeo. Vel vera sunt, quæ hîc dicit Epiphanius, vel falsa. Si vera, jam verum est, Petrum ætate minorem esse, quàm Andream, quod tu negas. Verum igitur negas. Si falsa, cur adducis? Fortè dicturus es, priorẽ partem, quæ tibi contraria est, falsam: posteriorem, quæ tibi favet, veram esse. Quid si ego è contrario dicam, hanc falsam, illam veram esse? Eodem jure hoc dixerim, quo tu illud. Sed non opus est, hoc effugio. Sic potius dicam. Posterior pars, quam tu urges, nihil te juvat. Primò, quia non asserit expressè, quod tu asseris, Petrum vocatum fuisse

fuisse ad Apostolatam ante Andream; sed Petrum in perfecta renunciatione præcessisse Andream. Quod commodè intelligi potest hoc sensu; Petrum, externa voce, primum omnium professum esse perfectam renunciationem, cum dixit: *Ecce nos reliquimus omnia, & secuti sumus te.* Sicut etiam primus omnium, externa voce, confessus est fidem divinitatis Christi, cum dixit: *Tu es Christus Filius Dei vivi.* Nec videtur aliter intelligi posse. Nam illa perfecta renunciatio, de qua loquitur Epiphanius, non consistit in externa abdicatione rerum temporalium, quia in illa Petrus non præcessit Andream, cum uterque simul ac eodem tempore reliquerit sua retia, juxta illud, Matth. 4. 20. *At illi continuo, relictis retibus, secuti sunt eum.* Ergo debet consistere in sincera professione perfectæ renunciationis, de qua jam dictum est. At hinc non sequitur, quod tu vis. Non enim valet hæc consequentia: Petrus, inter Apostolos, primus omnium professus est fidem divinitatis Christi, & perfectam renunciationem rerum temporalium: Ergo primus omnium vocatus est ad Apostolatam.

14. Sed, etsi darem, primum omnium vocatum esse, ex sententia Epiphaniij, non ideo Epiphanius pro te esset. Nam tu contendis, Primatum Petri consistere in primatu vocationis; quod Epiphanius non vult. Sic enim post verba, à te citata, immediate loquitur: *Insuper autem & in hoc Deus est, qui novit*

voca-

*vocationes cordium, & scit, quis dignus sit primo loco locari; & elegit Petrum, ut Dux esset suorum discipulorum.* Ubi distinguit internam vocationem ab externa; & asserit, Petrum electum esse Ducem Apostolorum, non ideo, quia primus externâ vocatione à Christo vocatus est, (quæ est tua sententia) sed quia internâ cordis vocatione, se dignum præstitit, ut primum locum obtineret, & fieret Dux Apostolorum; quod tuæ sententiæ contrarium est.

15. Ex eodem Epiphanio in Ancorato, citas hæc verba : *Ipse Dominus constituit Petrum primum Apostolorum.* Respondeo. Hoc ipsum est, quod nos asserimus. Sed longè diversa sunt hæc duo: Christus constituit illum primum Apostolorum; & Christus vocavit illum ad Apostolatam, antequam alios vocaret. Prius verum est; posterius falsum. Nam Christus vocavit omnes duodecim eodem tempore ad Apostolatam; & postea ex ipsis elegit Petrum, ut ipse esset primus, seu Dux reliquorum.

16. Ex Cypriano, tract. ad Quirinum, citas hæc : *Petrus, quem primum Dominus elegit.* Respondeo. Eodem sensu potest intelligi Cyprianus, quo Epiphanius in Ancorato. Nempe, Petrum ex duodecim Apostolis à Christo electum esse, ut esset primus, seu Princeps aliorum. Sed esto; dicat Cyprianus, Petrum esse prius tempore electum ad Apostolatam, quam alios; non ideo dicit, Primatum Petri in eo consistere. In quo autem consistat, ex sententia Cypriani, dicendum est, cap. 4.

17. Ex

17. Ex Clemente epist. 1. ad Iacobum fratrem Domini, citas hæc: *Petrus, qui fuit primitia electionis Domini, primus Apostolorum.* Respondeo. Fuit primus Apostolorum eo sensu, quo jam sæpè dictum est. Fuit primitiæ electionis Domini, quia Christus Dominus primum fructum electionis suæ percepit ex Apostolo Petro. Nam ille primus omnium confessus est divinitatem Christi; primus omnium dixit, *Eccen nos reliquimus omnia*; primus omnium promulgavit Evangelium. Quæ omnia fusiùs explicanda sunt infra, ubi de prærogativis Petri agendum est.

18. Ex Hilario in Matth. can. 7. citas hæc: *Petrus primus credidit, & Apostolatus est Princeps.* Respondeo. Nihil contra nos. Esto, primus crediderit, quia primus dixit, *Tu es Christus filius Dei vivi*; an ideo primus ad Apostolatatum vocatus est? Non sequitur. Similiter, esto, sit Princeps Apostolatus; an ideo ante alios Apostolus factus est? Nec hoc sequitur. Est quidè ante alios factus Princeps Apostolorum; sed non est factus ante alios Apostolus.

19. Ex Gregorio lib. 2. super Ezechielem, homil. 8. citas hæc: *Non ad memoriam revocat, quòd primus in Apostolatatum vocatus sit.* Respondeo. Gregorius ibi commendat humilitatem Petri, quòd cum ipse esset caput & Princeps Apostolorum; tamen æquo animo passus sit, reprehendi se à Paulo, qui erat illius subditus. Itaque illa verba, *primus in Apostolatatum vocatus est*, non habent hunc sensum, *primus ad Apostolatatum*

*latum vocatus est; sed hunc potius, in principem Apostolatus vocatus est: vel, ad Principatum Apostolatus vocatus est. Quem sensum ibidem explicat his verbis: Quatenus, qui primus erat in Apostolatus culmine, esset primus & in humilitate, Et paulo post pergit: Ecce, à minore suo reprehenditur, & reprehendi non dedignatur. Non ad memoriam revocat, quod primus in Apostolatuum vocatus sit. Ubi Paulum vocat minorem, respectu Petri: Et Petrum ait, primum in Apostolatuum vocatum esse, id est, primum esse in culmine Apostolatus, ut antè dixerat.*

20. Ex Hieronymo Epist. 13. ad Paulinũ, citas hæc: *Paulus Apostolus novissimus in ordine, primus in meritis est.* Hinc ita concludis: Ergo è contrario sensu, quia Petrus fuit primus in ordine vocationis, hinc Primatum hunc ordinis est consequutus. Respondeo. Prius tibi probandum est, Petrum eo sensu fuisse primum in ordine vocationis, quo Paulus fuit novissimus. Concedo, Paulum fuisse novissimum, ratione temporis. Nego, Petrum fuisse primum, ratione temporis. Nondum hoc probasti. Ego ex Evangelio contrarium ostendi.

21. Ex Augustino serm. 47. de SS. Petro & Paulo, citas hæc: *Beatus Petrus, primus Apostolorum: Beatus Paulus, novissimus Apostolorum.* Et mox subdis ex tuo: *in quo ergo Paulus novissimus, in eo Petrus primus; nempe in ordine vocationis.* Respondeo. Nusquam invenio sermonem 47. de sanctis Petro & Paulo, Invenio qui-

quidem tres sermones de festo Apostolorum Petri & Pauli, nempe serm. 106. & 107. & 108. inter sermones de diversis: sed verba à te citata, non invenio inter se connexa, ut tu connects; sed divisa. Nam initio sermonis 106. sic habet Augustinus: *Beatus Petrus Apostolorum primus.* Et postea serm. 108. circa finem, sic: *Ergo quid est Apostolus? Ipsum interroga: Ego sum, inquit, minimus Apostolorum.* At hinc non sequitur, eodem sensu Petrum esse primum, quo Paulus est minimus, aut contrà. Nam constat ex ipso Paulo, quo sensu ipse sit minimus, sic enim de se loquitur 1. Corint. 15. 9. *Ego enim sum minimus Apostolorum, qui non sum dignus vocari Apostolus, quoniam persecutus sum Ecclesiam Dei.* Ubi non vocat se minimum, id est, ultimum in ordine vocationis (de quo ordine tu loqueris) sed minimum, id est, indignissimum, propter sua peccata.

22. Ex Cyrillo lib. 4. in Joann. cap. 28. citashæc: *Responsio ei committitur, quia ordine major erat.* Respondeo. Apertam injuriam facis Cyrillo. Tibi probandum est, Petrum fuisse majorem ordine temporis. Vel, prius tempore vocatum esse, quam reliquos Apostolos. Hoc non dicit Cyrillus. Non enim loquitur de ordine temporis, sed de ordine prælationis & prudentiæ. Verba ejus sunt hæc: *Respondit ergo Simon Petrus: Domine, ad quæ ibimus? Per unum, qui præerat, omnes respondent.* Et paulo post: *Decet enim non omnes confuse, nec prosilientes*

tes imprudenter, quasi rapta uti oratione: Sed cedere iis, qui & consilio, & ordine, prapositi sunt. Et statim subdit: Opus igitur erat divinitus comprobata prudentia, soli responsionem committere illi, qui ordine major erat. Vel, ut antè dicebat, qui praeerat. Nam inter illos, qui praesunt, & illos, qui subditi sunt, est quidam ordo. Unde illi superiores appellantur; hi inferiores.

23. Ex Chrysostomo homil. 2. in Epist. ad Romanos, citas hæc: *Verum, ordinis duntaxat honos est verbum id, primum; neque enim superiores partes in hoc obtinet* (Judæus supra Græcum) *quod majorem justitiam acceperit; sed in hoc solum honoratur, quod primus eam acceperit.* Unde infer, quando Cyrillus dixit de Petro, *ordine major erat*, locutum esse de ordine temporis, non de ordine potestatis aut jurisdictionis. Respondeo. Frustra est. Jam ostendi, Cyrillū loqui de ordine praelationis & prudentiæ; non de ordine temporis. Nec Chrysostomus explicat mentem Cyrilli, sed Apostoli, Rom. 1. 16. *Virtus enim Dei est, in salutem omni credenti, judæo primum & Græco.* Quærit enim, quid significet illa particula, *Primum*? Et respondet, significare ordinem temporis. Jam vide, M. Antoni, an valeat hæc consequentia; Chrysostomus dicit, judæum ordine temporis, non potestatis, præferri Græco, in susceptione fidei Evangelicæ: Ergo Cyrillus dicit, Petrum ordine temporis, non potestatis, præferri alijs Apostolis. Miscret me tui, si tam malè sani capitis es.



24. Ex eodem Chrysostomo hom. 9. citashæc: *Petrum cum dico, petram nemo in debilem, crepidinem immobilem, Apostolum magnum; primum Discipulorum, primum vocatum & primum obedientem.* Respondeo. Hoc testimoniū videtur tibi aliquo modo patrocinari; reliqua nihil, ut ostensum est. Nam illæ duæ particule, *primum vocatum, &, primum obedientem*, insinuant Petrum ante alios vocatū fuisse à Christo, & ante alios vocanti Christo obtemperasse. Si hoc demus, illud quidem sequitur, Petrum ex sententia Chrysostomi; habere prærogativam vocationis, ratione temporis. Ac non sequitur, quod tibi probandum est, Primatum Petri, ex sententia Chrysostomi, consistere in illa prærogativa, excludendo Primatum potestatis & jurisdictionis. Imò hunc Primatum vel maxime agnoscit Chrysostomus; ut cap. 4. videbimus.

25. Sed necesse non est, ut prædictas particulas accipiamus eo sensu, quo tu accipis. Nam idem Chrysostomus alibi; cum ex professo agit de vocatione Petri, disertè ait, Petrum & Andream simul vocatos esse: & illos duos fuisse primos ordine vocationis, respectu aliorum Apostolorum: non autem solum Petrum fuisse primum, respectu Andreæ & reliquorum. Sic enim loquitur hom. 14. in Matthæum: *Perpende verò & fidem & obedientiam vocatorum (Petri & Andreæ) & cognosces, quam dulcis sit piscatio: siquidem in medio ipsius operis constituti, cum illū audissent jubentem, nihil distulerunt,*

E

lerunt,

lerunt; nihil omnino cunctati sunt. Non dixerant, Revertemur domum, loquemur propinquis: sed cuncta illico relinquentes, fecerunt, quod Heliseus quoque sub Helia legitur impleſſe. Hic nihil diſcernit inter vocationem ac obedientiam Petri & Andreæ; ſed ambos ſimul vocatos, ſimul obediētes fuiſſe oſtendit. Et merito. Nam id clarè conſtat ex Evangelio Matth. 4. 18. *Ambulans Jeſus juxta mare Galilææ, vidit duos fratres Simonem & Andream: Et ait illis: Venite poſt me, & faciam vos fieri piſcatores hominum. At illi continuo, relictis retibus, ſecuti ſunt eum.* Ecce, ſimul viſi, ſimul vocati, ſimul ſecuti. Et cū nullus alius ante illos vocatus ſit, neceſſe eſt, illos duos primos vocatos eſſe; etiam ex ſententiâ Chryſoſtomi. Nec hoc pugnat cum eo, quod ante dixit, Petrum primum vocatum eſſe. Nam ſi ambo primi vocati ſunt, reſpectu reliquorum; conſequens eſt, Petrum eſſe unum ex duobus primis; & hoc ſenſu primum appellari poſſe. Quod etiam dico de Andrea. Nihil ergo proficiſ ex Chryſoſtomo. Si hanc meam explicationem non admittis, cogeris fateri, Chryſoſtomum ſibi ipſi contradicere. Si ita eſt, cur non liceat mihi unam partem contradictionis ſequi, ſicut tu alteram ſecutus es?

\* \* \*

De

## De Primatu Charitatis.

26. **H**Actenus de Primatu vocationis, quem ostendi, fictitium esse. Sequitur Primatus Charitatis, de quo (lib. 1. cap. 5. n. 14.) sic scribis: *Petrus primus merito dicitur, quia ceteros virtute, & potissimum charitate erga Christum superavit.* Hanc posteriorem partem de excellentia charitatis probas dupliciter. Primò, quia Christus, qui erat conficius, dixit Petro, *Diligis me plus his?* Secundò, quia multa extant signa ferventis illius charitatis; ut quòd Petrus ambulaverit super aquas, ut citius ad Christum perveniret: quòd exerto gladio, conatus sit Christum defendere: quòd ex eodem affectu Malchi auriculam amputaverit: quòd ex fervore dixerit, *etiam si oportuerit memòri tecum, non te negabo*: quòd etiam dixerit, *Tu mihi lavas pedes?* quòd dixerit, *Abstine à te Domine: Non erit tibi hoc*, id est, non morieris.

27. Respondeo. Tu pugnas tecum ipse, ut soles. Nam alibi asseris hæc duo. Primò, quòd Petrus habuerit suum Primatum, antequam illi dictum esset à Christo, *Tu es Petrus, & tibi dabo claves* (lib. 1. cap. 5. n. 3. in fine) Secundò, quòd reliqui Apostoli magnum honorem detulerint Petro, propter Primatū; & Petrus agnoverit se ab alijs propter Primatū honorari (cap. 9. n. 2. in fine) Unde sequitur,

Primatum Petri, & ipsi Petro, & alijs Apostolis fuisse cognitum. Quod certè de Primatu charitatis dici non potest. Vel enim loqueris de interno affectu charitatis, vel de externo signo, quo se prodit internus affectus. Si de interno affectu, is non potuit esse notus vel ipsi Petro, vel alijs Apostolis. Nam neque Petrus sciebat, quantus affectus charitatis esset in Joanne; nec Joannes, quantus esset in Petro. Et sic de cæteris. Verissimū enim est, quod Theologi dicunt: *Ecclesia non judicat de occultis*. Dices, Christus manifestavit internum Petri affectum cum dixit, *Diligis me plus his?* Respondeo. Hoc factum est post Resurrectionem: Ergo antea saltem non fuit manifestatus. Et tamen antea, ex tua opinione, habuit Petrus suum Primatum. Habuit enim, ut tu asseris, antequam ipsi dictum esset, *Tu es Petrus*.

28. Si autem loqueris de externo signo charitatis, nec sic quidem poterant reliqui Apostoli certò cognoscere, Petrum habere Primatum charitatis. Nam illa signa, quæ à te allata sunt, non erant sufficientia ad hoc demonstrandum. Ratio est, quia Christus ferè semper reprehendit Petrum, quando hujusmodi signa exhibuit. Quod patet inductione. Nam primò, quādo ambulavit super aquas, dictum est illi, *Modica fidei, quare dubitasti?* (Matth. 14. 31.) Secundò, quando exerto gladio voluit Christum defendere, dictum est illi, *Converte gladium in locum suum. Omnes enim, qui acceperint gladium, gladio peribunt* (Matth. 26. 51.)

Ter-

Tertiò, quando dixit, *Domine, tecum paratus sum & in carcerem & in mortem ire: Et, etiam si oportuerit memor tecum, non te negabo*: responsum est illi: *Non cantabit hodie gallus, donec ter abneges nosse me.* (Lucæ 22.34.) Quartò, quando dixit, *Tu mihi lauas pedes?* Et, *non lavabis mihi pedes in aeternum*: responsum est illi, *Si non laverote nõ habebis partem mecum.* (Ioannis 13.8.) Quintò, quando dixit, *absit à te Domine, non erit tibi hoc*: responsum est illi, *Vade post me Satana; scandalum es mihi; quia non sapis ea, quæ Dei sunt, sed ea, quæ hominum.* (Matth. 16.23.) Quomodo ergo reliqui Apostoli, qui hæc audiebant, poterant certò cognoscere, Petrum charitate alios omnes antecellere? Certè, ex huiusmodi increpationibus faciliùs erat suspicari, Petrũ habere præposterum zelum, quàm syncerum charitatis affectum; & magis reprehensione, quàm laude, dignum esse.

29. Taceo, quòd D. Thomas in 1. parte. quæst. 20. art. 4. ad 3. pro sua modestia non audet definire hanc quæstionem, An Christus plus dilexerit Petrum, quàm Joannem? Item, an Petrus plus dilexerit Christum, quàm Joannes? Adfert quidem varias authorum opiniones: Quorum alij asserunt, quod Petrus plus dilexerit Christum in membris; Et ideo illi Ecclesia commissæ sit: Joannes plus dilexerit Christum in seipso; & ideo mater Christi ipsi commendata sit. Alij, quòd Petrus plus dilexerit Christum, quantum ad fervorem & promptitudinem: Joannes verò plus, quoad

familiaritatem : Alij, quòd incertum sit, uter plus dilexerit illum amore charitatis. Quid ipse? *presumptuosum*, inquit, *videtur hoc dyudicare, quia, ut dicitur Proverb. 16. 2. Spirituum ponderator est Dominus, & non alius.*

30. Quid porrò dicturus es ad auctoritatem Hieronymi lib. 1. contra Jovinianum, ubi asserit, & multis titulis probat, Joannem fuisse Christo chariorem, quàm Petrum? Quid ad Tertulliani, lib. de præscriptionib. cap. 22. ubi volens probare, Apostolos nihil ignorasse eorum, quæ ad salutem erant necessaria; sic scribit; *Latuit aliquid Petrum, adificanda Ecclesia petram dictum, claves regni cælorum consecutum, & solvendi & alligandi in cælis & in terris potestatem? Latuit aliquid Joannem, dilectissimum Domino, pectori ejus incumbentem; quem, loco suo, filium Mariæ commendavit?* Quibus verbis tribuit Petro præminentiam potestatis; Joanni prærogativam dilectionis.

31. Sed esto; Petrus plus dilexerit Christum, quàm Joannes: quòd non nego; An idcirco sequitur, Primatum Petri, quem scriptura & Patres illi tribuunt, in illa dilectionis eminentia consistere? Nunquam id probabis. At ego contrarium probabo, Primatum Petri consistere in prærogativa potestatis & jurisdictionis: idque ex scriptura, Patribus, Concilijs, aliunde, ut patebit in sequentibus capitulis. Nunc concludo hoc caput hac triplici assertionem. 1. Dubium est, An Petrus fuerit

fuerit senior omnibus alijs Apostolis, & præfertim Andrea. Non igitur Primatus Petri in prærogativa ætatis certò constitui potest.

2. Falsum est, Petrum prius tempore vocatum esse ad Apostolatam, quam ceteros. Falsus igitur Primatus, qui hoc falso fundamento nititur.

3. Incertum est apud bonos authores, An Petrus plus dilexerit Christum, quàm Joannes: Incertum igitur, an habuerit eminentiam charitatis. Et si certum id esset, quod non nego, non ideò certum, Primatum Petri in eminentia charitatis consistere.

### CAPUT TERTIUM.

#### *Verus Petri Primatus probatur ex Scriptura.*

1. **M**ulta sunt scripturæ testimonia, quibus probari solet, Petro commissam esse totius Ecclesiæ gubernationem à Christo. Ego unicum adducam, quo maximè utuntur Patres, nimirum illud Joan. 21. 17. *Pasce oves meas.* Ubi Christus committit Petro suas oves pascendas. Et quia video te, M. Antoni, hoc testimonio valde premi, & in varias contradictiones abire; singillatim explicanda sunt hæc quatuor: 1. An soli Petro dictum sit; *pasce oves meas*? 2. Quænam sint illæ oves? 3. Quid significet *pascere*? 4. An aliquid peculiare hoc loco concessum sit Petro,

præ alijs Apostolis? in his punctis consistit tota difficultas.

2. Prima igitur quæstio est: An soli Petro dictum sit, *pasce oves meas*? Affirmant Catholici. Et probant primò ex antiquis Patribus apud Bellarminum lib. 1. de Pontifice. cap. 14. Deinde ex ipso textu. Nam illi dictum est, *pasce oves meas*, à quo Christus ter quæsit, *Simon Joannis diligis me plus his*? At hoc à solo Petro specialiter quæsit. Soli ergo Petro dictum est, *pasce oves meas*. Nec opus est, pluribus argumentis id probare, cum tu idem sentias lib. 1. cap. 8. n. 1. ubi ais: *Hoc loco Christum cum ipso met Petro loqui singulariter, & ei personaliter dicere, pasce oves meas, constituo tanquam certissimum*. Igitur in hoc puncto cōvenimus; etiamsi postea incipias, tuo more, non nihil vacillare. Distinguendæ sunt tamen illæ duæ particulæ, quas fraudulenter connectis, *singulariter, &, personaliter*. Priorem concedo; posteriorem nego; Tametsi enim Christus, cum dixit, *Pasce oves meas*, soli Petro singulariter id dixerit, excludendo reliquos Apostolos, quibus id non dixit; non ideo concedendum est soli Petro personaliter dixisse, excludendo successores Petri; quia id falsum est. Non enim dixit Petro, ut privatae personæ, sed ut publicæ: sicut & illud: *ego rogavi pro te, ut non deficiat fides tua*.

3. Secunda quæstio est: Quænam oves commissæ sint Petro ad pascendum? Catholici docent, omnes Christi oves, id est, omnes fideles



fideles totius mundi illi commissos esse. Tui-  
dem asseris n. 5. his verbis : *Facile consentio sub*  
*verbo, Oves, fideles omnes indefinite totius mundi*  
*intelligi.* Rectè: sed minimè constans es. Nam  
paulo post, duo alia asseris, quæ & cum isto, &  
inter se pugnant. Unum est, omnes fideles in-  
telligi, exceptis Apostolis. Sic enim scribis n.  
6. *Illos tamen probare non possum, qui verbis illis,*  
*Pasce oves meas, Petro, etiam ipsorum Apostolorum*  
*curam censent à Christo fuisse commissam.* Alterū  
est, solos judæos seu Israëlitas intelligi. Hoc  
tradis n. 10. his verbis. *Tertiò dici potest, quod et-*  
*iam paulò antè attigi, Petro singulariter Christum*  
*dicere, Pasce oves meas, id est, Israëlitas, qui tunc*  
*solierant Christi oves.*

4. Vide obsecro, M. Antoni, quàm vagus  
& inconstans sis Nos constanter asserimus, o-  
mnes fideles etiam Apostolos, nomine ovium  
significari. Quod facile probari potest. Primò,  
authoritatè Patrum, qui unanimi consensu id  
docent. Secundò, ex verbis Christi: Nam cum  
dixit, *Pasce oves meas*, hoc voluit dicere, pasce  
gregem meum, pasce Ecclesiam meam. At re-  
liqui Apostoli, sine dubio, pertinebant ad gre-  
gem & Ecclesiam Christi. Tertiò, quia Chri-  
stus non dixit: *Pasce has oves*, aut *illas*, sed sine  
ulla restrictione, *Pasce oves meas.* Ergo o-  
mnes suas oves illi commisit; Ergo & Aposto-  
los. Quod eleganter expressit S. Bernardus  
lib. 2. de consideratione ad Eugenium cap. 8.  
*Tues, inquit, cui claves tradite, cui oves credite*  
*sunt. Sunt quidem & alij cæli janitores, & gregum*  
*E s* *pasto-*

*pastores, sed tutantur gloriosius, quanto & differentius utrumque praeter ceteris nomen hereditasti. Habent illi sibi assignatos greges, singuli singulos: tibi universi crediti, uni unus: Nec modò ovium, sed & pastorum tu unus omnium pastor. Unde id proberem, quæris? Ex verbo Domini; Cui enim, non dico, Episcoporum, sed etiam Apostolorum, sic absolutè & indiscrètè tota commissa sunt oves? Si me amas Petre, Pasce oves meas. Quas? Illius vel illius populi, civitatis aut regionis, aut certi regni? Oves meas, inquit. Cui non planum, non designasse aliquas, sed assignasse omnes? Nihil excipitur, ubi distinguitur nihil. Plura Patrum testimonia citabo sequentibus capite.*

5. *Objicis: Apostoli non indigebant Petro Pastore. Ad quid obsecro? Fortasse ad ipsorum confessiones audiendas? An ad ipsos docendos & instruendos? An ad corrigendos & puniendos? Respondeo. Vel ironicè hæc quæris, vel seriò. Si ironicè, non es dignus responso: Si seriò, dicam seriò quod res est. Apostoli indigebant Petro Pastore in eum finem, ob quem Christus voluit illum esse Pastorem. Nimirum ut in Ecclesia esset unum Caput visibile, cui reliqui omnes obedirent; & sic servata & stabilita unitate capitis, tolleretur occasio schismatis & dissensionis, quæ faciliè oritur in communitate, in qua non est unum caput, cui ceteri adhæreant, & subiecti sint. An autem indiguerint pastore, propter confessionem, inquisitionem, aut punitionem, parùm ad rem facit. Non enim necesse est, omnes & singulos subdi-*

subditi iusmodi præsidij indigere. Utinā nulli. Utinā omnes à peccato, ignorantia, & reatu immunes essent. Non ideo desinerent esse subditi.

6. Tertia quæstio est: Quid significet illa vox *pascere*: Hic iterum inconstans es. Nam n. 4. ais: *posset aliquis nec fortasse immerito, ad solam pasturam, id est, prædicationem restringere.* Et citas illud Bernardi lib. 4. de consideratione. c. 3. *Evangelizare, pascere est.* At n. 5. longè aliter: *Contineat, inquis, in se verbum pascendi quamcunque & quantamcunque authoritatem & potestatem, non pugno.* Item, *non pugno, si verbo pascendi tota potestas Ecclesiastica claudatur.* Nihil certum fixumq; apud te est, mi homo. Dic rotundè & sine ambagibus, quid est *pascere*: Relinque illud, *fortasse*: illud, *non pugno*: illud, *quamcunque & quantamcunque.*

7. Nos (sine *fortasse*) asserimus, *pascere* idem esse, quod officium pastorale exercere. Nemo ambigit. Officium autem pastorale includit tres actus principales, ut ex scriptura patet. Primus est, pabulum præbere, & ad pascua ducere, Ezech. 34. 2. *Va pastoribus Israel, qui pascebant semetipsos: Nonne greges à pastoribus pascuntur.* Et Psal. 22. 1. *Dominus regit me* (Græcè est, *pascit me*). & *nihil mihi deerit: in loco pascuæ ibi me collocavit.*

8. Secundus est, infirmas oves sanare, dispersas colligere, errantes reducere, contra lupos defendere, Ezech. 34. 5. *Dispersæ sunt oves meæ, eo quod non esset pastor: & factæ sunt*

in

*in devorationem omnium bestiarum agri, & dispersa sunt. Erraverunt greges mei, & non erat, qui requireret. Et infra v. 15. Ego pascam oves meas, & ego accubare faciam, dicit Dominus Deus. Quod perierat, requiram; & quod abjectum erat, reducam; & quod confractum erat, alligabo; & quod infirmum fuerat, consolidabo; & quod pingue & forte, custodiam,*

9. Tertius est, præesse, regere, gubernare, judicare, discernere, castigare. 2. Reg. 5. 2. *Tu pascis populum meum Israel*, id est, gubernabis, ut patet ex verbis sequentibus: *Et tu eris Dux super Israel.* Et Psal. 2. 9. *Reges eos in virga ferrea.* Græcè est, ποιμαίνεις αὐτούς, id est, pascis eos. Et Ezech 34. 17. *Vos autem greges mei, hæc dicit Dominus Deus: Ecce ego judico inter pecus & pecus arietum & hircorum.* Et v. 20. *Ecce ego ipse judico inter pecus pingue & macilentum.*

10. Unde sic concludo: Christus cum dixit Petro, *Pasce oves meas*, commisit illi officium pastorale, respectu omnium Christianorum (nullum enim, ut dixi, excepit.) Ergo dedit illi potestatem exercendi officium pastorale. Officium autem pastorale est, oves ad pascua ducere, infirmas curare, dispersas colligere, inter sanas & vitiosas judicare, contumaces cogere & ad ovile compellere, lupos arcere (quæ omnia, ut patet ex scripturis citatis, & potissimum ex Ezechiele, non tantum intelliguntur de pastore brutarum ovium, sed multo magis de Pastore fidelium.) Ergo Petrus habuit potestatem hæc omnia præstandi, respectu omnium

mnium Christianorum. Potuit igitur, ratione officij pastoralis, ubique Evangelium prædicare, Sacramenta administrare, peccātes corrigere, errantes reducere, inter veram & falsam doctrinam discernere, ad unitatem Ecclesiæ compellere, hostes arcere: sive per se, sive per alios sibi subordinatos. Et sic explicant antiqui Patres, quorum verba referemus sequenti capite.

11. Quarta quæstio est; An aliquid peculiare concessum sit Petro per illa verba, *Pasco oves meas*, præ alijs Apostolis? Tu ais, nihil præ alijs concessum illi esse: Alios non minus fuisse Pastores, quàm Petrum. Sic enim scribis lib. 1. cap. 8. n. 3. *Quamvis verissimum sit, illa verba, Pasce oves meas, seorsim soli Petro fuisse dicta, etiā alijs Apostolis presentibus, nihilominus in solo Petro ea effectum suum habuisse, dici nullo modo potest. Nonne ipsemet Christus dedit quosdam quidē Apostolos, alios Doctores & Pastores? Non ergo solus Petrus Pastor. Et rursum n. 4. Prius omnibus Apostolis simul cum Petro dictum est à Christo: Sicne misit me Pater, & ego mitto vos: Et postea dictum est Petro, Pasce oves meas. Neque video, quomodo affirmari possit aliquid amplius dari Petro seorsim his verbis, quàm datum fuerit ceteris omnibus illis. Et iterum n. 5. Illud contendo, nullam verbo pascēdi contineri potestatem, qua non melius & amplius contineatur in illis Christi dictis: sicut misit me pater, & ego mitto vos. Et illis: Euntes docete &c.*

12. Hic plane exorbitas, mi Antoni. Et pugnas non solum cum antiquis Patribus, qui docent

docent Petro plus datum esse, quàm reliquis Apostolis; sed etiam cum Evangelio & rectâ ratione. Nam si Petro nihil datum est amplius per illa verba, *Pasce oves meas*, quàm quòd antea datum erat per illa: *Sicut misit me Pater, & ego mitto vos*; jam nihil novi accepit per illud; *Pasce*, quod antea non habuerit meliori & ampliori modo (ut tu interpretaris) per illud, *Mitto vos*. Quid ergo necesse fuit, Christum uti tot ceremonijs circa Petrum, si nihil peculiare voluit illi dare? Quorsum illa trina interrogatio: *Simon Joannis diligis me plus his? Simon Joannis diligis me? Simon Joannis amas me?* Quorsum triplex illa commissio, *Pasce agnos meos, Pasce agnos meos, Pasce oves meas?* Otiosè hæc omnia facta esse necesse est, si nihil datum est Petro, quod antea datum non fuit. Imo, si quod antea meliori & ampliori potestate datum fuit, postea deteriori & restrictiori concessum est.

13. Ais, nihil otiosè hîc factum esse, sed multa mysteria in hoc uno facto contineri. Primum, inquis, *mysterium est unitatis collegij Apostolici*, ne ipsum collegium dissolveretur. Cum enim Petrus solus ex duodecim Apostolis negasset Christum expresse, poterant reliqui meritò illum excludere, vitare, abjicere, & consequenter dissolvere unitatem illam collegij Apostolici. Igitur, ne hoc fieret, dictum est Petro, coram alijs Apostolis, *Pasce oves meas*, id est, mane in collegio Apostolorum, & fac quod illi faciunt. Pro hac

hac interpretatione citas Optatum Milevitanum & Augustinum. Sed malâ fide. Nam illi duo, sicut & alij Patres, multo aliter explicant hoc mysterium unitatis. Ajunt in eo consistere, quod Christus voluerit servare unitatem in Ecclesia, quæ vix servari potest, nisi constituto uno capite, cui reliqui omnes subiecti sint. Itaque Petrum à Christo constitutum esse, cum illi dictum est, *Pasce oves meas*, id est gubernare Ecclesiam meam.

14. Audiamus Patres. Optatus lib. 2. contra Parmenianum, non longè à principio, sic scribit: *In qua (Romana cathedra) sedit omnium Apostolorum caput, Petrus. Unde & Cephas appellatus est. In qua una cathedra, unitas ab omnibus servaretur, ne ceteri Apostoli singulas sibi quisque defenderent: Ut jam schismaticus & peccator esset, qui contra singularem cathedram, alteram collocaret. Ergo cathedra unica est &c.*

15. Augustinus lib. de Pastorib. cap. 13. Imo verò & in ipso Petro unitatem commendavit. Multi erant Apostoli, & uni dicitur, *Pasce oves meas*. Quod clarius explicat Hieronymus lib. 1. contra Jovinianum, cum ait: *Propterea inter duodecim unus eligitur, ut capite constituto, schismatis tollatur occasio. Et Cyprianus lib. de simplicitate Prælatorum: Petro post resurrectionem suam dicit, Pasce oves meas. Et quamvis Apostolis omnibus post Resurrectionem suam, parem potestatem tribuat, & dicat: Sicut me misit Pater, & ego mitto vos: Tamen ut unitatem manifestaret,*

staret, unitatis ejusdem originem ab uno incipientem, sua auctoritate disposuit. Hinc apparet, non sincerè, sed fraudulentè, à te citatos esse Patres, pro mysterio unitatis, quod commentus es.

16. Secundum mysterium sic explicas (ibidem n. 9. in fine) *Petro soli dictum est à Christo, Pasce oves meas, quia tum Petrus erat figura, & representabat omnes Ecclesie Prælatos; Et ut omnium procurator generalis omnium nomine accepit curam pastorem.* Et producis Augustinum, lib. de Agone Christiano. cap. 30. & alibi. Sed & tibi, & Augustino contrarius es. Tibi quidem, quia paulo antè dicebas, Christum ideo dixisse Petro, coram alijs Apostolis, *Pasce oves meas*, ut alij non excluderent eum à suo collegio propter peccatum negationis, sed scirent restitutum esse in suum locum. Hic dicis, ideo factum esse, quia Petrus representabat omnes Ecclesie Prælatos, & erat generalis Procurator, qui omnium nomine accipiebat curam pastorem. Hæc inter se pugnant. Nam si Christus loquebatur cum Petro, tanquam cum privato reo, qui propter privatum peccatum excludendus erat à collegio Apostolorum; certè nō loquebatur cum illo, tanquam cum generali Procuratore, qui omnium nomine curam pastorem accipiebat. Non enim cohærent hæc duo: Petro tanquam privato reo dicitur, *Pasce oves meas*. Et, Petro tanquam generali Procuratori dicitur, *Pasce oves meas*. Similiter Augustino contrarius es. Nam ille, loco à te citato, asse-



asserit, Petro, ut totam Ecclesiam repræsentā-  
ti, dictum esse, *Pasce*. Tu asseris lib. 1. cap. 8. n. 1.  
Petro *singulariter & personaliter* dictum esse,  
*Pasce*. De qua repugnantia dicam iterum cap.  
7. §. 21.

17. Deinde quæro ex te: Si Petrus fuit ge-  
neralis Procurator omnium Prælatorum, an  
fuerit omnium Prælatorum absolutè, etiam  
Apostolorum; an omnium, exceptis Aposto-  
lis. Si prius, necesse est, Apostolos non per se,  
sed per Procuratorem accepisse curam pasto-  
ralem. At hoc antea negasti, asserens, eos ac-  
cepisse per se, quando ipsis dictum est, *Mitto*  
*vos*. Si posterius, sequitur Petro plus aliquid  
datum esse, quàm alijs Apostolis; quod ante  
negasti. Nam illi datum est, ut esset generalis  
Procurator omnium Prælatorum Ecclesiæ;  
quod alijs non fuit datum.

18. Tertium mysterium sic proponis: *Ter-*  
*tio discipote est, Petro singulariter Christum dicere;*  
*Pasce oves meas, hoc est, Israelitas, qui tunc soli e-*  
*rant Christi oves.* Unde & dicebat *Matth. 10. 6.*  
*Ite ad oves, quæ perierunt, domus Israel.* & *Matth.*  
*15. 24. Non sum missus, nisi ad oves, quæ perierunt,*  
*domus Israel.* At ego hîc nullum video myste-  
rium, sed mendacium & ignorantiam. Men-  
dacium est, solos Israelitas fuisse tunc Christi  
oves. Nam ipsemet dixit, *Joan. 10. 16. Alias o-*  
*ves habeo, quæ non sunt ex hoc ovili, & illas oportet*  
*me adducere.* Ubi apertè loquitur de genti-  
libus. Igitur non soli Israelitæ, sed etiam gen-  
tiles erant ipsius oves, Et alij quidem jam con-

versi ad fidem Christi, ut tres Magi, qui illum in stabulo adoraverant : alii deinceps convertendi. Miror ignorantiam tuam, si hæc nescis.

19. Sed esto: verum sit, quod falso asseris: Quid obsecro hîc mysterii est: Quæram enim, quod suprà quæsi, si Petro nihil novi collatum est per illud, *Pasce*, quod non prius collatū erat per illud, *Mitto vos, & Euntes in mundum universum* : Quid necesse fuit iterum dicere, *Pasce oves meas*? Tu respondes; quia per oves intelliguntur soli Israelitæ. Magnum scilicet mysterium. Imo magnum delirium. Nam si antea dictum est omnibus, *Ite in mundum universum*, & per hoc acceperūt potestatem prædicandi Evangelium omnibus Gentibus; certè cum postea dictū est Petro, *Pasce oves meas*, id est solos Israelitas, necesse est, priorem potestatem, quæ erat amplissima, revocatā esse, & ad solos judæos restrictam. Itane vero?

20. Testimonia scripturæ, quæ adducis, vel non intelligis, vel malitiosè abuteris. Nam initio quidem dictum est Apostolis: *Ite ad oves, quæ perierunt domus Israel*: sed postea laxata fuit potestas, cum dictum est, *Euntes in mundum universum &c.* Illud porro, *Non sum missus, nisi ad oves, quæ perierunt, domus Israel*, sic debet intelligi, Christum non esse missum, ut suam præsentiam corporalem, prædicationem & miracula exhiberet, nisi ad Judæos; quia illis solis, propter fidem Abraham, facta est promissio de adventu Messia, ut rectè no-

rat

tar Augustinus tract. 31. in Joannem, circa finem. Nihilominus erat etiam missus ad gentiles, ut suo sanguine illos redimeret, & per prædicationem Apostolorum ad suum ovile perduceret. Rom. 10. 11. *Non enim est distinctio Judæi & Græci: nam idem Dominus omnium.* Et 2. Corinth. 5. 15. *Pro omnibus mortuus est Christus.* Et 1. Timoth. 2. 6. *qui dedit Redemptionem semetipsum pro omnibus.*

21. Quartum mysterium est: *Christus ideo seorsim dixit Petro, Pasce oves meas, ut eidem Petro & quasi satisfactionem injungeret erroris trinae negationis, & simul etiam eidem animos adderet, ne suis fædis negationibus nimium confusus, in barathrum desperationis laberetur.* Pro hoc mysterio citas Augustinum, Cyrillum, Nazianzenum & Chrysostomum. Ineptè omnia. Primò, quia pastoralis cura ovium Christi, non est satisfactio erroris vel culpæ, sed est dignitas Prælati Ecclesiæ. Et, si verum est, quod in secundo mysterio dixisti, Petrus nomine omnium Prælatorum, tanquam generalis Procurator, accepit hanc dignitatem, seu curam pastorem. At absurdum est dicere, Petrum nomine omnium Prælatorum, satisfecisse pro suo errore trinae negationis. Nā trina negatio erat solius Petri, non aliorum Apostolorum aut Prælatorum.

22. Deinde, nullum erat periculū desperationis, ut tu invidiose fingis. Nā antequā Christus diceret Petro, *Pasce oves meas*, multa alia præcesserant, quæ ad depellendā desperationē abundè sufficerent, Primò, quia Christus, statim

F 2

post

post peccatum negationis, benignè aspexit Petrum. (Lucæ 22. 61.) Secundò, ex hoc aspectu secuta est vera contritio & pœnitentia Petri. (Matth. 26. 75. *Et egressus foras, flevit amare.*) Tertiò, post Resurrectionem sæpè apparuit Petro: semel quidem soli, (Luc. 24. 34.) Deinde, Petro & alijs simul (Ibid. v. 36.) Quartò, ter dixit illi & alijs Apostolis, *Pax vobis* (Joan. 20. 19. & seqq.) Quintò, dixit illi & alijs, *Accipite Spiritum sanctum. Et, Euntes docete omnes gentes.* Et, *Ecce ego vobiscum sum omnibus diebus usque ad consummationem seculi.* Quibus omnibus ita confirmatus fuit Petrus, ut in piscatione, quæ facta est post Resurrectionem, cum magna fiducia miserit se in mare, ut ad Christum in litore expectantem, natando citius perveniret, quam alij navigando, (Ioann. 21. 7.) Et tu, post hæc omnia, fingis barathrum desperationis? Magnam injuriam illi facis.

23. Patres, quos citasti, nō asserunt, quod tu asseris. Primò, quia nullam faciunt mentionem desperationis. Secundò, nec ajunt, satisfactionem seu compensationem, quæ Petro injecta est, propter peccatum trinæ negationis, consistere in eo, *Pasce oves meas*, ut tu comminisceris; sed in eo, *Diligis me plus his?* Nam quia Petrus ter Christum negaverat ex timore, vicissim exigit ab illo Christus trinam confessionem amoris. Sic enim scribit Augustinus (quem tu citas) tract. 123. in Joannem: *Redditur negationi trina terna confessio.* Et serm. 49. de verbis Domini: *Ut trina confessione amoris,*  
*deleteret*

*deleteret trinam negationem timoris. Eodem modo Cyrillus (quem etiam adducis) lib. 12. in Joannem cap. 64. Quoniam Petrus, inquit, ter in tempore passionis negavit, jure nunc ab eo terna dilectionis confessio petitur, ut terna negatio aequali confessionis numero compensetur. Igitur hæc tria hic distinguenda sunt: 1. trina negatio, quæ est peccatum. 2. trina confessio, quæ est compensatio seu satisfactio pro peccato. 3. pastura ovium, quæ est præmium & dignitas Ecclesiastica.*

24. *Quintum mysterium est: Christus ideo cum solo Petro locutus est, & seorsim illi pasturam ovium commendavit, quia sicut ipse præcipuus erat ex undecim; ita præcipuam curam prædicationis ipsi commisit, qui maximè omnium, qui tunc aderant, debebat in ipsius Domini vinea laborare. Pro hoc mysterio citas Leonem, Gelasium, Nicolaum & Lanfrancum.*

25. *Hic aliquid verè asseris ex Patribus, aliquid affingis ex tuo capite. Verum est, Petrum fuisse præcipuum Apostolorum, & pasturam ovium illi commendatam: Falsum est, illam Petri eminentiam positam fuisse in eo, quòd maximè omnium, qui tunc aderant, debuerit in vinea Domini laborare. Hoc enim intelligis de labore itineris, prædicationis, & adversitatis, in quo constat Paulum præ cæteris excelluisse (2. Corinth. 11. 23.) Et ideo, ut relinqueres Paulo hanc prærogativam, dixisti, Maximè omnium, qui tunc aderant.*

26. *De hoc labore nihil dicunt citati à te*

Patres. Nam Leo Epist. 87. ad Episcopos Provincia Viennensis, sic scribit : *Cui, cum præ cæteris solvendi & ligandi potestas tradita sit, pascendarum tamen ovium cura specialius mandata.* Et serm. 1. de Ascensione: *Beato Apostolo Petro supra cæteros, post regni claves ovilis Dominici cura demandatur.* Hic notandæ sunt istæ particulæ, *Præ cæteris*, &, *supra cæteros*, quæ non significant, ut tu falso asseris, Petrum præ cæteris vel supra cæteros debuisse laborare, excepto Paulo: Sed illi præ cæteris & supra cæteros traditam esse potestatem ligandi, & demandatam curam Ecclesiæ. Quod etiam asserunt reliqui Patres à te citati.

27. Vide nunc, Marce Antoni, quid mysterii lateat in tuis mysteriis, quæ lectori obtrudis. Nihil aliud ex illis colligo, nisi tuam inconstantiam, mendacium, contradictionem. Deinceps videamus, quid antiqui Patres, quorum autoritatem simulas te magnificare, sentiant de Primatu Petri. Ne tamen exiis, quæ à te allata sunt, videar aliquid præceteruisse, respondendum est ad illud, quod objicis ex Apostolo, Ephes. 4. 11. *Et ipse dedit quidem quosdam Apostolos, quosdam autem Prophetas, alios verò Evangelistas, alios autem Pastores.* Hinc infer, non solum Petrum fuisse Pastorem, sed etiam alios. Facilis responsio. Plures sunt Pastores particularium Ecclesiarum: Unus est pastor Ecclesiæ universalis, nempe Christus, & ejus loco, Petrus, vel Successor Petri. Unde vocatur Pastor Pastorum, ut supra

præ dixi ex Bernardo, & cap. sequenti iterum dicturus sum.

CAPUT QUARTUM.

*Primatus Petri probatur ex Patribus.*

1. **A**ntiqui Patres tam clarè, disertè, & rotundè loquuntur de Primatu Petri, ut clariùs, disertius, & rotundiùs loqui non possint. Nam aliqui expressè vocant illum *Vicariù Christi*, ut Ambrosius ad cap. 24. Lucæ. Anselmus ad cap. 16. Matthæi. Bernardus lib. 2. de consideratione ad Eugenium. Genadius Scholarius, de Primatu Papæ. Sect. 2.

Alii *Caput Ecclesiæ*, ut Hieronymus. in Psal. 13. Chrysostomus homil. 11. in Matthæum, Philo Carphatius in cantica.

Alii *Caput fidelium & Pastorem Gregis dominici*, ut Augustinus (vel quisquis autor est) in lib. quæstionum Veteris ac Novi Testamenti, quæst. 75.

Alii *Caput omnium Apostolorum*, ut, Optatus Milevitanus lib. 2. contra Parmenianum, Cyrillus Alexandrinus lib. 12. in Joannem cap. 64.

Alii *Principem Apostolorum*, ut Cyrillus Hierosolymitanus, catech. 2. & 11. Basiliius in Proœmio præceptionum latius disputatarū, Hieronymus in catalogo scriptorum Ecclesiasticorum.

Alii *Pastorē pastorū*, ut Eucherius Lugdunē-

lis in vigilia S. Petri, Bernardus lib. 2. de consideratione ad Eugenium.

Alij *Coryphaum Apostolorum*, ut Dorotheus Tyrius in Synopsi, Isidorus Pelusiota lib. 1. Epist. 142. Andreas Cæsariensis ad cap. 13. Apocalypsis.

Alij *verticem Apostolorum*, ut Origenes Homil. 2. in diversos locos Novi Testamenti, Chrysostomus in Homil. in Petrum Apostolū & Heliam Prophetam.

Alij *Apicem Apostolorum*, ut Cyrillus Alexandrinus lib. 14. thesauri cap. 2.

Alij *Antesignanum Apostolorum*, ut Isidorus Pelusiota lib. 2. epist. 58.

Alij *Petram & Crepidinem Ecclesie Catholicae, & recte fidei fundamentum*, ut Synodus Chalcodonensis. Act. 3.

Alij *Principem Ecclesie Christianorum*, ut Ephrem Syrus, serm. de transfiguratione Domini.

Alij *Ducem Discipulorum Christi*, ut Epiphanius Hæresi 51.

2. Ecce, qui & quanti tituli soli Petro præ alijs tribuuntur. Quos tu quidem lib. 1. cap. 4. & 5. agnoscis, quia negare non potes; sed tamē respondes hoc modo: 1. Titulum Vicarij perfectissimē convenire Spiritui sancto, quem Christus suo loco misit post Ascensionem. 2. Eundem convenire etiam Apostolis, sed nō magis Petro, quā alijs. 3. Titulum Principis Apostolorum, communem esse Petro & Paulo. 4. Reliquos titulos, quotquot sunt, concessos



fos esse Petro, propter Primatum ætatis, vocationis & charitatis; non autem propter Primatum potestatis aut jurisdictionis. Hæc tria posteriora discutienda sunt. Nam primum, de Spiritu sancto, jam antè refutatum est.

3. Prima ergo quæstio est : An omnes Apostoli æquè fuerint Vicarij Christi, ita ut Petrus in hoc officio, nullam prærogativam habuerit præ alijs? Tu affirmas cap. 4. n. 3. & seqq. at falsò. Nam etsi reliqui Apostoli fuerint etiam Vicarij Christi (quod non nego) non tamè ex officio fuerunt illius Vicarij in regimine totius Ecclesiæ, sicut Petrus, Petro rota Ecclesiæ, totum ovile, omnes Christi oves commissæ sunt; reliquis non item. Quod tametsi præcedenti capite satis probatum sit, hîc tamen obiter probandum est ex Patribus, quorum auctoritate contra nos pugnas.

4. Igitur Anselmus Archiepiscopus Cantuariensis (quem Anglia meritò veneratur) ad cap. 16. Matthæi, sic scribit: *Eam potestatem, ideo uni Petro concessit specialiter, ut ad unitatem nos invitaret. Ideo enim eum Principem Apostolorum instituit, ut Ecclesia quasi unum principalem Vicarium Christi haberet, ad quem diversa Ecclesiæ membra recurrerent, si forte inter se dissentirent. Quoniam si diversa essent capita in Ecclesia, unitatis vinculum rumpetur per diversa schismata. Quid clarius dici poterat? aut, quæ efficacior ratio ad persuadendum adhiberi?*

5. Et Sanctus Bernardus lib. 2. de consideratione ad Eugenium: *Inde est, quòd Petrus alte-*

*ra vice, instar Domini, gradens super aquas, unicum se Christi Vicarium designavit, qui non uni populo sed cunctis praeesse deberet.* Ecce, Petrum vocat unicum Christi Vicarium, non quòd reliqui Apostoli non fuerint Vicarij, sed quod non fuerint generales Vicarij, respectu totius Ecclesiae, sicut Petrus. Plura testimonia paulo post citabo.

6. Sed objicis alios Patres. Primo Augustinum lib. 2. contra Gaudentium, cap. 12. ubi citans illud Christi ad Apostolos, Act. 1. 8. *Eritis mihi testes in Jerusalem, & in totam Judaeam & Samariam, & usque ad terminos terrae*, sic scribit; *Hoc tanto tenacius, quanto posterius audientium mentibus fixit. Hanc sponsam suis amicis sponsus abiens commendavit.* Ex his verbis colligis primò, Christum in suo discessu ex hoc mundo, commisisse Apostolis officium prædicandi Evangelium in totum mundum. Secundò, omnes & singulos Apostolos indifferenter accepisse curam totius mundi, absque ulla limitatione. Tertiò, Ecclesiam, quæ Christi sponsa est, æquè omnibus Apostolis, tanquam Vicarijs, à Christo commendatam. Quartò, Petro nihil amplius præ cæteris collatum esse.

7. Respondeo. Erras primò in citatione. Augustinus non habet illa verba, loco à te citato, sed lib. 1. cap. 20. Deinde erras in re ipsa: nam etsi eo loco & tempore nihil peculiare Petro collatum sit, præ alijs Apostolis, tamen jam antea fuerat illi collata Præfectura totius

tius ovilis Christi, per illa verba, *Pasce oves meas*. Et præterea, firmitas seu constantia fidei in ipso, & successoribus, per illa, *Ego rogavi pro te Petre, ut non deficiat fides tua*. Neque necesse est, omnia uno loco & tempore conferri. Alioqui sequeretur, Apostolis nihil aliud collatum esse à Christo, quàm officium prædicandi; non autem officium baptizandi, & remittendi peccata. Nam in suo discessu ex hoc mundo, quando dixit, *Eritis mihi testes in Jerusalem*, non fecit mentionem baptismi aut clavium, sed tantum prædicationis Evangelij.

8. Quòd addis, Christum in discessu suo, omnibus & singulis Apostolis indifferenter dedisse curam totius mundi, absque ulla limitatione, falsum est. Nam, ut dixi, per illa verba, *Eritis mihi testes*, solum commisit illis officium prædicandi; non autem officium gubernandi Ecclesiam: Ergo ex illis verbis non potest colligi, omnes Apostolos in gubernatione Ecclesiæ fuisse æquales. Deinde, sensus verborum Christi non est, ut singuli Apostoli, nullo ordine aut respectu, prædicarent Evangelium per totum terrarum orbem (quia hoc moraliter fuisset impossibile) sed ut singuli, facta distributione, singulas partes peragrarent; Et sic ab omnibus, non tamen à singulis, Evangelium toto orbe promulgaretur. Idque fieret, partim per ipsos Apostolos, partim per ipsorum successores. Quòd etiam eventus docuit. Nā post  
ali-

aliquot annos à Christi discessu, facta est divisio Apostolorum, & singulis certa civitas, vel provincia, vel Regnum assignatura. Solus Petrus habebat generalem curam universalis Ecclesiæ, ut jam sæpè ex Patribus ostendi, ac deinceps ostensurus sum.

9. Nec aliter fieri potuit. Nam sicut Christus dixit, *Eritis mihi testes, usque ad terminos terræ*; ita antea dixerat, *Euntes in mundum universum, prædicate Evangelium omni creaturæ, baptizantes eos in nomine Patris &c.* At hoc non potuit sic intelligi, quòd singuli debuerint id præstare; alio qui si unus prædicasset Evangelium, & baptizasset omnes in universo mundo, quid reliqui eodem tempore fecissent? An eosdem iterum baptizassent? Nullo modo. Est ergo, non conjunctim, sed divisim intelligendum, hoc modo: Ite divisi in diversas partes mundi, & unus hîc, alius alibi prædicet Evangelium, baptizet, & similia officia exerceat. Nosti simile exemplum in nostra Societate. Mittimur in universum orbem terrarum: non ut singuli universum occupent, sed ut quisque in certo loco, sibi assignato, obeat officium hominis religiosi. Neque valet hæc consequentia: Omnes sacerdotes Societatis habent potestatem eundi in universum mundum, & ubique Evangelium prædicandi; Ergo omnes sunt inter se æquales, & Præpositus generalis nihil plus habet, quàm reliqui. Similis est consequentia, quam tu facis de Apostolis.

10. Secundò objicis Ambrosium, qui in  
Psal. 137.

Pſalm, 38, ſic ſcribit: *Ascende ergo homo in cælū, & videbis verum illum & æternum*, atque perpetuum Sacerdotem, *cujus hic imagines videbas, Petrum, Paulum, Joannem, Jacobum, Matthæum, Thomam.* Hinc inferſ, non ſolum Petrum, ſed omnes Apoſtolos æquè repræſentaſſe Chriſtum; ac proinde, æquè fuiſſe Vicarios Chriſti. Reſpondeo. Verum eſt, quod dicit Ambroſius: Falſum, quod tu inferſ. Nam omnes Apoſtoli, quatenus erant Sacerdotes, fuerunt imagines Chriſti, ſupremi & æterni Sacerdotis. Idem dici poteſt de omnibus alijs Sacerdotibus Novi Teſtamenti. Omnes ratione ſacerdotij, ſunt imagines Chriſti. An ideo omnes æquales? Ne tu quidem hoc dixeris. Nam fa-  
teris Episcopos, ex divina Chriſti institutione, majores ac eminentiores eſſe Presbyteris.

II. Sed, ut planius conſtet de mente Ambroſij, ponam antecedentia ipſius verba, quæ ſic habent: *Primum igitur umbra præceſſit; ſecuta eſt imago; erit veritas. Umbra in lege; imago verò in Evangelio; veritas in cæleſtibus. Umbra Evangelij & Eccleſia in Lege; imago futura veritatis in Evangelio; veritas in judicio Dei.* Hæc eſt Theſis Ambroſij. Sub qua theſi deſcendit ad hanc hypotheſin: Sacerdotes legis Moſaicæ erant umbræ, reſpectu Chriſti: Sacerdotes Evangelij ſunt imagines, reſpectu ejusdem: Chriſtus in cælo, eſt veritas. Nempe, in ratione ſacerdotij. At, ſicut hinc non ſequitur, omnes Sacerdotes legis Moſaicæ fuiſſe inter ſe æquales; ita nec ſequitur, omnes Sacerdotes Evangelij inter

inter se esse æquales. Et vicissim, sicut omnes Sacerdotes Mosaici fuerunt umbræ Christi; Et tamen, eo non obstante, Pontifex erat major alijs; ita omnes Sacerdotes Evangelici sunt imagines Christi; & tamen, eo non obstante, Pontifex est major alijs. Si hæc exempla non sufficiunt, dabo aliud. Constat ex scriptura, hominem creatum esse ad imaginē Dei (Genes. 1. 26.) Et hoc sensu omnes homines appellari posse imagines Dei. An hinc inferes, omnes in potestate & jurisdictione inter se esse æquales, nec plus habere Reges & Principes, quàm alios? Absit, Hæretica & scandalosa esset hæc illatio.

12. Tertiò objicis eundem Ambrosium, quia libi omnes Apostolos expressè vocat Vicariōs Christi, ut in c. 1. Epist. ad Rom. & in c. 3. prioris ad Corinth. Respondeo. Nemo hoc negat. Sed quæstio est, an omnes eodem sensu, & æquali potestate sint Vicarii Christi? Si hoc assereret Ambrosius, pro te esset. At contrarium asserit. Nam in c. 12. posterioris ad Corinth. sic scribit: *Prior secutus est Andreas Salvatorem, quàm Petrus; Et tamen Primatum non accepit Andreas, sed Petrus.* Non ergo omnes Apostoli æquales, ut tu fingis. Nā Petrus accepit Primatum, quem Andreas non accepit. Et serm. 46. de pœnitentia Petri in fine: *Videte ergo, quantum fletus profuerit Petro. Antequam fleret, lapsus est: postquam flevit, electus est. Et qui ante lachrymas pravivator exstitit, post lachrymas pastor assumptus est; Et alios regendos accepit, qui prius seipsum non rexit.*

rexit. Ecce, Petrus post fletum electus est. Sed ad quid electus? Non ad Apostolatam, quia jam antea erat Apostolus. Ad quid ergo? Ad officium Pastoris; ad regimen aliorum. Hoc ergo antè non habuit. Nec igitur reliqui Apostoli, qua Apostoli, id habebant. Solus igitur Petrus habuit.

13. Quartò objicis Chrysostomum, Homil. 11. in poster. ad Corinth. ubi explicans illū versiculū Pauli, *Pro Christo legatione fungimur*, sic scribit: *Misit filium Pater, exhortari, & legatione fungi apud humanum genus pro se: Quoniam autem ille occisus abijt, nos legationem suscepimus, & pro illo & Patre, exhortamur vos.* Et infra: *Igitur pro Christo legatione fungimur, id est, illius loco.* Nam nos, qua illius officij sunt, suscepimus. Ex utroque testimonio sic argumentaris: Legatus repræsentat suum principalem, & ab eo immediatè mittitur, & vices ipsius, ubi ille abest, supplet: Omnes & singuli Apostoli sunt tales. Omnes igitur & singuli suppleant vices Christi; nec magis Petrus, quàm reliqui.

14. Respondeo. Hoc testimonium contrate ipsum profers. Primò, quia Chrysostomus supponit, Christū in hac vita per seipsum exercuisse officium Capitis, Pastoris, Monarchæ; & postea id fecisse per Vicarios. At tu negas Christū in hac vita fuisse Caput Ecclesiæ, aut exercuisse ullum officium Capitis, ut lib. 1. c. 1. & seqq. ostensum est. Secundò, Chrysostomus dicit, non solum Apostolos, sed etiam Christū legatione functum esse pro Deo: & tñ agno-

agnoscit Christum esse majorem legatum, quàm Apostolos. At tu, ex eo, quia Apostoli fuerunt legati Christi, infer, omnes æquales fuisse in Legatione, quod Chrysostomus non infert. Alioqui etiam Christus fuisset æqualis Apostolis. Tertiò, Chrysostomus dicit, Apostolos suscepisse, quæ erant officii Christi. Vel hoc interpretaris absolutè dictum esse, vel cū limitatione. Si absolutè, falsum est. Nam Apostoli non susceperunt omnia, quæ erant officii Christi. Officium enim illius fuit, redimere genus humanum, & instituere Sacramenta. Hoc Apostoli non susceperunt. Si cum limitatione, verum quidem est, sed contra te. Nam si Apostoli non susceperunt omnia, quæ erant officii Christi, sed aliqua tantum; non potest inferri, quod tu infer, omnes in legatione fuisse æquales. Fieri enim potuit, ut alii plura, alii pauciora susciperent. Vel, ut alii cum majori, alii cum minori limitatione susciperet, quæ erant officii Christi. Habemus exemplum notissimum. Legati Apostolici, qui à Pontifice mittuntur in provincias, verè ipsius Legati sunt; sed cum limitatione accipiunt, quæ sunt officii Pontificis: & alius plus, alius minus accipit. Non enim omnes æquales sunt. Idem dico de Legatis Regum & Imperatorum. Omnes quidem legati sunt, sed alius cum majori potestate fungitur legatione; alius cum minori. Res nota est.

15. Tertia quæstio est: An titulus Principis Apostolorum cõmunis sit Petro & Paulo?

Tu



Tu affirmas lib. i. cap. 5. n. 2. Et probas ex Hieronymo & quibusdam alijs, qui Petrum & Paulum vocant Principes Apostolorum. Respondeo. Verum est: sed longe alio sensu. Nam quando Petrus seorsim vocatur Princeps Apostolorum; tunc intelligitur esse Princeps respectu omnium Apostolorum, etiam respectu Pauli; quia respectu omnium habet curam & gubernationem pastorem. Nemo enim excipitur ab eo, quod illi dictum est; *Pasce oves meas*. Quando autem Petrus & Paulus simul vocantur Principes Apostolorum; hoc intelligendum est, non de vero Principatu aut gubernatione pastore; sed de eminentia laborum ac molestiarum; in quibus illi duo præcelluere. Itaque magna est differentia inter Petrum & Paulum. Primo, quia Petrus duplici titulo vocatur Princeps Apostolorum: tum propter eminentiam potestatis seu præfecturæ; tum propter eminentiam laboris. At Paulus, posteriori tantum. Secundo, Petrus, & seorsim solus; & conjunctim cum Paulo vocatur Princeps. At Paulus seorsim, nunquam; quod bene notandum est. Unde Hieronymus, quem tu citas; quando de utroque simul loquitur, appellat Principes Apostolorum: quando seorsim de alterutro; Petrum quidem vocat Principem Apostolorum, non tamen Paulum; ut patet in catalogo de scriptoribus Ecclesiasticis.

16. Idem cōfirmo ex alijs Patribus. Nam Cyrillus Hierosolymitanus catech. ii. sic habet:

G

bet:

bet: *Omnibus Apostolis reticentibus, Petrus Princeps Apostolorum, & supremus Ecclesia Præco, dicit ad ipsum. Ubi Petrum vocat Principem, respectu omnium Apostolorum; & ut clarius explicet, quo sensu sit Princeps, ait esse supremum Ecclesiæ Præconem. De Paulo id nunquam invenies.*

17. Et Ephreem Syrus in serm. de transfiguratione Domini: *Sicut Moyses Societatis illius & conjunctionis Hebræorum, jussu Dei, Princeps fuit: Ita Petrus Ecclesia Christianorum. Atque, ut ille Veteris, ita hic Novi Testamenti Princeps. Pulchra collatio, & ad nostrum institutum accommodata. Cōstat autem Moysen fuisse Principem Hebræorū, ratione potestatis & jurisdictionis. Ergo eodē sensu, Petrus fuit Princeps Christianorū. Quis hoc unquā dixit de Paulo?*

18. Et Cassianus li. 3. De incarnatione Dñi c. 12. *Interrogemus summum illum, & inter Discipulos Discipulum, & inter Magistros Magistrum, qui Romana Ecclesia gubernaculum regens, sicut fidei habuit, ita & Sacerdotij Principatum. Dic nobis ergo, dic nobis Princeps Apostolorum Petre. Hic etiam Petrus vocatur Princeps Apostolorum, quia erat summus inter Apostolos, & præ alijs habebat Sacerdotij Principatum. De Paulō, nihil ejusmodi.*

19. Et Maximus Constantinopolitanus Patriarcha in Epist. ad Orientales: *Hunc enim ex cæteris mortalibus de toto orbe Conditor orbis ecclesiæ cathedram Magisterij principaliter possidendam tenere, perpetuo privilegij jure concessit.*

Ubi

Ubi vides, Petrum ideo vocari Principem omnium Apostolorum, quia principaliter possidet cathedram Magisterij, quæ illi perpetuo privilegij jure concessa est. At nullum esset Privilegium, si non principaliter, sed æqualiter cum alijs Apostolis illata cathedram possideret.

20. Et Leo Imperator, dictus Sapiens, in serm. de Petro: *Post resurrectionem ter Petrum Dominus percunctatus, an ab eo diligeretur, Principem Apostolorum constituit. Et paulo post: Petrus vero, cum intelligeret, Principatum eum magnum esse, & magnis indigentem viribus, videretque Joannem sequentem, illum dico, quem Jesus vehementer amabat: Hic, inquit, quid? Quod perinde erat, quasi diceret: Mene præsici vis Caput Discipulis? Hunc vero à te dilectum, qui voluit sedere ad dextram, hunc, inquam, quid facere jubes? Et iterum: Tu me sequere, id est, sequere me hoc baculo pastoralis: & sicut ego, cum eram vobiscum, servabam vos, ut Pater, & Caput & Magister, vigilans pro vobis: sic tu esto meo loco, & sequere me Principatu ac potestate tua fratres tuos confirmans. Te enim volo esse meo loco. Unde manet in hodiernum usque diem Petrus sequens Christum in successore suo. Magnum hoc testimonium.*

21. Et Hugo Victorinus serm. 64. de Apostolis Petro & Paulo: *Petrus ceteris eminet excellentia potestatis: Paulus excellentia predicationis. Petrus, Sol: Paulus, Luna. Petrus Sol, per collatam sibi divinitus potentiam: Paulus Luna, per collatam sibi cœlitus sapientiam.*

*pientiam. Et infra: Petro soli inter ceteros, & præ ceteris, à Domino cura pastoralis principaliter & specialiter injuncta est, ubi dicitur: Pasce agnos meos. Hæc sufficiant de titulo Principis, qui aliter Petro, aliter Paulo concessus est.*

22. Quarta quæstio: An reliqui tituli (§. i. enumerati) concessi sint Petro, propter Primatum ætatis, vocationis & charitatis; an vero propter Primatum potestatis & jurisdictionis? Tu asseris priorem partem; ego posteriorem. Nec opus est novis Argumentis. Jam ante ostendi, Primatum ætatis, vocationis & charitatis, vel incertum, vel fictitium esse. Primò quia incertum est, an Petrus fuerit ætate senior, quàm omnes reliqui Apostoli. Secundò, falsum est, vocatum esse ad Apostolatam, an- tequam reliqui vocarentur. Tertiò, de Primatu charitatis diversæ sunt authorum opiniones. Alij tribuunt illum Petro; alij Ioanni.

23. Deinde, multi ex supradictis titulis, plus aliquid significant, quàm prærogativam ætatis aut vocationis. Sunt enim duplices tituli. Aliqui tribuuntur Petro, respectu aliorum Apostolorum; ut cum dicitur Apostolorum Princeps, Caput, Coryphæus, Apex, Vertex, Antesignanus. Alij respectu Christi, vel totius Ecclesiæ, vel omnium fidelium; ut cum dicitur Universalis Vicarius Christi, Caput & Princeps Ecclesiæ, Caput fidelium, Pastor gregis Dominici. Priores fortè possent illi accommodari propter Primatum ætatis & vocationis, quem tu fingis: non tamen posteriores.

res Hoc ostendam in Exemplo à te allato. Dicit Petrum fuisse quasi primogenitum inter Apostolos; ac proinde, sicut quilibet alius primogenitus, ratione ætatis, potest vocari Caput aut Princeps suorum fratrum; sic etiam de Petro statuendum esse. Sit ita. At vicissim ego retorqueo: Sicut ex eo præcisè, quòd aliquis est primogenitus inter fratres, non potest vocari Caput aut Princeps Reipublicæ, Caput aut Princeps civium, Vicarius Regis aut Imperatoris: Sic in simili casu, ex eo præcisè, quòd Petrus est primogenitus inter fratres suos Apostolos, non potest vocari Caput Ecclesiæ, Princeps fidelium, Vicarius Christi. Alia ergo causa est horum titulorum, quàm prærogativa ætatis & vocationis.

24. Denique falsum est, Patres non agnovisse alium Primatum in Petro, quam qui à te fingitur. Primò, quia aliqui, ut ex dictis patet, negant illum fuisse seniore ætate & vocatione. Ergo illi saltem vel agnoscunt alium Primatum, vel nullum. Utrunque contra te est. Secundò, verba ac sententiæ Patrum non salvantur, per Primatum ætatis & vocationis. Audi quid scribant, & quomodo loquantur.

25. Chrysostomus Homil. 80. ad populū Antiochenum, ante medium: *Nōne, inquit, ter Petrus negavit? Nōne cum juramento ter? Quid ergo? Multūne temporis fuit illi necessariū ad pœnitentiam? Nequaquam. Sed eadem nocte lapsus est, & resurrexit. Post illum enim gravem casum, (negationi namq; nullum est malum æquale)*

rursum eum ad priorem honorem reduxit pœnitentia, & ei per totum orbem terrarum Ecclesia præsidentiam tradidit.

Et orat. 5. adversus Judæos, longè ante medium: *Petrus post illam nefariam abjurationem, quoniam celeriter suum ipsius peccatum recordatus est, nulloque accusante dixit peccatum, flevitq; amarè; adeo abluit illam negationem, ut etiam Primus Apostolorum fuerit factus, ac terrarum orbem totum subjecerit.*

Hæc duo testimonia non possunt intelligi de Primatu ætatis aut vocationis; quia illū Primatum, ut tu ipse fateris, habuit Petrus ante peccatum negationis, per hoc præcisè, quòd esset senior ætate, & Primus à Christo ad Apostolatū vocatus: Sed debent intelligi de Primatu, qui post factam pœnitentiam Petro concessus est, ut ex verbis Chrysostomi constat. Quis a. Primatus ille sit, colligi potest ex duabus illis particulis. 1. *Ecclesia Præsidentia per totū terrarum orbem.* 2. *Subiectio totius orbis terrarum.* Porro hic Primatus, qui tunc illi datus est, distinguui debet ab honore, ad quem ait Petrum reductum esse per pœnitentiam.

26. Eodem modo ac sensu loquitur Maximus Taurinensis ( qui vixit circa tempora Augustini) Homil. 3. in natali Apostolorū Petri & Pauli: *Quanti, inquit, meriti apud Dominū sum Petrus erat, ut ei post navicula parva remigiū, totius Ecclesia gubernacula traderentur? Certe, per gubernacula totius Ecclesiæ, non significatur Primatus ætatis aut vocationis, sed dignitatis*

gnitatis & jurisdictionis. Nec video, quomodo clarius explicari possit potestas jurisdictionis, quàm hîc explicata est: Nam perinde est, ac si dicas in simili casu: totius Imperij gubernacula Matthiæ Austriaco tradita sunt. Vel, totius regni Galliæ gubernacula Ludovico undecimo tradita sunt. Quis hic locus dubitandi aut tergiversandi?

27. Similiter Hieronymus lib. 1. contra Jovinianum: *Inter duodecim unus eligitur, ut Capite constituto, schismatis tolleretur occasio. Sed cur non Joannes electus est virgo? etati delatum est, quia Petrus senior erat, ne adhuc adolescens ac pene puer progressæ etatis hominibus præferretur.* Hinc tria colligo. Primò, solum Petrum ex duodecim Apostolis electum esse in Caput Ecclesiæ. At si electus est ex duodecim Apostolis, jam antea non erat ratione ætatis & vocationis. Aut si antea erat, electus non est. Secundò, ideò electum esse, ut constituto Capite, schismatis tolleretur occasio. Ergo non est electus pro sua tantum persona, sed etiam pro Successoribus; quia si tempore Apostolorum, quando Ecclesia erat exigua, debuit esse unum Caput ad vitandum schisma, multo magis post tempora Apostolorum, quando Ecclesia fuit diffusa per totum orbem terrarum. Tertiò, ideò potius Petrum, quàm Joannem electum esse in Caput, quia non decebat Joannem pene puerum præferri senioribus. Certè si Hieronymus putasset, quod tu fingis, Primatum Petri

in eo solum consistere, quod reliquis ætate & vocatione senior esset, vel frustra, vel stultè quæsiuisset, quare Joannes non esset electus ad Primatum? id est, quare non esset electus, ut fieret senior ætate & vocatione?

28. Item Leo Papa (qui propter doctrinam & virtutem dictus est Leo Magnus) serm. 3. de Assumptione sua ad Pontificatum: *Unus de toto mundo Petrus eligitur, qui & universarum gentium vocationi, & omnibus Apostolis, cunctisq; Ecclesia Patribus proponatur, ut quamvis in populo Dei multi Sacerdotes sint, multiq; Pastores, omnes tamen propriè regat Petrus, quos principaliter regit & Christus.*

Et Epist. 87. ad Episcopos provinciæ Vienneſis, cap. 1. *Sed hujus muneris Sacramentum ita Dominus ad omnium Apostolorum officium pertinere voluit, ut in beatissimo Petro, Apostolorum omnium summo principaliter collocaret: Ut ab ipso, quasi quodam Capite, dona sua velut in corpus omne diffunderet, ut ex ortem se mysterij divini intelligeret esse, qui ausus fuisset à Petri soliditate recedere. Hunc enim in consortium individua unitatis assumptum, id quod ipse erat, voluit nominari, dicendo, Tu es Petrus.*

Ex hoc utroque Leonis testimonio habemus hæc tria: Primò, quod Petrus regat omnes, quos principaliter regit Christus; etiam omnes alios Ecclesiæ Pastores & Apostolos. Secundò, quod à Petro, tanquam à Capite diffundantur dona Dei in omnia membra Ecclesiæ.



clesiæ. Tertiò, quòd Petrus à Christo in consortium individux unitatis assumptus sit.

29. Quid tu verò, Marce Antoni, ad hæc respondes? Primò fateris, quod res est, Leonē admittere Primatum Petri super totam Ecclesiam. Hoc accipio. Vixit autem Leo circa Annum Christi 440. Igitur ab eo tempore, id est, ab Annis mille ducentis, Primatus Petri fuit agnitus & concessus in Ecclesia. Secundò ais, Leonem oratorio more, voluisse Petri dignitatem amplificare, ut hac ratione suam dignitatem Pontificalem extolleret. An putas tibi similem fuisse, qui studio ambitionis; veritati à se agnitæ contradixerit? At scias in Sæctorum Catalogum ab Ecclesia relatum esse. Tertiò ais, Leonem in eo exorbitasse, quòd dixerit, Petrum in consortium individux unitatis à Christo assumptum esse. Hoc probas, quia individua unitas in Christo erat sola cum Patre & Spiritu sancto in natura & essentia divinitatis. *Qualem unitatem, inquis, quis asserat in Christum & Petrum? Nisi Petrum faciamus unum ex Trinitate, quæ est blasphemia horrendissima.* Audi, mi frater. Nulla est hîc blasphemia: Sed quod bene à Leone dictum est, tu vel non intelligis, vel malè interpretaris. Non dixit Leo, Christum assumpsisse Petrum in consortium individux unitatis, ratione naturæ aut substantiæ divinæ, ut tu falsò imaginaris; sed ratione nominis ac dignitatis. Nam Christus voluit illum vocari Petram & fundamen-

tum Ecclesiæ, sicut ipse vocabatur. Verba Leonis aperta sunt. Quæ etiam repetuntur à Nicolao Papa, & citantur in jure canonico, cap. *Fundamentum*, De electione & electi potestate in 6.

30. Addam adhuc unum aut alterum. è Patribus. Gregorius lib. 4. Epist. 32. ad Maurizium Augustum, sic scribit: *Cunctis Evangelium scientibus liquet, quod voce Dominica Sancto & omnium Apostolorum Principi Petro, totius Ecclesiæ cura commissæ est. Ipsi quippe dicitur, Pæsce oves meas.*

31. Et Arnobius Romanus (qui vixit circa tempora Augustini) ad Psalm. 138. *Ecce Apostolo Petro pœnitenti succurritur, qui est Episcopus Episcoporum, & major gradus redditur ploranti, quàm sublatus est deneganti. Quod ut doceam, illud ostendo, quod nullus Apostolorum nomen Pastoris accepit. Solus enim Dominus Jesus Christus dicebat: Ego sum Pastor bonus. Hoc ergo nomen Sanctum, & ipsius nominis potestatem, post Resurrectionem suam Petro pœnitenti concessit, & ter negatus, negatori suo, hanc, quàm solus habuit, tribuit potestatem: Ut non solum recuperasse, quod amiserat, probaretur; verum etiam & multo amplius pœnitendo, quàm negando perdiderat, acquisisse.*

32. Et Eucherius Lugdunensis in vigilia sancti Petri: *Dicit ei, Pæsce oves meas. Prius agnos, deinde oves commisit ei; quia non solum Pastorem, sed Pastorum Pastorem eum constituit. Pæscit igitur Petrus agnos, pæscit & oves: Pæscit filios, pæscit*

*pascit & matres: regit & Subditos & Pralatos. Omnium igitur Pastor est, quia præter agnos & oves in Ecclesia nihil est.*

33. Plures Patres, etiam antiquissimos, citabo postea, cum diluam objectiones tuas. Ac simul ostendam, eos ipsos, quorum auctoritatem nobis objicis, maximè nobis patrocinari. Nunc Augustini sententia, quæ multum ponderis habet, scorsim discutienda est.

### CAPUT QUINTUM.

#### *Primatus Petri probatur ex Augustino.*

1. **A**ugustini sententiam conaris tua interpretatione in alium sensum detorquere. Ais, nihil eum agnoscere in Petro peculiare, præter hæc duo. Primò, quòd primus fuerit admissus in Apostolatum: Et hinc habuerit aliquam præminentiam seu Primatū. Secundò, quòd ex hac præminentia & Primatu (qui totus consistit in prioritate vocationis) secutum sit, ut figuram totius Ecclesiæ gestaverit. Sic tu, totidem ferè verbis, lib. 1. cap. 10. n. 21. & alibi.

2. Ego contrà assero, Augustinum hæc tria agnoscere in Petro. Primò, quòd verè habuerit Primatum seu Principatum totius Ecclesiæ, non ratione ætatis, aut vocationis præcisè, sed ratione potestatis à Christo ipsi concessæ. Secundò, quòd propter hunc Primatum seu Principatum, sustinuerit perso-

nam

nam totius Ecclesiæ, & consequenter etiam Apostolorum ac aliorum fidelium. Sicut Imperator, aut Rex, aut Consul, sustinet personam totius imperij, aut regni, aut civitatis: Et consequenter omnium subditorum, qui in imperio, vel regno, vel civitate sunt. Tertiò, quòd sicut Imperator, aut Rex, aut Consul, quia sustinet personam subditorum, potest eorum nomine, vel respondere, vel pacisci, vel aliud quid facere, juxta juris concessionē; Sic etiam Petrus, quia sustinebat personam totius Ecclesiæ, solitus sit unus ipse pro omnibus respondere. Hæc tria perspicuè ostendā ex clarissimis Augustini testimonijs.

3. Ac Primò quidem, de Primatu Petri disertè agit lib. 2. de Baptismo contra Donatistas cap. 1. Ubi recenset hæc verba Cypriani: *Nam nec Petrus, quem primum Dominus elegit, & super quem edificavit Ecclesiam suam, cum secum Paulus de circumcisione disceptaret, postmodum vendicavit sibi aliquid insolenter, aut arroganter assumpsit, ut diceret se Primatum tenere, & obtemperari à novellis & posteris sibi potius oportere: nec despexit Paulum, quòd Ecclesia prius persecutor fuisset, sed consilium veritatis admisit, &c.* Deinde, ex sua sententia mox subjicit: *Ecce ubi commemorat Cyprianus, quòd nos etiam in scripturis sanctis didicimus, Apostolum Petrum, in quo Primatus Apostolorum tam excellenti gratia præminet, aliter quàm veritas postulabat, de circumcisione agere solitum, à posteriore Apostolo Paulo esse correctum.* Et infra ibidem: *Puto, quòd sine ulla*  
sui

*sui contumelia Cyprianus Episcopus Petro Apostolo comparatur, quantum attinet ad martyrij coronā. Ceterum magis vereri debeo, ne in Petrum contumeliosus existam. Quis enim nescit illum Apostolatus Principatum cuilibet Episcopatuui preferendū? Sed et si distat cathedrarum gratia, una est tamen martyrij gloria.*

4. Hic duo notanda sunt: Primò, quod Cyprianus supponat, Petrum habuisse quidē Primatum supra Apostolos, qui in eo consistebat, quòd omnes tenerentur ipsi obtemperare: Sed tamen, nec insolenter, nec arroganter usum fuisse illo Primatu, cū à Paulo corripitur; ut daret nobis Exemplum modestiæ & humilitatis, juxta illud Christi, Matth. 20. 28. & Luc. 22. 26. *Qui major est in vobis, fiat sicut minor; & qui praeceptor est, sicut ministrator. Sicut filius hominis non venit ministrari, sed ministrare.* Secundò, quòd Augustinus eundem Primatū tripliciter confirmet. Primò his verbis: *In quo Primatus Apostolorum tam excellenti gratia praeminet.* Quæ est illa tam excellens gratia? Certè non sola vocationis antiquas, ut tu vis. Quid enim excellens est, si dicam Petrum uno aut altero die citius vocatum esse ad Apostolatū, quàm Andream? Quanquam, ut suprà dixi, id falsum est. Deinde illis verbis: *quis nescit illum Apostolatus Principatum cuilibet Episcopatuui preferendum:* non ergo omnes Episcopi Petro æquales sunt. Imò Augustinus ait, se vereri, ne sit contumeliosus in Petrum, si illum cōferat cum Cypriano Episcopo, quoad dignitatem

ratem Ecclesiasticam. Denique illis verbis: *distat cathedrarum gratia*, id est, major est cathedra Petri quàm Cypriani: major Pontificis, quàm cujusvis alterius Episcopi.

5. Tu respondes, per cathedram Petri, non intelligi cathedram Romanam, sed Petri Apostolatum: cumque particularium Episcoporum cathedris præstare. *Si enim, inquis, quicumque Apostolatus excedit potestate quamcunque particularem cathedram, cum Apostolus quilibet in toto mundo possit suum Apostolatum exercere, quod Episcopi jam non possunt, nisi in limitatis Diocæsibus, sive provinciis aut regnis; quanto magis Primi & præcipui Apostoli, aliorum pluribus nominibus Principis, Apostolatus, singularem quamcunque, cathedrâ excedet?* Hac responsione te ipsum jugulas. Primo, quia concedis Petrû potestate Ecclesiastica (de hac n. sermo est) excedere Cyprianû, & omnes alios Episcopos Ecclesiarum particularium. Major igitur, ex tua concessione est potestas Ecclesiastica in Petro, quàm in aliis Episcopis. At hoc est, quod nos contendimus.

6. Secundo cõcedis, eundem Petrû potestate Ecclesiastica excedere alios Apostolos. Sic enim argumentaris: Si alij Apostoli potestate Ecclesiastica excedunt Episcopos, Ergo multo magis Petrus. Quæ consequentia non valeret, nisi Petrus eadẽ potestate excederet alios Apostolos. Sicut patet in simili exemplo. Nã qui sic infert: Si aer excedit calore terrâ & aquam; Ergo multo magis ignis: sine dubio supponit, ignem habere plus caloris, quàm aerem. At hunc excessum

cessum potestatis in Petronos urgemus. Si ergo illum concedis, non nobis, sed tibi contrarius es.

7. Tertiò affirmas, quēlibet Apostolū ecclesiast. potestate excedere quēlibet Episcopū, cū quilibet Apostolus in toto mundo possit suum Apostolatū exercere, q̄ Episcopus non pōt, nisi in limitato regno aut provincia. At alibi contrarium asseris, nēpe Apostolos & Episcopos in potestate & jurisdictione æquales esse: Et non differre, nisi accidente. Sic n. scribis l. 2. c. 1. n. 3. *Quoscunq; igitur Apostoli eligebāt, & ad Ecclesias regendas mittebant, ij procul dubio, parē cū ipsis Apostolis potestatem accipiebant, si vim ipsam institutionis spectemus.* Et ibidē n. 5. *Neg, ego invenio inter verum Apostolum, ac Episcopum, aliud discrimen, nisi quod Apostolus sit, qui Christū predicat, tanquam testis oculatus, ab ipso met Christo immediatē missus. Episcopus verò sit, qui eundē predicat, ut testis instructus, & fide illuminatus, ac missus à Christi ministris.* Et iterum n. 7. in fine: *Apostoli, dum alios ad fundandas vel regendas Ecclesias mittebant, eos ad Episcopatum evehebant: totumque ipsorum officium, cum tota potestate ministeriali, eis committebant: Una illa propria personali dignitate excepta, quod essent testes oculati vitæ & Resurrectionis Christi; ab eoque immediatē vocati & missi ad Evangelizandum.*

8. Vides, opinor, contradictionem in hac duplici tua assertionē. Una, Apostoli excedunt potestate Episcopos Altera, Episcopi ab Apostolis parem potestatem accipiebāt. Vel,  
Apo-

Apostoli Episcopis à se missis committebant  
 torum suum officium cum tota potestate. Re-  
 spondebis fortè, utramque veram esse diver-  
 so sensu. Apostolos enim & Episcopos habere  
 parem potestatem in habitu; non tamen parè  
 in actu. Igitur priorem assertionem veram esse  
 de potestate in actu, posteriorem, de potesta-  
 te in habitu. Sed hanc ipsam responsionem tu  
 ipse evertis. Nam. lib. 2. cap. 5. n. 26. sic habes.  
*Pradicandi potestatem in toto terrarum orbe, sicut  
 Apostoli non habebant, nisi habitu; Actu verò ibi,  
 ubi jam inter se convenerant, seu ubi eos Spiritus  
 sanctus esse volebat: Ita Episcopi habitu habent  
 eandem universalem potestatem jure divino, eo i-  
 pso, quo sunt facti ritè Episcopi: Actu tamen nō sunt  
 Episcopi, nisi suæ particularis Ecclesiæ in qua illos  
 Spiritus sanctus posuit.*

Et ibidem: *Ita & jurisdictio in habitu est uni-  
 versalis jure divino, in unoquoque Episcopo: in actu  
 verò non est, nisi particularis, sicut erat etiam in A-  
 postolis.* Hic planè idem statuis de Episcopis &  
 Apostolis: tum quoad potestatem & jurisdi-  
 ctionem in habitu, quæ in utrisque universa-  
 lis & illimitata est; tum quoad potestatem &  
 jurisditionem in actu, quæ in utrisque parti-  
 cularis & limitata est. Nihil ergo discernis.  
 Manet igitur vera contradictio, quam po-  
 tui.

9. Addo, ex tuis verbis manifestè colligi  
 duo alia absurda. Unum est, Paulum nec A-  
 postolum fuisse, nec Episcopum. Non Apo-  
 stolum, quia non fuit oculatus testis vitæ &

Resur-



Resurrectionis Christi. Nec Episcopum, quia non est immediate missus à ministris Christi; sed ab ipso Christo. Alterum, aliquos Episcopos habere majorem potestatem & jurisdictionem, quàm Apostolos, si non in habitu; saltè in actu. Nam Apostoli, ut jam dixisti, non habebant jurisdictionem in actu; nisi particularem & limitatam. At aliqui Episcopi, habent indifferentem, & non limitatam, ut fateris lib. 2. cap. 1. n. 11. his verbis: *Quicumque ab Apostolis Episcopi fiebant, ij eandem cum ipsis Apostolis in solidum auctoritatem accipiebant; & sanè universalem in habitu & illimitatam: In actu verò aliqui indifferenter, quocunque eos Spiritus sanctus, aut Apostoli dirigebant, terrarum orbem circumibāt: alij verò certis locis consistere jubebantur.* Hic distinguis inter Episcopos: Aliqui habent potestatem in actu, limitatam ad certum locum: alij indifferenter ad totum orbem terrarum. At Apostoli, ex tua sententiā, non habebant nisi particulare. Minus igitur habebant, quàm aliqui Episcopi ab ipsis ordinati & missi.

10. Ecce, Marce Antoni, in quantas angustias te conjicis, dum sententiam Augustini, qui clarè explicat Primatum Petri, conaris obscurare, & per ineptas ambages pervertere. Dic rotundè, quod dixit Augustinus, in Petro Primatum Apostolorum excellenter præminere: Hunc Primatum cuilibet Episcopatui præferendum esse. Sed, ne dubites, adducam alia tria Augustini testimonia pro eodem Primatu.

H

Pri-

Primum habetur Epist. 108. ad Seleucianā, statim ab initio, ubi sic ait: *Quod autem dicitur Petrum egisse pœnitentiam, cavendum est, ne ita putetur egisse, quomodo agunt in Ecclesia, qui propriè pœnitentes vocantur. Et quis hoc ferat, ut primum Apostolorum inter tales pœnitentes numerandum putemus?* Quasi dicat: Qui agunt pœnitentiam in Ecclesia, subiecti sunt Prælati Ecclesiæ, & ex illorum arbitrio puniuntur, tanto vel tanto tempore, prout ipsis visum est. At Petrus, tametsi gravissimè peccaverit, negando Christum, non tamen erat subiectus Prælati Ecclesiæ, cùm ipse potius esset Caput & Princeps Ecclesiæ; & neminem haberet, excepto Christo, à quo puniretur. Nō igitur debet inter pœnitētes Ecclesiæ numerari. Quòd hic sit sensus Augustini, colligitur ex alijs ipsius libris, ubi agit de pœnitentia Ecclesiastica, præsertim in Enchiridio c. 65. ubi sic scribit: *Rectè constituuntur ab ijs, qui Ecclesiæ præsumt, tempora pœnitētia, ut fiat etiam satis Ecclesia, in qua remittuntur ipsa peccata: Extra eā quippe non remittuntur.* Et Homil. 17. de utilitate pœnitentiæ, distinguit triplicem pœnitentiam: Unam accedentium ad baptismum: alteram quotidianā: tertiam Ecclesiasticam. De hac ita scribit: *Est pœnitentia gravior atque luctuosior, in qua propriè vocantur in Ecclesia pœnitentes; etiam remoti à Sacramento Altaris participandi.* Huiusmodi pœnitentem negat fuisse Petrum, quia non erat subiectus Ecclesiæ, ac proinde Ecclesia non poterat illum removere à Sacramento Altaris.

11. Alterū Augustini testimoniū habetur  
 Ierm. 124. de tempore, ubi agens de negatione  
 Petri, sic scribit: *Ideo B. Petrum paululū Dominus*  
*subdeseruit, ut in illo totū genus humanū posset a-*  
*gnoscerē nihil se sine Dei gratia p̄valere: Et ut Eccle-*  
*sia Rectori futuro, ignoscendi peccantib. quadā re-*  
*gula poneretur. Credenda n. erant Petro Apostolo*  
*claves Ecclesie. Credenda erat ei populorū innume-*  
*ra multitudo, quæ esset pro sua nature vitiis, passio-*  
*nibus, culpis, involuta atq. peccatis. Et infra: Toti-*  
*us corporis morbum in ipso Capite curat Ecclesia; &*  
*in ipso vertice componit membrorum omnium sa-*  
*nitatem, in ipsa cōfessionis Christi crepidine, in ipso*  
*immobilis fidei fundamento, in Petro scil. illo, qui*  
*dixerat. Etiam si me oporteat mori tecum, non te*  
*negabo. Et ibidem: Quid agis o Petre, future Re-*  
*ctor Ecclesie, quid loqueris? Verba clara sunt. Pe-*  
*trus vocatur Rector Ecclesie, cui infinita po-*  
*pulorum multitudo credita est. Vocatur Ca-*  
*put totius corporis Ecclesie: Vertex omnium*  
*membrorum Ecclesie: Immobilis fidei fun-*  
*damentum. Quid quæris amplius?*

12. Tertium testimoniū habetur in Quæ-  
 stionibus Veteris ac Novi Testamenti, q. 75.  
 Quamvis n. autor fortasse non est August. est  
 tamē autor antiquus, & ipsi Augustino æqua-  
 lis, aut antiquior. *Dicūt exactores didrachmæ ad*  
*Petrū Apostolū: Magister vester non solvit didrach-*  
*mā. Quo dicto, Magistrū, ut pro omnibus Discipu-*  
*lis solveret, convenerūt. Salvator a. cū p̄ se & Petro*  
*dari jubet, p̄ omnib. exsolvisse videtur: q̄a sicut in*  
*Salvatore erant omnes causæ Magisterij; ita & post*

*Salvatorem, in Petro omnes continentur. Ipsum enim constituit esse Caput eorum, ut Pastor esset gregis Dominici. Et ibidem: Manifestum est in Petro omnes contineri. Rogans enim pro Petro, pro omnibus rogasse dignoscitur. Semper enim in Præposito populus, aut corripitur, aut laudatur.*

13. Jam verò (quod secundo loco probandum erat ex Augustino) Petrum ratione sui Primatus, gessisse personam totius Ecclesiæ, & omnium fidelium, docet idem Augustinus, Enarratione prima in Psal. 108. statim in principio, ubi docet, Multa in Psalmo illo dici de Juda proditore, quæ illi conveniunt, quatenus gerit personam Judæorum, Christi hostium: sicut etiam multa cōveniunt Petro, quatenus gerit Personam Ecclesiæ. Verba Augustini sunt hæc: *Sicut enim quædam dicuntur, quæ ad Apostolum Petrum propriè pertinere videantur; nec tamen habent illustrem intellectum, nisi cum referuntur ad Ecclesiam, cujus ille agnoscitur in figura gessasse personam, propter Primatum, quem in Discipulis habuit &c. Ita Judas personam quodammodo sustinet inimicorum Christi judæorum &c. Ubi adverte, non eodem sensu, Petrum & Judam sustinere personam communitatis. Nam Judas propter nefariam prodicionem Christi, sustinet personam hostium Christi. Petrus propter Primatum Ecclesiæ, sustinet personam ejusdem Ecclesiæ.*

14. Et tract. 124. in Joannem, post mediū, recitans illa verba ex Evangelio, *Dimitte nobis debita nostra, sicut & nos dimittimus debitoribus nostris;*

*nostris; mox subdit: Hoc agit Ecclesia, (pe beata in hac vita arummosa: cuius Ecclesiæ Petrus Apostolus, propter Apostolatus sui Primatum, gerebat figurata generalitate Personam. Quodenim ad ipsam propriè pertinet, natuâ unus homo erat, gratiâ unus Christianus, abundantiore gratia unus idemque Apostolus. Sed quando ei dictum est: Tibi dabo claves regni Cælorum, universalem significabat Ecclesiam. Hic quædam attribuit Petro, tanquam privato homini; ut quod fuerit naturâ unus homo; gratiâ unus Christianus; abundantiore gratia, unus Apostolus. Quædam verò, tanquam personæ publicæ; ut quod habuerit Primatum Ecclesiæ; quod ratione Primatus, gesserit personam Ecclesiæ, non particularis, sed generalis seu universalis; quod in persona Ecclesiæ universalis, acceperit claves regni cælorum. At tu, Marce Antoni, contra Augustinum doces, Primatum Ecclesiæ, qui à te confingitur, convenire Petro, tanquam privato homini, ratione ætatis & vocationis.*

15. *Et in lib. de Agone Christiano cap. 30. Nusquam tam vigere debent viscera misericordie, quam in Catholica Ecclesia, ut tanquam vera Mater, nec peccantibus filiis superbè insultet, nec correctis difficile ignoscat. Non enim sine causa inter omnes Apostolos hujus Ecclesiæ Catholica personam sustinet Petrus, Huic enim Ecclesiæ claves regni cælorum data sunt, cum Petro data sunt. Et cum ei dicitur, ad omnes dicitur, Amas me? Pasce oves meas. Debet igitur Ecclesia Catholica correctis & pietate firmatis filiis libenter ignoscere, cum ipsi Petro, per-*

sonam ejus gestanti, videamus veniam esse concessam. Ecce, Petrus sustinet personam Ecclesiæ Catholicæ. Et cum Petro datæ sunt claves, nõ datæ sunt ipsi in privatum usum, sed pro bono totius Ecclesiæ. Et cum illi dictum est, *Pasce oves meas*, non illi soli, ut privato homini, sed omnibus illius successoribus dictum est.

16. Denique, quòd Petrus, quia sustinebat personam totius Ecclesiæ, solitus sit pro omnibus respondere, docet idem Augustinus serm. 31. de verbis Apostoli c. 2. *Respondit*, inquit, *Petrus unus pro omnibus, quia unitas in omnibus*. Et serm. 33. de verbis Domini. c. 1. *Ipsc enim Petrus, in Apostolorum ordine Primus, in Christi amore promptissimus, saepe unus respondit pro omnibus*. Ubi per illam particulam, *In Apostolorum ordine Primus*, intelligit Primatum Petri, non ratione ætatis aut vocationis, sed autoritatis & Præfecturæ, ut ipsemet ibidem explicat c. 2. cum ait: *Idem ergo Petrus à Petra cognominatus beatus, Ecclesia figuram portans, Apostolatus Principatum tenens*. De hac re dicam plura cap. sequenti. §. 16.

17. Ex dictis satis constat de sententia Augustini, nec quicquã video objici posse, quàm quòd lib. 1. c. 5. n. 10. objicis, illum dixisse serm. 47. de Sanctis Petro & Paulo: *Beatus Petrus Primus Apostolorum: Beatus Paulus novissimus Apostolorum*. Ex quo inferis, sicut Paulus fuit novissimus vocatione; ita Petrum fuisse primũ vocatione: Ac proinde Primatũ Petri nihil aliud esse, quàm Primatũ vocationis. Sed jam suprà respon-

responsum est, c. 2. §. 21. Nam ibi dixi, Augustinum non connectere illa verba; sed uno loco asserere, Petrum esse Primum Apostolorum; altero, Paulum esse minimum Apostolorum. Non igitur necesse esse, ut quo sensu, unus dicitur minimus, eodem alter dicatur primus. Paulum vocari minimum, id est, indignissimum, propter sua peccata: Petrum vocari Primum, i. e. Principem, ratione Primatus seu præfecturæ.

18. Sed esto. dixerit Augustinus per modum connexionis, Petrum esse Primum, Paulum novissimum; non sequitur, eodem sensu utrumque dictum esse. Dabo simile exemplum. Christus Marci 9. 34. dixit: *Si quis vult primus esse, erit omnium novissimus, & omnium minister.* Ubi primus & novissimus in eadem sententia connectuntur; & tamen non sumuntur eodem sensu. Nam sensus est: si quis inter vos vult esse primus in gradu vel Prælatura, fiat novissimus, id est, humillimus in ministerio.

## CAPUT SEXTUM.

### *Primatus Petri probatur ex prærogativis Petri.*

1. **C**atholici assignant varia privilegia seu prærogativas Petri, ex quibus colligunt ipsius Primatum & eminentiam supra alios Apostolos: Non quod unaquæque prærogativa per se sufficiens sit, ad astringendum Primatum; sed quod omnes simul sumptæ id faciant.

ciant. Sunt autē hæ præcipuè : 1. Quòd Christus soli Petro inter omnes Apostolos, proprium nomen mutaverit. 2. Quòd quando in Evangelio recēsentur nomina Apostolorum, semper primo loco ponatur Petrus. 3. Quòd scriptura loquatur de Petro, tãquam de Principe : de alijs Apostolis, tanquam de subditis. 4. Quòd Petrus sæpè loquatur nomine omnium Apostolorum, tanquam illorum Antesignanus. 5. Quod inter omnes Apostolos, soli Petro facta sit prima revelatio divinitatis Christi. 6. Quòd soli Petro inter Apostolos promissa sit stabilitas fidei & cathedræ. 7. Quòd Christus pro solo Petro & seipso voluerit tributum solvi in Capharnaum. 8. Quòd post Resurrectionem, inter omnes Apostolos, soli Petro primùm apparuerit. 9. Quòd Petrus sua autoritate vocaverit alios ad electionem novi Apostoli, in locum Judæ proditoris. 10. Quòd primus promulgaverit Judæis Evangelium, post acceptum Spiritum sanctũ. 11. Quòd primum miraculum apud Judæos fecerit, in cõfirmationem Evangelij. 12. Quòd etiam primus prædicaverit gentibus Evangelium : & quòd ipsi soli oblata sit visio cœlestis de vocatione gentium. 13. Quòd primus in Concilio Hierosolymitano sententiam dixerit.

2. Certè, hæ prærogativæ, ut alias omit-  
 tam, manifestè ostendunt, aliquid peculiare  
 fuisse in Petro, quod in alijs Apostolis non fu-  
 erit. Quid autem illud sit, in eo dissentimus.

Tu



Tu nihil aliud agnoscis, quàm Primatum ætatis, vocationis & fervoris. Nec putas aliud colligi posse ex prærogativis jam enumeratis. Sed erras, ut sæpe dixi. Primò, quia incertum est, an Petrus ætate omnes alios superaverit. Secundò, nec probare potes ex Evangelio, prius Petrum, quam reliquos ad Apostolaturn vocatos esse. Tertiò, nec solus fervor charitatis fuit causa omnium istarum prærogativarum. Quæ omnia clarius patebunt, si singulas prærogativas expendamus.

*Prima Prærogativa Petri.*

3. **I**gitur prima Petri Prærogativa est, quòd Christus soli ipsi, inter omnes Apostolos, proprium nomen mutaverit. Nam cum antea vocaretur Simon, postea vocatus est Cephass, id est, Petra (Joann. 1. 42.) quæ prærogativa illi communis est cum Abrahamo, qui cum antea vocaretur Abram, id est, Pater excelsus, postea vocatus est Abraham, id est, pater multitudinis, seu multarum gentium (Genes. 17. 5.) Major tamè est Petri prærogativa, quàm Abrahami. Nam Petrus, idem nomen sortitus est, quod Christus. Cephass enim, & Syriacè, & Græcè sumi potest, teste Optato lib. 2. contra Parmenianum. Syriacè significat petram, vel lapidem: Græcè, caput. Utroque nomine appellatus est Christus. Petra quidem seu lapis, super quem fundata est Ecclesia (Matth. 21. 24.) Caput verò, à quo regitur Ecclesia, sic-

H 5 ut mu-

ut mulier à viro (Ephes. 5. 23.) Itaque per hanc nominis mutationem voluit Christus significare Petrum fore Caput & fundamentum Ecclesiæ, sicut ipse erat. Sed diversimodè. Nam Christus est Caput & fundamentum primum; Petrus secundarium.

4. Tu respondes (lib. 1. c. 9. n. 1.) Ex hac nominis mutatione, non posse colligi Primatum. Primò, quia non solius Petri, sed etiam aliorum nomina mutata esse legimus. Secundò, quia alij Apostoli nō minus fuerunt petræ seu fundamenta Ecclesiæ, quàm Petrus, juxta illud Ephes. 2. 20. *Super ædificati super fundamentum Apostolorum & Prophetarum, ipso summo angulari lapide, Christo Jesu.* Tertiò, quia quòd Petrus fuerit Caput aliorum, non arguit Primatum potestatis aut jurisdictionis, sed tantum ætatis aut vocationis. Fuit enim Caput illorum, eo sensu, quo primogenitus est caput suorum fratrum.

5. Hæc responsio nulla est. Non n. dicimus, ex sola nominis mutatione, colligi Primatum Petri, sed ex omnibus prærogativis simul sumptis. Deinde falsum est, aliorum Apostolorum propria nomina à Christo mutata esse. Tametsi n. duo filij Zebedæi, Jacobus & Joannes, vocati sint à Christo Boanerges, id est, filij tonitru; hoc tamen nomen nō erat proprium, sed ambobus commune. Quòd autem Matthæus vocatus sit Levi, & similiter Judas vocatus sit Thadæus; non est factum per mutationem, sed per primam nominis impositionem.

6. Ubi

6. Ubi obiter hæc duo distinguenda sunt:  
 1. Impositio vel mutatio nominis ab hominib.  
 facta. 2. Impositio vel mutatio nominis à Deo  
 facta. Et quidem homines ferè solent triplici-  
 ter mutare vel imponere nomina. 1. ex eventu;  
 & sic ferè factum est in lege naturæ. 2. ex no-  
 minibus parentum vel cognatorum; & sic fa-  
 ctum fuisse in lege Mosaica, colligitur ex illo  
 Lucæ 1. 61. *Nemo est in cognatione tua, qui vocetur hoc nomine.* 3. ex nominibus, vel parentum,  
 vel cognatorum, vel Sanctorum in cælo exi-  
 stentium; & sic passim fit hoc tempore.

7. At Deus non solet alicui imponere vel  
 dare nomen, nisi ad significandū aliquod my-  
 sterium, quod paucis contingit. In Novo Te-  
 stamento contigit Christo, Joanni Baptistæ, &  
 Petro. Nescio an alicui alteri. De Christo legi-  
 mus Luc 1. 30. *Et ait Angelus ei: Ne timeas Maria: in-  
 venisti enim gratiam apud Deum. Ecce concipies  
 in utero, & paries filium, & vocabis nomen ejus Je-  
 sum: Hic erit magnus.* De Joanne Baptista ibi-  
 dem v. 13. *Ait autem ad illum Angelus: Ne timeas  
 Zacharia, quoniam exaudita est deprecatio tua: Et  
 uxor tua Elisabeth pariet tibi filium, & vocabis no-  
 men ejus Joannem, &c. Hic erit magnus coram Do-  
 mino.* Denique de Petro, Joan. 1. 42. *Intuitus  
 eum Jesus dixit: Tu es Simon filius Jona: Tu voca-  
 beris Cephas, quod interpretatur Petrus.* Ubi et-  
 iam, ut in duobus præcedentibus exemplis vel  
 addi, vel intelligi debet: *Et eris magnus.*

8. Et quidē de mysterio, q̄ latebat in impo-  
 sitione nominis Jesu & Joannis, nihil dicam  
 hoc

Primum habetur Epist. 108. ad Seleucianā, statim ab initio, ubi sic ait: *Quod autem dicitur Petrum egisse pœnitentiam, cavendum est, ne ita putetur egisse, quomodo agunt in Ecclesia, qui propriè pœnitentes vocantur. Et quis hoc ferat, ut primum Apostolorum inter tales pœnitentes numerandum putemus?* Quasi dicat: Qui agunt pœnitentiam in Ecclesia, subiecti sunt Prælati Ecclesiæ, & ex illorum arbitrio puniuntur, tanto vel tanto tempore, prout ipsis visum est. At Petrus, tametsi gravissimè peccaverit, negando Christum, non tamen erat subiectus Prælati Ecclesiæ, cùm ipse potius esset Caput & Princeps Ecclesiæ; & neminem haberet, excepto Christo, à quo puniretur. Nō igitur debet inter pœnitētes Ecclesiæ numerari. Quòd hic sit sensus Augustini, colligitur ex alijs ipsius libris, ubi agit de pœnitentia Ecclesiastica, præsertim in Enchiridio c. 65. ubi sic scribit: *Rectè constituuntur ab ijs, qui Ecclesia præsumt, tempora pœnitētia, ut fiat etiam satis Ecclesia, in qua remittuntur ipsa peccata: Extra eā quippe non remittuntur.* Et Homil. 17. de utilitate pœnitentiæ, distinguit triplicem pœnitentiam: Unam accedentium ad baptismum: alteram quotidianā: tertiam Ecclesiasticam. De hac ita scribit: *Est pœnitentia gravior atque luctuosior, in qua propriè vocantur in Ecclesia pœnitentes; etiam remoti a Sacramento Altaris participandi.* Huiusmodi pœnitentem negat fuisse Petrum, quia non erat subiectus Ecclesiæ, ac proinde Ecclesia non poterat illum removere à Sacramento Altaris.

11. Alterū Augustini testimoniū habetur Ierm. 124. de tempore, ubi agens de negatione Petri, sic scribit: *Ideo B. Petrum paululū Dominus subdeseruit, ut in illo totū genus humanū posset agnoscere nihil se sine Dei gratia p̄valere: Et ut Ecclesia Reḡtori futuro, ignoscendi peccantib. quadā regula poneretur. Credenda n. erant Petro Apostolo claves Ecclesia. Credenda erat ei populorū innumera multitudo, quæ esset pro sua natura vitiiis, passionibus, culpis, involuta atq; peccatis. Et infra: Totius corporis morbum in ipso Capite curat Ecclesia; & in ipso vertice componit membrorum omnium sanitatem, in ipsa cōfessionis Christi crepidine, in ipso immobilis fidei fundamento, in Petro scil. illo, qui dixerat. Etiam si me oporteat mori tecum, non te negabo. Et ibidem: Quid agis o Petre, future Reḡtor Ecclesia, quid loqueris: Verba clara sunt. Petrus vocatur Reḡtor Ecclesia, cui infinita populorum multitudo credita est. Vocatur Caput totius corporis Ecclesia: Vertex omnium membrorum Ecclesia: Immobilis fidei fundamentum. Quid quæris amplius?*

12. Tertium testimoniū habetur in Quæstionibus Veteris ac Novi Testamenti, q. 75. Quamvis n. autor fortasse non est August. est tamē autor antiquus, & ipsi Augustino æqualis, aut antiquior. *Dicūt exactores didrachmæ ad Petrū Apostolū: Magister vester non solvit didrachmā. Quo dicto, Magistrū, ut pro omnibus Discipulis solveret, convenerūt. Salvator a. cū p̄ se & Petro dari jubet, p̄ omnib. exsolvisse videtur: q̄a sicut in Salvatore erant omnes causæ Magisterij; ita & post*

H 2

Salva.

*Salvatorem, in Petro omnes continentur. Ipsum enim constituit esse Caput eorum, ut Pastor esset gregis Dominici. Et ibidem: Manifestum est in Petro omnes contineri. Rogans enim pro Petro, pro omnibus rogasse dignoscitur. Semper enim in Præposito populus, aut corripitur, aut laudatur.*

13. Jam verò (quod secundo loco probandum erat ex Augustino) Petrum ratione sui Primatus, gessisse personam totius Ecclesiæ, & omnium fidelium, docet idem Augustinus, Enarratione prima in Psal. 108. statim in principio, ubi docet, Multa in Psalmo illo dici de Juda proditore, quæ illi conveniunt, quatenus gerit personam Judæorum, Christi hostium: sicut etiam multa cōveniunt Petro, quatenus gerit Personam Ecclesiæ. Verba Augustini sunt hæc: *Sicut enim quadam dicuntur, quæ ad Apostolum Petrum propriè pertinere videantur; nec tamen habent illustrem intellectum, nisi cum referuntur ad Ecclesiam, cujus ille agnoscitur in figura gessasse personam propter Primatum, quem in Discipulis habuit &c. Ita Judas personam quodammodo sustinet inimicorum Christi judæorum &c. Ubi adverte, non eodem sensu, Petrum & Judam sustinere personam communitatis. Nam Judas propter nefariam prodicionem Christi, sustinet personam hostium Christi. Petrus propter Primatum Ecclesiæ, sustinet personam ejusdem Ecclesiæ.*

14. Et tract. 124. in Joannem, post mediū, recitans illa verba ex Evangelio, *Dimitte nobis debita nostra, sicut & nos dimittimus debitoribus nostris;*

*nostris; mox subdit: Hoc agit Ecclesia, ſpe beata in hac vita ærumnoſa: cujus Eccleſiæ Petrus Apoſtolus, propter Apoſtolatus ſui Primatum, gerebat figurata generalitate Perſonam. Quodenim ad ipſam propriè pertinet, natuâ unus homo erat, gratiâ unus Chriſtianus, abundantiore gratia unus idemque Apoſtolus. Sed quando ei d. Etum eſt: Tibi dabo claves regni Cælorum, univerſalem ſignificabat Eccleſiam. Hic quædam attribuit Petro, tanquam privato homini; ut quod fuerit natuâ unus homo; gratiâ unus Chriſtianus; abundantiore gratia, unus Apoſtolus. Quædam verò, tanquam perſonæ publicæ; ut quod habuerit Primatum Eccleſiæ; quod ratione Primatus, geſſerit perſonam Eccleſiæ, non particularis, ſed generalis ſeu univerſalis; quod in perſona Eccleſiæ univerſalis, acceperit claves regni cælorum. At tu, Marce Antoni, contra Auguſtinum doces, Primatum Eccleſiæ, qui à te conſingitur, convenire Petro, tanquam privato homini, ratione ætatis & vocationis.*

15. Et in lib. de Agone Chriſtiano cap. 30. *Nuſquam tam vigere debent viſcera miſericordia, quàm in Catholica Eccleſia, ut tanquam vera Mater, nec peccantibus filiis ſuperbè inſultet, nec correctis difficile ignoſcat. Non enim ſive cauſa inter omnes Apoſtolos hujus Eccleſiæ Catholica perſonam ſuſtinet Petrus. Huic enim Eccleſiæ claves regni cælorum data ſunt, cum Petro data ſunt. Et cum ei dicitur, ad omnes dicitur, Amas me? Paſce oves meas. Debet igitur Eccleſia Catholica correctis & pietate firmatis filiis libenter ignoſcere, cum ipſi Petro per-*

sonam ejus gestanti, videamus veniam esse concessam. Ecce, Petrus sustinet personam Ecclesiæ Catholicæ. Et cum Petro datæ sunt claves, non datæ sunt ipsi in privatum usum, sed pro bono totius Ecclesiæ. Et cum illi dictum est, *Pasce oves meas*, non illi soli, ut privato homini, sed omnibus illius successoribus dictum est.

16. Denique, quod Petrus, quia sustinebat personam totius Ecclesiæ, solitus sit pro omnibus respondere, docet idem Augustinus serm. 31. de verbis Apostoli c. 2. *Respondit*, inquit, *Petrus unus pro omnibus, quia unitas in omnibus*. Et serm. 13. de verbis Domini. c. 1. *Ipsc enim Petrus, in Apostolorum ordine Primus, in Christi amore promptissimus, saepe unus respondit pro omnibus*. Ubi per illam particulam, *In Apostolorum ordine Primus*, intelligit Primatum Petri, non ratione ætatis aut vocationis, sed autoritatis & Præfecturæ, ut ipsemet ibidem explicat c. 2. cum ait: *Idem ergo Petrus à Petra cognominatus beatus, Ecclesiæ figuram portans, Apostolatus Principatum tenens*. De hac re dicam plura cap. sequenti. §. 16.

17. Ex dictis satis constat de sententia Augustini, nec quicquā video objici posse, quàm quod lib. 1. c. 5. n. 10. objicis, illum dixisse serm. 47. de Sanctis Petro & Paulo: *Beatus Petrus Primus Apostolorum. Beatus Paulus novissimus Apostolorum*. Ex quo inferis, sicut Paulus fuit novissimus vocatione; ita Petrum fuisse primū vocatione: Ac proinde Primatū Petri nihil aliud esse, quàm Primatū vocationis. Sed jam supra respon-



responsum est, c. 2. §. 21. Nam ibi dixi, Augustinum non connectere illa verba; sed uno loco asserere, Petrum esse Primum Apostolorum; altero, Paulum esse minimum Apostolorum. Non igitur necesse esse, ut quo sensu, unus dicitur minimus, eodē alter dicatur primus. Paulum vocari minimum, id est, indignissimum, propter sua peccata: Petrum vocari Primum, i. e. Principem, ratione Primatus seu præfecturæ.

18. Sed esto, dixerit Augustinus per modum connexionis, Petrum esse Primum, Paulum novissimum; non sequitur, eodem sensu utrumque dictum esse. Dabo simile exemplum. Christus Marci 9. 34. dixit: *Si quis vult primus esse, erit omnium novissimus, & omnium minister.* Ubi primus & novissimus in eadem sententia connectuntur; & tamen non sumuntur eodem sensu. Nam sensus est: si quis inter vos vult esse primus in gradu vel Prælatura, fiat novissimus, id est, humillimus in ministerio.

## CAPUT SEXTUM.

### *Primatus Petri probatur ex prerogativis Petri.*

1. **C**atholici assignant varia privilegia seu prærogativas Petri, ex quibus colligunt ipsius Primatum & eminentiam supra alios Apostolos: Non quod unaquæque prærogativa per se sufficiens sit, ad astringendum Primatum; sed quod omnes simul sumptæ id faciant.

ciant. Sunt autē hæ præcipuè : 1. Quòd Christus soli Petro inter omnes Apostolos, proprium nomen mutaverit. 2. Quòd quando in Evangelio recēsentur nomina Apostolorum, semper primo loco ponatur Petrus. 3. Quòd scriptura loquatur de Petro, tãquam de Principe: de alijs Apostolis, tanquam de subditis. 4. Quòd Petrus sæpè loquatur nomine omnium Apostolorum, tanquam illorum Antesignanus. 5. Quod inter omnes Apostolos, soli Petro facta sit prima revelatio divinitatis Christi. 6. Quòd soli Petro inter Apostoles promissa sit stabilitas fidei & cathedræ. 7. Quòd Christus pro solo Petro & seipso voluerit tributum solvi in Capharnaum. 8. Quòd post Resurrectionem, inter omnes Apostolos, soli Petro primum apparuerit. 9. Quòd Petrus sua autoritate vocaverit alios ad electionem novi Apostoli, in locum Judæ proditoris. 10. Quòd primus promulgaverit Judæis Evangelium, post acceptum Spiritum sanctū. 11. Quòd primum miraculum apud Judæos fecerit, in cōfirmationem Evangelij. 12. Quòd etiam primus prædicaverit gentibus Evangelium: & quòd ipsi soli oblata sit visio cœlestis de vocatione gentium. 13. Quòd primus in Concilio Hierosolymitano sententiam dixerit.

2. Certè, hæ prærogativæ, ut alias omit-  
 tam, manifestè ostendunt, aliquid peculiare  
 fuisse in Petro, quod in alijs Apostolis non fu-  
 erit. Quid autem illud sit, in eo dissentimus.

Tu

Tu nihil aliud agnoscis, quàm Primatum ætatis, vocationis & fervoris. Nec putas aliud colligi posse ex prærogativis jam enumeratis. Sed erras, ut sæpe dixi. Primò, quia incertum est, an Petrus ætate omnes alios superaverit. Secundò, nec probare potes ex Evangelio, prius Petrum, quam reliquos ad Apostolatam vocatos esse. Tertiò, nec solus fervor charitatis fuit causa omnium istarum prærogativarum. Quæ omnia clarius patebunt, si singulas prærogativas expendamus.

### *Prima Prærogativa Petri.*

3. **I**gitur prima Petri Prærogativa est, quòd Christus soli ipsi, inter omnes Apostolos, proprium nomen mutaverit. Nam cum antea vocaretur Simon, postea vocatus est Cephass, id est, Petra (Joann. 1. 42.) quæ prærogativa illi communis est cum Abrahamo, qui cum antea vocaretur Abram, id est, Pater excelsus, postea vocatus est Abraham, id est, pater multitudinis, seu multarum gentium (Genes. 17. 5.) Major tamè est Petri prærogativa, quàm Abrahami. Nam Petrus, idem nomen sortitus est, quod Christus. Cephass enim, & Syriacè, & Græcè sumi potest, teste Optato lib. 2. contra Parmenianum. Syriacè significat petram, vel lapidem: Græcè, caput. Utroque nomine appellatus est Christus. Petra quidem seu lapis, super quem fundata est Ecclesia (Matth. 21. 24.) Caput verò, à quo regitur Ecclesia, sic.

H 5

ut mu-

6. Ubi obiter hæc duo distinguenda sunt:  
 1. Impositio vel mutatio nominis ab hominib.  
 facta. 2. Impositio vel mutatio nominis à Deo  
 facta. Et quidem homines ferè solent triplici-  
 ter mutare vel imponere nomina. 1. ex eventu;  
 & sic ferè factum est in lege naturæ. 2. ex no-  
 minibus parentum vel cognatorum; & sic fa-  
 ctum fuisse in lege Mosaica, colligitur ex illo  
 Lucæ 1. 61. *Nemo est in cognatione tua, qui vocetur hoc nomine.* 3. ex nominibus, vel parentum,  
 vel cognatorum, vel Sanctorum in cælo exi-  
 stentium; & sic passim fit hoc tempore.

7. At Deus non solet alicui imponere vel  
 dare nomen, nisi ad significandū aliquod my-  
 sterium, quod paucis contingit. In Novo Te-  
 stamento contigit Christo, Joanni Baptistæ, &  
 Petro. Nescio an alicui alteri. De Christo legi-  
 mus Luc 1. 30. *Et ait Angelus ei: Ne timeas Maria: invenisti enim gratiam apud Deum. Ecce concipies in utero, & paries filium, & vocabis nomen ejus Jesum: Hic erit magnus.* De Joanne Baptista ibi-  
 dem v. 13. *Ait autem ad illum Angelus: Ne timeas Zacharia, quoniam exaudita est deprecatio tua: Et uxor tua Elisabeth pariet tibi filium, & vocabis nomen ejus Joannem, &c. Hic erit magnus coram Domino.* Denique de Petro, Joan. 1. 42. *Intuitus eum Jesus dixit: Tu es Simon filius Jona: Tu vocaberis Cephas, quod interpretatur Petrus.* Ubi et-  
 iam, ut in duobus præcedentibus exemplis vel  
 addi, vel intelligi debet: *Et eris magnus.*

8. Et quidē de mysterio, q̄ latebat in im-  
 positione nominis Jesu & Joannis, nihil dicam  
 hoc

hoc loco. Res nota est, & alibi tractanda. De mysterio autem, quod Catholici agnoscunt, inmutatione nominis Petri, scribit Augustinus tract. 7 in Joannem, post medium his verbis: *Magnum, quia mutavit ei nomen, & fecit de Simone Petrum.* Et infra: *Si hoc antè Petrus vocaretur, non ita videres mysterium Petra, & putares casu eum sic vocari, non providentia Dei. Ideo voluit eum aliud prius vocari, ut ex ipsa commutatione nominis, Sacramenti vivacitas commèdaretur.* Et Leo Magnus Epist. 87. ad Episcopos provinciæ Viennensis, de Petro sic loquitur: *Hunc enim in consortium individua unitatis assumptum, id quod ipse erat, voluit nominari, dicendo, Tu es Petrus, & super hanc Petram aedificabo Ecclesiam meam* (quæ verba cap. 4. explicata sunt) Et serm. 3. de Assumptione sua ad Pontificatum, introducit Christum loquentem ad Petrum: *Sicut meus Pater tibi manifestavit divinitatem meam; ita & ego tibi notam facio excellentiam tuam, quia tu es Petrus, id est, cum ego sim inviolabilis petra, ego lapis angularis, qui facio utraque unum; ego fundamentum, præter quod nemo potest aliud ponere: tamen tu quoque petra es, quia mea virtute solidaris, ut quæ mihi, potestate sunt propria, sint tibi mecum participatione communia.* Et Prosper Aquitanicus lib. 2. de vocatione gentium, cap. 28. *Quis ergo ambigat, quis ignoret, hanc fortissimam petram, quæ ab illa principali Petra communionem, & virtutis sumpsit, & nominis, &c.*

9. Hic vides, Marce Antoni, quid Patres sentiant: Et quàm longè absis ab illorum sententia

tentia, qui mysterium, quod illi Magnum agnoscunt, parvi æstimas. Porro quòd addis, alios Apostolos non minus esse petras seu fundamenta Ecclesiæ, quàm Petrum, temerarium est. Audi, Constat ex Scriptura, & Christum, & Petrum, & reliquos Apostolos vocari fundamentum seu petram, super quam Ecclesia ædificata est; sed diverso modo. Solus Christus est fundamentum primum, quod sua firmitate consistit, juxta illud 1. Corinth. 3. 11. *Fundamētum aliud nemo potest ponere, præter id, quod positum est, quod est Christus Jesus.* Præter Christum, Prophetæ & Apostoli sunt fundamenta secundaria, Ephes. 2. 20. *Super ædificati super fundamentum Apostolorum & Prophetarum, ipso summo angulari lapide, Christo Jesu.* Nam illi, per prædicationem fidei & doctrinæ Christianæ, sustentant Ecclesiam: Vel, quod idem est, illorum doctrinæ & prædicationi incumbit Ecclesia. Et reliqui Christiani super illorum fidē & doctrinam superædificantur. Inter secundaria verò, primum locum tenet Petrus, cui speciatim dictum est, *Tues Petrus, & super hanc Petram ædificabo Ecclesiam meam, & portæ inferi non prævalēbunt adversus eam.* Ubi aliquid peculiare illi promittitur, quod alijs Apostolis promissum non est. Nimirum firmitas, constantia, & stabilitas, quæ per petram significatur. Quæ etiam alibi alijs verbis illi promissa est, Luc. 22. 32. *Ego pro te rogavi Petre, ut non deficiat fides tua, & tu aliquando conversus, confirma fratres tuos.*

10. Igitur Christus est fundamentum Ecclesiæ primarium, & (ut loquitur Augustinus in Psalm. 86.) *fundamentum fundamentorum*. Est lapis angularis, qui connectit inter se duos parietes, id est, Judæos & gentiles (Ephes. 2. 12. & seqq.) est ostium seu janua, per quam ingredimur in Ecclesiam, (Joan. 10. 9.) Apostoli & Prophetæ sunt fundamentum secundarium, quia illorum doctrina & prædicatio fundatur in Christo: quem Prophetæ futurum prædixerunt; Apostoli præsentem annunciarunt. Hoc peculiare habet Petrus, quod ipse cum suis Successoribus habeat prærogativam constantiæ & firmitatis in fide, quam reliqui Apostoli cum suis successoribus non habuerunt. Ipsi quidem in suis proprijs personis manserunt constantes (excepto Juda) sed in Successoribus defecerunt. Sola Cathedra Petri habet hoc privilegium. De quo plura dicturus sum in sexta prærogativa.

11. Jam verò, quod tertio loco objicis, ex eo, quod Petrus fuit Caput Apostolorum, non posse colligi Primatum potestatis, sed tantum ætatis aut vocationis; & frivolum est, & sæpè refutatum. Non audes negare, quod omnes boni authores asserunt, Petrum fuisse Caput Apostolorum. Quid ergo? Fingis ideo Caput fuisse, quia erat ætate Senior, vocatione antiquior. Nimirum, ut tollas Primatum, qui certus est; excogitas alium, qui incertus est.

Secundum

## Secunda Prærogativa.

12. **A**ltera prærogativa est, quòd quando in Evangelio recensentur nomina Apostolorum, semper primo loco ponatur Petrus, tanquam Princeps & Antesignanus, ut Matth. 10. 2. *Duodecim Apostolorum nomina sunt hæc: Primus, Simon qui dicitur Petrus, &c.* Idem fit Marc. 3. 16. & Luc. 6. 14, & Act. 1. 13. Tu respondes, ut soles, (lib. 1. cap. 9. n. 2.) Petrum primo loco nominari, quia erat primus ætate & vocatione. Nondum id probasti. At ego facile probem, fuisse Primum autoritate & jurisdictione: sic enim Patres explicant illā particulam, *Primus*. Et ratio sumitur ex ipso contextu. Nam si Petrus, in ista enumeratione Apostolorū, diceretur *Primus* ordine ætatis aut vocationis; tunc reliqui, qui ponuntur post Petrum, ponerentur etiam juxta ordinem ætatis aut vocationis. At hoc falsum est. Imò, nullus ferè inter eos servatur ordo. Nam apud Matthæum, post Petrum, nominatur Andreas: apud Marcum, non Andreas, sed Jacobus: apud Lucam in Actibus, Joannes. Idē fit in reliquis Apostolis. Aliquando Matthæus præponitur Thomæ, aliquando postponitur. Et sic deinceps. Debet ergo assignari causa, quare Petrus semper nominetur primo loco; reliqui nullo certo ordine. Nec potest alia dari, quàm quòd Petrus nominetur, ut superior; reliqui, ut inter se æquales, & solo Petro inferiores,

13. Et



13. Et sanè, quòd Petrus, ratione ætatis, non ponatur primo loco (etiãsi demus fuisse seniore[m] omnibus, quod tamen non damus) facilè convincam ex tua ipsius concessione. Fateris, Petrum, quia Senior erat, fuisse quasi primogenitum inter Apostolos; Ac proinde, sicut primogenitus solet primo loco numerari inter fratres, ratione primogenituræ; ita de Petro statuendum esse. At contrarium ostendam ex scriptura. Nam Ruben (quo exemplo tu uteris) fuit primogenitus inter duodecim filios Iacob: Et tamen non semper nominatur primo loco, ut patet Apoc. 7. 5. ubi Judas illi præponitur. Nec desunt similia Exempla. Inter filios Isai, primogenitus fuit Eliab, & præfertur illi David (1. Reg. 16.) Rursum inter filios David, Adonias fuit senior Salomone, & tamen præfertur ei Salomon. (4. Reg. 2.) Ergo ex eo, quod aliquis ætate senior est, non statim sequitur, alijs præferendum esse. Unde ergo probas, Petrum, eo titulo, quia senior erat, primum locum inter Apostolos obtinuisse? Non video.

### *Tertia Prærogativa.*

14. **T**ertia prærogativa est, quòd scriptura loquatur de Petro, tanquam de Principe; & de alijs Apostolis tanquam de subditis. Marc. 1. 36. *Et persecutus est eum Simon, & qui cū ipso erant.* Et Luc. 8. 45. *Dixit Petrus, & qui cum illo erant.* Et Luc. 9. 32, *Petrus verò, & qui cum illo erant.*

*erant. Et Act. 2. 14. Stans Petrus cum undecim. Et alibi sæpius. Qui modus loquendi usitatus est In scriptura, & significat Principem cum suis subditis, ut manifestè constat ex sequentibus testimonijs. 1. Reg. 30. 4. David, & populus, qui erat cum eo. Et infra v. 9. David & sexcenti viri, qui erant cum eo. Et 2. Macchab. 8. 1. Judas Macchabeus, & qui cum illo erant. Et cap. 10. 1. Macchabeus autem, & qui cum eo erant. Et cap. 11. 6. Ut autem Macchabeus, & qui cum eo erant. Et Apoc. 12. 7. Michael & Angeli ejus præliabuntur. Sicut ergo ex hac loquendi forma rectè colligimus, Davidem; Judam Macchabæum; & Michaellem Archangelum fuisse Principes respectu eorum, qui cum ipsis erant: Sic etiam colligimus ex simili loquendi forma, Petrum fuisse Principem Apostolorum.*

15. Hic iterum repetis tuam cantilenam; non alium Primatum ex hac prærogativa colligi posse, quàm ætatis & vocationis. At jam ostendi, ex modo loquendi scripturæ, plus colligi posse ac debere. Nisi fortè existimes, etiã Michaellem, Davidem, & Judam Macchabæum, non alio titulo, quàm ætatis aut vocationis, suos socios præcessisse. Quod ridiculum est. Nam inter Angelos, alius alio senior non est; nec unquam probabis ex scriptura; Michaellem ante alios ad officium Angelorum à Deo vocatum esse. Idem dico de Davide & Macchabæo. Non probabis, utrunque, & etate, & vocatione ad militiam; suos socios super-

I

fasse;

rasse. Sicut nec de Petro id hactenus probare potuisti. Mera figmenta sunt, quæ adfers.

### Quarta Prærogativa.

**Q**uarta prærogativa est, quòd Petrus sæpè loquatur nomine omnium Apostolorum, tanquam illorum Antesignanus, ut Matth. 16. 15. *Dicit illis Jesus: vos autem, quem me esse dicitis? Respondens Simon Petrus, dixit: Tu es Christus filius Dei vivi.* Et Matth. 19. 27. *Eccen os reliquimus omnia & secuti sumus te.* Et Luc. 12. 41. *Domine, ad nos dicis hanc parabolam, an ad omnes?* Et Joann. 6. 68. *Dixit ergo Jesus ad duodecim: nunquid & vos vultis abire? Respondit ei Simon Petrus: Domine, ad quem ibimus? Verba vite aterna habes.*

17. Ex his Patres colligunt Primatum Petri. Cyrillus Alexandrinus lib. 4. in Joannem. cap. 18. *Per unum, qui præerat, omnes respondent.* Et lib. 12. cap. 64. *Cum Salvator à Discipulis quæreret: Vos autem, quem me esse dicitis? Petrus, ut Princeps Caputque cæterorum, primus exclamavit: Tu es Christus filij Dei vivi.* Et aliter Cyrillus Hierosolymitanus, catech. 11. *Omni- bus Apostolis reticentibus (supra vires enim erat hæc doctrina) Petrus Princeps Apostolorum & supremus Ecclesiæ Præco, dicit ad ipsum, Tu es Christus filius Dei vivi.* Et Paulus Emissenus Homil. de Christi Nativitate: *Nonne Petrus, Apostolorum Coryphaeus, eorundemque os respondit, Tu*

*es Christus filius Dei vivi.* Et Cyprianus lib. 1. Epist. 3. ad Cornelium, longè ante medium: *Petrus tamen, super quem ædificata ab eodem Domino fuerat Ecclesia, unus pro omnibus loquens, & Ecclesie voce respondens ait: Domine, ad quem ibimus?* Augustinus idem sentit, ut cap. præcedenti ostensum est.

18. Habemus similia exempla in scriptura. Nam Christus, quia erat supremus Princeps omnium, sæpè loquebatur pro alijs. Verbi gratia. Quando Pharisei quærebant ex Apostolis: *Quare cum publicanis & peccatoribus manducat Magister vester?* Respondit Christus ipsorum nomine: *Non est opus valentibus medicus, sed male habentibus* (Matth. 9. 11.) Item cum ijdem Pharisei Apostolis spicas Sabbatho velentibus dicerent: *Quid facitis, quod non licet in Sabbathis?* Respondit pro illis Christus: *Nec hoc legistis, quod fecit David cum esurisset ipse, &c.* (Luc. 6. 2.) Et sic deinceps.

### Quinta Prærogativa.

19. Quinta est, quòd inter omnes Apostolos, soli Petro facta sit prima revelatio Divinitatis Christi. Matth. 16. 17. *Beatus es Simon Barjona, quia caro & sanguis nõ revelavit tibi, sed Pater meus, qui in cælis est.* Quare præ cæteris beatus? Quia p̃ cæteris, à Patre cœlesti revelatũ illi erat, *Tu es Christus filius Dei vivi.* Magnũ sine dubio privilegium. De quo Hilarius in Pl.

131. Athanasius serm. 4. contra Arrianos, Augustinus serm. 124. de tempore, Leo serm. 3. de Assumptione sua ad Pontificatum.

20. Tu tamen, tuo more, conaris hoc Petri Privilegium extenuare (lib. 1. cap. 9. n. 4.) & tria objicis. Primò, Nathanaëlem citiùs quàm Petrum, confessum esse Divinitatem Christi, cum dixit Joann. 1. 49. *Rabbi, tu es filius Dei, tu es Rex Israel*. Secundò, Joannem Baptistam, & citiùs, & meliùs, quàm Petrum id fecisse. Joan. 3. 30. *Illum oportet crescere, me autem minui*. Denique ipsum Petrum, antequam faceret hanc confessionem, *Tu es Christus filius Dei vivi*, jam antea cum alijs Apostolis agnovisse Christi Divinitatem, Joan. 6. 70. *Et nos credidimus, & cognovimus, quia tu es Christus filius Dei*.

21. Nihil efficis, Marce Antoni. Nam primò, quod adfers de Nathanaële, incertum est, an ipse eodem sensu, quo Petrus, dixerit, *Tu es Christus filius Dei*. Multi negant, asserentes Petrum locutum esse de Filio Dei naturali; Nathanaëlem de Filio Dei adoptivo. Plus igitur Petrum confessum esse, quàm Nathanaëlem. Hunc, solam sanctitatem & iustitiam: Illum, Divinitatem confessum esse. Ita Chrysostomus Homil. 20. in Joannem, Theophylactus & Eutymius in cap. 21 Joannis. Quos sequitur Cardinalis Bellarminus. Tu contrà sentis, utrumque, tam Nathanaëlem, quàm Petrum, confessum esse Christi Divinitatem. Et probas autoritate Augustini tract. 7. in Joannem, Chryso-

Chrysoſtomi Homil. 19. in Joannem, & Cyrilli lib. 12. theſauri cap. 15.

22. Sed falſò. Nam Chryſoſtomus Homil. 19. (quam tu citas) nihil habet, quod juvare te poſſit. At Homil. 20. (quam ego cito) planè contra te eſt. Verba ejus ſunt hæc: *Et ſi iſdē verbis, & Petrus, & Nathanael uſi ſint, non tamen idem ambo ſenſerunt: Sed Petrus Filium Dei, tanquam verum Deum; Nathanael, tanquam hominem tantum confeſſus eſt, quod ex conſequentibus conſtat. Addit enim, Tu es Rex Iſrael. Filius autem Dei, non modò Iſrael, ſed univerſi orbis terrarum Rex eſt. Quod etiam inde oſtenditur, quòd Petro nihil amplius addidit Chriſtus, ſed tanquam perfectò in fide, Eccleſiam ſuam ejus teſtimonio adificaturum pollicitus eſt. Nathanaeli autem, tanquam potiori in parte deficienti ſubdidit: Amen Amen dico vobis, amodo videbitis cælum apertum, & Angelos Dei aſcendentes & deſcendentes ſuper filium hominis. Animadvertis, quomodo eum à terra paulatim erigit? quomodo animum excitat, ne amplius ſimplicem hominem conjeſtetur? Cui enim Angeli miniſtrant, & ſuper quem aſcendunt & deſcendunt, quonam pacto hominem eſſe exiſtimabitur?*

23. Nunc vides impoſturam tuam in citando Chryſoſtomo. Certè Chryſoſtomus nō ſolùm aſſerit, quod Bellarminus aſſerit, ſed etiam validis argumentis confirmat. Quod etiā facit Theophylactus in cap. 1. Joannis, ubi ſic ſcribit: *Nathanael igitur, auditis illis, cœpit ſentire magnitudinem Domini, quantum tunc poſſibile e-*

rat, & fatetur illum filium Dei. Veruntamen, quāvis filium Dei fateatur, non tamen sicut Petrus. Nā Petrus quidem confessus est Filium Dei: ideo & beatus pradicatur, & Ecclesia ei concreditur. Nathanael verò, ut hominem nudum quidem eum fatetur: gratia autem propter virtutem, adoptatum in Filium Dei. Et hoc manifestum est ex eo, quod subditur: Tu es ille Rex Israel. Vides, quòd nondum venerat ad perfectam cognitionem veræ Deitatis Unigeniti. Etenim quasi amicum Dei, & quasi Regem Israel, eum credit esse. Quòd si verè eum Deum esset confessus, non dixisset, eum Regem Israel, sed Regem Universi. Unde non pradicatur beatus, sicut Petrus. Et Dominus corrigens eum, & inducens ad cognoscendum quiddam dignum sua Deitate; Videbitis, inquit, Angelos Dei ascendentes & descendentes super filium hominis. Ne enim, inquit, suspiceris nudum hominem, sed Dominum Angelorum. Cui enim Angeli ministrant, is utique non fuerit purus homo, sed verus Deus.

24. Eadem fraude usus es in citando Augustino. Nam ille quidem loco citato, sic scribit de Nathanaele: Talem vocem protulit, Tu es Filius Dei, Tu es Rex Israel: Qualem tantò post Petrus, quando ei Dominus ait: Beatus es Simon Barjona, quia caro & sanguis non revelavit tibi, sed Pater meus, qui in cælis est. Hic nihil aliud dicit, quàm Nathanaelem protulisse talem vocem, qualem Petrus protulit; quod etiam dicit Chrysostomus.

foetomus. An autem eo sensu protulerit, non dicit ibi Augustinus. Cur ergo fingis hoc illum dicere? Audi verò, quid dicat, serm. 124. de tempore: *Hic est Petrus*, inquit, *qui divina revelatione, prior omnium veritatem meruit confiteri, dicens, Tu es Christus Filius Dei.* Ubi nota particulam illam, *Prior omnium.* Quam etiam ponit Athanasius serm. 4. contra Arianos.

25. Sed esto: Demustibi (quod necesse non est) Nathanaelem prius, quàm Petrum, confessum esse Christi Divinitatem: demus etiam Joannem Baptistam (de quo certius est) idem fecisse. An ideo sublatum putas Petro suum privilegium? Nullo modo. Manet illi suum Privilegium commune quidem cum Joanne & Nathanaele; sed tamen proprium, respectu Apostolorum, cum quibus illum hoc loco conferimus. Nam ille prius quàm alij Apostoli, confessus est Christi Divinitatem: Ille præ alijs Apostolis meruit audire à Christo, *Beatus es Simon Bar Jona.* Nec obstat, quòd idem Petrus, ante illam confessionem, de se & alijs Apostolis dixerit: *Nos credidimus & cognovimus, Tu es Christus Filius Dei vivi;* nam etiam inde colligitur, Petrum, sicut præ alijs loquebatur, ita ante alios credidisse, & confessum esse Christi Divinitatem. Quod tu ipse concedis lib. 1. cap. 5. n. 4. ubi cum Ambrosio tribuis Petro Primatum confessionis, &



Primatum fidei. Unde etiam manifestè constat, te, studio contradicendi Catholicis, tibi ipsi contrarium esse. Nam loco citato contendis contra Catholicos, Petrum non habere Primatum potestatis aut jurisdictionis, sed fidei & confessionis. At cap. 9. n. 4. ubi contra Catholicos oppugnas Privilegia Petri, negas Petrum Primum esse inter Apostolos, qui Christi Divinitatem crediderit, & confessus sit. Hoc solenne tibi est.

26. Queritur hîc, non à te, sed ab alijs bonis authoribus: Cùm Petrus bis confessus fuerit Christi Divinitatem; semel Ioan. 6. 70. *Nos credidimus; quia tu es filius Dei;* & semel Matth. 16. 16. *Tu es Christus Filius Dei vivi;* cur priori loco nullam meritis sit laudem à Christo; posteriori verò dictum illi sit, *Beatus es Simon Bar-Jona?* Respondeo. Hoc ideo factum est, quia priori loco multi ex discipulis discedebant à Christo, & non credebant, quæ ab ipso dicebantur de manducanda sua carne, & bibendo suo sanguine. Unde postea dicebat, *Nunquid & vos vultis abire?* Tunc respondit Petrus: *Nos credidimus & cognovimus, quia tu es Christus Filius Dei.* Ne ergo Petrus, si à Christo laudaretur, præferret se alijs, qui recesserant à Christo, & sibi de sua perseverantia blandiretur; noluit illum Christus laudare. At posteriori loco, non erat occasio Superbiæ; ideoque dixit illi Christus, *Beatus es Simon Bar-Jona.* Vide Theophylactum & Toletum in c. 1. Joannis.

Sexta

*Sexta Prærogativa.*

**S**Extra est, quòd soli Petro, inter omnes Apostolos promissa sit constàtia fidei, & cathedræ. Et quidem duobus locis. Primò, Matth. 16. 18. *Tu es Petrus, & super hanc Petram ædificabo Ecclesiam meam, & porta inferi non prævalebunt adversus eam.* Deinde, Lucæ 22. 32. *Ego pro te rogavi Petre, ut non deficiat fides tua.* Quod ad priorem promissionem attinet, juxta Hebraicum textum, quo Matthæus scripsit Evangelium, non est illa generis differentia inter Petrum & Petram, sed utrobique eodem genere dicitur: *Tu es Petra, & super hanc Petram ædificabo Ecclesiam meam.* Perinde ac si dicas: *Tu es Petra, supra quam ædificabo Ecclesiam meam.* Unde manifestum est, per petram non posse aliud intelligi, quàm ipsum Apostolum Petrũ, qui est quasi lapis, seu petra fundamentalis, super quam ædificata est Ecclesia. Et quamvis non solus Petrus, sed etiam reliqui Apostoli sint lapides fundamentales, ita ut simul sint Duodecim (juxta illud Apoc 21. 14. *Et murus civitatis, id est, Ecclesia, habens fundamenta duodecim, & in ipsis duodecim, nomina duodecim Apostolorum Agni*) tamen reliquis Apostolis, & illorum Successoribus, non est promissa constàtia & firmitas, quæ Petro & illius Successoribus promissa est. Unde Cathedra Petri & Successorum ejus adhuc firma consistit, nec

in ea hætenus defecit fides Catholica, ut benè advertit Augustinus in Psalmo, contra partem Donati, ubi ait : *Numerate Sacerdotes, vel ab ipsa Petri Sede: Et in ordine illo Patrum, quis cui successit, videte. Ipsa est Petra, quam non vincunt superba inferorum portæ.* At Cathedræ aliorum Apostolorum quia non habuerunt hanc promissionem in Successoribus, pridem collapsæ sunt, ut Cathedra Jacobi Hierosolymitana; Cathedra Joannis Ephesina; Cathedra Matthæi Æthiopica; Cathedra Andreæ Scythica.

28. Quòd autem per petram, super quam Ecclesia ædificata est, debeat intelligi Petrus Apostolus, docent antiqui Patres. Origenes Homil. 5. in Exodum : *Vide, magno illi Ecclesiæ fundamento & Petra solidissima, super quam Christus fundavit Ecclesiam, quid dicatur à Domino.* Et in Psalm. 1. *Petrus, super quem Christi Ecclesia ædificata est, contra quam inferorum portæ non prevalebunt.*

Et Basilii Magnus ad cap. 2. Isaia: *Unus ex his montibus fuit Petrus, quem Petram appellavit, propter maximam firmitatem fidei, propter infractum animi robur ad non cedendum inslictis plagis tentationum; super quam Petram promisit ædificare Ecclesiam suam.* Et lib. 2. contra Eunomium: *statim ex hac voce, Petra, intelligimus Petrum Joannæ filium, qui fuit ex Bethsaida, Andreæ fratrem, qui quoniam fide præstabat, Ecclesiæ sibi commissam ædificationem suscepit.*

Et Epiphanius in Ancorato : *Ipse Dominus consti-*

constituit Petrum Primum Apostolorum, Petram firmam, super quam Ecclesia Dei adificata est, & porta inferorum non valebunt adversus illam.

Et Chrysostomus Homil. in Petrum & Heliam: Sed vide, cujusmodi peccato permisit subjici Petrum, illum talem ac tantum virum, Apostolorum verticem, fundamentum immobile, & petram stabilem, quæ non posset concuti.

Et Cyrillus lib. 2. in Joannem cap. 12. Intuitus autem eum Jesus dixit: Tu es Simon filius Jonæ, tu vocaberis Cephas, &c. Vocabulo ipso commode significans, quod in eo, tanquam in Petra lapideque firmissimo, suam esset adificaturus Ecclesiam.

Et Theophylactus ad cap. 16. Matthæi. Remunerat Petrum Dominus, mercedem illi dans magnam, quod super eum adificavit Ecclesiam. Et ad cap. 22. Lucæ. Tu verò conversus confirma fratres tuos. Planus hujus intellectus hic est: Quia te habeo, ut Principem Discipulorum, postquam negato me flevisti, & ad penitentiam veneris, confirma ceteros. Hoc enim te decet, qui post me Ecclesiæ petra es, & fundamentum.

Et Hieronymus in cap. 16. Matthæi: Secundum Metaphoram Petra, rectè dicitur ei, Aedificabo Ecclesiam meam super te.

Et Cyprianus lib. 4. Epist. 9. ad Pupianum, post medium: Loquitur illic Petrus, super quem aedificanda fuerat Ecclesia.

Et

Et Augustinus serm. 15. de Sanctis. *Petrum itaque fundamentum Ecclesia Dominus nominavit, & idèò dignè fundamentum hoc Ecclesia colit, supra quod Ecclesiastici adificij altitudo consurgit.*

29. Ex horum Patrum autoritate constat, Petrum esse fundamentum Ecclesiæ; esse Petram solidam firmam, stabilem, immobilem, super quam Ecclesia Christi fundata est. At objicis, non deesse alios Patres, qui per petram non intelligunt ipsum Petrum, sed fidem seu confessionem Petri. Respondeo. Utrumque intelligunt, & Petrum ipsum, & confessionem Petri. Nam cum asserunt, Ecclesiam fundatam esse super fidem & confessionem Petri, volunt significare, fundatam esse super Petrum, propter illius fidem & confessionem, ut rectè notat Cardinalis Bellarminus lib. 1. de Pontifice. cap. 10. circa finem, & Maldonatus ad cap. 16. Matthæi. Et modus ille loquendi usitatus est. Usitatè enim dicimus, in unius hominis prudentia & fidelitate fundatam esse Rempublicam, id est, in uno homine, propter ipsius prudentiam & fidelitatem. Item, valetudinem Imperatoris pendere à peritia unius medici, id est, ab uno Medico, propter insignem illius peritiam.

30. Sed iterum objicis (lib. 1. cap. 6. n. 14. & seqq.) hanc explicationem non esse secundum mentem illorum Patrum. Nam illos loqui de fide, abstrahendo à persona Petri. Et sic omnino

no loquendum esse, probas hac ratione: *Fides in Petro, veleſt ratio finalis, cur Petrus ſit fundamentum; & ſic ubique, ubi erit illa fides, erit fundamentum: veleſt tantum conditio, ſine qua Petrus non eſſet fundamentum; & ſic locutio eſt valde impropria.* Reſpondeo. Apertè pugnas cum ſcriptura, quæ Chriſtum, Apoſtolos, & Prophetas vocat fundamenta Eccleſiæ, ut dictum eſt. Si ergo Chriſtus eſt fundamentum, ſi Apoſtoli & Prophetæ ſunt, cur Petrus eſſe non poſſit? Et, ſi ſuper Chriſtum, Apoſtolos, & Prophetas ædificata eſt Eccleſia, cur ſupra Petrum ædificari non potuit? Aut è contrario, ſi fundamentum Eccleſiæ non eſt Petrus, ſed fides ſeparata à perſona Petri; cur non ſimili modo dicis, nec Chriſtum, nec Prophetas, nec Apoſtolos eſſe fundamentum Eccleſiæ, ſed aliquid aliud ſeparatum ab illorum perſona? Hic reſponde, ſi potes.

31. Ratio, quam adfers, nihil efficit. Primo, quia non ſequitur, quod inferſ in priori membro; Si fides in Petro eſt finis, propter quem Petrus eſt fundamentum: Ergo ubicunque eſt fides, ibi erit fundamentum. Sicut in ſimili non ſequitur; Si ſanitas eſt finis, propter quem ſumitur medicina: Ergo ubicunque eſt ſanitas, ibi eſt medicina. Sed ſuſpīcor mēdum eſſe in tuo exemplari, & pro illa particula, *Ratio finalis*, ponendam eſſe iſtam, *Ratio formalis*. Sed tunc, omiſſo priori membro, negandum eſt quod inferſ in poſteriori, de impropria locutione

cutione. Jam enim ostendi, usitatè dici posse, Petrus est Petra Ecclesiæ propter confessionem fidei. Denique, præter duo membra, quæ assumis, datur tertium, nempe, confessio fidei est causa moralis, propter quam Petrus est Petra Ecclesiæ. Sicut virtus est causa moralis, propter quam aliquis eligitur in Episcopum. Et meritum Christi est causa moralis nostræ justificationis: Et intercessio Principis est causa moralis, propter quam quis admittitur in aulam Imperatoris. Nam Petrus per confessionem fidei, quodammodo meritus est, ut fieret Petra Ecclesiæ. Et hoc sensu loquuntur Patres. Maximus Taurinensis Homil. 3. in natali Apostolorum Petri & Pauli: *Quanti, inquit, meriti apud Dominum suum Petrus erat, ut ei totius Ecclesiæ gubernacula traderentur.* Et Theophylactus ad cap. 16. Matthæi: *Remunerat Petrum Dominus, mercedem illi dans magnam, quòd super eum edificavit Ecclesiam.* Et alij.

32. Sed ut magis percipias, quàm inepta sit tua ratio, duo quæram ex te: Unum, si fides, abstrahendo à Persona Petri, est fundamentum Ecclesiæ, ut tu vis; vel abstrahis illam à solo Petro, vel ab omnibus universim. Si à solo Petro, & non ab alijs, quid causæ? Si ab omnibus, non erit ratio, cur Apostoli potius dicantur fundamenta Ecclesiæ, quàm alij Christiani. Quæ enim esse potest, si fides est fundamentum, abstrahendo ab omnibus?

bus? Alterum, quo sensu Christus dicatur esse fundamentum? An agnoscis aliquid in Christo, quod sit fundamentum Ecclesiæ, abstrahendo à persona Christi? An verò aliquid, quod sit ratio formalis vel conditio, sine qua Christus non esset fundamentum? Hic redit tua quæstio. Ad quam responde. Sin minus, paulo post ego respondebo.

33. Quod objicis, Patres loqui de fide separata à Petro, partim falsum est; partim illorum sententiam non assequeris. Falsum est de ijs, qui apertè asserunt, Petrum esse fundamentum Ecclesiæ propter confessionem fidei. Reliquos non intelligis. Ut intelligas, explicandum est, quomodo Christus, quomodo Petrus, quomodo reliqui Apostoli, quomodo item fides dicatur esse fundamentum Ecclesiæ. Igitur hæc tria distinguenda sunt. Primò, fides in Christum, quæ in eo consistit, ut credas Christum esse filium Dei, verum Deum ac verum hominem. Secundò, confessio illius fidei, de qua Apostolus Rom. 10. 10. *Corde creditur ad iustitiam; ore autem confessio fit ad salutem.* Tertiò, prædicatio ejusdem fidei, de qua ibidem vers. 14. *Quomodo credent ei, quem non audierunt? Quomodo autem audient sine prædicante? Quomodo vero prædicabunt nisi mittantur?* Juxta hanc distinctionem, hæc tres propositiones veræ sunt. Prima Christ⁹ est primarium fundamentum Ecclesiæ, ratione fidei circa ipsius Divinitatem & incarnatio-



nationem. Secunda, Petrus est secundarium fundamentum Ecclesiæ, ratione confessionis illius fidei, quam fecit dicendo: *Tu es Christus Filius Dei vivi*: habens annexam promissionem stabilitatis pro se & suis Successoribus. Tertia, Apostoli sunt secundaria fundamenta Ecclesiæ post Petrum, ratione prædicationis ejusdem fidei in Christum: non habentes annexam promissionem stabilitatis in suis Successoribus.

34. Juxta primam propositionem intelligendum est illud 1. Corinth. 3. 11. *Fundamentum aliud nemo potest ponere, præter id, quod positum est, quod est Christus Jesus*. Ubi Christus dicitur fundamentum, ratione fidei circa ipsius Divinitatem, ut explicat Gregorius lib. 7. Epist. 47. Anselmus, Cornelius de lapide, & alij in commentario illius loci. Quod intelligunt de fide viva, quæ per charitatem operatur, ut loquitur idem Apostolus ad Galat. 5. 6. Verba Gregorij sunt hæc: *Fundamentum aliud nemo potest ponere &c. Quisquis ergo in dilectione Dei & proximi, fidei, quæ in Christo est, firmitatem tenet, eundem Jesum Christum, Dei & hominis filium, apud se posuit fundamentum*.

35. Juxta secundam intelligendum est illud Matth. 16. 17. *Beatus es Simon Bar-jona, propter confessionem fidei, quam Deo Patri inspirante fecisti, dicens: Tu es Christus Filius Dei vivi* Propter hanc confessionem, *super te, tanquam petram firmam ac stabilem ædificabo Ecclesiam*

*clesiam meam: Et porta inferi non prevalebunt adversus eam.* Quare? quia confessio fidei; quā fecisti; nunquam defectura est in te & Successoribus tuis. *Ego enim pro te rogavi, ut non deficiat fides tua.*

36. Juxta tertiam intelligendum est illud Ephes. 2. 20. *Superadificati super fundamentum Apostolorum & Prophetarum*, id est, super Apostolos & Prophetas, qui propter prædicationem fidei in Christum sunt fundamenta Ecclesiæ secundaria. Et super hæc fundamenta proximè & immediatè superædificantur alij Christiani, qui per illorum prædicationem ad fidem Christi convertantur. Vide Cornelium de Lapide ibidem.

37. Ex dictis facilè intelligi & conciliari possunt Patres, quos adduxisti. Nam aliqui loquuntur de fide Christi, juxta primam propositionem. Et sic fides separari potest à Petro, non tamen à Christo, qui est principale objectum illius fidei. Sic loquitur Bernardus Epist. 194. cū ait: *Testante Apostolo, sicut unus Deus, una fides esse dignoscitur, in qua; tanquam immobili fundamento præter quod, nemo aliud potest ponere, firmitas Ecclesiæ Catholica inviolata consistit.* Alij loquuntur de confessione fidei, juxta secundam propositionem: Et sic fides non potest separari à Petro, quia solus Petrus est, qui propter hanc fidei confessionē, meritus est appellari Petra seu fundamentum Ecclesiæ. Sic loquitur Stephanus Papa à te citatus ex Baronio: *Catholica, inquit, Christi & Dei nostri*

*nostri Ecclesia, fundata super firmam Petram, Apostoli videlicet Petri confessionem. Et plures alij.*

38. Maneat igitur certum fixumque, sextam Petri Prærogativam in eo cōsistere, quod ipsi soli cum suis Successoribus, non autem reliquis Apostolis cum suis Successoribus, promissa sit constantia fidei & cathedræ: Et quòd ideo dicatur firma petra, super quam ædificata est Ecclesia nunquam ruitura.

### *Septima Prærogativa.*

39. **S**eptima est, quòd Christus pro solo Petro & seipso, non pro alijs Apostolis, voluerit tributum, nempe staterem seu didrachmam solvi in Capharnaum Matth. 17. 26. *Da eis pro me & te.* Nimirum, ut ostenderet, Petrū alijs præferendum esse, & ipsum solum cum Christo, tanquam Vicarium cum suo Domino sociandum, ut explicant Augustinus lib. quæstionum Veteris ac Novi Testamenti q. 75. Hieronymus ad cap. 18. Matthæi, circa initium, Theophylactus ibidem, Chrysostomus Homil. 59. in Matthæum, & alij plures. Ponam illorum verba.

40. Augustinus sic scribit: *Salvator autem, cum pro se & Petro dare jubet didrachma, pro omnibus exsolvisse videtur; quia sicut in Salvatore erant omnes causa Magisterij, ita & post Salvatorem in Petro omnes continentur. Ipsum enim constituit Caput eorum, ut esset Pastor gregis Domini.*

Hierø-

Hieronymus sic: Post inventum staterem, post tributa reddita, quid sibi vult Apostolorum repentina interrogatio, Quis putas major est in regno cælorum? Quia viderant pro Petro & Domino idem tributum redditum, ex aequalitate pretij arbitrati sunt, Petrum omnibus aliis Apostolis esse prælatum; qui in redditione tributi, Domino fuerat comparatus. Ideo interrogant, Quis major sit in Regno cælorum?

Theophylactus sic: Quia viderant Petrum à Christo honoratum, (honoratus enim erat hic, dando staterem pro Christo & pro se) & propterea humanum quiddam passi, invidiaque accensi, oblique accedunt interrogantes Dominum, quis maximus esset?

Chrysostomus circa illa verba, Da eis pro me & te, sic subjicit. Vidisti honoris excellentiam, Vide nunc, quanta Philosophia utitur Petrus. Hunc enim locum Marcus, qui Petri Discipulus fuit, ideo videtur non scripsisse, quoniam ingens hinc honor Magistro deferebatur. Sed negationem quidem ille diligentissime scripsit: Hæc verò, quæ ad Magistri laudem pertinent, ipso fortè ita volente, omnino siluit. Et paulo post: humanum quid passi Discipuli sunt, quod Evangelista quoque significavit dicens: In illa hora; quando sc. illis omnibus Petrum prætulit. Nam cum & Jacobus & Joannes primogeniti essent, nihil tamen tale pro ipsis fecisse videtur. Et paulò post: Quando certos præferri conspexerunt, (ut in transfiguratione Petrum, Jacobum & Joannem) nihil tale passi sunt. Cum verò ad unum delatus est honor, tunc nimirum doluerunt.

*luerunt. Quamvis non ex hac resolum, sed ex alijs quoque multis inflammati fuerunt: tum, quia dixit illi, Dabo tibi claves regni cælorum: tum, quia, Beatus es Simon Barjona. tum etiam hic, Da eis pro me & te: tum denique, quia liberiùs eum multà cum Christo colloqui conspiciebant.*

41. Quid tu verò ad hæc omnia, Marce Antoni? Primò, repetis solennem tuam responsionem, nihil aliud hinc colligi posse, quàm Petrum propter Primatum & vocationis, fuisse alijs prælatum. Agnoscis ergo prælatum esse. Erras tamen, ut sæpe dixi, id factum esse propter Primatum ætatis & vocationis. Nam incertum est, an Petrus fuerit Primus omnium ætate. Et falsum est, ante alios omnes vocatum esse ad Apostolatam.

42. Deinde, sigillatim hæc dicis de Augustino, Hieronymo & Chrysostomo. Primò, incertum esse, an Augustinus sit autor illius libri. Autorem verò, quisquis sit, nihil aliud voluisse, quàm Petrum fuisse Caput, id est, Primum & quasi Procuratorem cæterorum: Aut, si plus voluit, audiendum nō esse. At plus voluit sine dubio. Voluit Petrū esse Caput & Pastore gregis Dominici. Voluit omnes causas Magisterij, quæ erant in Christo, fuisse etiam in Petro. An ideo, quia hoc voluit, audiendus non est? Vide ne tu audiendus non sis

43. Secundò ais, Hieronymum, post verba superiùs citata, addidisse etiam hæc: *Vidensque Jesus cogitationes eorum, & causas erroris intelligens, vult desiderium gloria, humilitatis contentio-*

*sentione sanare.* Itaque ex Hieronymi sententia, errasse Apostolos, existimantes Petrum sibi prælatum, tanquam verè Dominum, Principem & Monarcham. Respondeo. Apostoli in uno errabant; in altero non errabant. Non errabant in eo, quòd putarent Petrum sibi præferri. Hoc enim manifestè constabat ex varijs signis, quæ Chrysostomus paulò ante attingit. At in eo errabant, quòd putarent illum, non solum eo tempore sibi præferri, sed etiam postea in temporali Messia regno, quod somniabant, fore præferendum. Atque hæc est Bellarmini sententia, quam tu frustra oppugnas.

44. Ut autem melius intelligatur, notandum est Apostolos ter, ut minimùm, contendisse de Primatu. Primò, in via, quando post transfigurationem ibant Capharnaum. Secundò, postquam venissent Capharnaum. Tertiò, quando postea ibant Hierosolymam. De prima contentione scribit Marcus cap. 9. 32. *Et venerunt Capharnaum. Qui cum domissent, interrogabat eos: Quid in via tractabatis? At illi tacebant. Si quidem in via inter se disputaverant, quis eorum major esset.* Fortasse ex ea occasione, quòd Petrus, Joannes, & Jacobus, non item reliqui, fuissent cum Christo seorsim in transfiguratione. De secunda scribit Matthæus cap. 18. 1. *In illa hora (cùm solutum erat tributum pro Christo & Petro) accesserunt Discipuli ad Jesum dicentes: Quis putas major est in regno cælorum?* Jam nova erat occasio, propter

solutionem tributi, in qua Petrus videbatur omnibus alijs præferri. De tertia scribit idem Matthæus cap. 20. 20. *Tunc accessit ad eum mater filiorum Zebedai cum filiis suis, adorans & petens aliquid ab eo. Qui dixit ei: Quid vis? Ait illi: Dic ut sedeant hi duo filij mei, unus ad dextram tuam, & unus ad sinistram in regno tuo. Et infra: Et audientes decem, indignati sunt de duobus fratribus. Jesus autem vocavit eos ad se, & ait: Scitis, quia Principes gentium dominantur eorum &c. Non ita erit inter vos. Sed quicumque voluerit inter vos major fieri, sit vester minister, &c.*

45. Nunc quaestio est, de quo Primatu toties contenderint Apostoli? Tu putas contendisse de Primatu Ecclesiastico; quis scilicet eorum, post mortem Christi, futurus esset ipsius Vicarius, qui omnibus alijs despotice præesset. Et in eo ipsos errasse, & à Christo correctos esse; cum talis Primatus nulli conferendus esset, sed omnes futuri essent æquales. Hoc tuum figmentum est, mi frater, quo comparis Primatum Petri suspectum facere apud lectorem. Meliores autores, quam tu es, aliter sentiunt. Nimirum, putasse Apostolos, temporale Christi regnum, quod ipsi imaginabantur, jam appropinquare; & in eo cum ipso se regnatos: ideoque disputasse, quis in illo regno proximus post Christum futurus esset. Et quia in eo errabant, à Christo correctos esse. Quam dixi esse Bellarmini sententiam lib. 1. de Pontifice. cap. 19. in fine. Et tu ipse,

NE

ut soles esse inconstans, eandem sequeris lib. 1. cap. 11. n. 1.

46. Et probatur Primò, ex illis verbis: *Dic, ut sedeant hi duo filij mei, unus ad dextram tuam, & unus ad sinistram, in regno tuo.* Vel, ut Marcus habet, *in gloria tua.* Per regnum Christi intelligebant regnum hujus vitæ, quo putabant Christū potiturum, ut explicat Chrysostomus Homil. 66. in Matthæum, ubi ait: *Quid porro est, quod petunt? alius te docebit Evangelista.* Nam quoniam, inquit, prope Jerusalem erant, credebantque regnum Dei jam jam eventurum, quod hujus vitæ ac seculare opinabantur; hæc postulabant, ut ob honorem facilius etiam omnia pericula possent evitare. Propterea Christus ab his eos cogitationibus abducens, pericula, sanguinem, necemq; ipsam expetendam esse jubet. Potestis, inquit, bibere calicem, quem ego bibo? Et infra: Folebant autem, ut ego conjicio, quoniā super duodecim sedes sessuros Discipulos audierunt, primatum hujus concessus impetrare: Et præponi quidem se cæteris, præterquam Petro, sciebant, quem formidantes, dicere ausi sunt, Dic ut unus à dextris, alter à sinistris sedeat. Quid igitur ipse? ut significaret nihil eos petere Spirituale, sed nec scire quidem quid postulent; nescitis, ait, quid petatis.

47. Similiter Theophylactus in cap. 20. Matthæi: Opinabantur filij Zebedæi, quod vadens Hierosolymam Dominus, regnaturus esset regno quodam temporali. Audierant enim cum sæpè dicentem: Ecce ascendimus Hierosolymam.



Et Hieronymus ( de cujus sententia disputamus) in cap. 20. Matthæi: *Unde opinionem regni habet mater filiorum Zebedæi, ut cum Dominus dixerit ( Filius hominis tradetur Principibus Sacerdotum & Scribis, & cōdemnabunt eum morte, & tradent ad illudendum, & flagellandum, & crucifigendum ) & ignominiam passionis timentibus Discipulis nunciaret, illa gloriam postulet triumphantis. Hac, ut reor, ex causa. Quia post omnia dixerat Dominus ( & tertia die resurget ) putavit eum mulier post Resurrectionem ilico regnaturum. Vides, Marce Antoni, Hieronymum loqui de regno temporali, non secus ac Chrysostomum & Theophylactum. In eo solum ab ijs differre, quod ipsi regnum illud temporale, ex opinione Apostolorum, interpretentur ante mortē Christi: Hieronymus, post Resurrectionem.*

48. At unde conceperant Apostoli hanc opinionem de instante temporali regno Christi? Ex duplici, ut apparet, Christi testimonio. Unum est, Matth. 16. 27. Marc. 8. 39. & Luc. 9. 27. *Amen dico vobis: sunt quidam de hic stantibus, qui non gustabunt mortem, donec videant Filium hominis venientem in regno suo.* Alterum, Matth. 20. 18. Marc. 10. 33. & Luc. 9. 44. *Ecce ascendimus Hierosolymam, & Filius hominis tradetur Principibus Sacerdotum, &c.* Ex priori colligebant, regnum Christi jam proximè instare. Et quia putabant sedem regni debere esse Hierosolymæ, ubi David & alij Reges habitaverant; simulatque Christus dixit, *Ecce ascendimus Hierosolymam*, persuasi sunt, jam jam regnum

gnum Hierosolymæ inchoandum esse; & in eo regno, se varia officia habituros. Contendebant igitur, quis supremum habituros esset.

49. Dicet fortè aliquis, Apostolos ex posteriori testimonio, contrarium debuisse colligere, nempe Christum Hierosolymæ moriturum, non regnaturum; quia de morte sua clarè loquebatur, nulla facta regni temporalis mentione. Respondeo. Id quidem debuissent colligere Apostoli, si intellexissent sensum verborum Christi. At non intellexerunt, ut fateatur Lucas loco citato, cum ait: *At illi ignorabant verbum istud, & erat velatum ante eos.* Loquitur de illo verbo, *Filius hominis tradetur Principibus Sacerdotum;* ubi de morte & passione Christi agitur. Igitur ex ignoratione hujus verbi, ortus est error Apostolorum, existimantium, Christum ascendere Hierosolymam ad possidendum regnum temporale, de quo putabant illum antea locutum esse, cum dixerat: *Sunt aliqui de hic stantibus, qui non gustabunt mortem, donec videant filium hominis venientem in regno suo.*

50. Tertiò ais, Hieronymum, cum dixit; *Ex aequalitate pretij, arbitrati sunt Apostoli, Petrū ipsis pralatum;* videri supponere, etiam pro cæteris Apostolis tributum fuisse solum, sed minus, quàm pro Christo & Petro. Contra quod dictum tria objicis: 1. non constare, pro cæteris solum esse. 2. nec etiam constare, alios plus, alios minus, pro dignitate personarum,

K § rum,

rum, solitos esse solvere. 3. Imo constare, omnes omnino, cujuscunque ætatis ac conditionis essent, debuisse æquale pretium persolvere, juxta illud præceptum Domini, Exod. 30. 15. *Dives non addet ad medium Sicli, & pauper nihil minuet.* Nam ex hoc præcepto pendere solutionem didrachmæ, juxta communem opinionem.

51. Similiter reprehendis Chrysostomum triplici titulo : 1. Quòd unum præceptum pro alio per errorem sumpserit, nempe præceptum Siclorum pro primogenitis solvendorum, pro præcepto didrachmi. 2. Quòd *in sua leviuscula inadvertentia perseverans*, prælaturam Petri super alios, colligat ex eo, quia tributum primogenituræ pro ipso est solutum, non pro alijs. 3. Quòd dixerit Jacobum & Joannem fuisse primogenitos, cum tamen fuerint fratres, qui simul primogeniti esse non possunt.

52. Quæ hîc objicis contra hos Patres, parùm ad rem faciunt. Solùm quæritur hoc loco, an Petrus in solutione didrachmi fuerit prælatus alijs Apostolis? Isti Patres nobiscum affirmant. Quid vis amplius? Ex quo autem præcepto jussum sit dari didrachmum, nihil pertinet ad hanc quæstionem. Sed tamen, quia litem de hac re moves, dicam. Invenio triplex tributum, quod ex præcepto debebant Judæi persolvere. Unum, quod tenebatur dare in usum templi. Exod. 30. 13. Alterum, quod dabant pro primogenitis, Num. 3. 46. Tertiũ, quod

quod Augustus Imperator illis imposuit, cum iussit, ut universus orbis describeretur. Luc. 2.

1. Igitur tu affirmas solutionem didrachmi pertinere ad primum præceptum. Ego contra assero, ad tertium pertinere. Mecum sentiunt Hieronymus, Beda, Maldonatus.

### Octava Prærogativa.

53. **O**ctava est, quod Christus post Resurrectionem, inter omnes Apostolos, soli Petro primum apparuerit. Sed duo objicis. Primò, id non adeò esse certum, quin negari possit. Ego contra, adeò certum esse contendo, ut negari, nisi ab Apostata, non possit. Primò, quia reliqui Apostoli id fatentur, coram Discipulis duobus redeuntibus ex Emmaus, Luc. 24. 34. *Surrexit Dominus verè, & apparuit Simoni.* Certè, si ipsi etiam apparuisset, dixissent sine dubio, *Apparuit nobis.* Et clarissimè Paulus, 1. Corinth. 15. 4. *Resurrexit tertia die secundum scripturas, & visus est Cepha, & post hoc undecim.* Quasi dicat, primum visus est ipsi Cepha, & postea, alio tempore, visus est alijs. Et tu ausis hoc negare? Audi Chrysostomum in illum locum: *Itaque Petro primum apparet. Nam qui Christum primus confessus erat, non abs re primus etiam resurgentem videt.* Et ibidem: *Itaque non omnibus initio visus est, nec pluribus simul; sed uni tantum, & ei Principi, & fide maximè digno.*

54. Secundò ais, Christum duplici de causa, inter Apostolos, primùm apparuisse Petro: 1. quia Petrus erat primus ordine, vocatione, & ætate, inter Apostolos. 2. Quia maximè omnium indigebat consolatione, propter ingentem dolorem ex trina negatione conceptum. Sed quæro: An quod hic asseris, adeò certum sit, ut negari non possit? Si negari potest, nihil efficis. Si negari non potest, nec illud negari potest, primam apparitionem, inter Apostolos, soli Petro factam esse. Cur ergo paulo antè dixisti, negari posse? Nihil apud te constans est. Deinde, sit ita. Christus apparuerit primùm Petro propter causas à te assignatas; An ideo prærogativa non est? At non tanta, inquires, ut ex ea Primatus Ecclesiasticus colligi possit. Neque nos ex hac sola prærogativa Primatum colligimus, ut initio dixi; & jam clarius explicabo.

### *Reliquæ Prærogativæ.*

55. **H**Actenus adduxi eas prærogativas, quæ præcesserunt Primatum Petri: nunc reliquas adducam, quæ secutæ sunt, Priores, vel erant signa futuri Primatus, vel dispositiones præviæ, vel promissiones ad eundem obtinendum. Reliquæ sunt effectus, & quasi exercitia Primatus jam obtenti. Unde apparet, te priores non rectè oppugnare ex eo, quòd ex singulis seorsim sumptis, non possit evidenter convinci Primatus. Non necesse id est. Sufficit, si  
vel

vel singulæ, vel omnes simul sumptæ, sint quædam signa, vel dispositiones ad futurum Primatum. Accipe simile exemplum. Quando Rex, vel Imperator vult alicui dare supremam Aulæ præfecturam, non solet re ipsa dare, nisi prius illum præ alijs habuerit commendatum, tum in familiari conversatione, tum in officijs regni vel Imperij, tum in legationibus & similibus Prærogativis. Quare hoc? Quia per hujusmodi præambula, partim vult illum disporre ad supremam præfecturam; partim significare, se illum præ alijs magnificare, & ad supremam dignitatem promovere velle: Ne, si subito, & quasi ex abrupto id faciat, videatur temerè sine consilio, & cum invidia aliorum, facere. Sic fecit Christus. Voluit Petro dare supremam Ecclesiæ præfecturam: Sed non voluit sine prævijs signis & dispositionibus, ut in simili jam explicatum est.

§6. Ex hac declaratione manifestè constat, quo sensu nos Catholici colligamus Primatum Petri ex prærogativis, quæ Primatum præcesserunt. Planè eo sensu, quo id faciunt prudentes viri in simili casu. Sic enim illi solent ratiocinari. Rex noster cogitat de supremo aulæ Præfecto constituendo. Quis ille futurus est? Certè non alius, ut apparet, quàm Eustachius. Nam præ reliquis, illi uni familiaris est; soli sua consilia communicat; solum ad legationes obeundas adhibet; soli promissionem facit; denique in omnibus primum locū illi tribuit. Nō possumus aliud statuere, quàm quòd

quòd illum unicum, & non alium ad supremā præfecturam destinaverit. Res vulgo nota est. Et miror, si hîc velis tergiversari.

§ 7. Sed notior fiet ex alijs prærogativis, quæ ex Primatu, tanquam effectus ex sua causa, vel quasi functiones consecutæ sunt. Nam Petrus, postquam suprema Ecclesiæ præfectura illi commissæ est, per illa verba, *Pasce oves meas*, mox cœpit illam ad praxin applicare, & varios ejus actus exercere. Ac 1. convocavit omnes Discipulos ad electionem novî Apostoli in locum Judæ proditoris. 2. Primus promulgavit Evangelium Hierosolymis. 3. Primus fecit miraculum Hierosolymis ad confirmandum Evangelium à se promulgatum. 4. Primus etiam prædicavit gentibus Evangelium. 5. Primus sententiam dixit in concilio Hierosolymitano. Quæ omnia fecit ex auctoritate sibi à Christo concessa. Et propter hanc causam Paulus Apostolus venit Hierosolymam, ut Petrum, tanquam universalis Ecclesiæ Pastorem, coràm videret, ut ipsemet de se fatetur in Epist. ad Galat. cap. 1. 18. De his singulis etiam aliquid dicendum est. Igitur, ut in eo, quem cœpimus, ordine, persistamus.

\* \* \*

98. Nova

## Nona Prærogativa.

§8. **N**ona prærogativa est, quòd Petrus convocaverit omnes Discipulos ad electionem novi Apostoli, Act. i. 15. *In diebus illis, exsurgens Petrus in medio fratrum, dixit: Viri fratres, oportet impleri scripturam; &c.* Hic est primus actus præfecturæ Petri. De quo Chrysostomus Homil. 3. in Acta: *Quàm est fervidus Petrus: Quàm agnoscit creditum à Christo gregem: Quàm in hoc choro Princeps est: Et ubique Primus omnium incipit loqui.* Et infra ibid: *Meritò primus omnium auctoritatem usurpat in negotio, ut qui omnes habeat in manu.* Et Oecumenius ad cap. i. Actorum: *Surgit Petrus, non Jacobus, ut is, cui præsentia Discipulorum commissa erat. Neque ullus orationi Petri contradixit, sed mox ad ejus præceptum constituerunt duos, quos dignissimos eo gradu existimabant, ut num eorum Deus ipse designaret.*

§9. Hic multa objicis contra illos duos Patres, quos vides tibi adversari. Nam illi dicunt, Petrum fuisse Principem eorum omnium, qui aderant in electione Matthiæ; habuisse eos in manu sua; agnovisse illos tãquam gregem à Christo sibi concreditum; usurpassè in eos auctoritatem; eos vicissim ad illius præceptum fuisse promptos & expeditos. Hæc omnia tibi desipiunt, mi Antoni. Quare? Quia astruunt Primatū Petri, quē tu ferre nō potes. Quid ergò consilij? aggredieris ipsos Patres, & quos



quos ratione superare non potes, calumnijs opprimendos censes. Igitur

60. Primò objicis: Chrysostomum oratoricè magis, quam Theologicè locutum esse. Sed dic obsecro, verum an falsum locutus est? Si verum, quid murmurās? Si falsum, cur apertè non dicis? nisi fortè, quicumque oratoricè loquiritur, falsum: qui Theologicè, verum loqui censerì debeat.

61. Secundò objicis, illa verba Chrysostomi, *Petrus agnoscit creditum à Christo gregem*, frustra & otiosè ab eò dicta esse; quia Petrus tantum agebat ibi de adimplendo numero collegij Apostolici. Hoc autem collegium nō pertinebat ad gregem Petro concreditum. Erras, mi frater. Nam sub ista voce, *Pasce oves meas*, qua Petro grex Christi concreditus est, comprehenduntur etiam Discipuli Christi. Igitur & illi Petro concrediti sunt. De qua re suprà actum est: Et simul obiter notata tua levitas ac inconstantia, qui modò omnes Christi fideles, modò omnes exceptis Apostolis, modò solos Israëlitas, ovium nomine comprehensos esse, commentus es.

62. Tertiò objicis, Actum Petri, quo convocavit Discipulos ad electionem novi Apostoli, non fuisse Actum pasturæ; & ideo etiam ex hac parte, Chrysostomum impertinenter dixisse illa verba, *Petrus agnoscit gregem sibi creditum*. Iterum erras. Actus pasturæ varij sunt, ut cap. 3 ex Ezechiele demonstratum est. Eò teremitto.

63. Quar-

63. Quàrtò objicis, Chryſoſtomum ſibi ipſi contradicere. Quod ſic oſtendis. Ex una parte dicit, Petrum fuiſſe Principem in choro Diſcipulorum: Ex alia proponit hanc quæſtionem: *Cur Petrus non poſtulaſſet ſolus à Chriſto, ut ipſi daret aliquem in locum Judæ ſubſtituendum?* Et eam paucis hiſ verbis ſolvit: *Jam Petrus erat ſeipſo factus melior.* Ex quibus tu, miro artificio, connectis has argutias: *Ergo Petrus, ex ſententia Chryſoſtomi, fuiſſet arrogans, ſi hoc præſumpſiſſet. At factus melior Chriſti reprehentionibus, & proprio caſu, noluit tantum audere. Arrogantia tamen & præſumptio non fuiſſet, ſi Petrus relictus fuiſſet à Chriſto Monarcha totius Eccleſiæ: ad ipſum enim ſpectaſſet miniſtrorum ordinatio.* Unde inferſ, Petrum ex ſententia Chryſoſtomi, non eſſe ſupremum totius Eccleſiæ Paſtorem; ideoque Chryſoſtomum ſibi ipſi contradicere. Sed, ut candidè dicam, quod res eſt, fingis Chymæras ex tuo capite, de quibus ne quidẽ ſomniaſſet Chryſoſtomus. Quæſtio Chryſoſtomi hæc eſt: Quare Petrus convocavit omnes Diſcipulos, ut communi orationis ſuffragio poſtularent aliquem à Chriſto, in locum Judæ ſubſtituendum? Quare non ipſe ſolus poſtulavit? Reſponſio eſt: *Quia Petrus erat ſeipſo factus melior.* Quasi dicat; Quò quis melior eſt, eò humilior: Quò humilior, minoris ſe æſtimat: Ac proinde, ſi aliquid à Deo petendum eſt, plus ſedit cõmuni omnium orationi, quàm ſuæ ſolius privatæ. Quamvis ergo Petrus poſuiſſet ſolus à Deo poſtulare ſubſtituendum,

L

maluit

maluit tamen communi aliorum suffragio id facere. Quid hîc mali est? Nihil, præter tuas ineptias.

64. Quintò objicis aliam Chrysostomi contradictionem, ex illis ipsius verbis: *Iam & illud considera, quàm Petrus agit omnia ex communi Discipulorum omnium sententia; nihil auctoritate sua, nihil cum imperio.* Unde inferis; Petrum non fuisse Principem Discipulorum, quod tamen antea dixerat Chrysostomus; ac proinde Chrysostomum sibi iterum contradicere. Rectius dicam, te iterum Chymæras fingere. Sane ex verbis Chrysostomi apertè colligitur, Petrum fuisse Principem; sed Principem modestum, qui cùm posset sua auctoritate & imperio agere, malit tamen Christi exemplum imitari. Si hoc non capis, accipe domesticum exemplum. Si quis laudaret Regem Angliæ, & diceret, omnia illum agere ex communi Episcoporum omnium sententia; nihil auctoritate sua, nihil cum imperio: an tu statim inferres: Ergo Rex non est? Cave ne feceris. Modestia Regum & Principum non obstat, quo minus possint agere ex auctoritate & imperio, si necesse sit.

65. Sextò objicis, Oecumenium improprie locutum esse, cùm dixit: *Mox adejus præceptum constituerunt duos.* Odisti hanc vocem, *Præceptum.* Et paulo post addis: *Oecumenius de solo Primatu personali Petri est intelligendus,* id est, de Primatu ætatis & vocationis. Non ita est. Debet intelligi de eo Primatu, quem ipse-  
met

met clarè explicat. De eo, inquam, Primatu, cui conveniunt hæc duo: *Præsidentia Discipulorum, & Præceptum*. Expresè enim asserit, Petro commissam esse præsidentiam Discipulorum; & Discipulos fecisse, quod à Petro præceptū erat. Quòd ais, improprie locutum esse, non credimus. Omitto similes tuas nugas.

### *Decima Prærogativa.*

66. **D**ECIMA Prærogativa est, Quod Petrus post acceptum Spiritum sanctum, primus omnium promulgaverit Judæis Evangelium, Act. 2. 14. Sicut Moyses in Veteri Testamento primus omnium promulgavit legem Decalogi & Deuteronomium. Uterq; Actus pertinet ad Primatum. Nam sicut Moyses habebat Primatum Synagogæ, & ideo prælatus est alijs in promulgatione legis; ita Petrus habebat Primatum Ecclesiæ, & ideo prælatus est alijs in promulgatione Evangelij.

### *Undecima Prærogativa.*

67. **U**NDECIMA est, Quòd Petrus primum miraculum fecerit in confirmationem Evangelij à se promulgati, sanando claudum ex utero matris, Actor. 3. 6. *In nomine Jesu Christi Nazareni, surge & ambula.* Quæ prærogativa non consistit in eo, quòd Petrus miraculum fecerit in confirmationem fidei, quia hoc omnes Apostoli fecerunt, Marc. 16. 20. *Illi autem profecti predicaverunt ubique,*

*Domino cooperante, & sermonem confirmante, sequentibus signis* : sed consistit in alijs duobus. Primò in eo, quòd primum miraculum fecerit post promulgationem Evangelij. Hic non potes confugere ad Primatum ætatis & vocationis, ut soles ; quia ille Primatus nil facit ad patrandum miraculum : sed necessariò id tribuendum est Primatui autoritatis & potestatis, quem Christus voluit ostendere in Petro per primi miraculi patratiorem. Sicut etiam in Veteri Testamento, miraculo confirmavit Primatum Moysis (Num. 16.) Ac deinde Primatum Aaronis (Num. 17.) Secundò in eo, quòd fecerit miraculum, non qualecunque, sed quòd claudum sanaverit, pedes ipsius consolidando. Hoc enim non caret mysterio, ut notat Ambrosius serm. 69. Nam per hoc, quòd pedes infirmi hominis firmavit ac consolidavit, significatum est, ipsum esse firmum ac solidum fundamentum Ecclesiæ.

### *Duodecima Prærogativa.*

68. **D**uodecima est, Quòd Petrus non solum apud Judæos, sed etiam apud gentiles, primus omnium promulgaverit Evangelium, & baptismum administraverit (Act. 10. 34.) Huic prærogativæ annexa est alia, quòd soli Petro ostensa sit visio, qua jubebatur gentilibus Christum annunciare (Act. 10. 10.) *Parantibus autem illis, cecidit super eum mentis excessus. Et vidit cælum apertum, & descendens vas quod-*

*quoddam, velut linteam magnum, quatuor initis  
submitti de cælo in terram, in quo erant omnia,  
quadrupedia, & serpentina, & volatilia cæli. Et fa-  
cta est vox ad eum: Surge Petre, occide, & man-  
duca.*

69. Hic unum dicis de priori parte præ-  
rogativæ: duo de posteriori, nempe de visione  
Petro exhibita. De priori, fateris insignem fu-  
isse prærogativam Petri, quod primus annun-  
ciaverit gentibus Evangelium: non tamen  
prærogativam Principatus, sed sollicitudinis  
ac diligentia, qua cæteros omnes superavit.  
At alibi asseris, Paulum superasse omnes præ-  
rogativa sollicitudinis ac diligentia. Paulus  
autem jam erat Apostolus eo tempore, quo  
Petrus prædicavit Gentibus Evangelium. Er-  
go si illa fuit insignis prærogativa Petri, non  
fuit diligentia, sed Principatus.

70. De posteriori pronuncias hæc duo,  
quæ directè inter se pugnant. Primò, visionem  
illam fuisse privilegium, quo Petrus, tanquam  
senior & ferventior inter Apostolos, meruit  
decorari. Secundò, non fuisse privilegium, sed  
potius increpationem, quia cùm Petrus esset  
nimium refractarius, & vix posset adduci ad  
vocationem Gentium, necesse fuit, ut per vi-  
sionem illam quasi compelleretur ad officiũ.  
Itane, Marce Antoni? Jam antè dixisti, Petrũ  
omnes alios superasse sollicitudine, diligen-  
tia, & fervore. Nunc dicis, fuisse refractarium,  
& propterea increpatum ac reprehensum à  
Deo. Nusquam es constans.

71. Et ne conqueraris injuriam tibi à me factam esse, recitabo verba tua, quibus hanc contradictionem involvis. Sunt autem hæc: *Fuit insignis Petri sollicitudinis prerogativa; qua sollicitudine & indefessa diligentia Petrus ceteros facile superavit.* Et mox de visione sic pergis: *Fuit privilegium, quo primus & maximus natus ex Apostolis, & feruentissimus executor, meruit condecorari.* Deinde, facta digressionem contra Bellarminum, quasi immemor verborum tuorum, sic concludis: *Hæc visio plus simplicis instructionis, & quasi cujusdam increpationis, quam laudis & prerogativa in Petro videtur innuere. Ise enim Judaismo addictissimus, vix poterat in Gentilium vocationem ad divina filiationis gratiam inclinare. A qua illum aversione, ut Christus amoveret, nimium legalibus addictum, visione hac occurrat, non sine illa redargutione: Quod Deus purificavit, tu commune ne dixeris. Ac ne ipse, nimium fortasse in hoc refractarius videretur, ter visio illa, aut saltem hæc vox repetita est.* Jam vide, quomodo inter se cohæreant, quæ hîc asseris.

72. Taceo de injuria, quam Petro irrogas. Ais, fuisse Judaismo addictissimum; vix potuisse in gentilium vocationem inclinare; fuisse refractarium. Unde probas? Ex falsa scripturæ interpretatione: quasi ob hanc causam reprehensus fuerit his verbis: *Quod Deus purificavit, tu commune ne dixeris.* Non ita est. Nam Petrus audita hac voce: *Occide & manduca;* respondit: *Absit Domine, quia nunquam manducavi carne commune & immundum.* Deinde sequi-

sequitur: *Quod Deus purificavit, tu commune ne dixeris.* Hoc tu interpretaris, quasi Petrus noluerit consentire in vocationem gentium, & quodammodo fuerit refractarius Absit. Nihil adhuc cogitabat de gentilibus; Quia nōdum intelligebat mysterium visionis. Solūm asserbat, se nunquam comedisse animalia immūda, quæ secundum legem Mosaicam, erant prohibita. Nec sciebat, per animalia immunda significari gentiles. Hoc postea intellexit: Et postquam intellexit, nunquam ostendit se refractarium circa gentium vocationem, sed promptum & expeditum.

### *Decima tertia Prærogativa.*

73. **D**ecima tertia est, Quod Petrus primo loco sententiā dixerit in concilio Hierosolymitano, Act. 15. 7. *Cum autem magna inquisitio fieret, surgens Petrus dixit ad eos: Viri fratres, &c.* Et quod omnes sententiam illius secuti fuerint: De quo Divus Hieronymus in Epistola ad Augustinum (quæ est undecima inter Epistolas Augustini) sic scribit: *In sententiā ejus Jacobus Apostolus, & omnes simul Presbyteri transferunt.* Et Theodoretus in Epistola ad Leonem: *Paulus præco veritatis, tuba sanctissimi Spiritus, ad magnum Petrum cucurrit, ut iis, qui Antiochiæ de legalibus institutis contendebant, ab ipso adferret solutionem.* Utrique ab ipso, tanquam controversiarum iudice.

74. Tria objicis. Primò, Petrum primo  
L 4 loco



loco sententiã dixisse, tanquam Decanum collegij: idque ratione ætatis, non jurisdictionis. At, mi homo, Decanus collegij Canonico- rum (saltem in Germania) non est nomen æta- tis, sed dignitatis: Et solet præsidere Capitulo, non tãquam senior ætate (cũ sæpe sit junior) sed tanquam superior jurisdictione.

75. Secundò objicis, Jacobum in Conci- lio Hierosolymitano aliquid amplius decre- visse, quod Petrus non decreverat, nempe ab- stinentiam à contaminationibus simulachro- rum, & fornicatione, & suffocatis & sanguine. Distinguo. Nihil amplius decrevit circa quæ- stionem in concilio propositam: aliquid tamẽ amplius circa alia, quæ non erant proposita. Quæstio proposita erat hæc: An circumcisio esset necessaria ad salutem ijs, qui ex Genti- bus convertebantur ad fidem Christi? Re- spondit Petrus non esse. Nec aliud respondit; quia aliud non quærebatur. Quod etiam ser- vatur à iudicibus secularium controversiarũ. Putant se abundè satisfecisse suo officio, si cla- rè & directè respondeant ad id, quod à liti- gantibus proponitur. Nihil ergo obstat, quòd Jacobus aliqua adjecerit, quæ à litigantibus non erant proposita.

76. Tertiò objicis, Decretum in illo con- cilio factum, non prodiisse nomine solius Pe- tri, sed totius concilii, ut patet ex inscriptione: *Apostoli & seniores fratres, his qui sunt Antiochia.* Respondeo. Si quæstio soli Petro fuisset pro- posita, prodiisset decretum nomine solius Pe- tri.

tri, sed quia toti concilio fuit proposita, debuit prodire nomine totius concilii, cui Petrus præsidebat. Idem fit in conciliis & Parlamentis secularibus. Nam Decreta, quæ ibi fiunt, non prodeunt nomine solius Præsidis, sed nomine Concilii vel Parlamenti.

77. Hæc sufficiant de prærogativis Petri: quarum aliquæ, ut dixi, præcesserunt ipsius Primatum, tanquam signa vel dispositiones præviæ: aliæ secutæ sunt, tanquam effectus & executiones Primatus jam obtenti. Deinceps diluendæ sunt objectiones, quas magno studio ex aliis adversariis transcripsisti, ut Petri & Pontificis auctoritati derogares. Impium hoc studium est, & à rebellibus usurpatum. Uti, nam in proximorum salutem id contulisses.

## CAPUT SEPTIMUM.

### *Diluuntur objectiones Marci Antonij contra Primatum Petri.*

1. **M**ulta objicis, Marce Antoni, contra Primatum Petri: non quidem studio veritatis, quam agnitam oppugnas; sed Spiritu ambitionis, quo video te ad scribendum impulsus esse. Sunt autem hæc potissimum objectiones. 1. Ecclesia Apostolis omnibus æquæ à Christo commendata est. 2. Evangelium reprobat Primatum inter Apostolos. 3. Ipsi Apo-

stoli in Petro non agnoverunt Primatum. 4. Nec Petrus illum unquam exercuit. 5. Pauli reprehensio, qua Petrum objurgavit, destruit Primatum Petri. 6. Idem colligitur ex scriptis Pauli. 7. Et ex comparatione Petri & Pauli: Hęc est summa tuarum objectionum, quas ferre ex Bellarmino suffuratus es. Primam pro-  
ponis lib. 1. cap. 3. Reliquas cap. 11, singulas eo ordine, quo propositę sunt, discutiam.

## I. OBJECTIO.

*Ecclesia Apostolis omnibus fuit aequè  
à Christo commendata.*

2. **H**Oc probas dupliciter. 1. Ex Scriptura. 2. Ex Patribus. Ex scriptura sic: Christus dixit omnibus Apostolis: *Sicut misit Pater, & ego mitto vos. Item, Euntes docete omnes gentes.* Omnibus ergo suam Ecclesiam commendavit. Quòd autem æquè omnibus, inde colligis, quia omnes æquè docuit & instruxit; omnibus æquè misit Spiritum sanctum in die Pentecostes. Respon-  
deo. Prior pars argumenti vera est, quòd Christus commendaverit suam Ecclesiam omnibus Apostolis: posterior falsa est, quòd omnibus æquè commendaverit. Nam soli Petro dixit: *Pasce oves meas.* Igitur pastura omnium ovium, soli Petro, non alijs commenda-  
ta est.

ra est. De quo supra. Nec valet hæc tua consequentia : Omnes æquè instructi sunt, & æquè Spiritum sanctum acceperunt. Ergo unus non habet maiorem jurisdictionem quàm alius. Nam aliud est loqui de doctrina & sanctitate; aliud de jurisdictione. Non omnes, qui pares sunt in doctrina & sanctitate, sunt etiam pares in jurisdictione. Alioqui Rex in regno, si non haberet maiorem doctrinam & sanctitatem, quàm subditi, non haberet etiam maiorem jurisdictionem. Nectū, Marce Antoni, si haberes Sacellānum pari doctrina & sanctitate, non esses illo superior, quoad jurisdictionem. Quæ omnia absurda sunt. Et ratio à priori est, quia jurisdictio per se non pendet à maiori doctrina & sanctitate.

3. Nec fortasse verum est, quod asseris de æquali instructione. Nam Paulus Apostolus fuit raptus in tertium cælum, & audivit arcana verba, quæ non licet homini loqui. Quid si ille magis instructus fuerit, quàm reliqui Apostoli? Certè id admodum verisimile est. An idcirco maiorem habuit jurisdictionem, quàm alii Apostoli? Hactenus nemo id dixit.

4. Ex Patribus, pro æqualitate Apostolorum, adducis primo loco Cyprianum tract. de simplicitate Prælatorū, sive de unitate Ecclesiæ, ubi sic habet : *Hoc erant utique & ceteri Apostoli quod fuit Petrus, pari consortio pradii, & honoris & potestatis; Sed exordium ab unitate proficisci-*

*sciscitur, ut Ecclesia una monstretur.* Hunc locū valdè urges; in quo continentur duæ propositiones. Una de paritate Apostolorum: Altera de unitate. Et putas priorem secundum litteram non posse aliter explicari, quàm quòd omnes Apostoli fuerint pares in honore & potestate; ac proinde Petrus non habuerit plus potestatis, quàm cæteri. Si autem Catholici, inquis, volunt ex posteriori contrarium probare, videant, quomodo defendant Cyprianum à contradictione. Respondeo. Et prior, & posterior propositio vera est, sine ulla contradictione. Nam verum est, omnes Apostolos, antequam Petrus totius Ecclesiæ præfectus constitueretur per illa verba, *Pasce oves meas*, fuisse inter se æquales in honore & potestate. Verum quoque est, eundem Petrum, postquam præfecturam Ecclesiæ accepit, fuisse majorem reliquis in honore & potestate. Et hoc significatur per *Exordium ab unitate*. Itaque hic locus Cypriani, non tibi, sed nobis patrociniatur.

5. Quod ut clarè percipias, scopus & intentio Cypriani explicanda est. Igitur hæc eo loco docet Cyprianus. Primò, Diabolum, post idololatriam, per Christi advētum sublatam, occulta quadam astutia circumvenire Christianos, ut possit illos in suas partes pertrahere: non jam iterum per idololatriam, sed per hæreses & schismata, quæ ab ipso in Ecclesia excitantur. *Quid verò, inquit, astutius, quidve subtilius, quàm ut Christi adventu detectus ac pro-*  
*stra-*

*fratrus inimicus, &c. Videns idola derelicta, & per  
nimum credentium populum, sedes suas ac templa  
deserta, excogitaverit novam fraudem, ut sub isto  
Christiani nominis titulo fallat incautos? Hæreses  
invenit & schismata, quibus subverteret fidem,  
veritatem corrumperet, scinderet unitatem. Quos  
detinere non potest in via veteris cecitate, circum-  
scribit & decipit novi itineris errore. Rapit de ipsa  
Ecclesia homines, & dum sibi appropinquasse jam  
lumi nacevasisse noctem seculi videntur, alias ne-  
scientibus tenebras rursus infundit, ut cum Evan-  
gelio Christi & cum observatione ejus & lege non  
stantes, Christianos se vocent, & ambulantes in te-  
nebris, habere se lumen existiment, blandiente ad-  
versario atque fallente, &c.*

6. Secundò docet, ideò multos per astu-  
tiam Diaboli fieri hæreticos & schismaticos,  
quia non conjungunt se Capiti & Pastori Ec-  
clesiæ, à quo est origo veritatis. Relicto enim  
hoc Capite, necessarium esse, ut à veritate re-  
cedatur. Hoc eo fit, inquit, *fratres dilectissimi, dñs  
ad veritatis originem non reditur, nec Caput qua-  
ritur, nec Magistri cœlestis doctrina servatur.*

7. Tertiò ait, se brevi compendio velle  
ostédere ex doctrina cœlestis Magistri, quod-  
nam sit hoc Caput, à quo est origo veritatis.  
Nam ostenso & retento hoc Capite, non erit  
amplius periculum recedendi à veritate. O-  
stendit autem ex verbis Christi, Petrum cum  
suis Successoribus esse hoc Caput. *Quasi quis  
consideret, inquit, & examinet, tractatu longo at-  
que argumento opus non est. Probatio est ad fidem  
facilis*

*facilis compendio veritatis. Loquitur Dominus ad Petrum: Ego tibi dico, quia tu es Petrus, & super istam petram ædificabo Ecclesiam meam, & porta inferorum non vincent eam. Tibi dabo claves regni cælorum &c. Et eidem post Resurrectionem suam dicit: Pasce oves meas.*

8. Mox objicit sibi ipsi in hunc modum: Christus omnibus Apostolis dedit æqualem potestatem: Ergo Petrus non est Caput Ecclesiæ. Et respondet, dedisse quidem omnibus æqualem potestatem, sed postea ex omnibus æquali potestate præditi, elegisse Petrum, ut esset Caput seu Monarcha Ecclesiæ; ut hac ratione caverentur schismata, quæ facilitè oriri solent inter æquales; & servaretur pax & unitas in Ecclesia, quæ facilius servatur, quando est unum Caput, à quo omnes dependent. *Et quamvis, inquit, Apostolis omnibus post Resurrectionem suam, parem potestatem tribuat, & dicat: Sicut misit me Pater, & ego mitto vos: Accipite Spiritum sanctum &c. tamen ut unitatem manifestaret, unitatis ejusdem originem ab uno incipientem, sua autoritate disposuit.*

9. Hoc ipsum magis confirmat sequentibus verbis: *Hoc erant utique & ceteri Apostoli, quod fuit Petrus, pari consortio præditi, & honoris & potestatis; sed exordium ab unitate profiscitur, ut Ecclesia una monstretur. Quasi dicat: Omnes Apostoli, ante electionem Capitis [ quæ facta est per illa verba, Pasce oves*

*oves meas* } erant quidem æquales ; sed tamen Christus, quia voluit exordium Ecclesiæ sumere ab unitate Capitis, & regimen Ecclesiæ esse monarchicum, ex omnibus elegit Petrum ; ut ipse esset Caput Ecclesiæ. Nam si in Ecclesia non esset unum Caput, cui reliqua membra obtemperarent ; non posset Ecclesiæ corpus esse unum, sed membra sine Capite inter se diffiderent ac distraherentur.

10. Hinc infert Cyprianus, eos non habere veram fidem, sed fieri hæreticos & schismaticos, qui ab hac Capitis & corporis unitate recedunt. *Hanc, inquit, Ecclesia unitatem, qui non tenet, tenere se fidem credit? Qui Ecclesia renititur & resistit, in Ecclesia se esse confidit?* Quod declarat per similia exempla. Nam sicut sunt multi radij solis, sed unum lumen: multi rami arboris, sed una radix: multi rivi fontis, sed una origo; ita multa sunt membra Ecclesiæ, sed unum Caput. (Intelligit Petrum, de quo supra.) Et rursum, sicut radius solis avulsus ab unitate luminis, dispareret: ramus à radice fractus, non germinaret: rivus à fonte præcisus arefcit; ita schismatici & hæretici, qui se separant à Capite Ecclesiæ, id est, à Petro & illius Successoribus, non possunt retinere veram fidem & Charitatem. *Ecclesia, inquit, una est, quæ in multitudinem latius incremento fecunditatis extenditur: quomodo Solis multi radij sed lumen unum:*  
*& ra-*



& rami arboris multi, sed robur unum tenaci radice fundatum. Et cum de fonte uno rivi plurimi defluunt, numerositas licet diffusa videatur exundantis copia largitate, unitas tamen servatur in origine. Avelleradium solis à corpore, divisionem lucis unitas non capit. Ab arbore frange ramum, fractus germinare non poterit. A fonte præciderivum, præcisus arefcet: Sic & Ecclesia Domini luce perfusa per orbem totum radios suos porrigit, unum tamen lumen est, quod ubique diffunditur, nec unitas corporis separatur: ramos suos in universam terram copia ubertatis extendit: profluentes largiter rivos latius expandit, unum tamen Caput est, & origo una, & una mater fecunditatis successibus copiosa. Illius factu nascimur, illius lacte nutrimur, Spiritu ejus animamur. Adulterari non potest sponsa Christi, incorrupta est & pudica. Unam domum novit, unius cubiculi sanctitatem casto pudore custodit. Hac nos Deo servat, hac filios regno, quos generavit, assignat. Quisquis ab Ecclesia segregatus adulteræ jungitur, à promissis Ecclesia separatur. Nec pertinet ad Christi pramia, qui relinquit Ecclesiam Christi. Alienus est, profanus est, hostis est. Habere jam non potest Deum Patrem, qui Ecclesiam non habet matrem.

II. Ex hoc Cypriani discursu tria colligo: Primò, Apostolos quidem fuisse inter se æquales, antequam unum Caput à Christo constitueretur; sed illo semel constituto, non amplius mansisse pares. Secundò, omnes recedere à veritate fidei, & fieri hæreticos ac schismaticos, qui recedunt à Capite, quod à Christo con-

sto con-

sto constitutum est. Tertiò, nec opus esse magno tractatu ad disquirendum, quæ sit vera fides. Nam illam esse veram fidem, quæ à Capite, tanquam ab origine (ex Christi institutione) in reliqua membra derivatur. Si hæc intelligis, Marce Antoni, redi ad unitatem capitis, à qua recessisti; & non eris hæreticus aut schismaticus.

12. Secundo loco adducis Hieronymum lib. i. contra Jovinianum, circa medium, ubi de æqualitate Apostolorum sic scribit: *Ex a quo super eos Ecclesiæ fortitudo solidatur.* Respondeo. Hieronymus ibi confert inter se Petrum & Joannem; & dicit Joannem, quia virgo erat, fuisse Christo chariorem quam Petrum, qui non erat virgo: Ut ostendat virginitatem matrimonio præferendam esse, quod negabat Jovinianus. Et postea subjungit: *Si autem omnixè contenderit (Jovinianus) Joannem virginem non fuisse; & nos amoris præcipui causam virginitatem diximus; exponat ille, si virgo non fuit, cur cæteris Apostolis plus amatus sit? At dicit: Super Petrum fundatur Ecclesiæ: licet id ipsum in alio loco super omnes Apostolos fiat, & cuncti claves regni cælorum accipiant, & ex a quo super eos Ecclesiæ fortitudo solidetur: tamen propterea inter duodecim unus eligitur, ut Capite constituto, schismatis tollatur occasio. Sed cur non Joannes electus est virgo? Ætati delatum est, quia Petrus senior erat; ne adhuc adolescens, ac pene puer, progressæ ætatis hominibus præferretur.*

13. Ex his verbis constat, Hieronymum,  
M quem

quem pro te citas, in multis tibi contrarium esse. Primò, Hieronymus asserit, Joannem plus cæteris Apostolis amatum fuisse à Christo. Unde sequitur, Joannem vicissim plus cæteris amasse Christum. Quod sic probo: Deus plus diligit meliores, ut docet Divus Thomas 1. part. quæst. 20. art. 4. Si ergo plus diligit Joannem, quàm alios Apostolos, sequitur Joannem esse meliorem, quàm alij Apostoli. Ergo etiam melior est Petro: Ergo plus diligit Deum, quàm Petrus. At hoc contra te est, quia tu asseris, Petrum habere Primatum charitatis præ alijs Apostolis.

14. Secundò, Hieronymus asserit, solum Petrum ex duodecim Apostolis electum esse, ut esset Caput Ecclesiæ, & cæteris præferretur. At si electus est, jam antea nò erat Caput, ratione ætatis aut vocationis, ut tu contendis: Aut, si antea erat, ratione ætatis aut vocationis, electus non est.

15. Tertiò, Hieronymus dicit, ideò electum esse, ut constituto Capite, schismatis occasio tolleretur. Ergo non est electus pro sua tantum persona, ut tu vis, sed etiam pro suis Successoribus. Nam si tempore Apostolorum, quando Ecclesia erat exigua, debuit esse unum Caput ad cavendum schisma; multo magis post tempora Apostolorum, quando Ecclesia fuit diffusa per totum orbem terrarum.

16. Quartò, Hieronymus dicit, Petrum potius electum esse in Caput, quàm Joannem; quia non decebat, ut Joannes, qui penè puer erat,

erat, præferretur senioribus. Certè, si putaret Hieronymus, quod tu fingis, Petrum esse Caput propter Primatū ætatis & vocationis, stultè disputaret, quare nō potius Joannes sit electus in Caput, quàm Petrus. Nā hoc esset disputare, quare non potius Joannes sit electus, ut fieret senior ætate & vocatione, quàm Petrus. Quæ est stulta disputatio.

17. Sed objicis, Hieronymum in eo nobis contrarium esse, quod asserat æqualitatem Apostolorum. Respondeo. Si hoc darem, nihil aliud sequeretur, quàm & tibi, & nobis cōtrarium esse; sed tamen tibi magis, quàm nobis. Faciamus ita esse; Jam quæro ex te, an sententia ipsius vera sit, an falsa? Si vera est, tuam falsam esse oportet, quæ illi contraria est. Si falsa, cur præsidium ab ea petis? Si partim vera, partim falsa, quis inter veram & falsam discernet? Non admitto te judicem.

18. Sed non necesse est, ad has angustias confugere. Nego Hieronymum nobis contrarium esse, nisi sibi ipsi contrarius sit. Quod ostendo ex ipsa disceptatione, quam habet cum Joviniano, in hunc modum. *Hieronymus.* Joannes plus fuit amatus à Christo propter virginitatem, quàm Petrus, qui non erat virgo. Virginitas igitur præstat matrimonio. *Jovinianus.* Nego Joannem fuisse virginem. *Hieronymus.* Si virgo non fuit, cur plus amatus fuit, quàm alij? *Jovinianus.* Petrus plus fuit amatus, quia super Petrum fundata est Ecclesia. *Hieronymus.* Si spe-

Et es doctrinam Apostolorum, super omnes æquè fundata est Ecclesia, quia una est doctrina omnium. Si spectes jurisdictionem, fateor Petrum præ cæteris electum esse, ut esset Caput Ecclesiæ. At hinc non sequitur, plus dilectum fuisse à Christo, quia jurisdictio non necessariò supponit majorē sanctitatem. *Jovinianus*. Cur non potius Joannes fuit electus, si erat virgo, ut tu contendis? *Hieronymus*. Propter defectum ætatis. Erat enim adhuc adolescens, ac pene puer. Non decebat autem, ut puer, cum potestate præficeretur senioribus.

19. Si hic est discursus Hieronymi cum Joviniano, ut esse verisimile est; nihil ex eo præsidij habes, præter confusionem. Si alius est, cur dissimulas? Sed iterū objicis alia Hieronymi verba contra eundem Jovinianum: *Joannes, inquit, & Jacobus, quia plus cæteris petierunt, non impetrauerunt: Et tamen non est dignitas eorum imminuta, quia reliquis Apostolis æquales fuerunt*. Respondeo. Hoc contigit ante electionem Capitis. Tunc omnes Apostoli erant æquales. At postquam dictum est Petro, *Pasce oves meas*, desierunt esse æquales, & Petrus cæpit esse Princeps aliorum, ac universalis Ecclesiæ Pastor.

20. Ex eodem Hieronymo, Epist. 58. ad Damasum Pontificem objicis hæc verba: *Ut qui Apostolos honore sequeris, sequaris & merito*. Non dicit, inquis, qui Petrum; sed, qui Apostolos honore sequeris; quia honor Petri & alio-

aliorum fuit æqualis. Respondeo. Hieronymus scripsit duas breves Epistolas ad Damasum ex Syria, de eodem argumento, in quibus consulit illum, tanquam iudicem omnium controversiarum, *An salva fide, concedi possit, tres esse in Deo hypostases?* In priori, sic alloquitur Damasum: *Quoniam vetusto Oriens inter se populorum furōre collisus, indiscissam Domini tunicam, & desuper textam, minutatim per frusta discerpit &c.* Ideo mihi Cathedram Petri, & fidem Apostolico ore laudatam censui consulendam. Hic Pontificem Petri successorem, agnoscit pro iudice. Et paulo post: *Apud vos solos incorrupta Patrum servatur hereditas, id est, apud solos Successores Petri, & qui illis adhærent.* Et iterum: *Quauquam igitur tui me terreat magnitudo, invitat tamen humanitas. A Sacerdote victimam salutis, à Pastore presidium ovis flagito.* Agnoscit se ovem: Damasum, pastorem. At non erat ovis Damasi, ratione particularis Ecclesiæ Romanæ; sed ratione universalis Ecclesiæ, quæ Damaso erat subiecta. Et rursus: *Ego nullum primum, nisi Christum sequens, beatitudini tuæ, id est, Cathedra Petri communionem consocior: super illam Petram adificatam Ecclesiam scio.* Quicumque extra hanc domum agnum comederit, profanus est. Hoc non dicit de Cathedra aliorum Apostolorum. Et infra: *Quicumque tecum non colligit, spargit, hoc est, Qui Christi non est, Anti-Christi est.* De nullo alio Episcopo hoc dicit, sed de Petri successore. Ex quibus omni-

bus manifestum est, Petrum ex sententia Hieronymi, non æqualem, sed superiorem fuisse alijs Apostolis. Cùm ergo in altera Epistola dicit: *Ut qui Apostolos honore sequeris, sequaris & merito*; non vult significare, omnes Apostolos honore ac dignitate equales esse, ut tu falsò interpretaris: sed rogat Damasum, ut sicut ipse est successor Apostolorum in honore, sic etiam conetur successor esse in virtute & merito. Quod potest commodè intelligi, etiamsi honor omnium Apostolorum non fuerit æqualis. Alioqui si inde conficeres, æqualem fuisse omnium honorem, conficeres etiam, æquale fuisse omnium meritum. Imò, tibi ipsi contradiceres. Nam lib. 1. cap. 5. & 9. ultrò fateris, Petrum reliquos Discipulos honore ac dignitate superasse.

21. Tercio loco adducis Augustinum lib. de agone Christiano cap. 30. ubi ait: *Non enim sine causa inter Apostolos omnes, huius Ecclesiæ Catholica personam sustinet Petrus. Huic enim Ecclesiæ, claves regni cælorum datae sunt, cùm Petro datae sunt. Et cùm ei dicitur, ad omnes dicitur: Pascere oves meas.* Ex hoc, & similibus Augustini testimonijs colligis, quæ Petro committuntur, non illi soli, sed omnibus committi; ideoque omnes æquales esse. Respondeo. Hoc potius collige: Cùm solus Petrus sustineat personam Ecclesiæ Catholi-  
cæ, non item reliqui Apostoli (quia de reli-  
quis

quis hoc nunquam affirmat Augustinus) Petrum hoc nomine reliquis Apostolis præferendum esse; ac proinde ex hac parte, non omnes esse Petro æquales. Deinde collige Augustinum tibi adversari. Nam Augustinus ait; *cum Petro dictum est, Pasce oves meas, omnibus dictum esse.* Tu lib. 1. cap. 8. nu. 1. contendis, non omnibus, sed soli Petro dictum esse. Sic enim scribis: *Ac primum quidem hoc loco Christum cum ipsomet Petro loqui singulariter, & ei personaliter dici: Pasce oves meas; constituo tanquam certissimum.* Si illi dicitur personaliter & singulariter, Ergo dicitur illi tanquam privatæ personæ. Non igitur quatenus sustinet personam Ecclesiæ. Hoc autem asserit Augustinus: Ergo tu aliter sentis, quàm Augustinus. Quid nos de hac re sentiamus, explicatum est cap. 3. §. 2. Nam hæc propositio; *Soli Petro dictum est, Pasce oves meas;* potest dupliciter intelligi: Primò, excludendo reliquos Apostolos; ut sensus sit: Nulli alteri Apostolo, sed soli Petro dictum est, *Pasce oves meas.* Sic verum est. Secundò, excludendo successores Petri; ut sensus sit, soli Petro, & non Successoribus ejus dictum est, *Pasce oves meas.* Sic falsum est.

22. Ex eodem Augustino. lib. 50. Homiliarum, Hom. 43. adducis hæc verba: *Sed fortè Apostoli sancti, primi, summi arietes, pastoris membra, pastores ipsi, fortè non habent*

M 4

bant



*bant peccatum?* Hinc infers æqualitatem Apostolorum. Respondeo. Ex quâ particulâ infers? An ex eo, quod fuerint sancti? At tu contendis, Petrum præ alijs habuisse Primatum charitatis & aliarum virtutum. Igitur ex hac parte concedis inæqualitatem. An ex eo, quod fuerint primi? At tu similiter contendis, Petrum præ reliquis fuisse primum ætate, vocatione & multis alijs prærogativis. An ex eo, quod fuerint summi arietes? At sicut inter primos, sic etiam inter summos datur ordo & inæqualitas, ut Num. 23. 9. *De summis silicibus videbo eum.* At inter summos silices, alius potest esse alio altior. An ex eo, quod fuerint membra pastoris? At non omnia membra sunt æqualia, vel magnitudine, vel honore, 1. Corinth. 12. 23. *Quæ putamus ignobiliora membra esse corporis, his honorem abundantiorum circundamus.* An denique ex eo, quod fuerint pastores ipsi? At sicut Christus est supra alios Pastores; ita inter hos potest esse discretio honoris & potestatis. Vide quàm Augustinus nihil pro te faciat.

23. Quartò, adducis Ambrosium in c. 6. Apocalypsis, ubi ait: *Primogenita gregis sunt Apostoli, quos primos genuit Ecclesia, & ex quibus Ecclesia nata est.* Respondeo. Non sunt verba Ambrosij, sed alterius, ut benè insinuas. Neque nobis officiunt, sed tibi. Primò, quia alibi disertè ais, Petrum esse primogenitum inter Apostolos (lib. 1. cap. 5. n.

13. &amp;

13. & 17.) & ideo primum locum illi deberi. Agnosceis igitur aliquam in hac parte inæqualitatem? Cum igitur hoc loco contendis, omnes simul esse primogenitos, ideoq; omnes inter se æquales; tibi ipsi contradicis. Secundo, alibi ais, Ecclesiam ædificatam esse ab Apostolis post Ascensionem Christi. Quomodo ergo verum est, quod hîc ais, Apostolos esse primogenitos Ecclesiæ? Nam si sunt primogeniti Ecclesiæ, necesse est, Ecclesiam esse illorum matrem: Si mater est, quomodo ab ipsis, qui filij sunt, ædificata?

24. Quintò adducis aliquos Patres, qui asserunt, Paulum fuisse æqualem Petro. Inter quos & Chrysostomus in cap. 1. Epistolæ ad Galat. ubi considerans officium Pauli in invisendo Petro, sic scribit: *Quid hoc animo possit esse modestius? post tanta taliq; benefacta, cum nihil opus haberet Petro, nec illius egeret voce sed honore par esset illi (nihil enim hic dicam amplius) tamen ascendit velut ad maiorem & seniore.* Et Ambrosius lib. 2. de Spiritu Sancto: *Una gratia fulgebat in his, quos Spiritus unus elegerat. Nec Paulus inferior Petro.* Et Leo Serm. 1. de Natali Petri & Pauli: *Quos gratia Dei in tantum apicem inter omnia Ecclesiæ membra provexit, ut eos in corpore, cujus Caput est Christus, quasi geminum constitueret lumen oculorum. De quorum meritis atq; virtutibus, quæ omnem loquendi superant facultatem, nihil diversum, nihil debemus sentire discretum, quia illos & electio pares, & labor similes, & finis fecit æquales.*

24. Respondeo. Hic multa contra te sunt; contra nos nihil. Ac primò contra te est, quod ait Chrysostomus, Paulum honore parem esse Petro. Nam tu dicis (lib. 1. cap. 5. nu. 13.) Petrum, utpote primogenitum omnium Apostolorum, honore omnes præcedere. Secundò, quod ait Ambrosius, Paulum non esse inferiorem Petro. At tu dicis (lib. 1. cap. 9. per totum) Petrum habere multas prærogativas, quibus reliquos Apostolos excellit. Tertiò, quod ait Leo, Petrum & Paulum esse pares electione: quod tu negas lib. 1. cap. 5. nu. 10. & seqq.

26. Quòd autem supradicti Patres nihil contra nos habeant, facile ostendam. Nam duplex potest institui comparatio inter Petrum & Paulum. Una, quoad sapientiam, sanctitatem, laborem, zelum, & honorem, qui ex illis consequitur: Et sic Paulus potuit esse par Petro. Quod manifestè significat Leo, cum ait: *De quorum meritis atq; virtutibus nihil debemus sentire discretum.* Altera, quoad jurisdictionem: Et sic Petrus erat major Paulo, ut sæpè ostensum est.

## II. OBJECTIO.

*Evangelium reprobatur Primatum  
inter Apostolos.*

27. **H**Oc probas ex contentione Apostolorum de Primatu, & responsione Christi, (lib. I. cap. 11. n. 1. & 2.) Nam cum Apostoli contenderent, quisnam illorum esset major? Respondit Christus: Luc. 22. 25. *Reges gentium dominantur eorum: & qui potestatem habent super eos, benefici vocantur. Vos autem non sic: sed qui major est in vobis, fiat sicut minor.* Hinc ita concludis: Omnes Apostoli etiam Petrus, contendeabant de Primatu: At si Petrus erat promissus Primatus, cur contendit? Secundò, Christus omnibus eripit cogitationem de Primatu temporali, cum ait: *Vos autem non sic.* Similiter de Primatu & jurisdictione spirituali, cum ait: *Qui major est in vobis, fiat sicut minor.*

28. Respondeo. Hic notanda est duplex contradictio in tuis verbis. Una est, quia hoc loco dicis, Apostolos contendisse de Primatu temporali, quis scilicet illorum futurus esset primus in regno Christi temporali, quod somniabant Verba tua sunt hæc: *Appetitus naturalis humanus propria excellentia, & in alios dominatus, Apostolorum animos adhuc imperfectos, nec parum, nec raro, titillavit. Quia enim Messiam dominatione temporali Regem Israel in mundo regnaturum, ex sacris scripturis non bene intellectis, & communi Hebræorū intelligentia existi-*

existimabant, magnas sibi apud Christum, quem Messiam agnoverant, dignitates pollicebantur; quippe qui ipsius primi essent affecula & familiares. Et cum duodecim essent, inter ipsos etiam unum aliquem primum locum habiturum autumabant. Et infra; Debit quidem animos eorum à temporalibus dignitatibus abducere, quas etiam sibi somniabant, &c. At cap. 9. n. 6. planè contrarium asseris his verbis: Respondet Bellarminus, errasse quidem Apostolos, quia temporalem principatum somniabant; & hunc errorem Dominum sæpè correxisse. De hoc tamen temporali mundi hujus principatu, Apostolos tunc nihil cogitasse, sed de sola pralatione Petri supra ipsos Apostolos, satis est apertum. Quomodo cohærent hæc duo: Apostoli nihil cogitabant de temporali principatu: Et, Apostoli existimabant Messiam dominatione temporali in mundo regnaturum, & magnas sibi apud illum dignitates pollicebantur.

29. Altera est: quia hoc loco in summa capituli II. sic habes: *Christus nudum ministerium, sine jurisdictione dedit Apostolis.* At cap. 3. n. 31. contrarium assererebas his verbis: *Christus immediate concessit Apostolis potestatem ordinis, & jurisdictionem plenissimam.* Nonne hæc aperta contradictio est, Dare nudum ministerium sine jurisdictione: Et, Dare plenissimam jurisdictionem? Et quamvis in priori loco videaris loqui de jurisdictione humana, hoc tamen non obstat. Vel enim loqueris de humana, id est, à puro homine accepta; & sic nihil ad rem:

ad rem: Vel de humana, id est, homini à Christo concessa; & sic manet contradictio.

30. Objectio tua, quam à Lutheranis accepisti, nullius momenti est; & jam pridem à Cardinale Bellarmino & alijs Catholicis refutata. Ad illos te remitto. Obiter tamen attingam, quid respondendū sit. Apostoli cogitabant de Primatu aliquo temporali, quem apud Christum essent habituri. Hoc suprà cap. 6. prærogativa septima, ostensum est. Et tu paulo antè fassus es. Christus eripis illis hanc cogitationem, his verbis: *Vos autem non sic.* Et simul suo exemplo hortatur, ut quisquis inter ipsos habiturus esset Primatum Ecclesiasticum, servaret modestiam ac humilitatem; nec se superbè efferret super alios.

*Qui, inquit, major est in vobis, fiat sicut minor.* Similem monitionem habemus de Primatu Regisin Veteri Testamento, Deuter. 17. 18. *Postquam sederit in solio regni sui, describet sibi Deuteronomium legis hujus in volumine.* Et paulo post: *Nec elevetur cor eius in superbiam super fratres suos.* Sicut ergo hinc non possumus inferre, Regem Veteris Testamenti non habuisse jurisdictionem in suos fratres, quia debebat servare modestiam, & non elevare se super fratres suos, quod solent facere Reges gentiles: Ita in simili, non possumus inferre, Petrum non habuisse jurisdictionem Ecclesiasticam in suos fratres, quia debebat illis servire & ministrare. Alioqui, quid dicemus de Christo? Habuit certè plenissimam jurisdictionem.

ditionem in Apostolos, & tamen ministrabat illis. (*Ego autem in medio vestrum sum, sicut qui ministrat.*) Cùm ergo suo exemplo hortatur Prælatos Ecclesiæ ad simile ministerium, non tollit ab illis jurisdictionem, sed humilitatem commendat.

### III. OBJECTIO.

*Ipsi Apostoli in Petro non agnoverunt Primatum.*

31. **H**OC sic probas, cap. II. num. 7. Apostoli, postquam Petro dictum esset, *Tu es Petrus, & Tibi dabo claves regni cælorum*; adhuc contendebant de Primatu: Ergo non agnoverunt, Petro per illa verba promissum esse Primatum; alioqui desissent contendere. Respondeo. Apostoli ex vna parte persuasi erant regnum Christi fore temporale: ex altera audiverant Christum moriturum, & Petrum ipsius loco habiturum claves regni cœlestis, id est, Primatum Ecclesiasticum. Sed prior cogitatio erat magis ipsis infixa, quàm posterior. Imò nec Petrus, nec alij Apostoli credebant, Christum moriturum, tametsi clarissimè hoc ipsis esset significatum. Matth. 16, 21. *Exinde capit Jesus ostendere Discipulis suis, quia oporteret eum ire Hierosolymam, & multa pati à senioribus, & Scribis, & Principibus*

*bus Sacerdotum, & occidi, & tertia die resurgere. Et assumens eum Petrus, cœpit increpare illum dicens: Absit à te Domine: Non erit tibi hoc. Et Luc 9.44. Filius hominis, futurum est, ut tradatur in manus hominum: At illi ignorabant verbum istud, & erat velatum ante eos. Certè, si vel non credebant, vel non intelligebant, CHRISTVM esse moriturum, quod tam clare ipsis dicebatur; quid mirum est, si non multum solliciti fuerint de futuro Petri primatu post mortem Christi? præsertim cum altera cogitatio de regno Christi temporali prævaleret.*

32. Si hoc non capis, Marce Antoni, exemplum sume à teipso. Promissio tibi facta erat in statu religioso, cùm abdicabas te rebus temporalibus: *Omnis, qui reliquerit domum, vel fratres, aut sorores, aut patrem, aut matrem, aut agros propter nomen meum centuplum accipiet, & vitam aternam possidebit. Quæ sanè promissio erat clarissima. Et tamen, magis insedit tibi cogitatio de Episcopatu: ideoque relicto statu religioso, & parum sollicitus de tam insigni promissione, ad seculum, cui renunciaveras, redijsti, & dignitatem Episcopalem importunè impetrafti. Non tam crasse hallucinati sunt Apostoli. Nunc quæro, an hæc consequentia bona sit? Marcus Antonius, postquam dictum est illi, Centuplum accipies, & vitam aternam possidebis, adhuc cogitavit de honore & dignitate Episcopali: Ergo non agnovit pro-*



promissionem à Deo sibi factam. At similis est hæc, quam tu facis : Apostoli, postquam dictum est Petro, *tibi dabo claves*, adhuc cogitabant de regno temporali : Ergo non agnoverunt promissionem Petro factam de Primatu spirituali.

#### IV. OBJECTIO.

*Petrus nunquam exercuit Primatum.*

33. **H**oc tripliciter probas, cap. 11. n. 10. & seqq. Primò, quia non solus Petrus, sed alij etiam Apostoli instituerunt primos Diaconos (Act. 6. 2.) Secundò, quia Apostoli miserunt Petrum & Ioannem in Samariam: Ergo Petrus non erat supra Apostolos, sed ad illorum arbitrium mittebatur. (Act. 8. 14.) Tertiò, quia Paulus & Barnabas detulerunt quæstionem de circumcissione, non ad solum Petrum, sed ad omnes Apostolos ac Seniores. Debuissent autem ad solum Petrum deferre, si ille fuisset supremus Rector Ecclesiæ, & Iudex controuersiarum.

34. Respondeo. Hæc omnia desumpsisti ex Lutheranis & Calvinistis. Sed cur dissimulas alia multa, quæ Petrus gessit in suo Primatu? Solus sua autoritate convocavit omnes Discipulos ad electionem novi Apostoli. Primus promulgavit Evangelium Hierosolymæ. Pri-

Primus item prædicavit gentibus Evangelium. Primus sententiam dixit in Concilio Hierosolymitano, Hæc omnia omittis. Quæ autem objicis, nullius ponderis sunt. Ad singula sic respondeo.

35. Ad 1. non valet hæc consequentia: Omnes Apostoli instituerunt primos Diaconos; & non solus Petrus: Ergo Petrus non habebat Primatum. Sicut neque hæc: Omnes Principes Angliæ sanxerunt legem de juramento fidelitatis, & non solus Rex; Ergo Rex non habet Primatum. Neque item hæc: Omnes Episcopi Dalmatiæ fecerunt; hunc aut illum Actum jurisdictionis Ecclesiasticæ, & non solus Marcus Antonius: Ergo Marcus Antonius non fuit Primas Dalmatiæ. Non enim necesse est, solum Regem in suo regno; solum Imperatorem in suo imperio; solum Archiepiscopum in sua provincia exercere quosvis actus jurisdictionis & potestatis, sine aliorum ope & auxilio. Multo minus valet hæc consequentia: Petrus in illo actu, quo constituebantur primi Diaconi, non exercuit Primatum Ecclesiasticum: Ergo nunquam exercuit. Et tamen mirificè tibi places in his & similibus tuis argutiis. Quanquam non argutiæ, sed stupiditates sunt.

36. Ad 2. Triplex potest esse missio. Prima ex imperio. Sic Rex, aut Princeps, aut Dominus mittit subditum aut servum. Secunda, ex consensu. Sic Deus Pater mittit Filium in hunc modum; & Filius Spiritum Sanctum. Tertia;

N

ex con-

ex consilio & directione. Sic consiliarij mittunt Regem ad bellum. Igitur Petrus missus est, non ex imperio, sed ex consensu & consilio Apostolorum. Ex qua missione non sequitur, Petrum vel æqualem vel inferiorem Apostolis fuisse. Nam superior potest hoc modo mitti ab inferioribus.

37. Ad 3. Hæc illatio nulla est: Quæstio de circumcissione non fuit delata ad solum Petrum, sed ad concilium Apostolorum & Seniorum: Ergo Petrus non habebat Primatum Ecclesiæ. An non plurimæ controversiæ civiles deferuntur ad Parlamentum Parisiense? An non plurimæ ad Senatum regium in Anglia? Nec ideo sequitur, Regem Gallix aut Angliæ non habere primatum in suo regno. Audi Antoni, quod res est. Sicut in regno Angliæ possunt controversiæ civiles deferri, vel ad solum Regem, vel ad Senatum Regis, præsentem Rege: Sic etiam in Ecclesia possunt controversiæ Ecclesiasticæ deferri, vel ad ipsum Pontificem, vel ad concilium, cui præest pontifex. Sicut ergo non destruitur auctoritas concilij, per hoc præcisè, quòd aliqua controversia deferatur ad solum Pontificem; ita vicissim non destruitur auctoritas Pontificis per hoc, quòd aliqua controversia deferatur ad concilium, cui præest pontifex, & non ad solum Pontificem. Res clara est. Sed cur illa controversia de circumcissione potius fuit delata ad concilium,

lium, quàm ad solum Petrum? Facilis responsio: Ut decisio fieret cum majori partium satisfactione. Nam partes litigantes facilius acquiescunt, quando constat controversiam ex communi Ecclesiæ consensu decisam esse.

## V. OBJECTIO.

### *Pauli reprehensio destruit Primatum Petri.*

38. **H**Oc sic probas: Paulus in Epist. ad Gal. cap. 2. 11 scribit, se in faciem restitisse Petro, quia reprehensibilis erat: Ergo Petrus non fuit Caput Ecclesiæ; alioqui Paulus fuisset arrogans & procax, quod Capiti Ecclesiæ ausus esset resistere. Hoc argumentum fusè persequeris, adductis multorum Patrum testimoniis, ad confirmandum Petri errorem, & justam Pauli obiurgationem. Respondeo. Non opus est tot testimoniis. Fatemur Petrū errasse: non quidem in aliquo fidei articulo, in quo errare non poterat, iuxta illam Christi promissionem; *Rogavi pro te Petre, ut non deficiat fides tua*: sed in facto, quia incautè simulabat Judæismum, cum aliquo scandalo & offensione gentilium. Fatemur etiam, Paulum apertè illi restitisse, quia meritò iudicabat eiusmodi simulationem non esse tolerandam, eo quòd esset scandalosa, At tuæ consequen-

tix, quas hinc nectis, non valent. Non enim sequitur : Petrus fuit à Paulo reprehensus : Ergo non habuit Primatum Ecclesiæ. Sicut in simili non sequitur : David fuit reprehensus à Joab (2. Regum 19. 5.) Ergo non habuit Primatum regni. Imò multi Patres ex hac ipsa Petri reprehensione docent, superiores posse corrigi ab inferioribus, quando fit cum debita humilitate & charitate, ut Augustinus Epist. 19. ad Hieronymum, Cyprianus Epist. ad Quirinum, de Hæreticis rebaptizandis, Gregorius Hom. 18. In Ezechielem, Diuus Thomas in 2. secundæ quæst. 33. art. 4. ad 2.

39. Similiter non sequitur, Paulum fuisse arrogantem & procacem, quòd ausus sit Capiti Ecclesiæ in faciem resistere; quia fecit hoc bono zelo, ad tollendum scandalum, quod ortum erat ex incauta Petri simulatione. Sicut nec ipse Joab censetur fuisse procax & arrogans, quòd ausus sit suum Regem ob ipsius peccatum arguere & objurgare. Et aliunde constabat Paulo, Petrum propter modestiam & humilitatem, qua erat præditus, non ægrè laturum fraternam correptionem, quam sciebat ex bona intentione provenire.

40. De hoc Petri & Pauli facto sic scribit Augustinus loco citato : *Ipsè Petrus, quòd à Paulo fiebat utiliter libertate charitatis, sancta ac benigna pietate humilitatis accepit: Atque ita rarius ac sanctius Exemplum posteris præbuit, quo non dedignarentur, si ubi forte recti tramitem*

*mitem reliquissent, etiam à posterioribus corrigi; quam Paulus, quo confidenter auderent, etiam minores majoribus, pro defendenda Evangelica veritate, salva fraterna charitate, resistere.*

41. Et certè Paulus, non tantum suo exemplo, sed etiam scripto docuit, superiores aliquando moneri & corrigi posse ab inferioribus, servata semper debita charitate ac subiectione. Sic enim scribit ad Colossenses cap. 4. 17. *Dicite Archippo: vide ministerium, quod accepisti à Domino, ut illud impleas.* Erat Archippus ille Colossensium Episcopus, successor Epaphræ, qui tunc captivus Romæ tenebatur in vinculis, ut scribit idem Paulus in Epistol. ad Philemonem vers. 23. *Salutat te Epaphras concaptivus meus in Christo Jesu.* Si ergo Paulus mandat Colossensibus, ut moneant Episcopum sui officij; quid mirum est, si alij quoque subditi possint aliquando suos Prælatos, vel monere, vel reprehendere, si necesse sit?

42. Et recta ratio hoc dicat. Nam laudabile est, opera misericordiæ, sive corporalia, sive spiritualia, servato debito modo ac ordine, præstare indigentibus: At peccantes corrigere, est opus misericordiæ spirituale; Ergo laudabile est, servato debito modo ac ordine, hoc opus præstare indigentibus. At non minus Prælati, quàm subditi, possunt indigere correptione: & sæpè magis, quia sunt in altiori & periculosiori loco, ut rectè notat Augustinus in Regula ad servos Dei,

circa finem, cum ait: *Non solum vestri, sed etiam Prælati miseremini; quia inter vos, quanto loco superiorem, tanto in periculo maiore versatur.*

43. Hoc argumentum pulchrè explicat Divus Thomas in 2. secundæ, quæst. 33. artic. 4. in hunc ferè modum: Duplex est correctio: Una iustitiæ; quæ fit per inflictionem legitimæ pœnæ: Altera charitatis, quæ fit per fraternam correptionem. Prior convenit solis Prælati, respectu subditorum; quia requirit jurisdictionem, quæ in solis Prælati est. Posterior convenit tam subditis, quàm Prælati; quia est actus charitatis, quæ ad omnes proximos, sive Prælatos, sive subditos, se extendit. Tenemur enim omnes ex charitate diligere; ac proinde omnes peccantes corripere, servatis ijs circumstantiis, quas charitas exigit. Non exigit autem charitas, ut eadem libertate & autoritate corripiamus Prælatos, quæ subditos: Sed exigit, ut Prælatos cum reverentia & subjectione; subditos cum mansuetudine & patientia, quantum fieri potest, oburgemus.

44. Nondum acquiescis; mi Antoni. Ais Patres sic argumentari: Paulus non reprehendisset Petrum, si agnouisset illum pro supremo Ecclesiæ Capite seu Monarcha. Et citas ex Hieronymo, apud Gratianum 2. quæst. 7. cap. Paulus, hæc verba: *Paulus, Petrum reprehendit: quod non auderet, nisi se non imparem sciret.* Et ex Ambrosio, ad cap. 2. Epist. ad Galat. *Quis eorum auderet Petro primo*

*Apo-*

*Apostolo, cui claves regni caelorum Dominus dedit, resistere, nisi alius talis, qui fiducia electionis suae sciens se non imparem, constanter improbaret, quod ille sine consilio fecerat.*

45. Respondeo. Tu pervertis sensum illorum Patrum. Nam Gratianus disertè monet, paulum dupliciter conferri posse cum petro. Primò, quoad Ecclesiasticam dignitatem. Secundò, quoad puritatem vitæ & conversationis. Priori modo; paulum fuisse imparem, seu inferiorem: Posteriori, non imparem. Quod declarat duplici exemplo. Uno Augustini, qui scribit, se majorem esse Hieronymo, ratione Episcopatus: minorem, ratione virtutum. Altero ejusdem, qui alibi scribit, Cyprianum fuisse æqualem petro in martyrio; minorem in potestate. Igitur ex sententia Gratiani, sic argumentandum est: Paulus non auderet petrum reprehendere, nisi sciret se non imparem in puritate vitæ & conversationis. Non autem sic: Nisi sciret se non imparem in Ecclesiastica potestate. Ratio est, quia qui alium reprehendit, debet esse immunis ab illo vitio, de quo illum reprehendit: At paulus reprehendebat petrum de mala conversatione cum Judæis & gentibus: Ergo non ausus fuisset illum reprehendere, nisi scivisset se esse immunem ab hoc vitio; & in puritate conversationis Petro non imparem, sed superiorem. Jam advertis, opinor, imposturam tuam.

N 4 46. Idem



46. Idem crimen committis in citando Ambrosio. Nam ille similem adhibet distinctionem. Confert Petrum cum Paulo dupliciter. 1. ratione potestatis. 2. ratione electionis. Priori modo præfert Petrum, quia vocat illum *Primum Apostolum, cui claves regni cælorum data sunt*, insinuans Petrum ex hoc capite reliquos omnes antecellere. Posteriori, Paulum facit Petro equalem; quia sicut Petrus immediatè à Christo electus est ad Apostolatam; ita etiam Paulus, ipso attestante Gal. 1.1. *Paulus Apostolus, non ab hominibus, neq; per homines, sed per Jesum Christum.*

47. Tandem, quia vides te argumentis nihil proficere, convertis te ad scommata & sarcasmos; quæ sita occasione ex illis Gregorij verbis, Hom. 18. in Ezechielem: *Ecce Paulus in Epistolis suis scripsit, Petrum reprehensibilem: Et ecce, Petrus in Epistolis suis asserit, Paulum in ijs, quæ scripserat, admirandum. Certè enim, nisi legisset Petrus Pauli Epistolas, non laudasset. Si autem legit, quia illic esse reprehensibilis dicitur, invenit. Amicus ergo veritatis laudavit etiam, quod reprehensus est.* Hanc Gregorij sententiam mirificè laudas. Et meritò. Sed venena inde colligis, non mella; quod malum est. Sic enim subnectis: *Mirum verò, quod Petrus, hoc est, summus Ecclesiæ Monarcha, & supremus CHRISTI ac Dei Vicarius, illam Pauli Epistolam ad Galatas in Indicem expurgatorium statim*

*statim non conjecerit, quippe ipsum primum & supremum Papam, adeò deprimentem, & ipsius errores exaggerantem. Certè Petri Successores tales Epistolas & libros, qui ipsorum errata & reprehensiones rationabiles continent, jam ferre nolunt, proscribunt eos, & diris devovent. Expectandum profectò, ut si planè nostri Papæ viderint, ex Evangelio canonico Papatum destrui, Evangelium etiam ipsum in librorum prohibitorum Indicem detruant.*

48. Hic apparet verum esse, quod Christus dicit in Evangelio: *Ex abundantia cordis os loquitur. Et, malus homo de malo thesauro cordis sui profert malum.* Multiplex malum ex thesauro tuo profers. Primò, Petrum Apostolum, per ironiam ac derisum, vocas summum Ecclesiæ Monarcham, & supremum Christi Vicarium. Si non volebas parcere Pontifici, perpercisses saltem Petro, qui in Evangelio ab ipso Christo laudatus est: *Beatus es Simon Barjona.*

Secundò, aliam injuriam illi facis, quia insinuas, tui similem, ac vindictæ appetentem esse. Tu certè, quia à Pontifice reprehensus es, vindictam paras, & de Sede Apostolica conaris illum deturbare. At Petrus meliori animo est. Reprehensus fuit à Paulo: non indignatur: non ægrè fert: non stringit calamum, ut tu facis.

Tertiò, etiam Paulo injuriam irrogas; quasi ipse depressoerit Petrum, & ipsius errores exaggeraverit. Invidiosa sunt hæc verba. Non voluit

## VI. OBJECTIO.

*Pauli scripta destruunt Primatum Petri.*

50. **Q**UOD sic probas. Primò, quia quando Paulus nominat insigniores Apostolos, Petrum alijs postponit, ut Gal. 2. 9. *Jacobus, & Cephas, & Joannes.* Secundò, quia ibidem non de solo Petro, sed etiam de Jacobo & Joanne dicit: *qui videbantur columna esse.* Ergo Jacobum & Joannem Petro exæquat. Tertiò, quia Jacobus, Petrus, & Joannes dederunt dextras Societatis Paulo & Barnabæ; ut hi ingentes, illi verò in circumcisionem ferrent Evangelium. (ibidem) At istæ dextræ Societatis repugnant Primatui Petri. Quartò, quia Paulus 2. Corinth. 12. 11. scribit: *Nihil minus fui ab iis, qui sunt supra modum Apostoli.* Quæ verba magnum præjudicium faciunt Primatui Petri. Sic tu.

51. Respondeo. Piget in istis quisquilijs herere. Sed tamen, ut est in Proverbijs, *respondendum est stulto juxta stultitiam suam, ne sibi sapiens esse videatur.* Ac primò, non est certum, Petrum medio, non primo loco, positum esse à Paulo. Nam, ut benè notatum est à Cardinale Bellarmino, multi Patres, præsertim Ambrosius, Chrysostomus, Augustinus, & Hieronymus, primum locum illi assignant. Esto tamen; medio loco inter Jacobum & Jo-

& Joannem positus sit. Cur in eo vim facis? Cur non potius in eo, quod non semel, sed sæpius in Evangelio positus sit primo loco, quando omnes Apostoli simul recensentur? conferamus hæc duo inter se. Tu ais, semel non esse positum primo loco: Ego, sæpè positum esse primo loco. Tu, semel positum esse post unū: Ego, sæpè positum esse ante omnes. Tibi multi contradicunt, ut Ambrosius, Chrysostomus, Augustinus, Hieronymus: Mihi, nullus: ne tu quidem. Uter ergo melioris causæ patronus est?

52. Addo, nec Paulum, quocunque loco posuerit Petrum, tibi patrocinari. Nam in eadem Epistola ad Galatas cap. i. disertè scribit, se venisse Hierosolymam, ut videret Petrum, & quindecim diebus apud eum mansisse. Cur non venit ad Jacobum & Joannem? Nimirum, quia pluris Petrum, quàm illos æstimabat. Unde Ambrosius circa illum locum: *Dignum fuit, inquit, ut cuperet videre Petrum, quia Primus erat inter Apostolos, cui delegaverat Salvator curam Ecclesiarum.* Et Hieronymus in Epistola ad Augustinum (quæ est undecima inter Epistolas Augustini) *Tanta Petrus auctoritatis fuit, ut Paulus in Epistola sua scripserit: Deinde post annos tres veni Hierosolymam videre Petrum.* Et Chrysostomus Homil 87. in Joannem: *Os erat Apostolorum & Princeps: propterea & Paulus eum præter alios visurus ascendit.* Et Theodoretus in cap. i. ad Galatas: *Etenim cum humanâ doctrinâ non indigeret, ut qui ab universorum Deo eam acce-*

accepisset, Apostolorum Principi, quem par est, honorem detulit. Et Oecumenius ibidem: *Post tot tantaque certamina abiit, ut videret Petrum, tanquam majorem. Ut autem etiam maneret, causa honoris, quem Petro deferebat, factum est.*

53. Jam verò ex eo, quod Paulus scribit de Petro, Jacobo & Joanne; *Qui videbantur columna esse*; non rectè infer, duos illos Petro fuisse exæquatos. Nam inter plures columnas una potest esse sublimior, quàm altera. Sicut supra monui in simili casu, inter plures fumos, unum posse altiorè esse, quàm reliquos. Et habemus manifestum exemplum in scriptura, Proverb. 9. 1. *Sapientia adificavit sibi domum, excidit columnas septem.* Ubi, juxta interpretes, per septem columnas, vel intelligunt Doctores Ecclesiæ, vel Sacramenta, vel dona Spiritus sancti. Et tamen non sequitur, vel omnes Doctores, vel omnia Sacramenta, vel omnia dona Spiritus sancti esse inter se æqualia. Imò constat, ubique esse magnam differentiam. Nam de Doctoribus legimus, Dan. 13. 3. *Qui docti fuerint fulgebunt quasi splendor firmamenti: Et qui ad justitiam erudiunt multos, quasi stella in perpetuas aternitates.* Jam verò, ut loquitur Apostolus, 1. Corinth. 15. 41. *Stella differt à stella in claritate.* Similiter certum est, inter Sacramenta, præcipuum esse Baptismum, quoad necessitatem: Eucharistiam, quoad præstantiam. Denique dona Spiritus sancti (quæ septem enumerantur ab Isaia, cap. 11. 2. nempe Sapientia, Intellectus, Consilium, fortitudo,

titudo, scientia, pietas, timor Domini) nō sunt omnia inter se paria. Quomodo ergo ex eo præcisè, quòd tres Apostoli vocantur columnæ, putas convinci posse; æquales inter se esse? Nihil minus.

54. Quod tertio loco objicis, Petrum, Jacobum & Joannem dedisse dextras Societatis Paulo & Barnabæ, verissimum quidem est; sed non rectè inde concludis, unum alteri non esse præferendum. Quasi verò, quicunque dextras societatis sibi mutuo porrigunt, pares esse necesse sit. Non ita est. Primò, quia societas potest esse inter inæquales, ut patet ex illo, 1. Joann. 1.3. *Ut & vos societatem habeatis nobiscum, & societas nostra sit cum Patre & cum Filio ejus Jesu Christo.* Deinde, multi porrigunt sibi invicem dextras, qui honore & autoritate inter se differunt. Nam Jehu Rex dixit Jonadab, filio Rechab, 4. Reg. 10. 15. *Nunquid est cor tuum rectum, sicut cor meum cum corde tuo? Et ait Jonadab: Est. Si est, inquit, da manum tuam. Qui dedit ei manum suam.* An ideo Jehu & Jonadab æquales? Nullo modo. Nam alter Rex erat; alter homo privatus.

55. Illud denique; *Nihil minus fui ab ijs, qui sunt supra modum Apostoli*, non intelligitur de jurisdictione, quasi velit dicere, se nulli Apostolorum cedere in potestate jurisdictionis, ut tu perperam contendis; sed partim de revelationibus, partim de laboribus & miseriis pro Christo susceptis, partim de prodigiis & miraculis

culis ab eo patrat: In quibus omnibus se ait nemini imparem esse. Hoc patet ex ipso cōtextu. Nam de revelationibus sic loquitur: *Si gloriari oportet (non expedit quidem) veniam autem ad visiones & revelationes Domini.* Et postea pergit: *Propter quod placeo mihi in infirmitatibus meis, in contumeliis, in necessitatibus, in persecutionibus, in angustiis pro Christo. Cū enim infirmior, tunc potens sum. Factus sum insipiens: vos me coegistis. Ego enim à vobis debui commendari: Nihil enim minus fui ab iis, qui sunt supra modum Apostoli, tametsi nihil sum: Signa tamen Apostolatus mei sunt super vos in omni patientia, in signis & prodigijs & virtutibus. Nulla hīc mentio jurisdictionis. Sed tu, Marce Antoni, ut hæretici solent, detorques omnia ad tuum sensum, Pudeat imposturæ.*

## VII. OBJECTIO.

### *Ex comparatione Petri & Pauli.*

56. **H**anc comparationem instituis ex scriptura, & Patribus. Ex scriptura sic: Sicut Petro dictum est, *Pasce oves meas*, id est, commendo tibi ovile meum, Ecclesiam meam: ita Paulus de seipso dicit, 2. Cor. 11. 11. 28. *sc. premi cura & sollicitudine omnium Ecclesiarum*: Ergo non minus Paulo, quàm Petro totius Ecclesiæ cura commissa est.

57. Re-

57. Respondeo. Cura & sollicitudo Ecclesiarum duplex est. Una oritur ex iustitia: altera ex zelo & charitate. Prior debet esse in Prælati Ecclesiæ, qui habent jurisdictionem Ecclesiasticam. Posterior potest esse in omnibus, qui charitate præditi sunt. Igitur Petrus habuit curam Ecclesiæ ex iustitia, quia habuit jurisdictionem in totam Ecclesiam: Quæ jurisdictionis significatur per verbum, *Pasce*, ut cap. 3. explicatum est. Paulus verò loquitur de posteriori cura & sollicitudine, quæ oritur ex charitate. Cùm enim recensuisset labores, carceres, plagas, famem, sitim, & alias miseras, quas pro Christo sustinebat; mox subjicit: *Præter illa, quæ extrinsecus sunt, instantia mea quotidiana, sollicitudo omnium Ecclesiarum. Quis infirmatur, & ego non infirmor? Quis scandalizatur, & ego non uror?* His posterioribus verbis explicat, unde oriatur illa sollicitudo. Nempe ex duobus actibus charitatis. Primò, ex dolore charitatis; quem percipiebat ex miseria proximi. *Quis, inquit, infirmatur, & ego non infirmor?* Quasi dicat: Infirmor cum infirmantibus, doleo cum dolentibus, lugeo cum lugentibus. Secundò, ex amore & zelo charitatis, quo accensus urebatur. *Quis, inquit, scandalizatur, & ego non uror?* Quasi dicat: Quando aliquis patitur scandalum, tanto zelo & amore accendor ad tollendum illud scandalum, ut quodammodo uri videar.

58. Non igitur cura Ecclesiarum, de qua Paulus loquitur, oriebatur ex obligatione iustitiæ;



stitiæ; sed ex duplici actu charitatis, dolore scilicet & amore. Quod etiam tuo exemplo facile confirmabo. Nam in expositione cōsiliij profectionis tuæ, disertè scribis te (quasi alterum Paulum) *semper habuisse desiderium unionis omnium Christi Ecclesiarum: & anxie perspexisse, an possit aliqua excogitari via, omnes Christi Ecclesias ad veram antiquam unionem componendi.* Unde hoc tantum desiderium, mihi Antoni? An ex obligatione justitiæ? Non opinor id dicturum. An ex zelo & fervore charitatis? Hoc dabis, sine dubio. Sed quero, an hinc inferes, quod de Paulo inferebas, non minus tibi, quàm Petro, totius Ecclesiæ curā à Christo commendatam esse? Non, si sapias.

59. Nec obstat, quod Paulus de seipso scribit 1. Cor. 9. 16. *Si Evangelizavero, non est mihi gloria: necesse est, ut non mihi incumbit. Vanum mihi est, si non Evangelizavero.* Non enim loquitur de necessitate justitiæ, sed obedientiæ: Neque de regimine Ecclesiæ, sed de Evangelij prædicatione. Nam ex obligatione præcepti tenebatur apud Gentiles prædicare Evangelium: sicut etiam hoc tempore tenentur Patres Societatis, quando ex virtute obedientiæ mittuntur à Romano Pontifice. At non tenebatur ex obligatione justitiæ gubernare totam Ecclesiā, quia hoc nusquam erat illi commissum: sicut etiam hoc tempore nō committitur Patribus Societatis. Utor hoc exemplo, quia tibi notū est. Si tamen vis, aliud accipe. Archiepiscopus Cantuariensis, si obedientiam illi promitte-

Q

res,

res, posset tibi mandare, ut per totum ipsius Archiepiscopatum, conciones ad populum haberes. An ideo totius Archiepiscopatus Ecclesiarum regimen tibi committeret? Nullo modo. Et tamen non malè diceres: *Va mihi est, si non Evangelizavero: necessitas enim mihi incumbit.* Quæ necessitas: Non justitiæ, sed obedi-  
tiæ & Præcepti. Jam capis mysterium.

60. Non successit ex scriptura compara-  
tio Petri & Pauli, quam urges. Videamus quid  
ad eandem astruendam adferas ex Patribus.  
Patrum testimonia, quæ adducis sunt hæc. I-  
renæus lib. 3. contra hæreses, cap. 13. *Ipsius (Dei)*  
*Petrus erat Apostolus, cujus & Paulus.* Ubi Petrum  
equat ad paritatem cum Paulo: non tamen  
eum præfert Paulo.

Clemens lib. 7. constitut. Apost. cap. 1. in-  
lucit Apostolos de Petro sic loquentes: *Ana-*  
*nias & Saphira, Petri coapostoli nostri sententia,*  
*morte sunt affecti.* Non vocant illum Principem  
aut Monarcham, sed coapostolum, tanquam parem.

Gelasius in Tomo de vinculo anathematis,  
statim in initio, Paulum vocat *coapostolum Pe-*  
*tri.*

Augustinus lib. 2. de Baptis. contra Donati-  
stas, c. 4. vocat *collegam Petri.* Et lib. 2. de pecca-  
torum meritis & remiss. c. 13. de Paulo sic lo-  
quitur: *Verum etiam in ipso Evangelio, ubi & tan-*  
*ti Apostolatus meruit principatum.* Et in Psal. 130.  
*Paulus Apostolus, quamvis ex persecutore factus*  
*sit predicator, abundantio rem gratiam consecutus*  
*est in omni labore Apostolico, quam ceteri Apostoli.*

Ori-

Origenes lib. 1. contra Celsum, Paulum vocat fundatorem Ecclesiarum, post Christum, principium.

Nazianzenus in Apolog. circa medium, ait Petrum & Paulum, Verbi & Sapientiae & gubernationis gratiam à Christo percipere meruisse. Et numerans eos, qui populo præfuerunt in Testamento Novo, ponit primum Joannem Baptistam: proximè verò duodecim Apostolos.

Cyrillus Hierosolymitanus catech. 6. Errorem (Simonis Magi) latius se proferentem coarguerunt duo viri boni huc perlati, Petrus & Paulus, Ecclesia Præfecti.

Ambrosius lib. 2. de Spirit. sanct. in fine: Una enim gratia fulgebat in his, quos Spiritus unus elegerat. Nec Paulus inferior Petro, quamvis ille Ecclesia fundamentum, & hic sapiens architectus, sciens vestigia credentium fundare populorum. Nec Paulus indignus Apostolorum collegio, cum primo facile conferendus, & nulli secundus. Nam qui se imparem nescit, facit aequalem.

Idem Ambrosius serm. 66. de Natali Petri & Pauli: Beati Petrus & Paulus eminent inter universos Apostolos, & peculiari quadam prerogativa præcellunt. Verùm inter ipsos, quis cui præponatur, incertum est. Puto enim eos aequales esse meritis, qui aequales sunt passione.

Leo Papa serm. 1. in Natali Sanct. Petri & Pauli. Quos gratia Dei in tantum apicem inter omnia Ecclesia membra provexit, ut eos in corpore, cui Caput est Christus, quasi geminum constituerit lumen oculorum.

Chrysostomus, quicquid tribuitur Petro, tribuit etiam Paulo. Petro tribuitur, quòd fuerit *petra & fundamentum Ecclesie*. At Chrysostomus Homil. 2. in Epist. ad Roman. tribuit Paulo, quòd fuerit *columna Ecclesie, petra, ferro & adamante firmior*. Petro tribuitur; quòd fuerit *Coryphaeus Apostolorum*. Chrysostomus Homil. 18. ad Roman. idem dicit de Paulo. Petro dicitur Ecclesia commissa. Chrysost. Homil. ultima, dicit Paulum electum à Deo, cui res orbis, mysteria cuncta, universamque dispensationem concederet.

Idem Chrysostomus plus tribuit Paulo quàm Petro. Nam Homil. 12. in posteriorem ad Corinth. sic scribit de Paulo: *Ille non solum, quæ suæ curabat cum sollicitudine, sed etiam, quæ totius mundi*. Et ibidem: *Duplex illi cura erat pro orbe terrarum: & quomodo necessaria non deficerent, & quomodo spiritualia abundarent*. Hec tu hætenus, Marce Antoni.

61. Respondeo. Vel agis de jurisdictione Petri & Pauli; vel de virtutibus, laboribus & meritis eorum. Si agis de jurisdictione (de qua inter nos disputatio est) non rectè citasti hos Patres. Nam aliqui illorum dicunt, Paulum Petro præcellere: alij æqualem esse: alij dubiū esse, uter præcellat. Quod de jurisdictione intelligi non potest. Alioqui Patres inter se essent contrarij. Nō enim cohærent inter se hæc tria. 1. Paulus præcellit Petro jurisdictione. 2. Paulus par est Petro jurisdictione. 3. Dubium est, uter præcellat jurisdictione. Si autem agis de

de eorum virtutibus, laboribus, & meritis, tūc quidem rectè citasti hos Patres; sed nihil ad rem, de qua disputamus. Non enim inter nos quæstio est de virtutibus & meritis, sed de sola jurisdictione. Igitur extra rem omnia sunt, quæ adducis. Patres tamen non pugnant inter se. Nā benè cohærent inter se hæc tria. 1. Paulus in laboribus & ærumnis præcellit Petro. 2. Paulus est par Petro, quia uterque est Apostolus Christi. 3. Incertum est nobis, uter alteri præcellat meritis apud Deum.

62. Hinc omnia testimonia, quæ adduxisti, facilè conciliantur & explicantur. Nam Irenæus, Clemens, & Gelasius faciunt Paulum Petro æqualem, si præcisè spectes Apostolatū. Uterque enim fuit Apostolus Christi. Rectè igitur Paulum vocant coapostolum Petri; & Petrum coapostolum aliorum. Eodē sensu Augustinus Paulum vocat collegam Petri. Quando verò idem Augustinus præfert Paulum, loquitur de laboribus, ut ipse se explicat. *Abundantiorē, inquit, gratiam consecutus est in omni labore Apostolico, quam ceteri Apostoli.* Quod etiam Paulus de se fatetur, 2. Corinth. 11. 23. *Ministri Christi sunt: plus ego, in laboribus plurimis, in carceribus abundantius, in plagis supra modum &c.*

63. Origenes tibi contrarius est, non nobis. Nam cū ait: Paulum esse præcipuum fundatorem Ecclesiarum post Christum; apertè insinuat Christum esse principalem Ecclesiæ fundatorem, quod tu negas. Contendis enim

Ecclesiam, non à Christo, sed ab Apostolis fundatam esse post Christi ascensionem, ut lib. 1. c. 1. ostensum est. In eo a. quòd Paulum constituit proximum post Christum, præferendo illum alijs Apostolis in fundatione Ecclesiarum; non contradicit nobis. Fatemur enim, Paulum plus laborasse, quàm Petrum; & plures Ecclesias particulares ab illo per prædicationem Evangelij fundatas esse, quàm à Petro.

64. Nazianzenus sic habet: *Hunc morbum* (id est studium inanis gloriæ) *curare ac sistere, Petri alicujus est aut Pauli, magnificorum Christi Discipulorum, eorum videlicet, qui una cum sermonis dispensatione, etiam charisma acceperunt, & omnibus omnia sunt, ut omnes lucrifaciant.* An hinc putas colligi posse, Paulum Petro fuisse æqualem in jurisdictione? Parum sanus es, si hoc putas. Addit Nazianzenus: *quoniam autem Pauli, & illi similium mentionem fecimus, relictis reliquis omnibus, qui vel secundam legulationem, vel prophetiam, vel militarem ducatum, vel aliam consimilem dispensationem populo præfuerunt, quales fuerunt Moyses, Aaron, Josue, Helias, Helisæus, Judices, Samnel, David, Multitudo Prophetarum, Joannes, duodecim Discipuli & qui illos sunt subsecuti, &c. his, inquam, relictis omnibus, solum Paulum exempli gratia proponamus.* Non video, quid ex his verbis velis extundere. Fateor, quosdam ex illis præfuisse populo secundum legislationem; quosdam secundum prophetiam; alios secundum ducatum milita-

militarem; alios secundum aliam dispensationem. Sed quid tum? An ideo Petrus & Paulus æquales erant in potestate & jurisdictione? Non sequitur.

65. At, Cyrillus Petrum & Paulum præfectos Ecclesiæ vocat. Et hoc fateor. Addo, etiam Timotheum, Titum, Polycarpum fuisse Ecclesiæ præfectos. An igitur omnes in eo genere æquales? Non sequitur. Nisi valeat hæc similis consequentia: Omnes Episcopi in Anglia sunt præfecti Ecclesiæ: Ergo omnes sunt æquales: Ergo Archiepiscopus Cantuariensis nihil habet præ cæteris. Tu ipse vide, an hoc legitimè sequatur.

66. Ambrosius cum dicit: *Una enim gratia fulgebat in his, quos Spiritus unus elegerat*; loquitur de Paulo & Barnaba, qui simul a Spiritu sancto electi erant ad ministerium. Act. 13. 2. *Ministrantibus autem illis Domino & jejunantibus, dixit illis Spiritus sanctus: Segregate mihi Saulum & Barnabam in opus, ad quod assumpsi eos.* Quod testimonium explicans Ambrosius sic scribit: *Paruerunt ergo Paulus & Barnabas Spiritui sancto imperanti.* Et post pauca sic: *Una enim gratia fulgebat in his, quos Spiritus unus elegerat.* Facta hac collatione inter Paulum & Barnabam, pergit conferre Paulum cum Petro, his verbis: *Nec Paulus inferior Petro, quamvis ille Ecclesiæ fundamentum, & hic sapiens Architectus, &c.* ubi Petrum & Paulum facit æquales in Apostolatu, non tamen in jurisdictione Ecclesiastica. Pergit: *Nec Paulus indignus Aposto-*

lorum collegio, cum primo facile conferendus, & nulli secundus. Nam qui se imparem nescit, facit aequalem. Loquitur de laboribus, in quibus Paulus nullo fuit inferior, 2. Corinth. 11. 23.

67. Leo Papa nihil aliud dicit, quàm Petrum & Paulum esse duo Ecclesie lumina. Quis negat? At inter lumina, unum alio potest esse majus. Quod etiam fatetur Leo serm. 3. de Assumptio. Quia ad Pontificatum, ubi aperte asserit, Petrum omnibus Apostolis, & cunctis Ecclesie Patribus præponi.

68. Chrysostomus aliqua ex ijs, quæ tribuuntur Petro, tribuit etiam Paulo; sed non omnia. Nam ipsemet tribuit Petro Primatum Ecclesie, quem Paulo non tribuit. Verba eius cap. 4. citata sunt. De cura omnium Ecclesiarum, quam tribuit Paulo, dictum est ad initium hujus objectionis.

69. Ex ijs, quæ hæcenus dicta sunt, duo colligo. Primò, Patres in astruendo Petri Primatum, non is ad stipulari. Secundò, te, qui oppugnamus Primatum Petri cum alijs rebellibus, sæpè ipsi contrarium esse: nunc hoc, nunc illud dicere, prout occasio fert; non prout veritatis studium exigit. Deinceps de Pontifice Petri Successore dicendum est.

\* \* \*

**LIBER**



LIBER TERTIUS,  
DE PRIMATU ROMA-  
ni Pontificis.

**H**VNC Primatum magno conatu ac studio oppugnās toto libro quarto. Et in eo oppugnando, plus laboris ac opera videris suscepisse, quàm fortasse pro anima tua salute suscepturus. Sed frustra. Nam defenso semel ac stabilito Primatu Petri, facile erit Primatum Pontificis, qui Petri successor est, defendere ac stabilire. Sunt autem hæc potissimum, quæ oppugnās. 1. Ecclesia Romana, 2. Pontifex Romanus, 3. Cardinales. 4. Nuncij Apostolici, qui in diversas provincias à Pontifice mittuntur. De Cardinalibus & nuncijs nihil dicam, Solum de Primatu Romana Ecclesia & Pontificis agendum est, ex quo reliqua dependent: Et, quo salvo, reliqua salva sunt. Agendum autem hoc ordine. 1. An Ecclesia Romana à Petro fundata sit? 2. An Petrus fuerit Episcopus illius Ecclesia à se fundata? 3. An Pontifex sit successor Petri in eadem Ecclesia? 4. An sit Caput seu Pastor totius Ecclesia, sicut Petrus fuit.

In his fere dissentis à Catholicis.

## CAPUT PRIMUM.

*An Ecclesia Romana à Petro fundata sit?*

I. SOLENT hîc multa disputari de Petro. 1. An fuerit Romæ. 2. An mortuus sit Romæ. 3. An ibi Ecclesiam primus fundaverit. 4. An fuerit ibi Episcopus Ecclesiæ à se fundatæ. Aliqui ex Lutheranis negant hæc omnia. Tu, cum Calvino, concedis duo priora, propter consensum Patrum: Verba Calvini lib. 4. Institut. cap. 6. §. 15. sunt hæc: *Propter hunc scriptorum consensum, non pugno, quin illic mortuus fuerit.* Tua verò, lib. 4. cap. 1. num. 2. sunt hæc: *Petrus Roma martyrio coronatum fuisse, malo assentiri, quàm reluctari, ob plurimorum sanctorum Patrum consensum.*

2. Reliqua duo, partim hoc capite, partim sequenti discutienda sunt. Ac primo, *An Ecclesia Romana primum à Petro fundata sit?* Vel quod idem est; *An Petrus Roma Evangelium primus predicaverit, & Romanos ad fidem Christi converterit?* Tu Paulo potius hanc laudem tribuis, quàm Petro. Nam loco citato n. 9. sic scribis: *Si itaque fundatio Romane Ecclesiæ spectetur, eam aut magis, aut non mi-*  
nus

*nus Paulo deberi, quàm Petro affirmamus. Par enim fuit, ut Civitas, quæ erat Caput Gentium, à Doctore Gentium primum institueretur.*

3. Duplex hic error est. Alter Romanos à Doctore gentium, id est, à Paulo, primum institutos esse in fide Christi. Quod est contra ipsum Paulum, Romanorum i. 8. ubi ait : *Fides vestra annuntiatur in universo mundo.* Et tamen, cum hoc scriberet, nondum fuerat Romæ. Nam mox subdit : *Desidero videre vos.* Et infra ibidem : *Sæpe proposui venire ad vos, & prohibitus sum usque adhuc.* Ergo Romani jam erant fideles, antequam Paulus ad eos veniret. Non igitur per illum primò facti sunt fideles, ut tu fingis in odium Petri.

4. Alter est, foundationem Romanæ Ecclesiæ, vel magis, vel non minus deberi Paulo, quàm Petro. Quod est contra consensum patrum, qui illam Petro potius tribuunt, quàm Paulo. Theodoretus in illud, Romanorum i. ii. *Desidero videre vos, ut aliquid impertiar vobis gratiæ spiritualis, ad confirmandos vos;* sic scribit : *Quia Petrus primus Evangelij doctrinam illis tradiderat, subjungit: ad confirmandos vos. Quod perinde est, ac si diceret: Non aliam doctrinam vobis trado, sed traditam confirmare volo.* Igitur Petrus, ex sententia Theodoret, primus fuit, qui Romanos ad fidem convertit: Paulus verò conversos confirmavit. Quid autem sit confirmare, dicam postea ex ipso Paulo. Et paulus

Oro-

perotore Claudio Romam aggreditur, ibiq; prædicans in multis virtutibus, manifestissime Christum esse Dei filium comprobavit. Ab illis enim diebus, Christiani apud civitatem Romanam esse cæperunt.

5. Idem scribunt Eusebius lib. 2. Histor. cap. 14. Arnobius lib. 2. cont. Gentes, & alij. Cur his omnibus contradicis: Cum antea quærebatur, An Petrus Romæ mortuus sit? dicebas: malo assentiri ob plurimorum Patrum consensum, quàm reluctari. Jam verò, cum quæritur, An Petrus Romanos ad fidem primus convertit? contrarium dicis: Malo reluctari in odium Papæ, quàm ob plurimorum Patrum consensum assentiri. Ne tamen temerè videaris reluctari, multa objicis sine ordine, ut lectori fucum facias: quæ breviter perstringam.

6. Primò, objicis illud, Act. 19. 21. *His autem expletis, proposuit Paulus in Spiritu, transita Macedonia & Achaia, ire Hierosolymam, dicens: Quoniam postquam fuero ibi, oportet me & Romam videre.* Ex quo colligis, Paulum fuisse anxium de Romanorum conversione, & ab eo primùm conversos esse. Respondeo. Non fuit anxius de illorum conversione, quia jam erant conversi ad fidem, ut ex ipso Paulo ostensum est; sed de confirmatione, Sic enim de se scribit Rom. 1. 10. *Obsecrans, si quomodo tandem aliquando prosperum iter habeam in voluntate Dei veniendi ad vos. Desidero enim videre vos, ut aliquid impertiar vobis gratia Spiritu-  
lis ad confirmandos vos, id est, simul consolari in vobis*

12, *Paulus testificatus est Romæ de CHRISTO*, non sequitur, fuisse primum, qui id fecerit. Non nego quidem, utroque loco testificatum esse, & multos ad fidem convertisse; sed nego, primum ante alios id fecisse.

9. Tertiò objicis: Scriptura nihil dicit de Petro, quod spectet ad Romanorum conversionem. At de Paulo legimus, Roman. 1. 14. *Gracis ac barbaris, sapientibus & insipientibus debitor sum. Ita (quod in me) promptum est & vobis; qui Romæ estis, Evangelizare.* Respondeo. Sicut Scriptura nihil dicit de Petro, quod spectet ad primam Romanorum conversionem; ita etiam nihil de Paulo. Igitur ex hac parte est par ratio. Rursum, sicut ex scriptura constat, Paulum fuisse Romæ; sic etiam constat, Petrum fuisse Romæ. Nam in 1. Epistola canonica, capit. 5. versic. 13. sic scribit: *Salutat vos Ecclesia, quæ est in Babylone collecta, & Marcus filius meus.* Ubi, nomine Babylonis, intelligit Romam, ut interpretantur Patres, Eusebius lib. 2. Histor. capit. 15. Hieronymus in catal script. Ecclesiast. in Marco, & alij passim. Et tu ipse fateris, lib. 4. cap. 3. nu. 26. & alibi. Est igitur & hic par ratio Petri & Pauli. In eo solum est disparitas, quòd scriptura expressè dicat, Paulum Romæ Evangelizasse; quod de Petro expressè non dicit, Sed quid refert? Ex eo nihil convinci potest contra nos. Non enim sequitur: Scriptura hoc non dicit de Petro: Ergo

Ergo factum non est. Sicut non sequitur : Scriptura non dicit petrum & paulum Romæ martyrium passos esse: Ergo ibi passi non sunt. Nec item: Scriptura non dicit Apostolos symbolum fidei condidisse : Ergo non condiderunt. Notum est illud apud Theologos : *Argumentum ab autoritate negativa non valet.* Denique, huic disparitati oppono aliam majoris momenti, quæ est hujusmodi : Antiqui Patres communi consensu tradunt, petrum Romanos primò ad fidem convertisse; quod de paulo non tradunt. Hanc digere, si potes.

10. Quartò objicis : Ipsemet paulus testatur, Romanos acceperisse ab ipso fidem. Et Evangelium Rom. 16. 25. *Ei autem, qui potens est vos confirmare juxta Evangelium meum, & prædicationem Jesu Christi, &c.* Respondeo. paulus non loquitur de Evangelio suo, quod ipse Romæ viva voce præsens prædicaverat (quia nondum fuerat Romæ, cum hoc scriberet, ut supra ostendi) sed de Evangelio, quod per Epistolam ipsis tradiderat. Est igitur hic sensus: Ei autem, qui potest vos in cæpto confirmare, juxta Evangelium meum, quod in hac Epistola ad vos scripsi, sit honor in sæcula sæculorum. Nam in illa Epistola scripserat, omnes, etiam gentiles & paganos, justificari ex fide Christi: Et quidem gratis, sine ullis ipsorum meritis præcedentibus. Ex qua re poterant confirmari in fide semel suscepta.

11. Sed instas: paulus loquitur de Evangelio,

gelio, quod ipse prædicaverat Romanis, non quidem per se sed per Discipulos suos, antequam ipse personaliter veniret Romam. Et hoc probas ex eodem capit. 16. ubi multos nominatim salutat, ut Priscillam & Aquilam, Andronicum & Juniam. Respondeo. Nec assertio tua vera est, nec probatio valet. Non enim sequitur: Paulus salutatur Priscillam, Aquilam, Andronicum & Juniam, Romæ existens: Ergo per Discipulos suos convertit Romam ad fidem. Prius probanda sunt hæc tria. 1. Illos fuisse Discipulos Pauli. 2. Missos esse à Paulo Romam, ut Romanos converterent. 3. Eos id præstitisse. Nihil istorum probas. Quid si ego contrarium probem? Quod facile est. Nam de Andronico & Junia sic legimus Roman. 16. 7. *Salutate Andronicum & Juniam cognatos & concaptivos meos: qui sunt Nobiles in Apostolis: Qui & ante me fuerunt in CHRISTO.* Certè si fuerunt Christiani, antequam Paulus fieret Christianus, & quidem præcipui inter Apostolos, id est, inter Doctores Evangelii (ut interpretatur Chrysostomus, Theodoretus, Cornelius à Lapide) non est probabile, fuisse Pauli Discipulos.

12. Similiter de Priscilla & Aquila sic legimus: Romanor. 16. 3. *Salutate Priscam & Aquilam adjutores meos in CHRISTO JESU.* Et Actorum 18. 1. *post hac Paulus egressus Athenis, venit Corinthum: Et inveniens*

P

quen-

quendam Judæum, nomine Aquilam, Ponticum genere, qui nuper venerat ab Italia, & Priscillam uxorem ejus (eò quòd præcepisset Claudius decedere omnes Judæos à Roma) accessit ad eos. Et quia ejusdem erat artis, manebat apud eos, & operabatur. Erant autem Scenofactoria artis. Et infra versic. 24. Judæus autem quidam, Apollon nomine, Alexandrinus genere, vir eloquens, devenit Ephesum, potens in scripturis, &c. Hic ergo cœpit fiducialiter agere in Synagoga. Quem cum audissent Priscilla & Aquila, assumpserunt eum. & diligentius exposuerunt ei viam Domini. Ex quibus hæc colligo. 1. Quòd Aquila & Priscilla habitaverint Româ, tempore Claudij Imperatoris. 2. Quod ab eodem Claudio cum aliis Judæis, Romæ expulsi fuerint (Anno Christi 51. ut refert Paulus Orosius). 3. Quòd post expulsionem, venerint Corinthum, & ibi primùm à Paulo visi & cogniti sint. 4. Quòd postea cum Paulo profecti sint Ephesum, & ibi in Christiana fide perfectè instruxerint quendam Judæum, nomine Apollon. 5. Quòd ob hanc instructionem, vocati sint adjutores Pauli in Christo Jesu. 6. Quòd post hæc omnia Romam reversi sint, & ibi habitaverint eo tempore, quo Paulus scripsit Epistolam ad Romanos, id est, Anno Christi, 8. At, quòd fuerint Discipuli Pauli, ex nullo horum constare potest, Tu hoc fingis sine fundamento.

13. Quintò, objicis illud 2. Timoth. 4. 16.

*In mea*



*In mea prima defensione nemo mihi adfuit, sed omnes me dereliquerunt: Non illis imputetur. Dominus autem mihi astitit, & confortavit me, ut per me prædicatio impleatur, & audiant omnes gentes. Et liberatus sum de ore leonis.* Ubi, inquis, per leonem intelligit Neronem, à quo tantisper liberatus, Romanæ Ecclesiæ fundandæ egregiam navavit operam. Et hæc est, inquis, illa prædicatio, *ut audiant omnes gentes.* Quia cum Roma esset Caput omnium gentium, inde facilè fides in omnes gentes erat penetratura. Sic tu interpretaris. Respondeo. Vera interpretatio consistit in his punctis. Primò, Paulus bis fuit Romæ in carcere sub Nerone. Priori vice liberatus est: posteriori, martyrio affectus. Igitur hoc loco agit de defensione sua, quam habuit in priori carcere, quando scilicet secundo anno Neronis, Hierosolymæ captus, ad eundem Romam missus est, ibique per biennium mansit, (Actor. 28 30.) Secundò, in illa defensione desertus est à suis, quia non audebant illi assistere, propter crudelitatem Neronis, quam metuebant. Nihilominus, Deum habuit adiutorem, qui cum corda Regum habeat in sua manu, ita promovit & flexit cor Neronis, ut Paulum è carcere dimiserit. Terriò, hoc ideo factum est à Deo, ut Paulus, qui jam Romæ biennio in carcere prædicaverat Evangelium, etià in Hispania & alibi prædicaret. Quod etiam contigit. Nam liberatus ex carcere, statim profectus est in Hispaniam

niam, & vicinas provincias, ibique per aliquot annos fidem Christi prædicavit. Postea Romam rediens, iterum captus est, & martyrio coronatus.

14. Hæc interpretatio desumitur ex communi Patrum sententia, apud Toletum, Pererium, & Cornelium de Lapide, in cap. 15. Epistolæ ad Romanos, versic. 24. Discrepat autem à tua interpretatione. Tu censes, Paulum post liberationem ex carcere, Romanæ Ecclesiæ fundandæ operam navasse: Et prædicationem Evangelii, de qua loquitur Paulus, Romæ contigisse. Nos dicimus Paulum biennio quidem in carcere prædicasse Evangelium (ut expressè habetur Act. 28. 30.) sed liberatum ex carcere, non mansisse Romæ, sed in Hispaniam ivisse: Ac proinde prædicationem, de qua loquitur Paulus, non Romæ, sed in Hispania factam esse. Et hoc probatur ex ipso Paulo, Roman. 15. 24. *Cum, inquit, in Hispaniam proficisci cepero, spero, quòd præteriens videam vos, & à vobis deducar illuc, si vobis primum ex parte fruius fuero.* Ubi fatetur, se tantum in transitu voluisse Romam videre, & rectà in Hispaniam contendere. Ut significet, Romanos non indigere prædicatione illius, quippe quibus Evangelium jam antea erat annunciatum. Hispanos autem indigere, qui vix audiverant aliquid de Christo. Ita Toletus in illum locum. Et consentiunt Pates ab illo citati.

15. Sextò objicis (num. 13.) illud Romanorum

norum, 15. 20. *Si autem prædicavi Evangelium hoc, non ubi nominatus est Christus, ne super alienum fundamentum adificarem: Sed sicut scriptum est: Quibus non est annunciatum de eo, videbunt: Et qui non audierunt, intelligent.* Ex quo loco conaris Baronium refellere, qui asserit, Petrum posuisse fundamentum Ecclesiæ Romanæ; ac deinde Paulum superædificasse. Tu contrà contendis, Paulum non solere prædicare Evangelium, nisi ubi antè prædicatum non est. Respondeo. Iterum tibi contradicis. Nam antea dixisti, Discipulos Pauli posuisse fundamentum Ecclesiæ Romanæ; ac deinde Paulum perfecisse. Hic dicis Paulum non solere prædicare Evangelium, nisi ubi antea prædicatum non est. Quæ duo inter se pugnant. Deinde, falsò interpretaris mentem Pauli. Non enim universè asserit, nusquam se prædicasse, vel prædicare Evangelium, nisi in iis locis, ubi CHRISTVS nominatus non est: Sed se hætenus prædicasse Evangelium apud multos gentiles, qui nihil audierant de CHRISTO, juxta illud vaticinium Isaïæ: *Quibus non est annunciatum de eo, videbunt; & qui non audierunt, intelligent.* Igitur hæc est propositio Pauli: Ego prædicaui Evangelium in Arabia, Seleucia, Cypro, Pamphilia, Lycaonia, Phrygia, Galatia, Achaia, & aliis gentilium provinciis, ubi nihil antea auditum erat de Christo. Quæ verissima est, ut patet Act. 13. & seqq. Tu fin-

gis hanc esse : Paulus nunquam prædicavit Evangelium in aliquo loco, nisi ubi antea prædicatum non est. Quæ est falsa. Nam prædicavit Hierosolymis, ubi antea prædicatum erat à Petro. Quod etiam de Roma dicendum est.

16. Septimò objicis (n.14.) Paulus arguit imperfectionem fidei à Romanis susceptæ, Rom.1.11. *Desidero videre vos, ut aliquid impertiar vobis gratiæ spiritualis ad confirmandos vos.* Quod non fecisset, si à Petro fuissent edocti. Respondeo. Hoc argumentum sic retorqueo : Quod non fecisset, si à Discipulis Pauli fuissent edocti, ut tu asseris. Quid respondes, Antoni? Deinde falsum est, quod assumis. Non arguit, sed laudat illorum fidem. *Primum*, inquit, *gratias ago Deo meo per Jesum Christum pro omnibus vobis, quia fides vestra annuntiatur in uniuerso mundo.* Certè, non ageret Deo gratias propter eorum fidem, si esset imperfecta & reprehensione digna. Nec diceret Hieronymus libr.3. contra Ruffinum, cap.4. *Ad Romanos Apostolico ore laudatos perfidia non habet accessum.* Ubi, & cujus ore laudatos? Pauli, cum dixit: *Fides vestra annuntiatur in universo mundo.* Nec obstat illud, quod tu imperitè adducis : *Ut aliquid impertiar vobis gratiæ spiritualis ad confirmandos vos.* Nam ibi nullum est verbum, quod arguat imperfectionem fidei. Imò contrarium colligitur ex ipso textu, qui sic habet: *Ad confirmandos vos, id est, simul consolari in vobis per eam, quæ*  
invi-

*in vicem est, fidem vestram atq; meam.* At quæ esset consolatio ex parte Pauli, si videret Romanos habere fidem imperfectam?

17. Octavò objicis (n. 15.) Paulus in Epistola ad Roman. non salutat Petrum, cùm tamen multos alios inferioris ordinis salutat: Ergo signum est, Petrum non fuisse tunc Romæ, alioqui & illum salutasset. Respondeo. Hoc argumētum sumpisti ex Illyrico Lutherano. Et duplex in eo vitium est: Unum, quia non sequitur: Paulus scribens ad Romanos, non salutat Petrum: Ergo Petrus non erat tūc Romæ. Sicut non sequitur: Paulus scribens ad Ephesios, non salutat Joannem: Ergo Joannes nō fuit Ephesi. Item, scribens ad Hebræos, non salutat Jacobum: Ergo Jacobus non erat Hierosolymis. Quasi necesse sit, omnes notos salutare, qui alicubi sunt. Alterum, quia multo minus sequitur: Petrus tunc non erat Romæ: Ergo antea non prædicaverat ibi Evangelium. Potest enim fieri, ut antea fuerit Romæ, & postea circa illud tempus, quo Paulus scripsit Epistolam, non fuerit. Habemus exemplum in ipso Paulo. Fuit Romæ per biennium in vinculis. Deinde profectus est in Hispaniam. Postea iterum rediit Romam. Quare similiter non potuisset Petrus, quando Romæ prædicaverat Evangelium, & Ecclesiam ibi fundaverat, parum secedere, ac deinde ad Ecclesiam, à se fundatam redire: Et ita factum esse, tradunt magni Autores. Vide Bellar. lib. 2. de Pontif. c. 7.

18. Nonò objicis (num. 15.) Romani dixerunt Paulo Romam venienti Actor. 28. 21. *Nos neque literas accepimus de te à Judæa, neque adveniens aliquis fratrum nuntiavit aut locutus est quid de te malum. Rogamus autem à te audire, qua sentis. Nam de secta hac notum est nobis, quia ubique ei contradicitur.* Ex quo loco sic ratiocinaris: Si Petrum habuissent præsentem, & eius prædicationes audivissent, non essent adeò novi & rudes, neque opus haberent, ut Paulus aliquam eis pleniorē novæ illius sectæ notitiā traderet. Respondeo. Hoc argumentum æquè tibi, ac nobis, solvendum est. Nam sicut nos dicimus, Petrum, antequam Paulus Romam veniret, prædicasse Romanis Evangelium: Sic tu dicis, Discipulos Pauli id fecisse, non Petrum. Si ergo valet hæc consequentia: Romani cupiebant à Paulo audire pleniorē notitiā fidei Christianæ: Ergo non habebant Petrum præsentem, nec Petrus ipsis prædicaverat: Valebit etiam hæc: Ergo non habebant Discipulos Pauli præsentēs, nec Discipuli Pauli ipsis prædicaverant. Aut si hæc non valet, cur ista valeat? Hic responde, quod vis. Nam quicquid dixeris pro te, dixeris etiam pro nobis: Et vicissim, quicquid contra nos, etiam contra te.

19. Addo, Romæ tum temporis fuisse non solum gentiles, sed etiam Judæos: Utrosq; à Petro quidem audivisse Evangelium, sed non omnes fuisse conversos; Multos adhuc mansisse, vel in sua gentilitate, vel in Judaismo:

mul-

multos dubitasse; multos ex curiositate voluisse audire, quid Paulus de Evangelio sentiret. Sicut etiam cōtigit Christo in Judæa prædicanti. Nam aliqui ex Judæis credebant illi; alii non credebant; alii dubitabant. Idem factum est Iconii, cū ibi Paulus & Barnabas prædicarent Evangelium, A&t. 14. 1. *Factum est autem Iconij, ut simul introirent in Synagogam Judæorum, & loquerentur, ita ut crederet Judæorum & Græcorum copiosa multitudo. Qui verò increduli fuerunt Judæi, suscitaverunt, &c.* Et infra: *Divisa est autem multitudo Civitatis: & quidam quidem erant cum Judæis, quidam verò cum Apostolis.* Similia contigerunt Thessalonicæ, Berræ, Athenis, Corinthi, Ephesi, & alibi, A&t. 17. & seqq. Cur non similiter potuit fieri Romæ? sicut revera factum est.

20. Decimò objicis (n. 16. & seqq.) Petrus non poterat venire Romam ante Paulum. Hoc probas ex Chronologia, quam proponis. Respondeo, Illa Chronologia à te conficta est: Et in multis discrepat à Chronologia aliorum autorum tam veterum, quàm recentiorum. Cur tibi potius credam, quàm illis? Illi dicunt: Petrum venisse Romam circa Annum secundum Claudii Imperatoris, ut Irenæus, Tertullianus, Cyprianus, Arnobius, Lactantius, Optatus, Hieronymus, Ambrosius, Augustinus, & alii quam plurimi apud Baronium Tomo I. Annalium, Anno Christi 44. At constat, Paulum venisse Romam anno tertio Neronis, ut tu ipse fateris. Igitur necesse

P s est,

est, Petrum, ut minimum, tredecim annis prius venisse, quàm Paulum. Si tu aliter sentis, per me licet. Nunquam tamen efficies, ut relicto Christiani orbis consensu, tibi assentiar, homini novo & inconstanti, qui non veritatis studio, sed ambitionis æstu ad scribendum, ut sæpè dixi, impulsus es.

21. Undecimò objicis (n. 10.) multi Patres conversionem Romanorum æquè Petro & Paulo tribuunt, ut Irenæus, Cajus, Dionysius Corinthiorum Episcopus, Lucius Papa, Tertullianus, Cyrillus Hierosolymitanus, Chrysostomus, Gregorius, Bernardus, Innocentius. Respondeo. Duo tibi probanda sunt. Primò, Paulum fuisse Primum, qui Romanos ad fidem cōvertit. Quod nunquam probabis. Nec ullus illorum Patrum id asserit. Secundò, Paulum vel magis, vel non minus, quàm Petrum fundasse Ecclesiam Romanam. Neque hoc asserunt citati Patres. Quid ergo? Aliqui dicunt, Petrum & Paulum id fecisse per prædicationem Evangelij: non tamen addunt, quod tu addis, Paulum vel magis, vel non minus, quàm Petrum, id fecisse. Ita Irenæus lib. 3. contra hæreses. cap. 1. his verbis: *Matthæus in Hebrais, ipsorum lingua scripturam edidit Evangelij, cum Petrus & Paulus Roma Evangelizarent, & fundarent Ecclesiam.* Quod non est contra nos. Fatemur utrumque fuisse Romæ, & ibi Evangelium prædicasse; sed prius Petrum, quàm Paulum, id fecisse. Alij dicunt, Petrum & Paulum reliquisse Romanis Evan-



**E**vangelium suo sanguine signatum, ut Tertullianus lib. 4. contra Marcionem. ca. 5. *Quibus, inquit, (Romanis) Evangelium Petrus & Paulus sanguine quoque suo signatum reliquerunt. Neque hoc negamus. Alij denique, Petrum prædicasse Romæ Evangelium, antequam Paulus eo veniret, ut Chrysostomus Homil. 2. in Epist. ad Roman. post initium, cum ait: Atqui Petrus prædicaverat Roma. Verum, quæ ille gesserat, Paulus pro suis reputat. Hoc contra te est.*

## CAPUT SECUNDUM.

*An Petrus fuerit Episcopus Romana Ecclesiæ.*

- I. **O**stensum est ex communi Patrum sententia, Petrum circa annum secundum Claudij venisse Romam, & ibi sua prædicatione multos convertisse ad fidem; atque ita Romanam Ecclesiam fundasse. Nunc quæstio est; *An etiam fuerit Episcopus illius Ecclesiæ? vel, An sederit in cathedra Romana Ecclesiæ à se fundata?* Tu nihil peculiare illi tribuis in hac re, præ Paulo. Nam cap. 1. n. 8. asseris hæc tria. Primò, Petrum non aliquo peculiari titulo fuisse Episcopum Romanæ Ecclesiæ, sed solum ratione sui Apostolatus. Secundò, eodem sensu
- Pau-

Paulum fuisse ibidem Episcopum. Tertiò utrumque tam diu fuisse ibi Episcopum, quam diu quisque actu exercuit ibi officium Apostoli, id est, officium prædicandi Evangelium. Nihil igitur in hoc negotio plus habere Petrum, quàm Paulum.

2. At Patres longè aliter sentiunt. Eusebius in Chronico, Anno 44. sic scribit: *Petrus natione Galilaus, Christianorum Pontifex Primus, cum primum Antiochenam Ecclesiam fundasset, Romam proficiscitur, ubi Evangelium prædicans, viginti quinque annis ejusdem urbis Episcopus perseverat.*

Hieronymus in Catal. script. Ecclesiast. *Petrus Roma viginti quinque annis cathedram sacerdotalem tenuit. Et in Epist. ad Damasum: cum successore Piscatoris, & Discipulo crucis loquor: Ego beatitudini tua, id est, Cathedra Petri, communionem consocior.*

Severus Sulpitius lib. 2. Histor: *Namque eo tempore, divina apud urbem religio invaluerat, Petro ibidem Episcopatum gerente: & Paulo, postquam ab injusto præsidis judicio Casarem appellaverat, Romam deducto.*

Cyprianus lib. 4. Epist. 2. ad Antonianum: *Factus est Cornelius Episcopus, cum Fabiani locus, id est, cum locus Petri, & gradus Cathedra sacerdotalis vacaret.*

Optatus Milevitanus lib. 2. contra Parmenianum: *Negare non potes scire te in urbe Roma, Petro primo Cathedram Episcopalem esse collocatam, in qua sederit omnium Apostolorum Caput, Petrus.*

Augu-

Augustinus lib. 2. contra literas Petiliani cap. 51 *Cathedra tibi quid fecit Ecclesia Romana, in qua Petrus sedit, in qua nunc Anastasius sedet? Et in Psalmo contra partem Donati: Numera- te Sacerdotes, vel ab ipsa Petri sede: Ipsa est petra, quam non vincunt superba inferorum porte.*

Gregorius in Psalm. 5. pœnitentialem: *In- tantum autem sua temeritatem extendit vesania, ut Caput omniam Ecclesiarum Romanam Ecclesiã sibi vendicet, & in domina gentium terra jus pote- statis usurpet. Quod omnino ille fieri prohibuit, qui hanc beato Petro Apostolo specialiter commisit.*

3. Ex his testimoniis (ut multa alia omit- tam) notanda sunt hæc: 1. Petrus primus Pon- tifex Christianorum. 2. Petrus viginti quinque annis Romanæ urbis Episcopus fuit. 3. Petrus Romæ viginti quinque annis Cathedram sa- cerdotalem tenuit. 4. Petrus Romæ Episcopa- tum gessit. 5. Petro cathedra Episcopalis pri- mo Romæ omnium collocata est. 6. Petrus se- dit in cathedra Romanæ Ecclesiæ. 7. Romana Ecclesia est Petri sedes. 8. Romana Ecclesia Petro specialiter commissa est. Nihil horum dicitur de Paulo. Et tu tamen, Marce Antoni, contra communem horum Patrum consen- sum, audes asserere, Paulum æquè fuisse Ro- mæ Episcopum, ac Petrum? Imò prius Ro- mam venisse, quàm Petrum? Prius Ecclesiam ibi fundasse, prius Episcopum Ecclesiæ fuisse?

4. Multa objicis (n. 11. & 12.) Primò, Linus & Clemens, qui primi successerunt Apostolis in Ecclesia Romana, fuerunt discipuli Pauli

Ergo

Ergo signum est, magis Paulum, quàm Petrũ, fuisse Romæ Episcopum. Respondeo. Unde probas fuisse Pauli Discipulos? Sed fuerint: An idéo sequitur, Paulum magis, quàm Petrum, fuisse Romanæ Ecclesiæ Episcopum? miror te sic desipere. Omnes, qui scribunt catalogum Romanorum Pontificum seu Episcoporum, incipiunt à Petro, & pergunt ad Linum, Clementem, & alios deinceps. Tu fingis novum catalogum, in quo oporteat incipere à Paulo, & progredi ad Linum, Clementem, & alios successores. Parùm prudenter.

5. Secundò objicis: Multi Pontifices Romani testantur se accepisse auctoritatem à Principibus Apostolorum, Petro & Paulo: Et se multa agere ex eorum auctoritate: Ergo non minus Paulus, quàm Petrus, fuit Romæ Episcopus. Respondeo. Pontifices dicunt se multa facere ex auctoritate Petri & Pauli, quia Petrus & Paulus sua prædicatione & sanguine fundarunt Ecclesiam Romanam. In ea tamen fundanda, Petrus Paulum antecessit, ut probatum est. Nam Romani primò conversi sunt à Petro, ac deinde à Paulo in fide confirmati. Et uterque quidem fuit Apostolus Romanorum; Sed Petrus peculiariratione Episcopus, cui alij Episcopi successerunt. Hoc patet ex Patribus, am citatis.

6. Tertiò objicis: Pontifices dicuntur Vicarij Petri & Pauli, ut patet ex quadam Synòdo sub Joanne 8. Ubi Episcopi illius Synodi ita lo-

ta loquuntur ad Carolum Imperatorem: *Jam quia divina pietas vos beatorum Principum Apostolorum, Petri & Pauli interventione, per Vicarium ipsorum, Dominum videlicet Joannem, summum Pontificem & universalem Papam, specialemque Patrem nostrum, &c.* Respondeo. Vel admittis illam Synodum, vel respuis. Si admittis, necesse est te admittere, Pontificem esse universalem Papam. Si respuis, nihil ex ea, tuo judicio, potes convincere.

7. Quartò objicis: Romæ in plumbeo sigillo, Paulus Petro ad dextram collocatur. Respondeo. Hæc objectio pridem soluta est à Cardinale Bellarmino. Si solutio bona est, cur non acquiescis? Si mala, cur non refellis? Summa solutionis est hæc. Aliquando Petrus ponitur ad dextram, aliquando Paulus: Quia sicut Petrus excellit potestate in Ecclesia; ita Paulus sapientia & labore. Plus enim laboravit, quàm reliqui: plures gentiles ad fidem convertit: plures provincias peragravit. Sicut ergo Ecclesia plus honorat Petrum, ratione potestatis; ita plus Paulum ratione sapientiæ & laboris. Nec id novum. Plus etiam honorat D. Thomam, Franciscum, Dominicum, Benedictum, quàm multos Pontifices & Episcopos; quia licet hi potestate excelluerint, illi tamen plus boni Ecclesiæ præstiterunt.

8. Quintò objicis: Nunquàm fit officium de Petro, quin fiat commemoratio de Paulo; & vice versa: Ergo pares sunt. Respondeo. Mirus homo es. In præcedente obje-

objectione contendebas, Paulum præferendum esse Petro: Nunc vis pares esse. Audi. Pares sunt in Apostolatu: impares in alijs. Nam Petrus, ut dixi, potestate excellit: Paulus labore & sapientia, Ecclesia utrumque magni facit; & utrique tribuit, quod ipsis debetur.

## CAPUT TERTIUM.

*An Pontifex sit Successor  
Petri?*

1. **D**E hac re disputas lib. 4. cap. 6. Et asseris Pontificem non esse propriè peculiarem Petri successorem. At Patres contrarium asserunt, quibus potius, quàm tibi credendum est. Sic enim scribit Optatus Milevitanus, lib. 2. contra Parmenianum: *Petro successit Linus, Lino Clemens, Clementi Anacletus, &c.* Augustinus Epist. 165. ad Generosum: *Si ordo Episcoporum sibi succedentium considerandus est, quanto certius, & verè salubriter ab ipso Petro numeramus, cui totius Ecclesiæ figuram gerenti, Dominus ait: Super hanc petram edificabo Ecclesiam meam. Petro enim successit Linus, Lino Clemens, Clementi Anacletus, Anacleto Evaristus, &c.* Et Philippus Presbyter in Concilio Ephesino, Tom. 2. cap. 16. *Nulli dubium, imò seculis omnibus notum est, Sanctissimum Petrum Apostolorum Principem & Caput, Ecclesiæ Catholica fundamentum, per successores suos hucusque semper vivere, causas-*

*causasque decernere, semperque victurum esse. Huius itaque ordinarius successor Papa Caelestinus nos ad hanc Synodum misit.* Omitto reliquos omnes, qui vel Chronica, vel martyrologia, vel vitas Pontificum conscripserunt. Omnes incipiunt à Petro : Et Pontifices faciunt Petri Successores.

2. Et ratio evidens sumitur ex principiis jam positis. Primum est, Christum in hac vita fuisse visibile Caput Ecclesiae in externa gubernatione, sicut vir est Caput mulieris. Alterum, hanc gubernandi formam non esse mutatam post Ascensionem Christi ; ac proinde etiam nunc opus esse visibili Capite Ecclesiae in externa gubernatione. Tertium hoc Caput, non aliud fuisse post Christum, quam Petrum, cui dictum est, *Pasce oves meas.* Cum ergo post mortem Petri non sit facta mutatio in regimine Ecclesiae, necesse est, Petro successisse aliquem, qui eodem modo, quo Petrus Ecclesiam gubernaverit. Nec alius assignari potest, quam Pontifex.

4. Secundò objicis : Nulli Apostolo datur personaliter pro sua singularitate successio : Ergo nec Petro. Respondeo. Antecedens potest dupliciter intelligi. Primò absolute, quòd nullus Apostolorum habuerit particularem successorem in Ecclesia aliqua particulari. Sic falsum est. Nam Jacobo in Ecclesia Hierosolymitana successit Simeon Cleophae filius. (Apud Eusebium lib. 3. Hist. c. 11.) Secundò cum hac limitatione, quòd nullus Aposto-

Q. lorum

lorum habuerit perpetuam successionem in sua Ecclesia. Sic verum est de omnibus Apostolis, excepto Petro. Ille solus in sua Ecclesia Romana habet perpetuam successionem, & in eo impletur promissio Christi: *Ego rogavi pro te Petre, ut non deficiat fides tua.*

5. Tertiò objicis: Omnes Episcopi sunt omnium Apostolorum, etiam Petri in solidū successores, ut fatetur Leo serm. 3. de Assumptione sua ad Pontificat. ubi ait: *Ecclesiasticam potestatem, quam Petrus habuit, ad omnes Ecclesia Principes, id est, Episcopos commesse.* Respondeo. Falsum est, quod assumis, omnes Episcopos in solidum esse Successores Petri. Solus Pontifex in solidum illi succedit: reliqui in partem. Nec Leo tibi, sed nobis patrocinator. Nam loco à te citato, sic habet: *Unus de toto mundo Petrus eligitur, qui & universarum gentium vocationi, & omnibus Apostolis, cunctisque Ecclesia Patribus praeponatur, ut quamvis in populo Dei multi Sacerdotes sint, multique Pastores, omnes tamen propriè regat Petrus, quos principaliter regit & Christus.* Hæc verba omisisti, quia contra te sunt. Non longè pòst, si pergit Leo: *Propter quod dicit beatissimo Petro: Tibi dabo claves. Transiit quidem etiam in alios Apostolos vis potestatis illius, & ad omnes Ecclesia Principes decreti hujus constitutio commavit, sed non frustra tui commendatur, quod omnibus intumetur.* Hæc verba citasti, sed mala fide. Nam Leo non dicit, quod tu dicis, potestatem Ecclesiasticam à Petro in omnes Episcopos in  
*foli-*



*solidum* commeasse : Vel omnes Episcopos in *solidum* esse Successores Petri. Alioqui sibi ipsi contradiceret: Nam in prioris sententia, quam citavi, contrarium assererat. Unus, inquit, *Petrus* eligitur, qui omnibus Apostolis, cunctisque Ecclesie Patribus præponatur. Hæc præpositura seu eminentia, non potuit in *solidum* commeare in omnes Episcopos; quia impossibile est, ut omnes & singuli Episcopi præponantur omnibus aliis Episcopis.

6. Quartò objicis: Nulla Ecclesia, tempore Apostolorum, habuit proprium & specialem Episcopum; sed præcipuæ quæquæ Ecclesie à pluribus simul Episcopis in *solidum* regebantur: Ergo Romanus Episcopus non potest dicere, se alicujus certæ ac specialis Apostoli successorem esse. Respōdeo. Negatur: Antecedens. Nam in Ecclesia Hierosolymitana, proprius & specialis Episcopus fuit Jacobus, ut omnes fatetur. In Ephesina, Timotheus, (teste Eusebio lib 3 c. 4.) In Cretenſi, Titus, (eodem teste, ibidem.) Et quid obsecro dicturus es de septem Ecclesiis Asiæ, de quibus Joannes in Apoc. Certè singulæ habuerunt proprios ac peculiare Episcopos, quorum virtutes & vitia ibi describuntur, cap. 2 & 3.

7. Quintò objicis: Petrus eo modo fuit Episcopus Romanus, quo Antiochenus: Ergò non est ratio, cur magis Romani Episcopi, quàm Antiocheni, dicantur esse Petri Successores. Respōdeo. Verū est, Petrū fuisse & Antiochenū & Romanū Episcopū: Et utrobiq; habuisse

suos successores; sed diverso modo. Nam Antiochiæ habuit Successores in Ecclesia tantū particulari: Romæ, in Ecclesia universali. Ratio est, quia ipse fuit à Christo constitutus Pastor universalis Ecclesiæ, per illud, *Pasce oves meas*, ut suprà dictum est. Hanc curam pastorem universalis Ecclesiæ, non amisit permutationem loci, sed per mortē. At Romæ mortuus est, non Antiochiæ: Ergo Romæ illam amisit, ac proinde Romæ habuit Successorem in pastoralis cura universalis Ecclesiæ.

8. Sextò objicis: Si Romanus Pontifex peculiaris Petri Successor est, sequitur Petrum fuisse specialem Episcopum Romanæ Ecclesiæ, & consequenter non fuisse Episcopum universalem. Respondeo. Posterior consequentia neganda est. Nam Petrus non solum fuit Episcopus Romanæ Ecclesiæ particularis, sed etiam Romanæ Ecclesiæ universalis. Scis quid velim. Ecclesia Romana dupliciter accipitur. Primò, pro illa sola Ecclesia particulari, quæ olim Romæ fuit, & nunc est. Secūdò, pro collectione omnium fidelium, qui toto orbe dispersi, adhærebant olim Romano Pontifici, & nunc etiam adhærent. Et hoc posteriori sensu habet varia nomina, 1. Dicitur Catholica seu universalis, quia toto orbe diffusa. 2. Pontificia, quia Pontifici subjecta. 3. Romana, à nobiliori sui parte. Petrus ergò fuit Episcopus Ecclesiæ Romanæ utroque modo acceptæ.

9. Septimò objicis: Paulus non minus fundavit Ecclesiam Romanam, nec minus fuit Episcopus

piscopus Ecclesię Romanę, quàm Petrus: Ergo non est ratio, cur Pontifex potius dicatur Successor Petri, quàm Pauli. Respondeo. Antecedens falsum est, ut cap. 1. & 2. demonstravi. Nam Petrus fuit primus, qui Romanos ad fidem convertit, & Romę sedem ac cathedram obtinuit, ut constat ex antiqua Patrum traditione, quam negare non potes.

10. Octavò objicis: Adhuc disputatur, an Pontifex, ut Pontifex, debeat eligi à clero tantum Romano, an verò ab universali Ecclesia, vel generali concilio, Ecclesiam universalem repręsentante. Si debet eligi à Clero tantum Romano, jam non eligitur, ut Caput universalis Ecclesię. Si autem debet eligi ab universali Ecclesia, jam non eligitur, ut Episcopus Romanus, & Successor Petri in Romana Ecclesia. Nam universalis Ecclesia potest eligere, quemcunque vult, non alligando illum ad hanc vel illam Ecclesiam particularem. Respondeo. Pontifex eligitur à Cardinalibus. Cardinales autem possunt dupliciter spectari. Primò, quatenus sunt clerici Ecclesię Romanę particularis. Secundò, quatenus sunt Procuratores, & ministri totius Ecclesię. Et hoc modo eligunt Pontificem. An autem possint eligere Pontificem, qui non simul esset Episcopus Romanus, sed vel Parisiensis, vel Viennensis, vel nullius loci Episcopus particularis, alia quęstio est.

\* \*

\*

Q;

CA-

## CAPUT QUARTUM.

*An Pontifex sit Caput seu Pastor universalis Ecclesiae?*

1. **T**U id negas, lib. 4. cap. 7. & seqq. Ne tamen planè videaris omnem illi auctoritatem derogare, asseris hæc duo: Primò, Pontificem Romanum non habere ullum privilegium jure divino, supra alios Episcopos. Secundò, habuisse tamen aliqua privilegia jure Ecclesiastico, quæ nunc in abusum abierunt. Nimirum hæc quinque: 1. curam quandam & superintendentiam generalem super universam Ecclesiam, quæ speciali quadam ratione, præ aliis Episcopis, illi concessa fuerit. 2. Privilegium appellationis in judiciis Ecclesiasticis. Nam omnes Episcopi totius orbis, qui sentiebant se gravari ab Episcopis aut Synodis provincialibus, poterant confugere ad Romanum Pontificem, & ibi suam causam defendere, & innocentiam demonstrare. 3. Privilegium communionis in fide. Nam quando grassabatur aliqua hæresis, & occupabat multas Ecclesias, ut hæresis Arriana; tunc Pontifex erat quasi Dux & Arbiter Catholice communionis: Et cui ipse dabat vel adimebat suam communionem, reliqui etiam dabant vel adimebant. 4. Privilegium definiendi ac decernendi. Nihil enim grave in Ecclesia

clesiæ universali, nisi consulto prius & consentiente Romano Pontifice, poterat tractari, decerni, aut definiri. Non ut definitio robur haberet à Pontifice, sed ut majus robur haberet, quàm alioqui habitura esset. 5. Privilegium per fugij. Nam afflicti Episcopi, & persecutionem ab hæreticis vel tyrannis patientes, confugiebant ad Pontificem, & ab eo juvabantur. Hæc quinque privilegia concedis, & explicas cap. 9. per totum. Nec ullum aliud agnoscis.

2. Ego contrà statuo, & hæc, & plura alia Privilegia Pontifici concessa esse, non tantùm jure Ecclesiastico, sed etiam divino, & ex peculiari Christi institutione. Et quidem, omisso quinto privilegio, quod tu proponis, reliqua proponam hoc ordine. 1. Tota Ecclesia Pontifici gubernanda concessa est. Ex hoc ferè pendent alia, quæ sequuntur. 2. Omnes Episcopi, in judiciis Ecclesiasticis possunt appellare ad Pontificem. 3. Omnes Christiani, in controversiis fidei, debent adhærere Pontifici & Ecclesiæ Romanæ. 4. Nullum decretum potest statui pro tota Ecclesia, nisi consulto & consentiente Pontifice. 5. Pontifex potest leges Ecclesiasticas præscribere, quæ obligent universam Ecclesiam. 6. Potest Episcopos, Reges & Principes, propter grave delictum & contumaciam, excommunicare, aut alia pœna Ecclesiastica punire. De his, ut alia omittam, sigillatim agendum est.

*Tota Ecclesia Pontifici gubernanda  
commissa est.*

3. **H**oc probo tribus modis. 1. Ex jure institutionis. 2. Ex jure successionis. 3. Ex Concilij & Patribus. Primò igitur, ex jure institutionis sic: Forma gubernandi Ecclesiam debet nunc esse talis, qualis ab initio fuit, ex Christi institutione: At ab initio, ex Christi institutione, gubernabatur Ecclesia ab uno visibili Capite, nempe ab ipso Christo: Ergo etiam nunc debet gubernari ab uno visibili Capite, quod non est aliud, quàm Pontifex. Hoc argumentum fusè tractatum est, lib. 2. cap. 3. 4. & 5. Hic obiter ex tua concessione confirmari potest.

4. Ac primò, quod talis nunc debeat esse forma gubernandi Ecclesiam, qualis ab initio fuit ex Christi institutione, concedis lib. 1. c. 1. n. 21. his verbis: *Nam sicut Ecclesia eadem prorsus est, non alia similis: ita gubernatio eadem perseverat, non alia similis.* Item, quòd Ecclesia ab initio gubernata fuerit ab uno visibili Capite, nempe ab ipso Christo, concedis ibidem n. 24. his verbis: *Ego sanè in Christi visibili regimine ordinario hæc tantum observo: Sacramenta visibilia instituere; Ministros vocare & mittere; Evangelizare, Ministros suos errantes corripere & increpare, legem explicare, eamq; à corruptelis vindicare.*

*dicare. Alterius generis officia à Capite Christo, ut visibilis erat, prædeuntia, ego certè non reperio. Igitur ex utraque tua concessione, & major & minor propositio syllogismi nostri vera est. Vera igitur conclusio.*

5. Secundò, ex jure successionis sic: Pontifex succedit Petro cum pari potestate: At Petro totius Ecclesiæ gubernatio fuit commissa: Ergo etiam Pontifici committitur. Minor lib. 2. de Primatu Petri probata est. Majorem probo autoritate Patrum, quos præcedenti capite recensui, & paulò post iterum recensebo. Deinde ratione. Nam si Pontifex non succederet Petro cum pari potestate, jam mutata esset forma gubernandi Ecclesiā, Nam tempore Petri gubernata fuit ab vno visibili Capite: nunc non gubernaretur ab aliquo visibili Capite. Hanc mutationem non admittis. Ergo fateri debes, Pontificem habere Primatum Ecclesiæ, sicut Petrus habuit.

6. Respondes (cap. 6. nu. 8.) Etiam si ex divino jure successionis deberet aliquis Petro succedere in Primatu Ecclesiæ, adhuc tamen negandum esse, Romanum Pontificem fore successorem. Mira pertinacia. Quis ergo foret? An tu, Marce Antoni? An aliquis alius? Designa, si potes. Aut constringam te hoc modo: Aliquis jure divino debet succedere Petro in Primatu, ex suppositione. Negas Pontificem esse, quod omnes antiqui Patres affirmant. Dicis, alium esse debere, quod ha-

Q 5      etenus

tenus nemo dixit. Quis tibi credet? Nec tu ipse tibi.

7. Sed quo jure, inquires, Romanus Pontifex potius succedit, quàm quivis alius Episcopus? Dicam, Antoni. Jure divino, seu ex institutione Christi. Nam quia Christus semel instituit, ut Ecclesia semper gubernetur ab uno visibili Capite, seu pastore, necesse est, ex vi illius institutionis, ut moriente uno pastore, succedat alius in ejus locum, sicut in Veteri Testamento factum est, (Hebr. 7. 23.) Alioqui nisi alter alteri succederet, non servaretur institutio Christi, qua voluit, ut Ecclesia semper haberet unum visibilem Pastorem, cui diceret, quod Petro dixit, *Pasce oves meas*. At unde constat, Pontificem debere esse hunc successorem? Et hoc dicam. Constat ex traditione. Scis, Antoni, quæ sunt juris aut institutionis divinæ, dupliciter nobis innotescere: Vel ex scriptura; vel ex traditione. Sicut ergo ex scriptura constat, Christum fuisse visibile Caput Ecclesiæ; & Petrum constitutum Christi Vicarium, per illud, *Pasce*: ita constat ex traditione, Pontificem esse Petri successorem. Hanc traditionem accepimus ab antiquis Conciliis & Patribus, de quibus iam dicendum est.

8. Tertiò, accedit consensus Patrum & cōciliorum. Ex quibus dupliciter probo Primatum Pontificis, respectu totius Ecclesiæ.

1. Ex titulis, quos illi tribuunt. 2. Ex aliis ipsorum sententiis. Recensebo tres titulos,

& to-



& totidem sententias, ne prolixus sim. Plures videri poterunt apud Bellarminum, Coccium, & alios. Igitur

Primus titulus est : *Caput universalis Ecclesie*. Qui titulus habetur in Epistola Paschagini Episcopi, & aliorum de damnatione Dioscori, tom. 2. concil. in fine concilii Chalcedonensis, ubi leguntur hæc verba : *Unde sanctissimus & beatissimus Papa, Caput universalis Ecclesie Leo, per nos, ut legatos suos, sancta Synodo consentiente, Petri Apostoli præditus dignitate, qui Ecclesie fundamentum & petra fidei, & cælestis regni janitor nuncupatur, Episcopali eum dignitate nudavit*. Ubi tria dicuntur de Pontifice Leone. 1. Quòd sit Caput universalis Ecclesie. 2. Quòd sit præditus dignitate Petri Apostoli. Vel, ut nos loquimur, quòd sit successor Petri cum pari potestate. 3. Quòd Dioscorum Episcopum Alexandrinum privaverit dignitate Episcopali. Ex primo & tertio colligimus, amplitudinem potestatis ipsius. Ex secundo, quòd illam potestatem habeat jure divino, sicut Petrus habuit.

9. Simili titulo usi sunt Patres Concilii Chalcedonensis in Epistol. ad Leonem, quæ extat in eodem concilio in fine, sub hoc titulo : *Relatio Sanctæ Synodi Chalcedonensis ad beatum Papam Leonem de omnibus gestis generaliter*. Ubi inter cætera, sic scribunt : *Si enim, ubi duo aut tres sunt congregati in nomine ejus, ibi se in medio eorum fore perhibuit : Quantam circa Sacerdotes peculiaritatem potuit demonstrare, qui &*  
*patria*

*patriæ & labori suæ confessionis notitiam prætul-  
runt? Quibus tu quidem, sicut membris Caput  
praeras. Ecce, fateatur Episcopi in concilio  
congregati, Leonem Pontificem ipsis præ-  
fuisse, sicut caput præest membris. Erat au-  
tem concilium generale, quod repræsentab-  
bat totam Ecclesiam. Igitur agnoscunt Leo-  
nem fuisse Caput totius Ecclesiæ.*

10. Secundus titulus est: *Papa universalis  
Ecclesiæ. Quo utuntur Athanasius & Episco-  
pi Aegypti in Epistola ad Marcum Papam: (si  
modo Athanasio ascribenda sit illa epistola)  
Domino, inquit, sancto, & Apostolici culminis  
venerando Marco, sanctæ Romanæ & Apostolicæ  
Sedis, atq; universalis Ecclesiæ Papa, Athanasius  
& uniuersi Aegyptiorum Episcopi salutem. Cui  
similis est hic titulus: Pastor & custos ouilis  
Christi. Quo utuntur Ambrosius, Bassianus,  
& cæteri Episcopi in Epistola ad Siricium Pa-  
pam. Quæ est Epistola 81. inter Epistolas Am-  
brosij. Item hic: Custos vineæ Saluatoris. Quo  
utitur concilium Chalcedonense in citata  
relatione ad Leonem Papam, cum ait: Et post  
hac omnia, insuper & contra ipsum, cui vineæ cu-  
stodia à Salvatore commissa est, extendit insa-  
niam, id est, contra tuam quoque Apostolicam san-  
ctitatem. Loquitur de Dioscoro, qui primò  
quidem contra Flavianum & Eusebium Epi-  
scopos; deinde contra Leonem Pontificem se  
opposuit. Est igitur hic sensus: Postquam op-  
ponit se Episcopis, audet etiam se oppone-  
re Pontifici, cui totius Ecclesiæ custodia  
com-*

commissa est. Nam per vineam Salvatoris intelligendam esse Christi Ecclesiam, constat passim ex Evangelio.

11. Tertius titulus est: *Summus Pontifex: Summus Papa: Summus Sacerdos: Princeps Sacerdotum: Summus omnium presulum Pontifex*, Quem illi tribuunt Bernardus in suis Epistolis ad Romanos Pontifices. Hieronymus in præfat. Evangeliorum ad Damasum, Sexta Synodus Act. 18. in Sermon. acclamatorio, Valentinus in Epist. ad Theodosium, quæ habetur tom 1. conciliorum. Et Stephanus Archiepiscopus Carthaginensis in Epist. ad Damasum Papam, quam scripsit nomine trium conciliorum Africæ, in qua sic legimus: *Beatissimo Domino & Apostolico culmine sublimato Damaso Papa, & summo omnium presulum Pontifici.*

12. Addo trium celeberrimorum Patrum sententias, Ambrosij, Hieronymi, Augustini. Ambrosius Epist. 81. ad Siricium Papam: *Recognovimus literis sanctitatis tuæ, boni pastoris excubias, qui fideliter tibi commissam januam serves, & pia sollicitudine Christi ovile custodias, dignus quem oves Domini audiant, & sequantur. Et ideo, quia nosti oviculas Christi, lupos facile deprehendes. & occurreas quasi providus pastor, ne isti morsibus perfidia sue, ferali quæ ululatu Domini-cum ovile dispergant.* Hic non aliter loquitur de Pontifice, quam de Petro. Nam vocat illum bonum pastorem: non tantum respectu ovium, quæ tunc erant in particulari Ecclesia Ro-

fla Romana, sed quæ erant in tota Christi Ecclesia. Hoc enim significant illæ particulæ.

1. Christi ovile. 2. Oves Domini. 3. Oviculæ Christi. 4. Dominicum ovile. Unde constat, Pontificem, ex sententia Ambrosii, eodem jure esse pastorem ovilis Christi, quo Petrus fuit; quia omnia, quæ tribui solent Petro, tribuit etiam Pontifici, tanquam legitimo Petri successori. At Petrus, iure divino fuit pastor ovilis Christi, ut libr. 2. ostensum est; Ergo eodem iure Pontifex est pastor ovilis Christi.

13. Eodem sensu scribit Hieronymus Epistol. 57. ad Damasum Papam: *Quamquam tui me terreat magnitudo, invitat tamen humanitas. A Sacerdote victimam salutis, à pastore praesidium ovium flagito.* Et infra: *Beatitudini tuæ, id est, cathedra Petri communionem confocior.* Ubi tria aperte insinuat. 1. Pontificem esse Successorem Petri, vel sedere in cathedra Petri. 2. Pontificem esse pastorem, sicut Petrus fuit. 3. Se esse ovem illius pastoris. At non erat ovis pertinens ad particulare ovile, quod Romæ erat; sed pertinens ad universale ovile Christi, quod toto orbe erat dispersum. Ergo Pontifex, ex sententia Hieronymi, est pastor omnium Christi ovium, eo jure, quo Petrus fuit, quia sedet in cathedra Petri.

14. Augustinus multa scribit in eandem sententiam. Et quidem in lib. cont. Epist. Manichæi, quam fundamentalem vocant, c. 4. sic

sichabet : *Multa sunt alia, quæ in Catholica Ecclesia gremio me justissimè teneant. Tenet consensus populorum atque gentium : tenet auctoritas miraculis inchoata, spe nutrita, charitate aucta, vetustate firmata : tenet ab ipsa Sede Petri Apostoli, cui pascendas oves suas post Resurrectionem suam Dominus commendavit, usque ad presentem Episcopatum, successio Sacerdotum : tenet postremo ipsum Catholica nomen, quod non sine causa, inter tam multas hæreses, ista Ecclesia sola obtinuit.* Hic non loquitur Augustinus de aliqua Ecclesia particulari, quæ sit Romæ tantum aut Carthagine ; sed de Ecclesia Catholica, quæ tota orbe dispersa est : Ideoque ponit quatuor motiva, totam Ecclesiam concernentia, quæ meritò suadent homini Christiano, ut maneat in Ecclesia Catholica, & non deficiat ad Ecclesiam Donatistarum, aut Manichæorum. Sunt autem hæc motiva : 1. Consensus omnium populorum, qui in Ecclesia CHRISTI sunt. 2. Miracula, quæ in Ecclesia Christi fiunt. 3. Constans ac perpetua successio pastorum Ecclesiæ CHRISTI. 4. Ipsum nomen Catholicæ, id est, universalis. Circa successionem duo notanda sunt. Unum est, quòd Petro commissæ sit pastura totius Ecclesiæ. Alterum, quòd Pontifex succedat Petro in pastura totius Ecclesiæ. Hoc est, quòd hic quærimus.

15. Idem Augustinus epist. 162. ad Glorium, Eleusium, Felicem, & Grammaticum, non

non longe post initium, loquens de Carthagine, sic scribit: *Erat etiam transmarinis vicina regionibus, & fama celeberrima nobilis. Unde non mediocris utique autoritatis habebat Episcopum, qui posset non curare conspirantem multitudinem populorum, cum se videret & Romana Ecclesia, in qua semper Apostolica cathedræ viguit principatus, per communicatorias literas esse conjunctum.* Hic per primatum Apostolicæ cathedræ intelligit primatum totius Ecclesiæ, quem primo quidem habuit Petrus; deinde Petri Successores, id est, Pontifices. Nam si ille Principatus non transisset à Petro in Successores illius, falsum esset, quod asserit Augustinus, principatum illum semper viguisse in Ecclesia Romana. Non enim potuit semper vigere, si in solo Petro, & non etiam in Successoribus Petri viguisset.

16. Et lib. 1. contra duas Epistolas Pelagianorum, ad Bonifacium Papam. cap. 1. *Neque enim dedignaris, qui non alta sapi, quamvis altius præsideas, esse amicus humilium.* Et infra: *Cum vero non desinant heretici fremere ad Dominici gregis caulas, atq. ad diripiendas tanto pretio redemptas aves, aditus undecunque rimari, communisque sit nobis omnibus, qui fungimur Episcopali officio, quamvis ipse in eo præemineas celsiori fastigio, specula pastoralis, facio quod possum pro mei particula muneris.* Hic duo aperte dicit de Pontifice 1. Illum altius præsidere, quam Episcopos. 2. Illum celsiori fastigio præeminere in Episcopatu. 3. Insinuat, hoc esse discrimen

men

men inter Pontificem & Episcopos quòd quilibet Episcopus habeat tantum particulam curæ pastoralis: Pontifici totius Ecclesiæ cura incumbat. *Specula*, inquit, *Pastoralis est communis omnibus Episcopis: sed tu inter Episcopos celsiori fastigio præmines; ego pro mei muneris particula facio, quod possum.*

17. Dices fortè, Pontificem jure tantum Ecclesiastico præminere, non divino. Sed hoc jam refutatum est sæpius. Nam Pontifex eo jure præminet, quo Petrus, cum sit Successor Petri: At Petrus præminet jure divino: Ergo & Pontifex. Vide titulos & testimonia hæcenus citata. Ubi tamen notandum est, præminentiam illam, qua pollet Pontifex præ alijs Episcopis, & divino & Ecclesiastico jure concessam ac stabilitam esse. Divino quidem, quia Christus non soli Petro, sed etiam Petri Successoribus illam concessit. Et hoc sensu intelligenda sunt testimonia conciliorum & Patrum, quæ jam citavimus. Ecclesiastico verò, quia Ecclesia sæpe declaravit. Pontificem habere illam præminentiam, præ alijs Episcopis. Et sic intelligendus est Valentinianus in Epist. ad Theodosium (quæ habetur Tom. I. conciliorum, immediate ante concilium Chalcedonense) cum ait: *Beatissimus Romanæ urbis Episcopus, cui principatum Sacerdotij super omnes antiquitas contulit.* Non vult dicere, quòd antiquitas contulerit illi principatum, quem à Christo non habet; sed quòd agnoverit illius

R

princi-

principatum, & declaraverit pro tali habendum & agnoscendum. Neq; hoc novum est. Nam sæpe fit, ut eadem res, & divini & humani sit juris. Quo pacto libri Macchabæorum, & divina & Ecclesiastica autoritate sunt canonici. Furtum, & divina & humana lege prohibitum est. Obedientia filiorum erga parentes, & divino & humano jure præcipitur. Ad credendam Christi Divinitatem, & divino & humano jure obligamur. Hæc nota sunt.

## SECUNDUM PRIVILEGIUM.

### *Appellatio ad Pontificem.*

18. **S**ecundum privilegium est, quòd omnes Episcopi totius orbis, qui in judiciis Ecclesiasticis sentiunt se gravari ab Episcopis aut Synodis provincialibus, possint confugere ad Romanum Pontificem, tanquam ad judicem superiorem, cui reliqui etiam Episcopi subjecti esse debeant; & à cujus sententia non liceat ulterius provocare. Hoc patet ex Concilio Sardicensi, cap. 4. juxta secundam editionem: *Osius Episcopus dixit: Quòd si aliquis Episcopus judicatus fuerit in aliqua causa, & putat se bonam causam habere, ut iterum judicium renovetur, si vobis placet, sancti Petri Apostoli memoriam honoremus, ut scribatur vel ab his, qui examinauerunt, vel etiam ab aliis Episcopis, qui in pro-*



in propinquo morantur, Romano Episcopo. Et si judicaverit renovandum esse judicium, renovetur, & det judices. Si autem probaverit talem causam, ut ea non refricentur, qua acta sunt: qua decreverit Romanus Episcopus, confirmata erunt. Si ergo omnibus placet, statuatur. Synodus respondit: P L A C E T. Et cap. 5. ejusdem secundæ editionis: Cum aliquis Episcopus depositus fuerit eorum Episcoporum judicio, qui in vicinis commorantur locis, & proclamaverit agendum sibi negotium in urbe Roma; alter Episcopus in eadem cathedra (post appellationem ejus, qui videtur esse depositus) omnino non ordinetur, nisi causa fuerit in judicio Episcopi Romani determinata.

19. Hi duo canones magnam habent auctoritatem in Ecclesia, quia concilium Sardicense, in quo conditi sunt, semper ab Ecclesia fuit receptum. De quo Sulpitius libr. 2. Histor. scribit, ex toto orbe fuisse convocatum. Et Socrates libr. 1. cap. 16. appellat concilium generale. Interfuerunt enim legati Julij Primi Pontificis, & præterea ex toto terrarum orbe plusquam trecenti Episcopi, nominatim ex Italia, Gallia, Hispania, Britannia, Africa, Ægypto, Syria, Thracia, Pannonia, & alijs provinciis, ut refert Athanasius in Apologia secunda, circa initium.

20. De iisdem canonibus sic scribit Gelasius Papa in Epistol. ad Faustum: *Ipsi sunt canones, qui appellationem totius Ecclesia, ad*

R 2. hujus

*hujus sedis examen voluerunt deferri. Ab ipsa vero, nusquam prorsus appellari debere sanxerunt. Et in Epistola ad Episcopos Dardanix: Ad illam de qualibet mundi parte canones appellari voluerunt: Ab illa autem nemo est appellare permissus. Habentur hæ Epistolæ in tom. 2. concil. inter Decreta Gelasij Papæ primi.*

21. Tu quidem, Antoni, non negas hoc privilegium de jure appellationis; sed dicis Ecclesiastico tantum jure, & non divino concessum esse. Erras. Nam antequam Ecclesiastico jure statutum esset in supradicto Concilio Sardicensi, Episcopos posse appellare ad Pontificem; jam usû recepta erat hujusmodi appellatio, ut variis Exemplis demonstrat Cardinalis Bellarminus lib. 2. de Pontif. c. 21. circa finem. Unde etiam Leo Papa Epist. 87. ad Episcopos Provinciæ Viennensis in Gallia, fatetur antiquam esse consuetudinem appellandi ad Pontificem. Sic enim scribit: *Vestra fraternitas recognoscat, Apostolicam sedem, pro sui reverentia, à vestra etiam provincia Sacerdotibus, innumeris relationibus esse consultam; & pro diversarum (quemadmodum vetus consuetudo poscebat) appellatione causarum, aut retractata, aut confirmata fuisse judicia.*

22. Porro hæc consuetudo, quæ postea per canones concilii Sardicensis fuit confirmata, non aliunde, quàm ex Apostolica traditione & auctoritate orta est, ut colligitur ex Theodorero in Epistola ad Renatum Presbyterum, ubi sic ait: *Audarunt me Sacerdotio,*  
*ejiciunt-*

*ejiciuntq; ex civitatibus, nec senectutem reveriti, neque cantuem in religione & pietate nutritam. Quam obrem deprecor te, ut sanctissimo Archiepiscopo (Leoni Papæ) suadeas, ut Apostolica auctoritate utatur. jubeatq; ad vestrum concilium adire. Tenet enim sancta ista sedes gubernacula regendarum cuncti orbis Ecclesiarum. Quare, quæ ab isto vestro tribunali proficiuntur, qualiacunque erunt, judicij vestri integritate, confisiamur. Ubi clarè significat, Pontificem, non solo jure Ecclesiastico, sed auctoritate Apostolica, supremum esse judicem in judiciis Ecclesiasticis: ac proinde ad illum appellari posse. Et rationem addit, quia Pontifex Romanus gubernat omnes Ecclesias totius mundi: Ergo ab omnibus Ecclesiis totius mundi potest ad ipsum fieri appellatio. Eodem sensu scribit in Epistol. ad Leonem Papam: Ego, inquit, suffragium Sedis Apostolicæ expecto, & supplex oro atque obsecro Sanctitatem Vestram, ut ea me, tribunal vestram justum ac rectum appellantem defendat ac protegat, &c. Vestram sententiam expecto. Quod si sententia eorum, qui me condemnaverunt, acquiescere jusseritis, acquiescam.*

## TERTIUM PRIVILEGIUM.

*Qui in fide non vult errare, debet  
adhærere Ecclesie & Pon-  
tifici Romano.*

23. **T**ertium privilegium est, quod omnes Christiani, quando oriuntur dissensiones in fide, debeant adhærere illi parti, quam tenet Romanus Pontifex, & Sedes Apostolica; si non velint errare. Hoc tradunt antiqui Patres. Irenæus libr. 3. contra hæreses cap. 3. rationem reddens, cur potius describat successionem Episcoporum Ecclesiæ Romanæ, quàm aliarum Ecclesiarum particularium, sic scribit: *Ad hanc enim Ecclesiam, propter potentiores principalitatem, necesse est omnem convenire Ecclesiam, hoc est, omnes qui sunt undique fideles: in qua semper ab his, qui sunt undique, conservata est ea, quæ est ab Apostolis traditio.*

24. Et Divus Hieronymus Epistol. 8. ad Demetriadem, cap 9. *Et quia vereor, in dæmone cognovi, in quibusdam adhuc vivere & pullulare venenata blandaria; illud te pio charitatis affectu pramonendam puto, ut Sancti Innocenti, qui Apostolica cathedra Successor est, teneas fidem: nec peregrinam, quantumvis tibi prudens callidaque videaris, doctrinam recipias. Ubi etiam insinuat rationem, cur Pontifici in fide*

fide adhærendum sit; quia nimirum Pontifex Successor Petri Apostoli. At Petro & Successoribus illius dictum est: *Ego rogavi pro te Petre, ut non deficiat fides tua: Et tu aliquando conversus, confirma fratres tuos.*

25. Et Basilius Magnus in Epistola data Sabino Diacono ad Pontificem Romanum: *Revera dignum est illa excellentissima voce, qua te beatum predicavit, quod pietati tue donatum à Domino est, scilicet, ut quod adulterinum est, à legitimo ac puro discernas; ac fidem Patrum sine subtractione ulla pradices.* Alludit ad illud, quod Petro dictum est: *Beatus es Simon Bar-jona, quia caro & sanguis non revelavit tibi, sed Pater meus, qui in cælis est.* Quod etiam Pontifici, Petri Successori, dictum esse interpretatur. Et rectè. Nam sicut ad illam fidei quæstionem: *Vos autem quem me esse dicitis?* Petrus ex peculiari Dei revelatione respondit: *Tu es Christus Filius Dei vivi:* ita ad similes fidei quæstiones, Successor Petri, ex peculiari Dei assistentia, debet respondere.

26. Et Cyrillus Alexandrinus in Epistola ad Celestinum Papam: *Quoniam vero Deus hisce in rebus prudentiam à nobis exigit, longaque Ecclesiarum consuetudo suadet, ut istiusmodi sanctitati tua communicentur, non possum equidem id, quod apertum est, ad pietatem tuam non perscribere.* Et paulò post: *Quamvis hac ita se habeant, non prius tamen Nestorij Communionem confidenter deserere ausi fuimus.*

fuiamus, quàm hac ipsa pietati tuæ indicaremus. Digneris proinde, quid hic sentias, declarare; quo liquido nobis conslet, an communicare cum Nestorio nos oporteat, an verò libere ei denunciare, neminem cum eo communicare, qui ejusmodi erroneam doctrinam fovet ac prædicat. Porro tuæ integritatis mens, ac super hac re sententia, non modo piissimis Deoque devotissimis Macedoniæ Episcopis, sed totius quoque Orientalis Antistitibus perspicuè per literas exponi debet. Hic apparet, totam Ecclesiam Orientalem, tanti fecisse Romanum Pontificem, ut in rebus fidei, nihil, nisi ex ipsius decisione, statuendum esse existimarent.

27. Et Maximinianus Constantinopolitanus Episcopus in Epistolâ ad Orientales: *Omnes fines terra, quæ Dominum sincerè receperunt, & ubiq; terrarum Catholici veram fidem confitentes, in potestatem Romanorum Pontificum, tanquam in Solem respiciunt, & ex ipsa lumen Catholica & Apostolica fidei recipiunt Nec immeritò, quia Petrus legitur primò perfectam fidem esse confessus, Domino revelante, cum dixit: Tu es, Christus filius Dei vivi. Et infra. Hunc enim de cæteris mortalibus ex toto terrarum orbe conditor orbis elegit, cui cathedram Magisterij principaliter possidendam tenere, perpetuo privilegij jure concessit: ut quisquis divinum aliquid, aut profundum nosse desiderat, ad hujus præceptionis oraculum doctrinamq; recurrat. Nota, perpetuo privilegij jure.*

28. Et

28. Et Augustinus lib. i. contra duas Epistolas Pelagianorum ad Bonifacium Pontificem, cap. i. *Hac autem, quæ duabus Epistolis eorum respondeo, ad tuam potissimum dirigere Sanctitatem, non tam discenda, quam examinanda, & ubi forsitan aliquid displicuerit, emendanda con-  
stitui.* Verba clara sunt. Similia habent Theodoretus in Epist. ad Leonem Papam, Scytho-  
menus lib. 6. H. stor. c. 22. & alii passim.

QUARTUM PRIVILEGIUM.

*Nullum Decretum statui potest pro  
tota Ecclesia, nisi Pontifice  
consentiente.*

29. **Q**uartum privilegium est, quòd nihil grave in Ecclesia universalis, nisi cò-  
sulto prius ac consentiente Pontifice, possit tractari, decerni, ac definiri. Hoc quidem cò-  
cedis, Antoni, sed non eo sensu, quo nos. Nam nos dicimus, huiusmodi decreta vel decisio-  
nes, quæ fiunt pro tota Ecclesia, non habere vim ac robur, nisi accedat consensus Pontifi-  
cis. Tu asseris, habere quidem robur sine con-  
sensu Pontificis, sed tamen plus roboris ex consensu illius accedere. Nobiscum sentiunt antiqui Patres.

30. Socrates lib. 2. Historiæ cap. 5. *Nec Ju-  
lius Roma Episcopus in concilio adfuit, neque quen-  
quam, qui ejus locum suppleret, eo misit, cum uti-*

que Ecclesiasticus canon jubeat, non oportere absque Romani Pontificis sententia, Decreta Ecclesiis sancire. Loquitur de concilio Antiocheno, quod contra Athanasium celebratum est; sed sine robore & autoritate, quia defuit consensus Pontificis.

31. Et Sozomenus lib. 3. cap. 7. Athanasius fugiens Alexandria, Romam adventavit. Eodem tempore Paulus etiam Constantinopolitanus Episcopus forte illo accessit, & Marcellus quoque Episcopus Ancyra, & Asclepas Gaza Episcopus: qui cum doctrina Ariana adversaretur, in crimen vocatus est ab Arianis quibusdam, quod altare everterit, & fuerit propterea abdicatus. Cujus locum in Ecclesia Gaza administranda obtinuit Quintinianus, itemque Lucius Episcopus Adrianopolis, ab aliis accusatus, sua quam regebat Ecclesia spoliatus, Roma a-tatem degit. Quorum criminationes cum Episcopus Romanus intellexisset, & omnes fidei concilij Nicæni consentientes reperisset, in communionem recepit. Ac cum propter Sedis dignitatem, cura omnium ad ipsum spectaret, singulis suam Ecclesiâ restituit, scripsitque ad Episcopos Orientis, eosque incusavit, quod inconsulto de hisce viris judicassent, Ecclesiasque perturbassent.

32. Et Theodoretus lib. 2. Histor. cap. 22. Numerus Episcoporum, qui erant Ariminensi congregati, præjudicii vim habere non debet: præsertim cum formula composita sit, neque Episcopo Romano, cujus sententia præ cæteris omnibus expectanda erat, &c.

33 Et Concilium Chalcedonense act. 1.  
statim



statim ab initio, post recensita nomina eorum qui interfuerunt: *Paschasinus vero Reverendissimus Episcopus, & Vicarius Sedis Apostolica, cum in medio, una cum his viris reverendissimis collegis suis stetisset, dixit: Beatissimi atq; Apostolici viri, Papa urbis Roma, quae est Caput omnium Ecclesiarum, praecepta habemus praemanibus, quibus praecipere dignatus est ejus Apostolatus, ut Dioscorus Alexandrinorum Episcopus non sedeat in concilio, sed audiendus intromittatur. Quod nos observare necesse est. Et infra: Quia cum personam judicandi non haberet, presumpsit, & Synodum ausus est facere sine auctoritate Sedis Apostolica, quod nunquam li-  
suit, nunquam factum est.*

34. Et Act. 16. in Relatione S. Synodi ad Leonem Papam, paulo post mediū: *Hac sunt, quae tecum, qui spiritu praesenseras, effecimus. Indicamus vero, quia & alia quadam procerum ipsarū ordinata quiete, & propter Ecclesiasticorum statutorum firmitatem definimus, scientes quia & Vestra Sanctitas eadem probatura & confirmatura est. Et circa finem: Rogamus igitur, & tuis Decretis nostrum honora iudicium & sicut nos Capiti in bonis adjecimus consonantiam, sic & Summitas tua, filiis, quod decet, adimpleat. Hic petunt Patres concilii, ut, quae ipsi communi consensu in concilio generali statuerant, à Pontifice confirmantur, & robur accipiant.*

35. Et Anastasius Hierosolymitanus Patriarcha in Epist. ad Felicem Papam: *Fuit semper Apostolica Sedis vestra licentia, injuste  
damna-*

*damnatos vel excommunicatos, potestatis sue auctoritate restituere, & sua omnia eis reddere. Quod, qui eos condemnarunt aut excommunicarunt. apostolicopunire privilegio: Sicut etiam nostris, & anterioribus novimus factum temporibus, &c. Antiquis regulis sanctum est, ut quidquid, quamvis in remotis provinciis, super eorum querelis aut excusationibus ageretur, non prius tractandum vel accipiendum esset, quam ad notitiam almae sedis vestrae esset deductum, ut hujus auctoritate, juxta quod fuisset faciendum, infirmaretur, aut firmaretur.*

36. Et Augustinus cum aliis Episcopis Concilii Carthaginensis Epist. 90. ad Innocentium Papam: *Hoc itaque gestum, Domine frater sancte, charitati tuae intimandum duximus, ut statuti nostrae mediocritatis, etiam Apostolicae Sedis adhibeatur auctoritas, pro tuenda salute multorum, & quorundam perversitate etiam corrigenda.*

37. Et Ambrosius Epist. 78. ad Theophilum Alexandrinum (ubi agit de componenda discordia, quae erat inter Evagrium & Flavianum.) *Sane, inquit, referendum arbitramur ad Reverendum fratrem nostrum Romanæ Sacerdotem Ecclesia. Et ibidem: Ut nos quoque, cum id gestum esse cognovimus, quod Ecclesia Romana comprobarerit, lati hujusmodi fructum examinis adipiscamur.*

38. Et Prosper in Chronicis: Concilio apud Carthaginem habito ducentorum septendecim Episcoporum, ad Pontificem Sozum synodalia decreta

*creta perlata, quibus probatis, per totum mundum  
hæresis Pelagiana damnata est.*

39. Accedit efficacissima ratio, quæ sumitur ex primo privilegio in hunc modum: Pontifex habet curam & gubernationem totius Ecclesiæ, sicut Rex totius regni, aut Imperator totius imperii, quisque in suo genere: At nemo potest facere efficax Decretum pro toto regno aut imperio, nisi consentiente Rege aut Imperatore: Ergo similiter nemo potest facere efficax Decretum pro tota Ecclesia, nisi consentiente Pontifice. Hæc tamen duo distinguenda sunt. Primò, facere efficax Decretum pro tota Ecclesia. Hoc nemo potest sine expresso consensu Pontificis. Secundò, facere efficax decretum pro hac aut illa Ecclesia particulari. Hoc potest Episcopus hujus aut illius Ecclesiæ particularis, sine expresso consensu Pontificis; modo decretum in se bonum sit, & Pontifex rationabiliter non repugnet.

#### QUINTUM PRIVILEGIUM.

*Pontifex potest sancire leges Ecclesiasticas, quæ obligent universam  
Ecclesiam.*

40. **H**Oc sequitur ex dictis, quia cum sit Caput Ecclesiæ, sicut Rex est Caput regni, & Imperator imperii; non minus potest

potest sancire leges pro tota Ecclesia, quàm Rex pro toto regno, aut Imperator pro toto imperio.

41. Hoc magis explicabo ex tribus generalibus principiis. Unum est, quod Prælati Ecclesiæ habeant potestatem regendi subditos; & quòd subditi jure divino teneantur eis obedire. Patet ex Scripturis, Luc. 10. 16. *Qui vos audit, me audit. Et qui vos spernit, me spernit.* Et Matth. 18. 17. *Si Ecclesiam non audierit, sit tibi sicut ethnicus & publicanus.* Et Actor. 20. 28. *Spiritus sanctus posuit Episcopos regere Ecclesiam Dei.* Et Hebr. 13. 17. *Obedite Præpositis vestris, & subiacete illis.* Et ratio est, quia si subditi non tenerentur obedire, jam non essent subditi.

42. Alterum est, quòd Prælati Ecclesiæ non tantum habeant potestatem regendi subditos, sed etiam coercendi & puniendi, si non obediant, ut passim docet Apostolus 1. Cor. 4. 21. *Quid vultis? in virga veniam ad vos, an in Spiritu mansuetudinis?* Et 2. Cor. 13. 10. *Hæc absens scribo, ut non præsens durius agam, secundum potestatem, quam Dominus mihi dedit.* Et hac potestate frequenter usus est. 1. Quando excommunicavit Corinthium incestuosum. 2. Quando reprehendit Corinthios, quòd iudicio contenderent apud infideles. 3. Quando Hymenæum & Alexandrum, propter hæresin, tradidit Sathanæ. 4. Quando Thessalonicensibus scripsit: *Si quis non obedit verbo nostro, per epistolam hunc notate, & non commisceamini illi.*

43. Ter-

43. Tertium sequitur ex prædictis, quòd Prælati Ecclesiæ habeant etiam potestatem condendi novas leges, obligantes in consciëntia. Ratio est, quia habent potestatem regendi & puniendi subditos, & subditi tenentur illis obedire. Ergo habent potestatem condendi leges, secundum quas possint regere & punire subditos, & in quibus subditi teneantur illis obedire.

44. Fortè dices cum Calvino, id non sequi. Nam satis esse, si possint eos regere & punire secundum leges divinas. Nec requiri, ut regant & puniant eos secundum leges humanas. Respondeo. Potestas Prælatorum latius se extendit, quàm ad ea, quæ sunt juris divini. Primò, quia testimonia scripturæ, quæ allata sunt, non astringuntur ad solum jus divinum. Secundò, quia Apostoli multa præceperunt subditis, quæ non erant juris divini. Nam in Concilio Hierosolymitano prohibuerunt sanguinem, suffocatum & immolata, quæ tunc temporis non erant prohibita jure divino. Jus enim veteris Testamenti erat abrogatum. Nec ullum aliud extabat jus divinum, quo illa prohiberentur. Similiter D. Paulus legem statuit de bigamis ad Episcopatum non admittendis. 1. Timoth. 3. 2. Et alibi (præsertim 1. Corinth. 7. 10.) distinguit sua præcepta à præceptis Christi. Denique legantur canones Apostolorum, concilia generalia, Decreta Pontificum, in quibus

quibus sunt multæ leges Ecclesiasticæ de iis, quæ jure divino in particulari determinata non sunt.

### SEXTUM PRIVILEGIUM.

*Pontifex potest excommunicare Episcopos, Reges & Principes graviter delinquentes, si contumaces sint.*

45. **D**Uplex est excommunicatio, major & minor. Major, de qua hîc agimus, est censura seu pœna Ecclesiastica, qua homo Christianus propter delictum & contumaciã, ejicitur extra Ecclesiam, & privatur communibus Ecclesiæ bonis. Nam sicut is, qui in Republica civili contumax & rebellis est suo Principi, vel magistratui, potest eiici in exilium, & privari privilegiis & commodis illius Reipublicæ, ex qua ejicitur; sic etiam fit in Ecclesia. Sunt autem triplicia bona Ecclesiæ, quibus homo privatur per excommunicationem. 1. Sacramenta. 2. publicæ preces & suffragia. 3. communis convictus & conversatio fidelium inter se. Igitur, qui excommunicatus est, non potest admitti ad Sacramenta; nec est particeps publicarum precum & suffragiorum, quæ fiunt in Ecclesia; nec potest cum aliis Christianis in communi convictu seu societate conversari, juxta illud Apostoli 1. Cor.

5. *Scripti*

§. *Scripti vobis, cum ejusmodi nec cibum sumere. Et v. 13. Auferte malum ex vobis ipsis.*

46. Potestas infligendi hanc pœnam concessa est Apostolis & eorum successoribus, Matth. 18. 15. his verbis: *Si peccaverit in te frater tuus, corripe eum inter te & ipsum solum. Si te audierit, lucratus eris fratri tuo. Si autem te non audierit, adhibe tecum adhuc unum vel duos, ut in ore duorum vel trium testium stet omne verbum. Quod si non audierit eos, dic Ecclesie. Si autem Ecclesiam, id est; Prælatos Ecclesiæ, non audierit, sit tibi, sicut Ethnicus & publicanus, id est, priveretur omnibus Ecclesiæ bonis, quibus ethnici & publicani privati sunt. Est autem cōcessa propter duos potissimum fines. Primò, in commodum & utilitatem delinquentium, ut quando vident se excludi à consortio aliorum, cōfundantur & resipiscant, juxta illud Apostoli 2. Thess. 3. 14 *Ne commisceamini cum illo, ut confundatur.* Secundò, in bonum & cautelā aliorum, ne inficiantur, juxta illud, 1. Cor. 5. 6. *Nescitis, quia modicum fermentum totam massam corrumpit?* Vide D. Augustinum lib. 3. contra Epistolam Parmeniani, ubi prolixè & eleganter de hac re disputat.*

47. Hic obiter notandū est, hæc ferè pro eodem usurpari in scripturis & Patribus. 1. Excommunicare aliquem. 2. ejicere de Ecclesia. 3. auferre de medio. 4. tradere Satanæ. 5. habere pro ethnico & publicano. 6. nec cibum cum illo sumere. 7. nec cum eo commisceri. 8. arcere à cōmunionē fraternitatis. 9. Sacra-

S

mento

mento benedictionis exautorare, 10. communicatione interdicere. 11. à communione orationis & omnis sancti commercij relegare. Et speciatim advertit Augustinus in quæstionibus super Deuteron. q. 39. hanc formulam loquendi, *Auferte malum ex vobis*, aliter accipi in veteri testamento, aliter in novo. In veteri idē esse, quod *interficite*. In novo, idem, quod *excommunicate*. Unde subijcit: *Hoc nūc agit in Ecclesia excommunicatio, quod fuit agebat interfectio.*

48. His positis, quæstio est, an Pontifex possit Regem Christianum, qui id meritus sit, excommunicare, seu communibus Ecclesiæ bonis privare: Nihil certius apud Catholicos. Imò tam certum apud omnes hoc est, quàm certo persuasum habent, Pontificē esse Christi Vicarium in Ecclesia, & omnes Christi oves illi commissas esse: ideoque, quod Petro dictū est, *Pasce oves meas*, etiam Pontifici, tanquam Petri Successori, dictum esse interpretantur. Sicut ergo Pastor potestatem habet, non solum pascendi & gubernandi oves, quæ ipsius curæ commissæ sunt; sed etiam morbidas & infectas, ab alijs separandi, seu ex ovili depellendi, ne noceant cæteris; sic etiam de Pontifice, respectu fidelium, sentiendum est. Cū ergo quilibet Rex Christianus, sit ovis Christi, sanè, si contingat illum delinquere, & contagionem contrahere; poterit per Pastorem separari ab alijs, donec sanetur & resipiscat.

49. Hujus rei varia extant exempla. Tā-

Apo--



Apostolorum, non legamus ullum Regem aut Imperatorem fuisse excommunicatum, quia vix ulli erant tunc Reges aut Imperatores Christiani, qui excommunicari possent (gentiles enim non excommunicantur) tamen deinceps non pauci hac pœna castigati sunt. Primo, Theodosius Imperator ab Ambrosio Episcopo. Secundo, Arcadius Imp. & Eudoxia ab Innocentio I. Tertio, Leo Isauricus Imperator à Gregorio II. Quarto, Desiderius Longobardorum Rex ab Adriano Papa. Quinto, Robertus Francorum Rex ab Episcopis Gallia. Sexto, Henricus III. Imp. à Gregorio VII. in Synodo Romana. Septimo, Petrus Aragonia Rex à Martino Papa. Octavo, Philippus Francorum Rex à Paschali Pontifice. Nono Henricus IV. Imp. à Legatis ejusdem Pontificis. Decimo, Rogericus Sicilia Rex ab Innocentio II. Undecimo, Wilielmus Sicilia Rex ab Adriano IV. Duodecimo, Fridericus Imperator ab Alexandro III. in Concilio Lateranensi. Decimo tertio, Henricus Anglia Rex ab eodem Pontifice. Decimo quarto, Wilielmus Scotorum Rex à Legatis Pontificis. Hæc & similia exempla in historijs passim obvia sunt. Nec adversarij negare id possunt.

*Diluuntur objectiones Marci Antonij contra Primum Pontificis.*

I. **M**ulta objicis contra Primum Romanum Pontificis (lib. 4. cap. 7. & 8.) quæ omnia ferè ex Lutheranis & Calvinistis suffuratus es. Et quidem prima objectio sumitur ex principiis hæcenus à te positis. 2. Ex doctrina Parisiensium Theologorum. 3. Ex eo, quòd in Ecclesia nulla sit jurisdictio. 4. Ex dictis Pelagij & Gregorij Pontificum. 5. Ex concilijs Oecumenicis. 6. Ex Episcopis Asiaticis. 7. Ex Cypriano. 8. Ex Firmiliano. 9. Ex Episcopis Orientalibus. 10. Ex Athanasio. 11. Ex Basilio. 12. Ex Nazianzeno. 13. Ex Hieronymo & Damafo. 14. Ex Socrate, Et sic deinceps.

I. OBJECTIO

*Ex principiis Marci Antonij.*

2. **P**rinicia, quæ ais à te prioribus libris probata esse, sunt hæc tria. 1. Quòd Christus non instituerit Monarchiam Ecclesiasticam. 2. Quòd omnes Episcopi, jure divino, sint inter se pares. 3. Quod solo jure Ecclesiastico introducta sit inter illos aliqua inæqualitas

qualitas & Hierarchia. Ex quibus infero, Pontificem non habere Primatum Ecclesiæ: Vel non esse visibile Caput Ecclesiæ. Sed hæc principia jam refutata sunt. Quibus oppono alia tria. 1. Quod Christus fuerit visibile Caput Ecclesiæ. 2. Quod Petrus fuerit Vicarius Christi in visibili Ecclesiæ regimine. 3. Quod Pontifex sit Successor Petricum pari potestate. Ex quibus infero, Pontificem habere Primatum Ecclesiæ, sicut Petrus habuit. Hæc hæctenus probata sunt.

## II. OBJECTIO

### *Ex doctrina Parisiensium.*

3. PRIMò explicas doctrinam Parisiensium ex Gersonio, Petro Aliacensi, Jacobo Almayno, & Joanne Majore (cap. 7. n. 4. & aliquot seqq.) deinde n. 9. ais, illorum doctrinam de Primatu Pontificis, si bene intelligatur, nihil à tua discrepare: nec item à veritate. Illos enim reipsa negare Primatum, & docere, regimen Ecclesiæ non esse Monarchicum, sed Aristocraticum, quod etiam tu doces.

4. Hic non opus est mea responsione. Ipsi Parisienses in sua censura respondent, quicquid hîc dicis, meram imposturam esse. Itaque negant, tuam doctrinam ab ipsorum doctrina nihil discrepare. Tuam damnant: suam, contra tuâ imposturam, à calumnia vin-

dicant. Nihil addam. Hoc solum moneo, te similem esse Lutheranis, qui cum viderent se pridem à Catholicis turpiter defecisse, nec suæ defectionis prætextum reperirent; finxerunt se nihil discrepare à Patriarcha Constantinopolitano: ut hac ratione persuaderent mundo, doctrinam Lutheranorum eandem esse cum doctrina Ecclesiæ Orientalis. Sed repulsam passi sunt. Patriarcha non agnovit illos pro veris Christianis, sed tanquam impostores abjecit & repudiavit. Idem tibi accidit, Antoni. Defecisti nuper à Catholicis, propter privatos affectus. Quærebas prætextum Apostasiæ. Nec alium invenisti, quàm ut diceres, te sentire cum Academia Parisiensi. Reclamant Parisienses: impostorem te vocant. Quem deinceps Patronum quæsiturus es? Nemo, nisi nesciat impostorem te esse, tibi assistet.

### III. OBJECTIO

*Ex eo, quòd in Ecclesia nulla sit  
jurisdictio.*

5. **H**anc objectionem proponis c. 7. n. 6. circa med. his verbis: *Sciant etiam de jure divino, veram jurisdictionem in Ecclesia nullam esse sed totam charitate regi, regulis voluntariis ac documentis, suasionem, hortatu, increpationibus & obsecrationibus: pœnas verò alias non habere, nisi ad summum, Exclusionem hominis à reli-*  
qua

qua fidelium societate; quæ est pœna duntaxat privata, nō positiva. Quare propter jurisdictiones falsas, & nullas Papatū ponere, est maxima levitatis?

6. Respondeo. Maxime levitatis est, propter odium privatum, à communi omnium sententia decedere: quod tu facis. Nullum hîc patronum habes, nec Parisienses, nec alios Catholicos, nec Anglicanos, ad quos confugisti, nec teipsum. Nam Parisienses in sua censura, de hac tua propositione, quam negas veram in Ecclesia jurisdictionem, sic statuunt: *Hæc propositio est hæretica, & ordinis Hierarchici subversiva.* Reliqui etiam Catholici agnoscunt veram jurisdictionem in Ecclesia, ut patet ex Scholasticis & alijs Theologis, qui de hac re copiosè scripserunt. Eandem agnoscunt Anglicani Theologi, ac nominatim Thomas Lancellottus, & Guilielmus Tookerus in duello contra Becanum, pag. 305. & alibi. Et tu ipse agnoscis, lib. 1. cap. 3. n. 31. his verbis: *Christus immediate concessit Apostolis potestatem ordinis & jurisdictionem plenissimam.* Et lib. 2. cap. 3. n. 30. loquens de iisdem Apostolis & eorum subditis, sic scribis: *Ubi enim nullum crimen aderat in inferioribus, quod à superioribus corrigeretur, superiores suam jurisdictionem, quam in actu primo habebant, in actu secundo non exercebant.* Igitur Prælati Ecclesiæ, ex hac tua concessione, habent jurisdictionem in actu primo, & eam possunt exercere in actu secundo, si necessitas exigat.

7. Accedit duplex ratio, quam negare nō

S 4 potes.

potes. Una est: Ubicunque est potestas condendi leges, quibus subditi obligantur, ibi est jurisdictio: At in Ecclesia est potestas condendi leges Ecclesiasticas, quibus Christiani obligantur: Ergo in Ecclesia est jurisdictio. Major nota est, quia duplex solet distingui potestas: Una ordinis: altera jurisdictionis. At potestas condendi leges, non est potestas ordinis sed jurisdictionis. Minor probatur dupliciter. Primò, ex supradictis in quinto privilegio, ubi ostendi Prælatos Ecclesiæ habere potestatem condendi leges Ecclesiasticas, sicut Princeps secularis habet potestatem condendi leges politicas. Deinde ex tua concessione. Nā l. 2. c. 10. fateris cælibatum Clericorum, jure Ecclesiastico, vel lege Ecclesiastica, vel decreto Ecclesiastico, introductum esse. His enim vocabulis ibi uteris.

8. Altera est: Ubicunque est potestas puniendi subditos delinquentes, ibi est jurisdictio: At in Ecclesia est potestas puniendi subditos delinquentes: Ergo in Ecclesia est jurisdictio. Major nota est. Minor probatur dupliciter. Primo, ex Apostolo 1. Cor. 4. 21. *Quid vultis in virga veniam ad vos, an in Spiritu mansuetudinis?* Et 2. Cor. 13. 10. *Hec absens scribo, ut non presens durius agam secundum potestatem, quam Dominus mihi dedit.* Quæ est illa potestas: Non ordinis, sed jurisdictionis. Deinde ex tua concessione, quia fateris, in Ecclesia esse potestatem excommunicandi, seu, ut tuis verbis utar, potestatem *excludendi homines à reliqua fidelium societate.*

9. Quòd

9. Quòd autem ais , excommunicationem esse pœnam tantùm privativam , non positivam; nihil obstat jurisdictioni positivæ. Imò talis pœna, etiam si privativa sit , non potest legitimè infligi, nisi ab eo, qui habet positivam potestatem puniendi : Quæ positiva potestas est vera jurisdictio. Disce hoc, exemplo Regis. Nam si Rex non haberet positivam jurisdictionem in subditos, non posset delinquentes ejicere in exilium, neque privare communi civium societate , aut fama, aut Capite, aut bonis temporalibus. Nec valet hæc consequentia : Privare hominem civili societate est pœna privativa : Ergo non requirit positivam jurisdictionem.

10. Denique falsum est, quod addis, Ecclesiam non habere alias pœnas , quàm increpationem & excommunicationem. Habet jejunia, orationes, eleemosinas, castigationes corporales , quas per modum pœnæ aut satisfactionis , potest pœnitentibus imponere ut semper usurpatum est. Habet interdicta, irregularitates, & alias censure Ecclesiasticas, quibus subditi coercentur. Et quid respondebis Petro & Paulo Apostolis, quorum alter Ananiam & Saphiram corporali morte punivit: alter incestuosum Satana tradidit in interitum carnis? An illis obiecturus es, in Ecclesia non esse alias pœnas, nisi increpationem & excommunicationem ;  
ideoq; malè eos fecisse, quòd alias  
usurpaverint?

## IV. OBJECTIO

*Ex dictis Pelagij & Gregorij  
Pontificum.*

II. **A**Is (cap. 7. nu. 10. & seqq.) hos duos Pōtifices acerrimè oppugnasse Primatum in Ecclesia, eo quòd oppugnaverint titulum: *Oecumenici seu universalis Patriarcha*, quo utebatur Joannes Constantinopolitanus Episcopus. Hæc enim duo, secundum te, idem valent. 1. esse universalem seu Oecumenicum Patriarcham. 2. esse Caput Ecclesiæ universalis, vel habere Primatum Ecclesiæ universalis. Ergo qui oppugnat prius, oppugnat etiam posterius.

12. Verba Pelagij sunt hæc: *Nullus Patriarcharum hoc tam prophano vocabulo unquam utatur; quia si unus Patriarcha universalis dicitur, Patriarcharum nomen ceteris derogatur.* Quæ verba sumpta sunt ex epistola Pelagij Papæ ad illegitimam Synodū Constantinopolitanam (tom. 2. concilior in Decret. Pelagij) & referuntur apud Gratianum dist. 29. cap. Nullus.

13. Verba Gregorij lib. 4. epist. 32. ad Mauritiū sunt hæc: *Quis est iste, qui contra statuta Evangelica, contra canonum Decreta, novum sibi usurpare nomen præsumit? Et infra: Sed absit à cordibus Christianorum nomen istud blasphemiae, in quo omnium Sacerdotum honor adimitur, dum ab uno sibi dementèr arrogatur.* Et libr. 6. epistol. 30.



fol. 30. *Ego fidenter arceo, quia quisquis se universalem Sacerdotem vocat, vel Vocari desiderat, in elatione sua Antichristum præcurrit, quia superbiendo se ceteris præponit. Alibi habet similia.*

14. Respondeo. Pugnas contra te ipsum. Nam lib. 3. cap. 8. num. 14. sic habes: *Docuimus, unumquemque Episcopum jure divino esse universalem.* Vel verè, vel falsò id docuisti. Si verè, necesse est Pelagium & Gregorium, quos pro te adducis, falsum docuisse. Nam illi docent, nullum debere vocari Episcopum aut Sacerdotem universalem. Si falsò, revoca errorem. Deinde non intelligis citatos Patres. Reprehendunt illi Joannem Constantinopolitanum Episcopum, quod titulum universalis Patriarchæ vel Sacerdotis, fastuosè sibi arrogaverit. Ut autem constet, quo sensu id fecerit, notandum est, hæc duo distingui, quæ tu confundis. 1. Dici universalem Episcopum in Ecclesia. 2. Dici Episcopum universalis Ecclesiæ. Prior titulus reprehenditur in Joanne; posterior Romano Pontifici conceditur. Et citati Patres priorem asserunt esse prophanum, blasphemum, Antichristianum: posteriorem, non item.

15. Est autem hoc discrimen inter utrumque titulum. Qui dicit se esse universalem Episcopum vel Sacerdotem, insinuat se solum esse Episcopum, & aliis omnibus derogat nomen & honorem Episcopalem. Et hoc fecisse Joannem, testatur Gregorius, partim locis citatis, partim lib. 4. epistol. 34. cum ait: *Triste*

*valde*

valde est, ut patienter feratur, quatenus despectis omnibus, prædictus frater & Coepiscopus meus, solus conetur appellari Episcopus. Et Epist. 36. ad Eulogium. Si unus Patriarcha universalis dicitur, Patriarcharum nomen ceteris derogatur. Et lib. 7. epist. 69. ad Eusebium: Nam si unus, ut putat, universalis est, restat ut vos Episcopi non sitis.

16. Qui autem dicit, se esse Episcopum, vel Pastorem universalis Ecclesiæ, non significat se esse solum Episcopum vel Pastorem; sed se habere generalem curam, & gubernationem totius Ecclesiæ, licet alij Episcopi habeant specialem curam, & gubernationem Ecclesiarum particularium. Et hoc sensu Pontifex solet vocari Episcopus & Pastor universalis Ecclesiæ. Quod etiam fatetur Gregorius. Nam lib. 6. Epist. 32. ait: Petro omnium Apostolorum Principi, totius Ecclesiæ cura commissæ est. Item, Cura ei totius Ecclesiæ & Principatus committitur, & tamen universalis Apostolus non vocatur. Idem sentiunt alij Pontifices, qui Gregorium præcesserunt, ut Sixtus I. epist. 2. Victor I. epist. 1. Pontianus epist. 1. & alii. Qui se vocarunt Episcopos universalis Ecclesiæ. Verba eorum sunt hæc: Sixtus universalis Apostolica Ecclesiæ Episcopus, omnibus Episcopis in Domino salutem. Item, Victor Romana & Universalis Ecclesiæ Archiepiscopus. Item, Pontianus sanctæ & universalis Ecclesiæ Episcopus. Et sic alij deinceps.

17. Vides Marce Antoni, Pelagium & Gre-

Gregorium frustra à te adductos esse, contra nos. At meritò cōtra te adduci possunt. Nam Gregorius, ut jam dixi, agnoscit, Petro totius Ecclesiæ curam & Principatum commissum esse, quod tu negas. Similiter Pelagius loco citato sic habet: *Relatum est ad Apostolicam Sedem, Joannem Constantinopolitanum Episcopum, universalem se scribere, vosq; ex hac sua presumptione ad Synodum convocare generalem, cum generalem Synodum convocandi autoritas Apostolica Sedi beati Petri singulari privilegio sit tradita; & nulla unquam Synodus rata legatur, quæ Apostolica autoritate non fuerit fulta.* Et infrà: *Sciat Joannes, nisi errorem suum citò correxerit, à nobis excommunicandum fore.* Quibus verbis fatetur hæc tria. 1. Autoritatem convocandi generalem Synodum, singulari privilegio, traditam esse Apostolicæ Sedi. 2. Nullā Synodum ratam esse, quæ Apostolicā autoritate non sit firmata. 3. Pontificem posse excommunicare Episcopos Orientales. Quæ omnia contra te sunt. Nec debes excipere, suspectos esse Pelagium & Gregorium in hac causa. 1. quia tu uteris ipsorum autoritate. 2. quia vocas eos Pontifices sanctos: idq; propterea, ut ipsorum testimonium plus ponderis habere videatur.

18. Ex dictis facile solvuntur argumenta, quæ frustra ex Pelagio & Gregorio adducis contra Primatum Pontificis, (lib. 4. cap. 7. num. 22.) Percurram obiter. Primum est: Qui se dicit uniuersalem Episcopum, reliquis omni-

mnibus Episcopis aufert nomen, honorem, & dignitatem Episcopalem: At Pontifex hoc facit: Ergo &c. Resp. Major vera est eo sensu, quo Joannes vocabat se universalem Episcopum. Minor falsa est, quia Pontifex vocat quidem se Episcopum uniuersalis Ecclesiæ; non tamen Episcopum universalem, eo sensu, quo Joannes.

19. Secundum: Luciferianum est, velle unū Episcopum se efferre super alios Episcopos, qui sunt astra cœli. Resp. Lucifer voluit se efferre supra astra cœli, ex mera superbia, non autem ex Dei ordinatione. Luciferū imitatus est Joannes Constantinopolitanus. At Pontifex Romanus, Petri Successor, id non facit. Imitatur Petrum, cui totius Ecclesię cura erat demandata; & ideo totius Ecclesię Pastorem & Episcopum meritò se vocat: non ex superbia, sed ex Christi institutione.

20. Tertiū: Schisma aperit & inducit, qui se vocat universalem. Resp. Joannes inducebat schisma, quia cum Pontifex Romanus esset Episcopus uniuersalis Ecclesiæ, cui omnes tenebantur obedire, ipse se subduxit ab obedientia, & vocavit se universalem Patriarcham: & sic dividebat unitatem Capitis in Ecclesia. Hoc non facit Pontifex. Quærit conservare unitatem Capitis; non in varia schismata distrahere.

21. Quartū: Solus Christus est Ecclesiæ Caput universale, & omnes Episcopi sunt Christi membra. Resp. Solus Christus est Caput Eccle-

Ecclesiæ, quoad internum influxum gratiæ. Ar non Solus est caput, quoad externam gubernationem. In priori officio Capitis non admittit Vicarium; in posteriori admittit. Hoc lib. 1. fusè explicatum est.

22. Quintum: Neq; Petrus, neque ullus Apostolus, aut Sanctus Episcopus, vocavit se unquam universalem. Respondeo. Si de nomine disputas, verum est: si de re ipsa, falsum. Nam Petrus re ipsa exercuit officium Pastoris, respectu totius Ecclesiæ: quod etiam fecerunt Successores Petri: et tamen si non vocaverint se universales; vocati sunt tamen Episcopi seu pastores universalis Ecclesiæ, ut cap. 1. præcedenti in primo privilegio ostensum est.

23. Sextum: Proprium est Præcursoris Antichristi, superbiendo se cæteris antepondere. Resp. Verum est. At Pontifex hoc non facit. Non enim ex superbia, sed ex divina institutione, cæteris se anteponebat: Sicut in veteri testamento faciebat Moyses, & reliqui summi Pontifices. Sicut etiam in regno Angliæ facit Rex, & in imperio Imperator. Uterq; enim legitimo jure Electionis præfert se aliis. In quo dissimiles sunt Joanni Constantinopolitano, qui ex superbia, non ex Dei ordinatione, se cæteris anteponebat.

24. Septimum: Si in Ecclesia esset aliquis Episcopus universalis, eo sanè in hæresin lapsus, tota caderet, aut macularetur Ecclesia. Resp. Hoc argumentum sumpsisti ex Gregorio lib. 4.

lib. 4. epist. 32. & lib. 6. epist. 24. Qui longè aliter id proponit cōtra Joannem Episcopum Constantinopolitanum. Et supponit hæc duo principia. 1. Quod multi Episcopi Constantinopolitani in hæresin lapsi sint, ut Nestorius, Macedonius, & plures alii. 2. Quòd is, qui vocat se Episcopum & Sacerdotem universalem, eo sensu, quo Joannes vocabat se universalem, significet se solum esse Episcopum & Sacerdotem; & reliquis omnibus deroget nomen, honorem, & auctoritatem Episcopalem ac Sacerdotalem. Ex utroq; sic argumentatur: Si Nestorius aut Macedonius fuisset Episcopus & Sacerdos universalis, sequeretur totam Ecclesiam fuisse lapsam, quando ipse lapsus est. Quæ consequentia bona est, suppositis illis principiis, quæ iam posita sunt. Tunc enim censetur labi, vel periclitari Ecclesia, quando nullus in eà manet Sacerdos aut Episcopus. At labente Episcopo universalis, qui solus vult haberi Sacerdos & Episcopus, nullus amplius manet Episcopus aut Sacerdos. Ergo labente tali Episcopo, censetur labi tota Ecclesia.

25. In hoc argumento plus roboris est, quàm in isto: Si Rex laberetur in hæresin, totum regnum periclitaretur. Nam etiam si Rex laberetur, adhuc superessent Episcopi & Sacerdotes Catholici, qui populum in fide retinerent. At labente Episcopo universalis, nullus superest Episcopus aut Sacerdos Catholicus, qui possit populum instruere. Nec ad  
Roma-

Romanum Pontificem potest hoc argumentum applicari. Primò, quia Gregorius supponit Romano Pontifici dictum esse; quod Petro dictum est: *Ego rogavi pro te, ut non deficiat fides tua* (li. 4. Epist. 32.) Secundò, quia Romanus Pontifex non dicit se universalem Episcopum, id est, nō dicit se solum esse Episcopum; derogando alijs nomen, honorem, & auctoritatem Episcopalem. Unde etiam ex hac parte (posito, sed non concessō, quòd possit fieri hæreticus) nō sequeretur, labentē Pontifice; totam Ecclesiam periclitari. Nam illō labente, adhuc superessent multi Episcopi & Sacerdotes, qui Ecclesiæ prospicerent; donec novus eligeretur Pontifex.

## V. OBJECTIO

*Ex Concilijs Oecumenicis.*

26. **O**Bjicis duò concilia Oecumenica, secundum & quartum, id est, Constantinopolitanum & Chalcedonense, quæ declararunt Episcopum Constantinopolitanum Romano Pontifici in potestate & privilegiis parem esse. Respondeo. Falsum est. Nam in Concilio Constantinopolitano c. 5. juxta primam editionem sic legimus: *Constantinopolitana civitatis Episcopum habere oportet Primatus honorem post Romanū Episcopum, propterea quòd sit nova Roma.* Vel, ut habet altera editio: *Constantinopolitanus Episcopus habeat priores honoris partes post Romanū Episcopum, eo quòd sit ipsa nova Roma.* In quo canone solum decernitur;

T

ut

ut Episcopus Constantinopolitanus habeat præcipuam dignitatem post Episcopum Romanum, nō autem, ut habeat parem dignitatem cum Episcopo Romano. Itaq; hoc decretum factum est in favorem Episcopi Constantinopolitani, non respectu Pontificis, sed respectu aliorum Episcoporum, præsertim Alexandrini & Antiocheni, qui cum illo certabant de honoris prærogativa. Et definitū, ut post Pontificem, qui semper supremus in Ecclesia habitus est, proximum locum teneret Constantinopolitanus, non autem Alexandrinus aut Antiochenus.

27. Ex Concilio Chalcedonensi, act. 15. citas canonem 28. in quo statuitur, *Constantinopolin aequalib. cum Roma privilegiis frui debere.* Sed frustra. Nam canon ille clandestinus & subreptitius est, quem Legati Pontificis nunquam approbarunt. De hoc vide Baronium. Tom. 6. Annalium, An. Christi 451. Bell. li. 2. de Pontif. c. 18. Et Notationē quæ habetur to. concil. ad finem 15. actionis Chalcedonensis, quæ sic habet: *Meminerit candidus lector canonem hunc 28. de Constantinopolitani Episcopi privilegijs & eminentia prorsus rejectum esse à Leone sanctissimo Pontifice Romano, ut ex multis ejus suprà excussis literis perspicuè videre licet. Et certè, coactus est etiam Anatolius ipse Constantinopolis Antistes, qui callidè à Patrib. Chalcedonensis Synodi, canonis hujus promulgationem impetraverat, reclamantibus Romani Pontificis Leonis Legatis & Vicarijs, intra pristinos se limites tenere & ab*



*& ab infauſtis ambitionis conſilijs animum reuo-  
care.*

VI. OBJECTIO  
*Ex Episcopis Aſianis.*

28. **S**Extò objicis: Polycrates Episcopus Aſianus, & Irenæus reſtiterunt Victori Papæ, Aſiaticas Eccleſias excommunicanti, Reſp. In factò Victoris duo ſpectanda ſunt. 1. Potestas excommunicandi. 2. Cauſa excõmunicationis. Igitur Polycrates & Irenæus non negarunt Victorem Papam habere potestatẽ excõmunicandi Episcopos Aſiæ (ut bene notat Baronius to. 2. Annalium An. Chriſti 198. & patet ex eo, quod ſuprà oſtenſum eſt, Pontificem poſſe excommunicare Episcopos, Reges, & Imperatores, ſi fuerint cõtumaces) ſed negarunt cauſam excommunicationis fuiſſe ſufficientem, & ideo illi reſtiterunt. Cauſa excõmunicationis erat hæc. Poſt longam controverſiam de celebratione Paſchæ, an deberet celebrari, cum Judæis 14. die primi Menſis, ſive dies eſſet Dominicus, ſive non; an verò die tantùm Dominico; tandem definivit Victor, celebrandum eſſe die tantùm Dominico. Et voluit, ut in Aſia ſervaretur hoc ipſius decretum. Aſiani non volebant ſervare. Igitur à Pótifice excommunicati ſunt. Pontifici reſtiterunt Polycrates & Irenæus, aſſerentes, nihil aliud hoc eſſe, quàm turbare Eccleſiam. Nec eſſe legitimã cauſam excommunicationis: In Aſia ſemper celebratum fuiſſe Paſcha die 14. primi Menſis: hanc conſuetudinem mutari non debere.

29. An autem Victor habuerit sufficientem causam, necne, jam non disputo. Si habuit, immeritò reprehensus est à Polycrate & Irenæo. Si non habuit, reprehendi potuit cum debita modestia, sicut Petrus à Paulo reprehensus est. At hoc non derogat ipsius potestati aut jurisdictioni. Nam etiam Rex potest reprehendi à consiliario vel Principe, salva ipsius corona & autoritate. Vide quæ dicta sunt lib. 2. c. 7. §. 38. & seqq.

## VII. OBJECTIO

### *Ex Cypriano.*

30. SEptimò objicis. Cyprianus libr 3. Epist. 3. ad Corneliū, non patitur se esse inferiorem Romano Pontifice, sed ei se penitus parem facit. Nam cū Cyprianus excommunicasset quosdam Clericos, qui postea Romanam confugerunt ad Pontificem, & ab eo recepti sunt in communionem: egrè id tulit Cyprianus, & scribit Pontificem id facere non potuisse: atq; ex tali facto solere schismata in Ecclesia oriri, quando unus Episcopus immiscet se negotio alterius.

31. Hoc probas ex verbis Cypriani, qui loco citato sic scribit: *Neg, enim altunde hæreses oborta sunt, aut nata schismata, quam inde, quòd Sacerdoti Dei non obtemperatur. Nec unus in Ecclesia ad tempus Sacerdos, & ad tempus Iudex vice Christi cogitatur, cui si secundum magisteria divina obtemperaret fraternitas universa, nemo ad-*  
versus

versus Sacerdotum Collegium quicquam moveret: nemo post divinum iudicium, post populi suffragium, post Coepiscoporum consensum, iudicem se non iam Episcopi, sed Dei faceret. Nemo dissidio unitatis Christi Ecclesiam scinderet: Nemo sibi placens, ac tumens, seorsim foris, novam hæresin conderet. Ubi per Sacerdotem Dei, qui unus in Ecclesia fungitur officio iudicis vice Christi, ais intelligi unumquemq; Episcopum in suo Episcopatu.

32. Deinde in progressu sic pergit Cyprianus: Nam cum statui sit omnibus nobis, & æquum sit pariter ac iustum, ut uniuscujusq; causa illic audiatur, ubi est crimen admissum, & singulis pastoribus portio gregis sit ascripta, quam regat unusquisq; & gubernet, rationem sui actus Domino redditurus oportet utique eos, quibus præsumus, non circumcursare, nec Episcoporum concordiam coherentem subdola & fallaci temeritate collidere, sed agere illic causam suam, ubi & accusatores habere, & testes sui criminis possint: nisi paucis desperatis & perditis minor videtur esse autoritas Episcoporum in Africa constitutorum, qui jam de illis iudicaverunt, & eorum conscientiam multis delictorum laqueis vinctam, iudicii sui nuper gravitate damnarunt. Jam causa eorum cognita est: jam de ijs dicta sententia est. Unde concludis, non esse minorem auctoritatem Episcoporum Africæ, quàm Romani Pontificis, in iudicio Ecclesiastico: ac proinde, qui ab aliquo Episcopo Africæ excommunicati sunt, nō debere à Romano Pontifice admitti in communionem.

33. Resp. Prius testimonium Cypriani contra te est. Nam ibi expressè docet, ideo in Ecclesia nasci hereses & schismata, quia non obtemperatur Sacerdoti, id est, Pontifici, qui unus in tota Ecclesia constitutus est, ut loco Christi sit Iudex omnium controversiarum fidei. Quod alijs quidem verbis, sed eodè sensu clarissimè docet in li. de Simpl. Præl. seu de unitate Ecclesiæ, ubi quærēs, quare in Ecclesia nascentur hæreses & schismata, sic respondet: *Hoc eo fit fratres dilectissimi, dum ad veritatis originem non reditur, nec Caput queritur &c.* quem locum fusè explicavi li. 2. c. 7. obiect. 1.

34. Circa posterius testimonium, tria discutienda sunt, 1. Quod sit illud statutum, de quo loquitur Cyprianus. 2. Qui sint illi pauci desperati & perdit, quos ait ab Episcopis damnatos esse. 3. Quo sensu intelligendum sit, quod ait: *Nisi minor videtur esse auctoritas Episcoporum in Africa.*

Est igitur prima quæstio, de quo statuto loquatur Cyprianus: Resp. Vel loquitur de statuto Fabiani Papæ, vel de aliquo simili, quod ex illo desumptum est. Statutum Fabiani habetur in Epistola ipsius tertia ad Hilarium Episcopum his verbis: *Peregrina vero iudicia, salva in omnibus Apostolica auctoritate, generali sanctione prohibemus: quia indignum est, ab externis ut iudicetur, qui provinciales, & à se electos debet habere iudices, nisi fuerit appellatum. Unde oportet, si aliquis Episcoporum super certis accusetur criminibus, ut ab omnibus audiatur, qui sunt in Provincia*

*vincia Episcopis, quia nec oportet, accusatum alibi, quam in foro suo audiri. Et paulò post: Semper ibi causa agatur, ubi crimē admittitur. Et iterum: Placuit etiam, ut si Episcopus appellavit ad Apostolicam Sedem, id statuendum, quod ejusdem Sedis Pontifex statuerit.* Habetur hæc epistola rom. 1. concilior. in decretis Fabiani Papæ. Ex hoc statuto colliguntur hæc duo. 1. Causam uniuscujusq; debere illic audiri & judicari, ubi admissum crimē est. 2. Licere tñ appellare ad Pontificē Romanū tanquam ad supremum in Ecclesia judicem. Quod tibi contrarium est.

35. Altera quæstio est, Qui sint illi pauci desperati & perditī, quos ait Cyprianus ab Episcopis Africanis legitimè dānatos esse? Resp. Sunt quinq; schismatici Pseudoepiscopi, Privatus, Felix, Jovinus, Maximus, Repost<sup>9</sup>, qui ppter adulteria, stupra, & nefanda sacrificia legitimè accusati, & ab Episcopis Catholicis in Africa damnati sunt. De quibus hæc scribit Cyprianus in epistola citata. 1. Quòd Fortunatum creaverint Pseudoepiscopum, contra Cyprianum, qui erat legitimus Episcopus. 2. Quod Felicissimū Romam miserint ad Cornelium Papam: non appellandi causa, sed fallendi & mentiendi. Dicebant enim Fortunatum legitimè electum esse Episcopum à viginti quinque Episcopis; quod erat falsum, cum non fuerit electus, nisi à quinq; Pseudoepiscopis. Dicebant Cyprianū non esse legitimū Episcopum. Hæc & similia dicebant, ut à Cornelio Papā reciperentur ad cōmunionem.

Sedis Apostolicæ, & Cyprianum cum alijs Episcopis facerēt suspectum apud Pontificem. Sciebant enim, se pro hæreticis vel schismaticis habendos, si Apostolicæ Sedis cōmunionem carerent. De hac ipsorum fraude conqueritur Cyprianus. Vnde colligo hæc tria. 1. Cyprianum non negare, quin liceat appellare ad Pontificem, si appellatio sit iusta & legitima. 2. Reprehendere tamen mendacem ac fraudulentam appellationem. 3. Non solum Cyprianū, sed etiam adversarios ipsius agnoscere Pontificem esse supremum iudicem in Ecclesia, quia certò persuasum habent, se non habendos pro hæreticis, si cum illo ad communionem admittantur.

36. Tertia quæstio, quo sensu intelligendū sit, quod Cyprianus ait: *Nisi minor videtur esse auctoritas Episcoporum in Africa constitutorum?* Respondeo. Non debet sic intelligi, quasi nō sit minor auctoritas Episcoporū Africæ, quàm Romani Pontificis, in iudicio Ecclesiastico, ut tu putas. Nā si ab Episcopis licet appellare ad Pontificem, necesse est, minorem esse Episcoporum, quàm Romani Pontificis, auctoritatem. Debet ergo sic intelligi, quod non sit minor auctoritas Episcoporū in Africa, quàm in Galliæ & alijs Provinciis. Ut hic sit sensus: Fabianus Papa generatim statuit, ut si quis Episcopus accusetur super certis criminibus, audiatur ab omnibus Episcopis, qui sunt in Provincia, ubi crimina commissa sunt. Hoc statutum tam debet intelligi de Episcopis Africæ, quam

quàm aliarum Provinciarum. Si ergo, vigore hujus statuti, permillum est Episcopis aliarum Provinciarum judicare Episcopum de criminibus in propria Provincia commissis; etiam Episcopis Africæ id permillum est. Nam horum autoritas non est minor, quàm aliorum. Hanc explicationem confirmant illa verba Cypriani, *Nam cum statutum sit omnibus nobis*, id est, cum statutum Fabiani pertineat æquè ad omnes Episcopos &c.

37. Iterum objicis ex eodem: Cyprianus facit se parem Stephano Pontifici in Ecclesia universali gubernanda. Nam lib. 3. epist. 13. sic Stephanum alloquitur: *Cui rei nostrum est consulere & subvenire, frater charissime, qui divinam clementiam cogitantes, & gubernanda Ecclesie libram tenentes, sic censuram vigoris peccatoribus exhibemus, ut tamen lapsis erigendis, & curandis vulneratis, bonitatis & misericordie divine medicinam non denegemus. Quapropter facere te oportet plenissimas literas ad Coepiscopos nostros in Gallijs constitutos &c.* Hic vim facis in eo, quod dicit Cyprianus, *Qui gubernanda Ecclesia librâ tenentes.* Ex quo deducis, æquè Cyprianum ac Pontificem fuisse totius Ecclesiæ gubernatorem.

38. Respondeo. Cyprianus rogat Stephanum Papam, ut scribat literas ad Episcopos Gallix, & ipsis Pontificia autoritate denunciet, ut Marcianum Episcopum Arelatensem, propter hæresin Novatianam, deponant ab Episcopatu, & alium in locum ejus substituant. Et simul insinuat hæc duo. 1. Se id rogare ex

T 5 pio

pio affectu erga Ecclesiam, ne illa detrimen-  
tum patiatur. 2. Cum ipse per se, & sua autori-  
tate, non possit Episcopis Galliæ id denuncia-  
re; rogare se, ut Pontifex id faciat, cui omnes  
Episcopi subiecti sunt. Alioqui, si ipse potuif-  
set per se præstare, quid necesse erat confuge-  
re ad Pontificem?

39. Hunc sensum colligo ex ipsis Cypria-  
ni verbis. Sic enim incipit: *Faustinus collega no-  
ster Lugduni consistens, frater charissime, semel at-  
que iterum mihi scripsit, significans ea, quæ etiam  
vobis sci utique nuntiata, tam ab eo, quam à cate-  
ris Coepiscopis nostris in Provincia constitutis,  
quod Marcianus Arelate consistens, Novatiano  
se conjunxerit, & à Catholica Ecclesia unitate dis-  
junxerit &c. Cui rei nostrum est consulere, &c.*  
Ecce, jam omnes Episcopi Galliæ scripserant  
Pontifici, ut succurreret. Et unus ex illis,  
Faustinus nomine, scripserat etiam Cypria-  
no, ut Pontificem sui officij moneret. Sed  
quare omnes scripserant Pontifici? Quare i-  
psi per se non deponebant Marcianum ab E-  
piscopatu, & alium substituebant? Quia scie-  
bant se sua autoritate id non posse, sed auto-  
ritate Pontificis, cui omnes Episcopi subiecti  
sunt. Et ideo Faustinus etiam petebat à  
Cypriano, ut Pontificem instigaret. Quod  
& fecit Cyprianus, his verbis: *Quapropter te  
facere oportet plenissimas literas, ad Coepiscopos  
nostros in Gallijs constitutos, ne ultra Marcianum  
pervicacem & superbum, & divina pietatis ac  
frater-*



fraterna salutis inimicum, collegio nostro insultare patiantur. Et infra: Dirigantur in Provinciam, & ad plebem Arelate consistentem à te litera, quibus absento Marciano, alius in locum ejus substituantur. Quasi dicat: Neque ego, neque Episcopi Gallia possunt id præstare. Tui id officij est: ideo ad te confugimus. Vides, Marce Antoni, Cyprianum tibi iterum adversari.

## VIII. OBJECTIO

### *Ex Firmiliano Episcopo:*

40. **O**ctavo objicis: Firmilianus Episcopus Cæsareæ Cappadociae nō agnovit Stephanum Pontificem pro Capite Ecclesiæ, sed illum contempsit. Nam in Epistola ad Cyprianum scripta graviter invehitur in Pontificem: Et inter cætera sic illum alloquitur: *Volentibus vivere, causa mortis fuisti, & insuper indignaris. Vide quæ imperitia reprehendere audeas eos, qui contra mendacium pro veritate nituntur.* Et infra: *Nisi quod imperitos, etiam animosos atque iracundos esse manifestum est: dum per inopiam consilij & sermonis, ad iracundiam facile vertuntur; ut de nullo alio magis, quàm de te dicat scriptura divina, Proverb. 19. Homo animosus parit lites, & vir iracundus exaggerat peccata. Lites enim & dissensiones quantas parasti per Ecclesias totius mundi? peccatum verò quàm magnum tibi exaggerasti, quando te à tot gregibus scidisti?* Et multa alia in-  
eun-

eundem sensum. Ex quibus colligis, Firmilianum non agnovisse Pontificem pro suo Primare, seu Ecclesiæ gubernatore.

41. Respondeo. Firmilianus tunc fecit, quod tu nunc facis. Offensus erat Pontifici, sicut tu es. Et ex illa offensa, multis convitiis proscindebat Stephanum, sicut tu proscindis Paulum. Itaque argumentum, quod sumis ex Firmiliano, tanti valet, quanti hoc, quod ex te fumo: Marcus Antonius, ex privato odio, non agnoscit Pontificem pro Capite Ecclesiæ; Ergo Pontifex non est Caput Ecclesiæ. Facestant hujusmodi ineptiæ. Porro causa, cur Firmilianus tam acerbè scripserit in Pontificem, hæc est. Cyprianus cum multis Episcopis Africæ contendeat Baptismum ab hæreticis collatum, non esse validum, ac proinde baptizatos ab hæreticis, quando redeunt ad Ecclesiam Catholicam, esse rebaptizandos. Hanc sententiam sequebatur Firmilianus cum aliis Episcopis Cappadociæ, Siliciæ & Galatiæ: qui omnes in Synodo Iconii habita, statuerunt, nihil eorum, quæ ab hæreticis fiunt, ab Ecclesia Catholica recipiendum esse: Non Baptismum, non ordinationem, non manuum impositionem, non alia similia. Hoc patet ex Epistola Firmiliani jam citata, ubi sic scribit: *Planè, quoniam quidam de eorum baptismo dubitant, plurimi simul convenientes in Iconio, diligentissimè tractavimus & confirmavimus, repudiandum esse omnino baptismum, quod sit extra Ecclesiam constitutum.*

42. Stephanus Pontifex, nixus Apostolica traditione, contrarium decernebat, nempe Baptismum ab hæreticis collatum, si aliunde non esset defectus, validum esse: ac proinde baptizatos ab hæreticis non esse rebaptizandos. Quia verò Episcopi, qui fuerant in Synodo Iconiensi, pertinaciter persistebant in sua opinione, à Stephano excommunicati sunt, (apud Eusebium lib. 7. c. 4.) Hoc ægrè ferens Firmilianus, strinxit calamus, & epistola ad Cyprianum missa, multis calumniis bonum Pontificem infectatus est: eoque liberius id fecit, quòd sciret Cyprianum esse in eadem secum opinione, & Pontifici in hoc puncto adversari.

43. Hæc est historia rei gestæ. In qua tria certa sunt. 1. Cyprianum & Firmilianum cum aliis Episcopis, in illa controversia de Baptismo hæreticorum errasse, quòd etiam se fateri necesse est. 2. Eosdem peccasse, quòd non voluerint Stephano Pontifici obedire: ut de Cypriano scribit Augustinus lib. 1. contra Donatist cap. 18. & alibi. 3. Non tamen peccasse contra fidem, sed contra obedientiam. Nam Stephanus Papa non definiverat illam controversiam, tanquam de fide: Sed solum præceperat, ut non rebaptizarentur hæretici, ut factetur ipsemet Cyprianus in epistola ad Pompejum.

\* \* \*

IX. OB.

## IX. OBJECTIO

*Ex Episcopis Orientalibus in Concilio Antiocheno.*

44. **N**ONò objicis: Episcopi Orientales in Concilio Antiocheno, duplici de causa restiterunt Julio Pontifici. 1. Quòd ipsos Romam citasset. 2. Quòd Athanasium ad se confugientem, qui in Synodo Orientali fuerat damnatus, absolvisset, & suæ Sedi restituisset. In utroque dicebant illum usurpasse plus auctoritatis, quàm debebat. Unde etiam can. 12. statuerunt, *ut major debeat esse Synodus, quæ absolvit, quàm fuerat illa quæ damnavit.* Insinuantes Athanasium, si legitime vellet absolvi, non debere quærere absolutionem ab uno Episcopo, qualis erat Julius, sed ab aliqua Synodo majori, quàm fuerat illa, in qua erat damnatus. Hæc omnia probas ex Epistola Julij, quam scripsit ad Orientales.

45. Respondeo. Hæc objectio magis te premit quàm nos. Tu objicis Episcopos Orientales, inter quos erant triginta sex Arianæ. Ego vicissim objicio Athanasium & Julium, qui erant sincerissimè Catholici. Objectio tua est hæc: Episcopi Orientales, qui magna ex parte erant Arianæ, restiterunt Julio: Ergo non habebant illum pro Capite Ecclesiæ. Mea est hæc: Athanasius vir doctissimus & sanctissimus,

simus, ab Episcopis Orientalibus appellavit ad Pontificem, tanquam ad legitimum judicem: Ergo agnovit illum pro legitimo judice. Item: Julius absolvit Athanasium, & citavit Episcopos Orientales: Ergo agnovit se habere potestatem hoc faciendi. Videamus nunc, tua an mea objectio plus momenti habeat. Tua fundatur in facto Arianorum: mea in facto sanctissimorum Patrum. Tu credis Episcopis hæreticis: Ego credo Episcopis Catholicis. Credo, inquam, Athanasio, de quo testatur D. Thomas (1. p. quæst. 61. art. 3.) quòd nunquam in doctrina fidei erraverit. Credo Julio Pontifici, à quo ipsi etiam Ariani veniam deprecati sunt, ut fatetur Athanasius Apolog. 2. contr. Arianos, his verbis: *Ariani victi à veritate, veniam scriptis literis à Juliano Romano Pontifice poposcerunt, & ad nos pro pace epistolas misere.*

## X. OBJECTIO

### *Ex Athanasio.*

46. **T**Ria objicis ex Athanasio. Primò, quòd totam dignitatem Romanæ Ecclesiæ in eo posuerit, quòd esset Sedes Apostolica. Secundò, quòd commemorans impudentiā cujusdā Eunuchi, non veriti præsentia Liberij Pontificis, dixerit: *Oblivus sui, quòd coram Episcopo staret.* Si putasset, inquis, Pontificem esse Vicarium Christi, dixisset, *oblivus sui, quòd*

quòd coram Vicario Christi, coram Vice-Deo staret. Tertiò, quod Orat. 1. contra Arianos, recensens præcipuos Scriptores sui temporis, non ponat primo loco Romanos Pontifices.

47. Respondeo. Primâ objectio contraria est. Nam ex eo, quòd Romana Ecclesia est Sedes Apostolica, habet Apostolicam dignitatem. Et sicut in illa Sede Apostolica primus omnium sedit Petrus, qui erat Vicarius Christi; sic post Petrum, in eadem sedit Pontifex, Successor Petri cum pari potestate. Itaque Athanasius nō potuit majorem laudem tribuere Romanæ Ecclesiæ, quàm dicendo, Sedem Apostolicam esse.

48. Altera objectio puerilis est. Nam sicut rectè dicimus: Oblitus sui, quod corā Deo; vel corā Christo, vel coram Rege staret: Ita rectè dicimus: Oblitus sui, quòd coram Episcopo staret. Neq; necesse est, omnes titulos, qui alicui debentur, semper exprimere. Alioquin semper dicendum esset: Oblitus sui, quòd coram Deo Optimo Maximo, infinito, æterno, immenso, omnipotente staret: Vel, quòd coram Rege Serenissimo, potentissimo, invictissimo, mansuetissimo staret. Quòd ridiculum est. Habent isti tituli suum locum; sed nō semper usurpandi sunt. Addo, Athanasium a libi non neglexisse titulos, qui Romano Episcopo debentur. Nam Apolog. 2. contra Arianos, vocat *Romanum Pontificem*. In epist. ad Marcum, *Sanctæ Romanæ & Apostolicæ Sedis, atque universalis Ecclesiæ Papam*. Et in epist. ad

ad Felicem II. *Beatissimum Patrem*. Et alibi aliter.

49. Tertia obiectio est similis præcedenti. Nam qui recenset præcipuos scriptores sui temporis ; non semper debet habere rationem dignitatis personarum ; sed aliquando etiam doctrinæ, vel ætatis, vel famæ & existimationis, vel librorum qui ab unoquoque editi sunt. Et tu, Antoni, si hoc tempore texeres Catalogum scriptorum hujus sæculi, quem primo loco ponendum statueres ? An Regem Angliæ, quia Rex est ? Liceret quidem. Sed cur non similiter liceat præponere vel Baronium, propter cognitionem historiæ : vel Bellarminum, propter doctissimos controversiarum tomos, qui toto orbe notissimi sunt : vel Christophorum Clavius ; ob insignem peritiam rerum Mathematicarum, in quibus excelluit : vel aliquem alium in suo genere celeberrimū ?

## XI. OBJECTIO

*Ex Basilio.*

50. EX Basilio epist. 77. ad Occidentales,

producis hæc verba : *Sive Caput vos ipsos Ecclesiæ universalis reputatis, non potest dicere pedibus caput, Non est mihi opus vobis: sive in reliquum vos Ecclesiasticorum membrorum ordinem locatis, non potestis nobis dicere, qui in eodem vobiscum corpore constituti sumus, Non estis nobis necessarij. Nam & manus mutuam inter se operam*

V

peram

peram necessariam habent; & pedes mutuo sese firman-  
 mant; & oculi per concordiam habent, quòd obje-  
 cta clarè & dilucidè apprehendunt. Nos quidem  
 nostram imbecillitatem agnoscimus, & vestram a-  
 vidè concordiam requirimus. Hæc verba inter-  
 pretaris ironicè à Basilio dicta esse, contra fa-  
 ctū Pontificis, hoc sensu. Sive, ut vos vanè præ-  
 tenditis, estis Caput; sive, ut est veritas, mem-  
 bra cum aliis; debetis nobis ex charitate suc-  
 currere. Respondeo. Basilius non scribit iro-  
 nicè, sed serio. Scribit autem Damaso Pontifi-  
 ci Romano, & aliis Episcopis Occidentalibus.  
 Et quidem ad Damasum referri debent illa i-  
 psius verba: *Sive Caput vos ipsos universalis Ec-  
 clesiae reputatis.* Ad reliquos verò Episcopos i-  
 sta: *Sive in reliquum vos Ecclesiasticorum mem-  
 brorum ordinem locatis.*

51. Sed iterum sic urges: Basilius epist. 50.  
 ad Athanasium data, laudat Meletium Antio-  
 chenum, & dicit dignum esse, qui præsit uni-  
 verso Ecclesiæ corpori. Hoc nō diceret, si pu-  
 taret Romanum Pontificem præesse universo  
 Ecclesiæ corpori; alioqui injuriam illi faceret,  
 præferendo illi Meletium Antiochenum. Et  
 maximè urges illam particulā, qua utitur Ba-  
 silius: *Ut universo, ut ita dicam, Ecclesiæ corpori i-  
 pse præsit.* Quid sibi vult illud, *Ut ita dicā?* Hoc  
 vult, inquis, in Ecclesia talem præfulem non  
 dari.

52. Respondeo. Tria dicit Basilius. Pri-  
 mò, Ecclesiam Orientalem in varias partes  
 dissectam esse, Quod verissimum est. Nam a-

lia



lia pars erat Arianorum: alia Apollinaristarū: alia Catholicorum, qui rursus inter se erant divisi. Et alii quidem adhærebant Meletio (inter quos Basilus) alii Paulino. Secundò dicit, Meletium fore aptissimum, qui inter partes concordiam & pacem constituat, & omnes ad unitatem redigat. Tertiò, totum Orientem optare, ut Meletius præsit universo corpori Ecclesiæ Orientalis. Itaq; ista particula, *Ut ita dicam*, non significat, nullum dari, qui præsit universo corpori Ecclesiæ, (quia constat Pontificem præesse) sed significat, se non loqui de universo corpore Ecclesiæ absolutè, sed de universo corpore Ecclesiæ Orientalis.

## XII. OBJECTIO

*Ex Nazianzeno.*

53. **N**AZIANZENUS, inquit, in orat. funebri in Basilium, commemorans turbas in Basilium excitatas, facit etiam occidentales Episcopos earum autores, vel saltem cooperatores. Verba Nazianzeni sunt hæc: *Aderant & ex Occidentalibus Episcopis quidam, qui Ecclesias, quotquot essent orthodoxæ, ad se pertrahabant.* Hinc ita concludis: Si Romana Ecclesia erat primum Caput Occidentalium, & Domina cæterarum omnium Ecclesiarum, cur arte & officiis, Orientales Ecclesias ad se trahit & allicit? Hoc erat Primatum artificio sibi comparare, non exercere.

54. Respondeo. Non intelligis, quæ dicis. Historiæ rei gestæ sic habet. Cæsareæ

in Cappadocia vacabat sedes Archiepiscopalis. Cæsarienses petebant Basilium. Basilus fugit. Interea per vim electus & creatus est Eusebius. Ægrè hoc tulerunt Monachi, quibus præerat Basilus, qui maluissent Basilium creari Episcopum, non Eusebium. Ob hanc causam Eusebius fuit offensus Basilio. Cum hoc adverterent Monachi, moliti sunt facere defectionem ab Eusebio. Quod erat illis facile ob tres causas, quas Nazianzenus loco citato commemorat. 1. Quia Basilus, cujus causam agebant Monachi, erat magni nominis & existimationis apud populum. 2. Magna pars populi erat aliena ab Eusebio, tanquam non legitime electo. 3. Eodem tempore erant ibi Episcopi Occidentales, Eusebius Vercellensis, & Lucifer Calaritanus, qui propter fidem Catholicam, à Constantio Imperatore Ariano fuerant in exilium missi. & post mortem Constantii, liberati ab exilio, venerant in Cappadociam, ibique autoritate Liberii Papæ, reformabant Ecclesias Arianas, & Catholicas in fide conservabant. Illi igitur adhærebant meliori parti factionis. Hæc omnia patent, partim ex Nazianzeno, loco citato, partim ex Baronio, tom. 3. & 4. Annalium, Anno Christi 360. & seqq.

55. Hinc sequitur. 1. falsum esse, quod tu asseris, Episcopos occidentales fuisse vel autores, vel cooperatores turbarum, quæ in Basilium erant excitatæ. Non enim agebant con-

contra Basilium, sed contra Eusebium. 2. Nullam esse hanc tuam consequentiam: Episcopi Occidentales, auctoritate Romani Pontificis, pertrahebant ad se Ecclesias Orthodoxas, ne inficerentur: Ergo Romanus Pontifex non habebat Primatum totius Ecclesiæ. Hæc melior est: Romanus Pontifex per suos Legatos fuit sollicitus de Ecclesiis Orientalibus, vel ad fidem reducendis, vel in fide confirmandis: Ergo putavit ad se pertinere curam illarum Ecclesiarum.

## XIII. OBJECTIO

*Ex Hieronymo & Damaso.*

56. **H**ic multa objicis. Primo, quod Hieronymus præfatione in Evangelia, nullum alium titulum tribuerit Damaso Pontifici, quam *Summi Sacerdotis*. At omnes Episcopi vocantur summi Sacerdotes apud Hieronymum lib. contra Luciferianos, & lib. de ordinibus Ecclesiæ. Ergo nihil peculiare agnovit in Pontifice, præ aliis Episcopis. Respondeo. Mirus disputator es. Paulo antè sic concludebas: Athanasius Pontificem vocat Episcopum: Ergo. Nunc sic: Hieronymus Pontificem vocat summum Sacerdotem: Ergo. Sed quid ergo? Dicam: Ergo Marcus Antonius ineptè disputat. Quasi verò, qui Pontificem vocat Episcopum aut summum Sacerdotem, per hoc neget, esse Caput totius Ecclesiæ. Etiam

Christus in Scriptura vocatur Episcopus & Sacerdos, (1. Pet. 2. 25. & Hebr. 7. 11.) An ideo concludes; non esse Caput Ecclesiæ? Nihil minus. Imò & Caput Ecclesiæ, & Episcopus, & Sacerdos est. Non enim pugnant hæc inter se. Nec unum derogat auctoritati alterius. Deinde falsum est, Hieronymum omnes Episcopos vocare summos Sacerdotes. Certè in lib. contra Luciferianos, quem tu citas, id non invenio. Alter liber de ordinibus Ecclesiasticis, quem etiam adducis, non est Hieronymi, sed alterius, ut bene observavit Erasmus in censura, & Cardinalis Bellarminus in lib. de Script. Ecclesiasticis.

57. Secundo objicis: Hieronymus in Epist. 85, ad Evagrium sic scribit: *Nec altera Romana urbis Ecclesia, altera totius orbis existimanda est. Et Gallia, & Britannia, & Africa, & Persis, & Oriens, & India, & omnes barbara nationes, unum Christum adorant, unam observant Regulam veritatis. Si auctoritas quaritur, orbis major est urbe. Ubique fuerit Episcopus, sive Romæ, sive Euchubij, sive Constantinopoli, sive Rhegij, sive Alexandria sive Thanis, ejusdem meriti, ejusdem est & Sacerdotij.* Hæc verba, inquis, plurimum pugnant cum Papatu Romano. Et qui hæc nunc diceret, statim Romæ hæreticus conclamaretur, & patibulis destinaretur.

58. Respondeo. Non pugnant cum Papatu. Nec Hieronymus ibi loquitur de Papa, sed de Diaconis Ecclesiæ Romanæ, qui quòd pau-

pauciores & ditiores essent, quàm Sacerdotes & Episcopi, per quendam abusum, absente Pontifice, volebant illis præferri. Contra hunc abusum disputat Hieronymus. Et sic argumē-  
tatur: Quod fit in omnibus Ecclesiis orbis Christiani, debet etiam Romæ fieri: At in omnibus Ecclesiis Presbyteri præferuntur Diaconis: Ergo etiam Romæ id debet fieri. Nec divitiarum in hac re habēda est ratio. Hic sensus colligitur ex ipso Hieronymo. Sic enim scribit: *Audio quendam in tantam erupisse vecordiam, ut Diaconos Presbyteris, id est, Episcopis, anteferebat.* Deinde post verba, à te citata, sic pergit: *Potentia divitiarum, & paupertatis humilitas, vel sublimiorem vel inferiorem Episcopum non facit.* Er infra: *Ceterum, etiam in Ecclesia Roma, Presbyteri sedent, & stant Diaconi: licet paulatim incrementibus vitiis, inter Presbyteros, absente Episcopo, sedere Diaconum viderim: & in domesticis convivis, benedictiones presbyteris dare. Discant, qui hoc faciunt, non se recte facere, & audiant Apostolos: Non est dignum, ut relinquentes verbum Dei, ministremus mensis. Sciant, quare Diaconi constituti sint. Legant Acta Apostolorum: recordentur conditionis suæ. Et cætera, quæ sequuntur.*

59. Igitur objectio, quam facis ex hoc loco Hieronymi, talis est: Diaconi Romanæ Ecclesiæ, per abusum præferebant se Presbyteris, quod non debebant facere, quia in aliis Ecclesiis Christiani orbis, Presbyteri præferuntur Diaconis: Ergo Pontifex Romanus

non habet Primatum Ecclesię. Vel certè talis: Orbis Christianus major est urbe Roma: Ergo Romanus Pontifex non est Caput Ecclesię. Vel talis: Ecclesia Romę non adorat alium Deum, nec observat aliam regulam veritatis, quam alię Ecclesię per orbem dispersę: Ergo Pontifex non est Caput Ecclesię. Vel denique talis: Major est autoritas totius Ecclesię, quàm solius Romanę particularis: Ergo. Omnes hę consequentię ineptę & Apostaticę sunt.

60. Tertiò objicis: Hieronymus ibidem, comparans Ecclesiam Romanam cum Ecclesia, quę erat in Bethlehem, ait multo augustiorem locum esse, qui Salvatorem mundi, quàm qui fratris genuit parricidam. At si Romana Ecclesia esset Sedes Monarchię Ecclesiasticę, non deberet illi præferri Bethlehem. Respondeo. Hieronymus non confert inter se Ecclesias illas, quoad dignitatem & jurisdictionem, de qua nos hęc disputamus: Sed quoad sanctitatem locorum, in quibus erectę & fundatę sunt. Et ait, augustiorem esse locum Bethlehemiticum, in quo Christus Sanctus Sanctorum, natus est; quàm Romanum, in quo Romulus, parricida fratris, genitus est. Quis hoc negat?

61. Quartò objicis: Hieronymus in Apologia contra Jovinianum, de Damaso Pontifice, qui scripta ipsius contra Helvidium laudaverat, sic scribit: *Num vir egregius & eruditus in scripturis, & virgo, Ecclesia virginis Doctor,*  
aliquid

*aliquid in illo sermone reprehendit?* Hic, inquis, non erat locus tacendi de Papatu; sed omnino addidisset, *Vicarius Christi, & totius Ecclesie gubernator*, si credidisset hos titulos Pontifici convenire. Respondeo. Adhuc nescis, Antoni, ubi sit locus tacendi aut loquendi. Hieronymus volebat ostendere librum suum, quem scripserat contra Helvidium de perpetua Beatæ Mariæ virginitate, à Damaso, tanquam viro docto, lectum & approbatum esse. Nec quicquam in eo repertum, quod scripturis divinis esset contrarium. Quid hinc opus erat mentionem facere de jurisdictione?

62 Quintò objicis: Damasus Pontifex apud Ambrosium, Epistol. 79. fatetur se inferiorem esse Concilio Capuensi, dum non audet judicare causam Bonosi Episcopi, quæ à dicto Concilio iudicanda ei fuerat commissa. Respondeo. Causa Bonosi non fuit Damaso iudicanda commissa, ut tu fingis; sed aliis iudicibus, ut patet ex epistola citata, quæ sic incipit: *Accepi literas vestras* (scribit Theophilo & Anylio) *quibus vel pro veritate, vel pro modestia, nostram sententiam sciscitari voluistis. Sed cum hujusmodi fuerit Concilij Capuensis judicium, ut finitimi Bonoso atq; ejus accusatoribus, indices tribuerentur, & præcipue Macedones, qui cum Episcopo Thessalonicensi de eius factis cognoscerent, advertimus, quod nobis judicandi forma competere non posset.* Igitur Concilium Capuense non commiserat Damaso Pontifici, sed alijs iudicibus causam Bonosi cognoscendam &

judicandam, præsertim Macedonibus. Porro inter illos iudices, erant etiam Theophilus & Anysius, ut constat ex verbis sequentibus: *Vestrum est igitur, qui hoc recepistis iudicium, sententiam ferre de omnibus: Nec refugiendi vel elabendi, vel accusatoribus, vel accusato copiam dare. Vicem enim synodi recepistis, quos ad examinandum synodus elegit.*

63. Hinc duo colligo, quæ contra te sunt. Unum est, quod Theophilus & Anysius, qui erant duo ex iudicibus à Concilio Capuensi constitutis, voluerint Damaso Pontifici deferre sententiam judicandam: Quod non fecissent, nisi agnovisset illum pro supremo iudice, ad quem liceret cõfugere. Alterum est, quòd Damasus non dixerit, se non posse iudicare ex defectu jurisdictionis, ut tu falsò interpretaris; sed non cõvenire seu congruere, ut ipse iudicet, cùm jam alij competentes iudices à concilio designati sint. Quod perinde est, ac si dicat Imperator: Cùm Respublica Colonienfis designaverit certos iudices in causa N. Baronius, ibi habitantis, non competit, ut ego iudicem. Sic enim servatur ordo & pax in Imperio. Nam si illi rectè iudicaverint, bene quidem: Sin malè, ad me potest fieri appellatio. Quid hinc colligis, Antoni? Nihil certè contra nos. Nec plus contra Pontificem, quàm contra Imperatorem.



## XIV. OBJECTIO

*Ex Socrate.*

64. **EX** Socrate libro 4. cap. 24. pro-  
 fers hæc verba : *Damasus Libe-*  
*rio in Episcopatus Romani admistratione successit.*  
*Unde Ecclesia Romana status forte fortuna ma-*  
*gnopere conturbatus fuit.* Ex quibus colligis hæc  
 duo. 1. Quòd dixerit illum successisse in admi-  
 nistratione, non totius Ecclesiæ, sed Romani  
 Episcopatus. 2. Quòd dixerit, statum Roma-  
 næ, non autem universalis Ecclesiæ, turbatū  
 esse. Resp. Miserit me tui, si putas hujusmo-  
 di nugis, te aliquid lectori persuadere posse.  
 Jam suprà dixi, non omnia ubique dicenda  
 aut scribenda esse. Scripsit Socrates, quod re-  
 ipsa contigerat. Scripsit, inquam, Damasum  
 successisse Liberio in Episcopatu Romano.  
 Quod verissimum est. Scripsit ex ea succes-  
 sione ortam fuisse aliquam turbationem in  
 urbe Roma. Quod etiam verissimum est, quia  
 Ursinus seu Ursicinus volebat succedere.  
 Quid opus erat addere, successisse illum in  
 gubernatione totius Ecclesiæ? Aut ex ea suc-  
 cessione ortam fuisse turbationem in tota Ec-  
 clesia? prius fuisset superfluum; posterius fal-  
 sum. Cum n. constet, eum qui succedit in Epi-  
 copatu Romano, succedere etiam in Primatu  
 Ecclesiæ; superfluum est expressè hoc addere.  
 Similiter, cū ex successione Damasi nō fuerit  
 turba-

turbatus totius Ecclesię status, sed illa turbatio intra urbem Romanam se continuerit; falsò scripsisset Socrates, si illam turbationem toti orbi Christiano tribuisset.

## XV. OBJECTIO :

*Ex Ambrosio.*

65. **E**X Ambrosio lib. 3. de Sacrament. cap. 1 adducis hæc verba : *Non ignoramus, quòd Ecclesia Romana hanc consuetudinem (lavandi pedes post Baptismum) non habeat, cujus typum in omnibus sequimur, & formam. Hanc tamen consuetudinem non habet, ut pedes lavet. Et paulò pòst: In omnibus cupio sequi Romanam Ecclesiam: sed tamen & nos homines sensum habemus. Ideo quod alibi rectius servatur, & nos recte custodimus. Ipsum sequimur Apostolum Petrum, ipsius inhaeremus devotioni. Ad hoc Ecclesia Romana quid respondet? utiq; ipse auctor est nobis hujus assertionis Petrus Apostolus, qui Sacerdos fuit Ecclesię Romana. Hæc verba, inquis, destruunt Papatum Romanum. Respondeo. Vide, ne destruas tuum cerebrum; si ex quolibet velis quidlibet efficere. Certè si ad formam revoces argumentum, quod hìc latet, erit ejusmodi: Romana Ecclesia non servat ceremoniam lotionis pedum, quam servant alię Ecclesię: Ergo Pontifex non habet Primatum Ecclesię. Concessio antecedente, nego consequentiam. Quomodo probas?*

has? non video, nisi prius probes hæc duo. 1. Quælibet ceremonia Ecclesiastica, quæ servatur in una Ecclesia, debet etiam in alijs servari. 2. Si Episcopus Romanus non servat Romæ aliquam ex ceremonijs Ecclesiasticis, quæ alibi servatur, non potest habere Primum Ecclesiæ. Si hæc duo probaveris, circumspiciam de alia responsione.

## XVI. OBJECTIO

*Ex Augustino.*

66. **H**anc si proponis: Augustinus lib. de unico Baptismo contra Petilianum, cap. 14. faciens comparisonem inter Stephanum Romanum, & Cyprianum Carthaginensem Episcopum, nec non inter ipsas Ecclesias Romanam, & Carthaginensem; ne ullam quidem umbram ponit Romani Papatus, sed summam æqualitatem. Sæpissimè verò (ut libr. 2. contra Cresconium Grammaticum cap. 37. & lib. de unitat. Eccles. cap. 12.) ubi singulares Ecclesias commemorat, & ex quibus universalis Ecclesia conflatur, Romanam facit vnam ex illis, & singulares omnes Ecclesias membra tantum dicit esse unius Ecclesiæ toto orbe diffusæ: nullam verò excipit è numero membrorum, ut eam faciat Caput. Hæc tu Antoni. Deinde sic concludis: Romana Ecclesia est membrum, non Caput, teste Augustino: Ergo Episcopus Romanæ Ecclesiæ est etiam membrum, non Caput.

67. Re-

67. Resp. Multis modis hîc peccas. Primò, quia Augustinus propriè nō instituit comparisonem inter Stephanum & Cyprianum; sed solum dicit, illos duos inter se dissentire in controversia de Baptismo hæreticorum. Verba Augustini sunt hæc: *Duo erant eminentissimarum Ecclesiarum, Romana scilicet & Carthagenensis Episcopi, Stephanus & Cyprianus, ambo in unitate Catholica constituti. Quorum Stephanus Baptismum Christi in nullo iterandum esse censebat, & hoc facientibus graviter succensebat. Cyprianus autem in heresi vel schismate baptizatos, tanquam non habentes Baptismum Christi, baptizandos in Ecclesia Catholica existimabat. Quid hinc colligis? Nihil ad nostrum propositum.*

68. Secundò, falsum est, Augustinum inter Stephanum & Cyprianum ponere summam æqualitatem. Nam expressè ait, Stephanum statuisse pœnam excommunicationis in omnes q̄ baptizatos ab hæreticis rebaptizarent. *Cum ergo Stephanus, inquit, non solum non rebaptizaret hæreticos, sed etiam hoc facientes, velut fieret, decernentes, excommunicandos esse censeret, sicut aliorum Episcoporum, & ipsius Cypriani literæ ostendunt; tamen cum eo Cyprianus in unitatis pace permansit.* At hinc sequitur, Stephanum habuisse potestatem excommunicandi alios Episcopos, quam Cyprianus non habuit.

69. Tertiò falsum est, Augustinum sæpissimè, & præsertim duob⁹ locis à te citatis affirmare omnes Ecclesias particulares esse membra

bra unius Ecclesiæ toto orbe diffusæ. Uno tantum loco id affirmat, nempe li. de unitat. Eccles. c. 12. At altero loco, nempe lib. 3. contra Cresconium c. 37. commemorat quidē multas Ecclesias particulares, sed nullā facit mentionem membrorum aut Capitis. Igitur & fraudulenter citas illum locum, ad decipiendum lectorem; & temerè ponis illam particulam, *sapissimè*. Sed esto: Sapissimè id affirmat. An ideo valebit hæc consequētia: Omnes Ecclesiæ particulares sunt membra unius Ecclesiæ toto orbe diffusæ: Ergo nulla illarum est Caput? Nō magis quàm hæc: Ergo nulla illarum est pes aut manus. Nisi putes, caput non esse membrum corporis. Tam est membrū, quàm pes aut manus. Sed præcipuum inter mēbra.

70. Sed etiam hoc demus, Ecclesiā Romanam particularem non esse Caput. Insuper & hoc, Pontificem Romanum, quatenus præcisè est Episcopus Romanæ Ecclesiæ particularis, non esse Caput totius Ecclesiæ. Nō sequitur tamen, eundem Pontificem, quatenus illi totius Ecclesiæ cura cōmissa est, non esse Caput totius Ecclesiæ. Accipe simile exemplū. Matthias Imperator non est Caput imperij, quatenus præcisè est Archidux Austriæ; sed quatenus gubernatio Imperij ab Electoribus illi tradita est. Et Marcus Antonius non fuit Caput Ecclesiæ Spalatensis, quatenus erat Doctor Theologiæ; sed quatenus erat Archiepiscopus illius Ecclesiæ.

XVII. Ob-

## XVII. OBJECTIO

*Ex Concilio Africano.*

71. **E**AM sic proponis : Episcopi Africanani , tempore Innocentij Papæ, in concilio Africano cap. 72. statuerunt hunc canonem : *Quicumque non communicant in Africa, si in transmarinis ad communicandum obrepserint, jacturam clericatus excipiant.* Ubi per transmarinos, ais potissimum intelligi Ecclesiam Romanam. Ex quo inferis, Episcopos Africanos prohibuisse, ne quisquam, qui in Africa sit excommunicatus, appellet ad Romanam Ecclesiam, vel Pontificem, ut ibi ad communionem recipiatur. Eos igitur non agnovisse Primum Pontificis.

72. Respondeo. Male interpretaris canonem. Non enim prohibet legitimam appellationem ad Pontificem; neque etiam negat Primum Pontificis; sed tantum decernit pœnam in eos, qui cum in Africa sint repulsi à communione, postea per fraudem & subreptionem communicant in Ecclesiis transmarinis, quasi excommuniati non essent. Vel certè, per occultam fallaciam, obtinent absolutionem ab excommunicatione, quasi injustè excommunicati essent. Quod constat ex epistola Africanorum Episcoporum ad Cœlestinum Papam, ubi sic habent: *Præfato debite salutationis officio, impendio de-*

*dio deprecamur, ut deinceps ad vestras aures hinc venientes, non facilius admittatis. Ubi notandum est, quod cum debita observantia deprecantur Pontificem, non quidem, ut venientes ex Africa nullo modo admittat ad communionem; sed ut non facile admittat, nisi causa prius cognita & examinata. Aliunde autem constat, quod agnoverint ipsius Primatum in Ecclesia universali.*

73. Reliquæ objectiones, quæ sequuntur, sunt triplices. Quædam non egent solutione. Aliæ solvi possunt ex ijs, quæ dicta sunt. Aliæ denique solutæ sunt à Cardinale Bellarmino. Neque necesse est, solutiones ex Bellarmino huc transcribere. Lege ibi sis. Et si bonæ sunt, acquiesce: Sin male, tuo iudicio, ostende vitium, & succurremus.

\* \* \*

X

LIBER

LIBER QUARTUS.  
DE RECTORIBUS ET  
Ministris Ecclesiæ.

**H**IC unum asseris, in quo tibi assentior, nempe Episcopos Presbyteris jure divino superiores & eminentiores esse: quod tamen est contra tuum Regem in Anglia, qui non aliam distinctionem admittit inter Episcopos & Presbyteros, quam qua ordinis causa, humano jure introducta est. Cum illo transige. At multa alia asseris, in quibus non assentior. Præcipua ferè sunt hæc. 1. Singulos Episcopos cum plena potestate in solidum gubernare Ecclesiam. 2. Sacros Ministros ad cælibatum jure non teneri. 3. Votum continentia non esse annexum sacro ordini. 4. E si annexum esset, tali voto non dirimi matrimonium. 5. Sacrum Ordinem non esse Sacramentum. 6. Duo tantum esse Sacramenta ex sententia Augustini. 7. Monachos non fieri Apostatas, si post vota solennia deserant suum statum, & matrimonium ineant. Reliqua prætereo. Hæc, quæ recensui, breviter examinanda sunt.



CAPUT PRIMUM.

*An singuli Episcopi cum plena potestate in solidum regant Ecclesiam?*

1. **T**U affirmas lib. 2. cap. 1. n. 9. his verbis: *Episcopi omnes, simul & in solidum, eandem regunt Ecclesiam, singuli cum plena potestate.* Et n. 13. *Episcopi dicuntur Apostolorum Successores, quia in eorum officio, quod erat Apostolorum omnium commune, succedunt omnes omnibus in solidum.* Et n. 15. *In potestate universali, succedunt Episcopi, non modo universi, sed etiam singuli.* Et lib. 3. c. 8. n. 14. *Docuimus, unumquemque Episcopum jure divino esse universalem: & teneri ex officio, & ex charitate, Ecclesiam Christi, in quacunque parte illa illius opera indigeat, subvenire.*

2. Theologi Parisienses censent has tuas propositiones esse hæreticas, schismaticas, & unitatis Ecclesiæ subversivas. Et sic est. Primo, quia repugnant unitati Capitis, quod Christus in Ecclesia instituit. Nam si singuli Episcopi cum plena potestate succedunt omnibus Apostolis in solidum; Ergo omnes æqualem habent potestatem cum Petro & Pontifice, quod est hæreticum & hætenus refutatum.

3. Secundo, si singuli Episcopi, jure divino, habent plenam potestatem regendi Ecclesiam in solidum, & non hanc aut illam tantum particularem, sed Ecclesiam toto orbe diffusam, ut

tu intelligis; Jam tibi, ex concessione juris divini, licitum est, cum plena potestate regere omnes Anglicanas Ecclesias in solidum; nec alii Episcopi Anglicani, jure divino poterunt tibi obsistere. Experire, an ita sit. Docebunt ipsi te aliam, ut opinor, Theologiam, si hanc potestatem usurpaveris. Nec est, quòd obtendas, te loqui de plena potestate in habitu, non in actu. Alibi quidem sic distinguis: Sed hoc loco non item. Nam illa tua verba: *Singuli regunt Ecclesiam cum plena potestate*, nò significant habitum, sed actum. Alioqui debuisses sic dicere, *Singuli habent plenam potestatem regendi*. Nunc dicis, *Singuli regunt*. At regere significat actum, non habitum.

4. Tertio, si singuli, ut tu loqueris, non solum ex charitate, sed etiam ex officio tenentur subvenire cuicunq; Ecclesiæ indigenti; planè sequitur, te etià ex officio ad hoc teneri. Cur ergo ex obligatione officii, quâ obstrictus es, ex tua sententia, nò subvenis Ecclesiis Dalmatix & Croatiæ, quæ tuo judicio indigent meliori instructione? Cur fugisti ex illis partibus, & Ecclesias indigentes reliquisti sine Pastore? Si esses bonus pastor, usurpares illud Christi: *Bonus pastor animam suam dat pro ovibus suis*. Nunc, quia mercenarius es, usurpas illud, quod sequitur: *Mercenarius autem, & qui non est pastor, videt lupum venientem, & dimittit oves, & fugit*. Videtur Christus de te locutus esse. Et tu te ipsum damnas, si cum tenearis ex officio subvenire, non subvenis.

5. Quar-

5. Quartò, si verum est, vnumquemq; Episcopum *jure divino esse universalem*, ut hic disertè asseris; quare tam graviter insectaris hunc titulū in Petro & Pontifice? Neutrum vis dici Episcopum universalem. Sic enim scribis lib. 4. c. 7. n. 22. *In Ecclesia nullus est Episcopus universalis*. Et ibidem: *Qui se dicit Episcopum Universalem, reliquis omnibus Episcopis, & nomen & honorem aufert*. Et multa alia in eundem sensum. De quibus suprà dictum est, lib. 3. c. ult. object. 4.

CAPUT SECUNDUM.

*An Ministri Ecclesie jure teneantur ad Cœlibatum?*

1. **T**U negas c. 10. in titulo Capitis, his verbis: *Sacros Ministros ad cœlibatum jure non teneri*. Qui titulus, cū sit negativus, perinde valet; ac si dicas, sacros ministros ad cœlibatū nullo jure, nec divino, nec humano teneri. Quod an verum sit, discutiendum est. Ut tamen certo ordine progrediamur, ostendā.

1. Sacerdotes veteris testamenti divino jure obligatos fuisse ad continentiam, nō quidem perpetuam, sed pro certo tēpore. 2. Apostolos servasse perpetuam continentiam, non quidem jure divino, sed partim consilio Christi, partim sua sponte. 3. Eosdē Apostolos suasisse, & decrevisse, ut alii deinceps Ministri Ecclesie servarent eandem continentia. 4. Eam deinceps servatam esse. 5. Postea etiam lege Ecclesiastica præscriptam, non semel, sed sæpius.

X. 3

pius. 6. Hanc legem Ecclesiasticam aliter servari in Ecclesia Occidentali, aliter in Orientali. Deniq; ostendam in tuis verbis aliquot falsitates & contradictiones.

2. PRIMA CONCLUSIO. Sacerdotes veteris Testamenti, jure divino tenebantur ad aliquam continentiam ab usu matrimonii, præsertim pro iis diebus, quibus Deo in tabernaculo vel templo ministrabant. Hoc tu negas, cap. 10. num. 78. post medium. Sed scripturæ & Patres mecum sentiunt. Ex scripturis habemus aliquot testimonia. Primum Exod. 19. 22. *Sacerdotes quoque, qui accedunt ad Dominum, sanctificentur*, id est, abstineant ab uxoribus. In eo enim potissimum consistebat sanctificatio, ut patet ex eodem capite. Nam versic. 10. dicebat DEUS, ad Moysen: *Vade ad populum, & sanctifica illos hodie & cras, laventq; vestimenta sua.* Moyses autem intellexit illam sanctificationem de abstinentia ab uxoribus. Nam mox accedens ad populum, & explicans illi voluntatem Dei, dixit: *Estote parati in diem tertium, & ne appropinquetis uxoribus vestris.* Ubi notandum est, illam sanctificationem, seu abstinentiam ab uxoribus, de qua agitur citato capite, tam populo, quam Sacerdotibus fuisse præceptâ; quia tam populus, quam Sacerdotes debebât audire promulgationem legis Mosaicæ, & ad illam toto biduo se disponere per abstinentiam ab uxoribus, & per lotionem vestimentorum, & castrorum purgationem. Speciali tamen

tamen titulo præceptam fuisse Sacerdotibus, pro omni eo tempore, quo fungebantur officio sacerdotali; sive orando pro populo, sive hostias & sacrificia offerendo, sive aliquod aliud sacrum ministerium exhibendo. Hoc enim significatur illis verbis: *Sacerdotes quoque, qui accedunt ad Dominum, sanctificentur.* Nam tunc dicebantur accedere ad Dominum, quando vel erant oraturi, vel sacrificium oblaturi, vel aliquid simile facturi. Nosti hæc.

3. Secundum testimonium 1. Reg. 21. 1. *Venit autem David in Nobæ ad Achimelech Sacerdotem.* Et infra: *Respondens Sacerdos ad David, ait illi: Non habeo laicos panes ad manum, sed tantum panem sanctum: Si mundi sunt pueri, maxime à mulieribus.* Et respondit David Sacerdoti; & dixit ei: *Equidem si de mulieribus agitur, continuimus nos ab heri & nudiustertius, quando egrediebamur, & fuerunt vasa puerorum sancta. Porro via hæc polluta est, sed & ipsa hodie sanctificabitur in vasis.* Hic vides, non licuisse comedere panem sanctificatum, nisi præmissa sanctificatione, quæ in duobus consistebat. Primò ac potissimè in abstinencia ab uxoribus. Secundo in purificatione corporis, si quid maculæ in via contraxisset. Et certè, si homines laici debebant hoc modo sanctificari, multo magis sacerdotes; quippe qui ad majorè puritatem, ratione status ac officij obligabantur.

4. Quod sic ulterius declaro. Duo hic præcepta distinguenda sunt. Unum quo laici prohibebantur comedere panes sanctificados, vel

ut alibi vocantur, panes propositionis. De quo Christus, Matth 12.3. *Non legistis, quid fecerit David, quando esurit, & qui cum eo erant? Quomodo intravit in domum Dei, & panes propositionis comedit, quos non licebat ei edere, neque his, qui cum eo erant, nisi solis Sacerdotibus?* Alterum, quo jubebantur abstinere ab uxoribus, qui manducaturi erant hujusmodi panes. De hoc quaestio est, quosnam obligaverit? Tu dicis obligasse solos laicos. Ego contra, obligasse etiam Sacerdotes. Et quidem per se, & primario, Sacerdotes. Quod tripliciter probō. Primò, ex dictis, quia Sacerdotes tenebantur ad majorem puritatem, quam laici. Secundò, quia esus panum propositionis per se pertinebat ad solos Sacerdotes; Ergo etiam sanctificatio requisita ad esum istorum panum, per se pertinebat ad solos Sacerdotes. Unde sicut laici non poterant comedere hujusmodi panes, nisi tantum per accidens, & in casu necessitatis; ita non tenebantur se sanctificare pro comestione, nisi tantum per accidens, & in casu necessitatis. Tertio, quia si præceptum de abstinence ab uxoribus pertinisset ad solos laicos, ut tu vis, vel fuisset illis datum à Deo, antequam Achimelech loquebatur cum Davide, vel ab ipso Achimelech cum jam loqueretur cum ipso. Non prius, quia nusquam legimus in scriptura, quod Deus dederit tale præceptum pro solis Laicis, antequam Achimelech loquebatur cum Davide. Nec posterius, quia Achimelech, cum dicebat

gebat Davidi, *Si mundi sunt pueri, maximè à mulieribus*; non dabat novum præceptum, sed supponebat, jam antè à Deo datum esse. Ac non erat aliud à Deo datum, nisi quo Sacerdotes obligabantur abstinere ab uxoribus, quotiescunque fungerentur officio sacerdotali, seu, quotiescunque aliquid sacri ministerij, si-ve orando, si-ve hostias offerendo, si-ve panes sanctos comedendo, peragerent. Itaque sensus Achimelech est hic: Vobis quidem non licet comedere panes sanctificados, sed solis Sacerdotibus: Si tamen vultis propter præsentem necessitatem comedere, cum alij panes haberi non possint, necesse est, vos ea puritate & sanctitate id præstare, qua Sacerdotes facere consueverunt, qui abstinēt ab uxoribus, quotiescunque hujusmodi panes comesturi sunt. Idem ergo à vobis exigo.

5. Tertium testimonium i. Paralip. 24. 7. *Exiit autem sors prima Jojarib, secunda Jedei, tertia Harim, &c.* ubi recensentur viginti quatuor familiae Sacerdotum, qui per vices debebant ministrare in domo Domini, juxta illud Luc. 1. 5. *Fuit Sacerdos quidam nomine Zacharias, de vice Abia.* Et paulo post: *Factum est autem, cum sacerdotio fungeretur in ordine vicis sua ante Deum, secundum consuetudinem sacerdotij, sorte exijt, ut incensum poneret.* Constat autem, Sacerdotes, quando ministrabant Domino secundum vicem suam, debuisse multos dies perseverare in ministerio. Nam ibidem vers. 23. de Zacharia sic legimus. *Et factum est, ut im-*

X 5

pleti

*pleti sunt dies officij ejus, abiit in domum suam.* Plerique autores putant fuisse octo dies unicuique destinatos, nempe à Sabbatho usque ad Sabbathum, ut Josephus, Ambrosius, Theophylactus, & alij apud Maldonatum in Commentario illius loci. Et colligitur ex illo 2. Paralip. 23. 8. *Fecerunt ergo Levitæ & universus juda juxta omnia, quæ præceperat Jojada Pontifex: & assumpserunt singuli viros, qui sub se erant, & veniebant per ordinem Sabbathi cum his, qui impleverant Sabbathum, & egressuri erant.*

6. Igitur Sacerdotes per octo dies, relictis domibus & uxoribus suis, permanebant in templo, & ibi ministrabant. Et quidem tempore sacrificij, erant in ea parte templi, ubi sacrificia offerebantur. Reliquo tempore, habitabant in atrio templi, in domunculis, ad id destinatis: quo non licebat uxores introducere. Unde consequens est, debuisse à cohabitatione uxorum abstinere. De qua re sic scribit Siricius Papa in epistola ad Himerium Tharaconensem Episcopum cap.

7. *Dicat mihi nunc, quisquis ille est sectator libidinum; præceptorque vitiorum, si æstimat, quòd in lege Moysis passim sacris Ordinibus à Domino laxata sint frena luxuria, cur eos, quibus committebantur sancta sanctorum, præmonet dicens: Sancti estote, quia & ego Sanctus sum Dominus Deus vester? Cur etiam procul à suis domibus, anno vicis sue, in templo habitare iussi sunt Sacerdotes? Hac videlicet ratione, ne vel cum uxoribus possent carnale*



*nale exercere commercium, ut conscientia integritate fulgentes, acceptabile Deo munus offerrent. Quibus etiam, expleto deservitionis sua tempore, uxorius usus, solius successionis causa, fuerat relaxatus, quia non ex alia, nisi ex tribu Levi. quisquā ad Dei ministerium, fuerat praeceptus admitti. tom. 1. concilior.*

7. Idem, quod ad rem attinet, sentiunt alij Patres. Hieronymus lib. 1. contra Iovinianum, longè post medium: *Nam & in veteri lege, qui pro populo hostias offerebant, non solum in domibus suis non exant, sed purificabantur ad tempus, ab uxoribus separati; & vinum & siceram non bibebant, quae solent libidinem provocare.*

8. Et Innocentius I. epist. 2. ad Victricium Rotomagensem Episcopum, cap. 9. *Præterea, quod dignum & pudicum, & honestum est, tenere Ecclesia omni modo debet, ut Sacerdotes & Levitæ cum uxoribus suis non coeant, quia ministerij quotidiani necessitatibus occupantur. Scriptum est enim: Sancti estote, quoniam & ego sanctus sum, Dominus Deus vester. Nam si prius temporibus, de templo Dei Sacerdotes anno vicis sua non discedebant, sicut de Zacharia legimus, nec domum suam omnino tangebant, quibus utique propter sobolis successionem uxorius usus fuerat relaxatus: quanto magis hi Sacerdotes vel Levitæ pudicitiam ex die ordinationis suæ servare debent, quibus vel Sacerdotium, vel ministerium sine successione est, nec præterit dies, quæ v-*

*à sa*

à sacrificiis divinis, vel à Baptismatis officio vacent? (tom. 1. concilior.)

9. Et Beda ad cap. 1. Luc. Hoc est, quod dixi, quod vicis sua tempore Pontifices, templi tantum officiis mancipati, non solum à complexu uxorum, sed ab ipso quoque domorum suarum abstinerent ingressu: ubi nostri temporis Sacerdotibus, quibus semper Altari servire jubetur, perpetuum servanda castitatis exemplum datur. Quia enim tunc Sacerdotum ex stirpe Aaron successio quærebatur, necessario tempus substituenda sobolis procurabatur. At quia nunc non carnalis Successio, sed perfectio spiritualis inquiritur, consequenter Sacerdotibus, ut semper Altari queant assistere, semper ab uxoribus abstinendum, semper castitas observanda præcipitur.

10. SECUNDA CONCLUSIO. Apostoli servarunt perpetuam continentiam, non quidem ex præcepto divino, sed partim ex consilio Christi, partim sua sponte ac proposito. Ac primò, quod servaverint perpetuam continentiam, constat ex illo Matth. 19. 27. *Ecce nos reliquimus omnia, & secuti sumus te: quid ergo erit nobis?* Jesus autem dixit illis: *Amen dico vobis.* Et infra: *Omnis qui reliquerit domum, vel fratres, aut sorores, aut patrem, aut matrem, aut uxorem, &c.* Ex quo loco constat, Apostolos reliquisse omnia, quæ habebant. Ac proinde, qui antea habebant uxores, reliquisse etiam uxores; & qui antè habebant filios aut filias, reliquisse etiam filios aut filias. Et sic deinceps. Et Paulus, qui post alios Apostolos separatim vocatus

tus est à Christo, de se scribit. 1. Cor. 7. 7. *Volo vos omnes esse, sicut meipsum*, id est, vellem seu optarem, si commodè fieri posset, vos omnes esse cœlibes & continentes, sicut ego sum. Et ibidem: *Dico autem non nuptis & viduis: Bonum est illis, si sic permaneant, sicut & ego*. Nempe, in statu continentiae.

11. Quòd autem non servaverint continentiam ex præcepto divino, sed ex Christi consilio & propria voluntate, clarum est. Nul- lum enim extat præceptum divinum novi testamenti, quo vel Apostoli, vel alij Ecclesiæ ministri obligentur ad cœlibatum. Extat tamen consilium Christi, Matth. 19. 10. *Dicunt ei Discipuli ejus: Si ita est causa hominis cum uxore, non expedit nubere. Qui dixit illis: Non omnes capiunt verbum istud, sed quibus datum est. Sunt enim Eunuchi, qui de matris utero sic nati sunt. Et sunt Eunuchi, qui facti sunt ab hominibus: Et sunt Eunuchi, qui se ipsos castraverunt propter regnum cœlorum. Qui potest capere capiat*. Hic ponit triplex genus continentium & abstinentium ab uxoribus. Nam aliqui à natura; alij à necessitate; alij à propria voluntate habent, quòd abstineant. Ad hoc tertium genus hortatur Christus, cum ait: *Qui potest capere, capiat*. Et hoc Christi consilium, tanquam sanum & meritum, propria voluntate amplexi sunt Apostoli.

12. TERTIA CONCLUSIO. Apostoli & suaserunt, & statuerunt, ut alij deinceps ministri Ecclesiæ servarent continentiam. Audi Paulum

Paulum ad Tit. 1. 7. *Oportet Episcopum sine crimine esse, sicut Dei dispensatorem: hospitem, benignum, sobrium, justum, sanctum, continentem.* Ubi inter cæteras virtutes, præscribit etiam continentiam, distinctam à sobrietate, id est, continentiam ab uxoribus, ut Divus Hieronymus rectè interpretatur.

13. Et 2. Timoth. 2. 3. *Labora sicut bonus miles Christi Iesu. Nemo militans Deo, implicat se negotiis secularibus, ut ei placeat, cui se probavit.* Alludit ad milites, qui ut placeant suo Imperatori, toti intenti sunt in bellum, & abstinere se ab omnibus curis sæcularibus, etiam ab uxoribus. Nam ut scribit Cornelius Tacitus lib. 14. & Dio. lib. 60. Olim prohibitum fuit militibus conjugium, ut tanto facilius vacare possent militiæ. Et similiter Tertullianus in exhortatione ad castitatem, docet suo tempore milites fuisse cœlibes; sicut etiam multi hoc tempore sunt, præsertim milites ordinis Teutonici, & alij, qui regulam certam profitentur. Vult igitur Apostolus, multo magis milites Christi, debere intètos esse in ministeriũ divinum, & abstinere ab ijs omnibus, quæ hoc ministerium quocunq; modo impediunt. Maximè autem impedit usus matrimonij. Nã ut alibi loquitur idem Apostolus: *Qui cum uxore est, sollicitus est, quæ sunt mundi; quomodo placeat uxori, & divisus est.*

14. Et 1. Cor. 7. 5. *Nolite fraudare invicem, nisi forte ex consensu ad tempus, ut vacetis orationi.* Ex quo loco D. Hieronymus ad cap. 1. Epist.

pist. ad Tit. sic argumentatur: *Si laicis imperatur, ut propter orationem abstineant se ab uxorum coitu, quid de Episcopo sentiendum est, qui quotidie pro suis populi que peccatis illibatas Deo. oblaturus est victimas?* Et lib. 1. contra Jovinianum, longè post medium: *Si laicus, & quicumque fidelis orare non potest, nisi careat officio conjugali: Sacerdoti, cui semper pro populo offerenda sunt sacrificia, semper orandum est. Si semper orandum est, ergo semper carendum matrimonio.* Similia habent Origenes Hom. 23. in Num. Epiphanius hæresi 49. Innocentius I. in epistola ad Exuperium, cap. 1. & alij.

15. Dices fortè, Apostolum quidem suasse continentiam, sed non præcepisse. Respondeo. Certum est, quòd in hoc genere plus exegerit à Sacerdotibus, quàm à laicis. At à laicis dupliciter exegit continentiam. Primò per modum consilij & desiderij, 1. Cor. 7. 7. *Volo vos omnes esse, sicut me ipsum.* Secundò, per modum præcepti, ibidem vers 5. *Nolite fraudare invicem, nisi fortè ex consensu ad tempus, ut vacetis orationi;* ut interpretantur Patres jam citati. Ergo per modum majoris cujusdam obligationis debuit exigere continentiam à Sacerdotibus. Quæ major obligatio exprimitur illis verbis: *Oportet Episcopum esse continentem.* Itè: *Labora sicut bonus miles Christi Iesu.* Itè: *Qui sine uxore est, sollicitus est, quæ Domini sunt, quomodo placeat Deo. Qui a. cum uxore est, sollicitus est quæ sunt mundi, quomodo placeat uxori, & divisus est.* Unde sic concludo: *Tanta est obligatio Sacer-*

Sacerdotum, ut abstineant ab uxoribus, quāta est, ut serviant Deo & non mundo: At majori obligatione tenentur ad serviendum Deo, quam laici. Imò sicut ratione officij obligati sunt, ut totos se tradant servitio Dei, & non sint divisi: Ita ratione officii obligati sunt, ut abstineant ab uxoribus, & caveant divisionem.

16. Hæc ex Paulo. Accedit communè decretum Apostolorum, quod habetur can. 27. inter canones Apostolorum, his verbis: *In-nuptis autem, qui ad clerum prouti sunt, precipimus, ut si voluerint, uxores accipiant: sed lectores cantoresque tantummodò.* Ubi nomine lectori & cantorum, comprehenduntur etiam alii minores ordines, ut fateris cap. 10. n. 6. *Est enim omnium par ratio.* Excipiuntur autem ij, qui sunt in maioribus ordinibus constituti, quibus non licet uxores accipere. Quod similiter fateris n. 8.

17. Habemus ergo sanctionem Apostolicam de cœlibatu clericorum; quam negare non potes. De qua loquuntur Patres Concilii Carthaginensis secundi, can. 2. ubi statuentes vel potius confirmantes legem Cœlibatus, addunt hanc rationem; *Ut, quod Apostoli docuerunt, & ipsa servavit Antiquitas, nos quoque custodiamus.*

18. QUARTA CONCLUSIO. Continentia, quam Apostoli Ministris Ecclesiæ præscriperunt, statim in Ecclesia, tam Orientali, quā Occidentali, recepta & servata est. Hoc patet

tet primò ex verbis concilii jam citatis : *Ut quod Apostoli docuerunt, & ipsa servavit Antiquitas.* Secundò, ex tua concessione. Nam cap. 10. n. 3. sic scribis: *Ecclesia semper vel ab ipsis ipsius incunabulis, ut mox ostendam, in suis ministris plurimum amavit, commendavit, & etiam interdum præcepit continentiam.* Et n. 9. ais, *fuisse decretum commune totius Ecclesiæ.* Nec opus est pluribus in re clara.

19. QUINTA CONCLUSIO. Subsecutæ sunt variæ leges Ecclesiasticæ, quibus eadem continentia Ministris Ecclesiæ imperata est. Et quidem dupliciter. Primò, ut non liceat illis uxores ducere, post susceptos ordines. Secundò, ut si ante susceptos ordines duxerint uxores, & postea susceperint ordines, nō liceat uti uxoribus, sed debeant perpetuam servare continentiam. Hujusmodi leges late sunt hooferè ordine. Primò à Concilio Elibertino (Anno Christi 313. aut 315. can. 33. *Placuit, in totum prohibere Episcopis, Presbyteris, Diaconis ac Subdiaconis positis in ministerio, abstinere se à conjugibus suis, & non generare filios. Quod quicumque fecerit, ab honore clericatus exterminetur.* (tom. 1 concilior.)

20. Secundò, à Concilio Carthagenensi secundo (circa Annum Christi 396.) can. 2. *Gmnibus placet, ut Episcopi, Presbyteri & Diaconi, vel qui Sacramenta cōtrectant, pudicitie custodes, etiam ab uxoribus se abstineant.* Et ratio additur: *Ut quod Apostoli docuerunt, & ipsa servavit Antiquitas, nos quoque custodiamus.* (tom. 1. concil.

21. Tertiò, à Siricio Papa, (circa idē tempus) in epistola ad Himerium Tharaconensem Episcopum cap. 7. *Plurimos Sacerdotes Christi atque Levitas, post longa consecrationis sua tempora, tam de conjugibus propriis, quàm etiam de turpi coitu, sobolem didicimus procreasse, & crimen suum hac præscriptione defendere, quia in veteri testamento Sacerdotibus ac ministris generandi facultas legitur attributa. Ecce, vocat crimen, quòd Sacerdotes Christi utantur propriis uxoribus. Et illorum defensionem mox refutat, asserens, Sacerdotes in veteri testamento habuisse etiam legem continentiae pro eo tempore, quo ministrabant in templo (verba illius §. 6. adducta sunt) ac deinde subjicit: *Quarum sanctionum Sacerdotes omnes atque Levitæ insolubili lege constringimur, ut à die ordinationis nostræ, sobrietati ac pudicitia, & corda nostræ mancipemus & corpora. Hic habes legem pudicitiae corporis, qua Sacerdotes constringuntur. Audi etiam pœnam, si hanc legem nō servant. Hi verò, (pergit Siricius) qui illiciti privilegij excusatione nituntur, & sibi asserunt veteri hoc lege concessum, noverint se ab omni Ecclesiastico honore, quo indignè usi sunt, Apostolica Sedis auctoritate dejectos, nec unquam posse veneranda attingere mysteria.* (tom. I. concilior.)*

22. Quartò, ab Innocentio I. (circa annum Christi 400.) in epist. ad Exuperiū, c. I. ubi repetit & confirmat legem à Siricio latam, his verbis: *Proposuisti, quid de his observari debeat, quos in Diaconij ministerio, aut in officio Presbyteri po-*  
 ryp o-



*rij positos, incontinentes esse aut fuisse, generati filij prodiderunt. De his, & divinarum legum manifesta est disciplina, & beata recordationis viri Siricij Episcopi monita evidentia commearunt, ut incōtinentes in officiis talibus positi, omni Ecclesiastico honore privarentur, nec admitterētur accedere ad ministerium, quod sola continentia oportet impleri. Est n. vetus admodum sacra legis autoritas jam inde ab initio custodita, quòd in tēplo, anno vicis sue habitare præcepti sunt Sacerdotes, ut servientes sacris oblationibus puros & ab omni labe purgatos, sibi vendicent divina ministeria, neq; eos ad sacrificia fas sit admitti, qui exercent vel cum uxore carnale consortium &c. (tom. 1. concil.)*

23. Quintò, à Concilio Agathensi (Anno Christi 506.) can. 9. Placuit etiam, ut si Presbyteri vel Diaconi conjugati, ad thorum uxorum suarum redire voluerint, Papæ Innocentij ordinatio, vel Siricij Episcopi autoritas, quæ est his canonibus inserta, servetur. (tom. 2. concilior.)

24. Sextò, à Concilio Aurelianensi tertio (An. Christi 537.) can. 7. Clerici vero, qui cum uxores non haberent, benedictione suscepta, conjugia crediderint eligenda, qui volentes absq; ulla reclamatione in atate fuerint legitima ordinati, tum ipsi mulieribus, quas acceperint, excommunicatione percillantur. (tom. 2. concilior.)

25. Septimò, à Concilio Aurelianensi quarto (Anno Christi 547.) can. 17. Ut Sacerdotes sive Diaconi, cum conjugibus suis non habeant communē lectum & cellulam, ne propter suspicionē carnalis cōsortij, religio maculetur. Quod

qui fecerint, juxta priscos canones, ab officio regredientur. Omitto reliquos canones & decreta, quæ posterioribus seculis statuta sunt. Omitto testimonia sanctorum Patrum, quæ habentur apud Bellarminum & Coccium.

26. SEXTA CONCLUSIO. Lex continentia seu cœlibatus, de qua hætenus dictum est, semper viguit in Ecclesia Occidentali, [nisi quòd in quibusdam fortè locis particularibus aliquantulum fuerit neglecta, ut notat Gabriel Vasquez 3 par. disp. 248. cap. 2.] At in Orientali non item. Nam Græci, tametsi post susceptos ordines non soliti sint uxores ducere, tamen si antea duxerint, possunt ordines suscipere, & simul uxores retinere. Nec tenentur ab earum consortio abstinere, nisi tempore vicis suæ, sicut in veteri testamento factum est. Hæc illorum consuetudo, in qua differunt ab Occidentalibus, cœpit à tēpore sextæ Synodi generalis (aut circiter) & huc usque perseverat. Vide Vasquez ibidem.

27. Venio nunc ad tuas falsitates & contradictiones. Primo asseris in titulo cap. 10. *Sacros Ministros ad cœlibatum jure non teneri*. Falsum est, quia tenentur jure Ecclesiastico, quod in supradictis canonibus sancitum est. Deinde tibi ipsi contradicis. Nam in eodem capite n. 3. expressè dicis, *Ecclesiam præcepisse continentiam*. Et hoc præceptum Ecclesiæ (n. 9.) vocas *commune decretum totius Ecclesiæ*.

28. Secundo asseris (cap. 10. n. 16.) *sextam Synodū, hoc est, Patres Trullanos permittere Presbyteris*

*byteris uxores.* Falsum est. Nam sexta Synodus nullos canones aut decreta promulgavit. Synodus a. Trullana, quam tu confundis cū sexta synodo, post sextam synodum celebrata est in palatio Imperatoris Justiniani, quod Trullum dicebatur. Sed non fuit legitima.

29. Tercio asseris (c. 10. n. 19.) *Siricium Papam commendasse quidem clericis cōtinentiam, nō tamen præcepisse.* Falsum est. Nam & præcepit continentiam, & pœnā constituit ijs, qui præceptum continentiae non servant. Utrumque colligitur ex verbis illius suprà citatis. Nā præceptum continetur illis verbis: *Quarū sanctio- num Sacerdotes omnes atq; Levitæ insolubili lege constringimur.* Pœna verò illis: *Noverint se ab omni Ecclesiastico honore dejectos.*

30. Quarto asseris (c. 10. n. 23.) *absolutam & perpetuam continentiam primum omnium indi- ctam esse presbyteris & Diaconis conjugatis à Cō- cilio Agathensi, can. 9.* Falsum est. Nam Conci- lium Agathense, canone citato, profitetur, se id statuere, quod jam antea à duobus Pontifi- cibus, Siricio & Innocentio fuerat statutum. Sic enim loquitur: *Placuit etiam, ut si Presbyteri vel Diaconi conjugati ad thorum uxorum suarum redire voluerint, Papæ Innocentiij ordinatio, vel Si- ricii Episcopi auctoritas, quæ est his canonibus inser- ta, servetur.*

31. Quinto asseris (c. 10. n. 35.) *in Occidenta- li Ecclesia multas esse expressas leges, quæ præcipi unt plenam & absolutam continentiam.* Rectè quidem. Sed contrarium dicis n. 70. asserens,

*tam in Occidente, quàm in Oriente, Presbyteris liberum mansisse, ut, qui possent capere, caperent.*

32. Sexto asseris (ibidem) in Orientali Ecclesia, nullam esse legem, aut decretum, aut constitutionem Ecclesiasticam, sive universalem, sive provincialem, quæ præcipiat plenam & absolutam continentiam. Contrarium dicis alibi. Nam n. 12. sic habes: Græci Patres, initio satagerunt, ut Diaconi cælibes tantum, hoc est, non uxorati, & sub promissione castitatis ac cælibatus, ad Diaconatus gradum proveherentur. Sic enim statuit Ancyranæ synodus. Et n. 16. Concilium Neocæsariense statuit, ne Presbyter uxorem ducat. Et n. 29. citra controversiam est, quòd Ecclesia Græca neque diffitetur, neque servare respuit, videlicet, nemini in sacris ordinibus constituto, licere uxorem ducere. Et ibidem: Sed in eo convenimus, quoad Episcopos, ut si conjugatus ad Episcopatum ascenderit, omnino ab usu uxoris cesset, & se pœnitentius contineat. Et n. 73. Si leges Ecclesiasticas, totius Ecclesiæ universalis antiquas, nec non antiquum usum earum, tam Occidentis, quàm Orientis spectes: nemini in sacris Ordinibus, à Subdiaconatu & suprâ constituto, licere uxorem ducere, si sit in gradu Ecclesiastico retinendus. Id enim constanter servavit & servat Ecclesia universalis, Græca pariter ac Latina.

33. Septimò asseris (cap. 10. n. 49. in fine) Ecclesiasticas leges, quæ præcipiunt cælibatum, ponere hominibus laqueum. Falsum est. Non ponunt laqueum, sed exigunt eam sanctitatem & ca-

& castimoniam à Sacerdotibus, quæ ipsorum officio consentanea est. Deinde injuriam facis illis omnibus, qui hujusmodi leges statuerunt. Et quis es tu, qui tot Pontificum & Conciliorum decreta audes accusare & traducere? Tu potius laqueum ponis, qui conaris sacerdotibus persuadere, non teneri ipsos ad continentiam, sed posse uxores ducere, & contra leges Ecclesiasticas in matrimonio vivere. Similis illi, qui suadebat primis parentibus, ut contra legem divinam comederent de ligno scientiæ boni & mali, adjiciens: *Nequaquam moriemini.*

34. Octavo asseris (n. 65.) *Ecclesiam non posse statuere legem, quæ certo hominum statu generatim adimat libertatem contrahendi matrimonium.* Verum quidem est, quòd absolutè loquendo non possit hoc facere: Sed falsum est, quòd non possit hoc facere, eo modo, quo nunc facit; nempe sub hac conditione: Si quis velit esse Presbyter aut Episcopus, debet servare continentiam. Nam per hujusmodi legē, non cogit quenkum ad continētiam, sed relinquit unicuique liberum, ut possit amplecti statum Ecclesiasticum, vel non amplecti; & consequenter, ut possit uxorem ducere, vel non ducere, prout placuerit. Deinde, tibi ipsi contradicis. Nam n. 73, asseris, *leges Ecclesiasticæ totius Ecclesia universalis, quæ cælibatum præcipiunt, posse abrogari per contrariam consuetudinem.* Ergo supponis hujusmodi leges, antequam abrogentur, recepras esse & obligare.

35. Nono asseris (n. 70.) *Episcopos olim, si conjugati essent in sui promotione, cessasse quidē in posterum ab opere nuptiarum; non tamen cessasse ex religione aut cautione, quasi putarent id eis minimē iam licere; sed ex devotione & amore perfectioris cuiusdam puritatis.* Falsum est, ut patet ex Siricio Papa, qui, ut supra dixi, ait *crimen esse, si Episcopi aut Presbyteri conjugati utantur propriis uxoribus.* At non esset crimē, si liceret illis uti. Deinde tibi ipsi contradicis. Nam paulo antē dicebas: *In eo convenimus, quo ad Episcopos, ut si conjugatus ad Episcopatum ascendat, omnino ab usu uxoris esset, & se penitus contineat.*

### CAPUT TERTIUM.

#### *An votum continentiae sit annexum, sacro ordini?*

1. **T**U negas lib. 2. cap. 11. n. 1. & trib. sequent. Ratio est, quia votū est promissio Deo facta: et promissio est actus perfectē liber & voluntarius in promittente. Huiusmodi autem actus non potest esse annexus sacro ordini, qui est externa tantū ceremonia. Non n. Ecclesia potest efficere, ut externa ceremonia necessario annexum habeat meū liberum & voluntarium actum, quo Deo promittam continentiam. Potest quidem exigere à me, ut huiusmodi actum eliciam; sed nō potest efficere, ut huiusmodi meus actus per se sit annexus externae ceremoniae.

2. Fru-

2. Frustra laboras, Antoni. Nos non dicimus, huiusmodi actuale & expressum votum annexum esse sacris ordinibus. Solùm asserimus, Clericos ex præcepto Ecclesiastico obligatos esse ad continentiam. Hanc obligationem, quatenus per præceptum Ecclesiæ annexa est sacris ordinibus, vocamus votum continentiae: Non quidem explicitum & expressum, de quo tu loqueris, sed quasi implicitum ac virtuale. Nam is, qui scit huiusmodi obligationem requiri ab eo, qui vult sacros ordines suscipere; certè, si liberè suscipit sacros ordines, censetur etiam liberè consentire in obligationem continentiae, quæ illis annexa est. Sicut is, qui liberè adit hæreditatem, cui scit annexum esse onus restitutionis; censetur etiam libere suscipere huiusmodi onus.

3. Sed objicis: *Huiusmodi votum, quale jam descriptum est, non obligat coram Deo, si non adsit internus animus votendi, quod sapè fit, sed solum præsumitur obligare. Ac proinde, qui susciperet sacros ordines sine interno actu votendi continentiam, non esset obligatus ad continentiam, sed posset uxorem ducere.* Respondeo. Verum est, votum non obligare, si non adsit internus actus votendi. Qui autem susciperet sacros ordines sine interno votendi actu, tamen si non obligaretur ad continentiam vi voti, quod nullum esse supponitur; obligaretur tamen vi præcepti Ecclesiastici, quod præcipit continentiam, ac proinde non posset uxorem ducere.

Y 5

4. Ite-

4. Iterum objicis : *Multi olim inviti ad Episcopatum vel Presbyterium pertracti sunt , ut Ambrosius , Augustinus , Paulinus , & alij . Ergo illi saltem non habuerunt internum actum liberum & voluntarium servandi perpetuam continentiam .* Respondeo . Non sequitur . Nam licet non libenter admiserint Episcopatum vel Presbyterium , id tamen non fecerunt , quòd inviti servarent continentiam ( quam post susceptos ordines servarunt libentissimè ) sed quòd inviti susciperent eam dignitatem , qua putabant se indignos esse . Est igitur duplex voluntas hìc distinguenda . Una suscipiendi dignitatem Ecclesiasticam : Altera servandi continentiam , quæ cum illa dignitate connexa est . Hæc posterior potest esse prompta & expedita , tametsi prior sit aliquo modo , ut sic dicam , coacta vel extorta . Simile est de eo , qui invitatus suscipit officium Regis vel Imperatoris , quia putat se tanto oneri imparè esse ; & tamen paratus est subire laborem , qui tali officio annexus est .

\*  
\*  
\*



## CAPUT QUARTUM.

*An votum continentia, quod sacris  
ordinibus annexum est, diri-  
mat matrimonium?*

1. **H**Oc dupliciter potest intelligi. Primò de obligatione servandi continentiam, quæ per legem Ecclesiasticam annexa est sacris Ordinibus, de qua dictum est præcedenti capite. Secundò, de voto expresso, quo quis liberè & voluntariè promittit Deo perpetuam continentiam, quando suscipit sacros ordines. Est igitur quæstio, An vel hoc votum, vel ista obligatio sit impedimentum, quod dirimat subsequens matrimonium? Utrumq; negas, lib. 2. cap. 11. n. 8. & seqq. Et probas duplici potissimum argumento.

2. Primò, quia pœnæ Ecclesiasticæ, quæ olim statutz sunt in eos, qui post susceptos ordines contrahunt matrimonium, sunt tâtum pœnæ depositionis à ministerio, vel excommunicationis. Nec in tota antiquitate reperire est ullum testimonium Patrum aut Conciliorum, quo hujusmodi matrimonia declarantur irrita & invalida. Quod confirmas variis exemplis.

3. Secundò, Votum simplex nō dirimit matrimonium: Ergo nec votum solenne, quia solennitas seu publica professio nihil addit  
voto

voto simplici. Hoc confirmas ex Apostolo 1. Timoth 5. II. *Adolescentiores viduas devota. Cum enim luxuriatae fuerint in Christo, volunt nubere: habentes damnationem, quia primam fidem irritam fecerunt. Si, inquis, matrimonium, quod huiusmodi viduae, post solenne votum castitatis contrahabant, fuisset irritum, non dixisset Apostolus, Volunt nubere, sed, Volunt scortari.* Hic addis auctoritatem Patrum & Conciliorum.

4. Respondeo. Quæ adfers de voto solenni, quo quis liberè & voluntariè, promittit Deo perpetuam continentiam, capite ultimo discutienda sunt, ubi de Monachis disputandum est. Ibi ostendam, votum solenne, non solum impedire, quod tu concedis; sed etiam dirimere matrimoniū, quod tu negas. Reliqua, quæ pertinent ad obligationē continentie, quæ per præceptum Ecclesiasticum sacris ordinibus annexa est, hoc loco examinanda sunt. De quibus sic sentio.

5. PRIMA CONCLUSIO. Matrimonium, quod olim, contrahabant clerici in sacris ordinibus constituti, erat quidem validū, sed tamen illicitum. Hoc concedis. Et quidem, quod fuerit validum, ex eo patet, quia in antiquis conciliis & canonibus nulla lex lata est, quæ declararet irritum & invalidum esse. Huc spectat primum Argumētum quod attulisti. Quod autem fuerit illicitum, ex eo constat, quia jure Ecclesiastico erat prohibitum. Quidquid autem lege Ecclesiastica prohibitum est, illicitè fit.

6. SE-

6. SECUNDA CONCLUSIO. Matrimonium, quod nunc contrahunt clerici in sacris ordinibus constituti, non solum est illicitum, sed etiam irritum & invalidum. Hoc posterius tu negas. At ego probo, quia nunc lata est lex Ecclesiastica, quæ hujusmodi matrimonium declarat esse irritum & invalidum, ut patet ex jure canonico, cap. *Ut lex.* 27. q. 1. Et ca. unico, de voto, in 6. & in Concilio Tridentino Sess. 24 can 9. Et ratio est, quia sicut Princeps Secularis potest ferre legem, qua decernat personas esse inhabiles ad civiliter contrahendum; ac proinde, si tales personæ præsumant contrahere, contractum illorum esse irritum & invalidum: Sic etiam potest Ecclesia statuere legem Ecclesiasticam, qua decernat certos homines esse inhabiles ad contractum matrimonii; ideoque si præsumant contrahere, contractum esse nullum. Et re ipsa id facit. Decernit enim eos inhabiles esse, qui clandestinè contrahunt, sine parochio & testibus; qui in certo gradu cognationis aut affinitatis contrahunt; qui in sacris ordinibus constituti contrahunt: ac proinde si præsumant contrahere, matrimonium esse invalidum.

7. Objicies fortè, quod solet objici, *legem Ecclesiasticam non posse derogare juri naturali. At ius naturale concedit hujusmodi matrimonia, de quibus jam dictum est: Ergo lex Ecclesiastica non potest illa fatere irrita & invalida.* Respondeo. Jus naturale quædam præcipit vel prohibet; quæ-

quædam libera permittit. Igitur lex Ecclesiastica non potest derogare jure naturali, in iis, quæ præcepta aut prohibita sunt. Potest tamen derogare, vel potius certi aliquid determinare in iis, quæ libera permissa sunt. Verbigratia. Jus naturale præcipit charitatem, temperatiam iustitiâ: prohibet furtum adulterium, homicidium. In his nō potest lex humana derogare juri naturali. Rursum: jus naturale permittit liberum usum rerum externarum, ut agrorum, fluminum, montium, fructuum, avium, piscium, pecorum: Et hoc sensu dici solet, jure naturali, omnia esse communia. At lex humana tollit hanc communitatem, & introducit divisionem ac proprietatem rerum, ut liceat mihi dicere: Hic ager est meus, non tuus; & sic deinceps. Idem facit Ecclesia circa matrimonium. Jus naturale permittit liberum contractum matrimonii in multis casibus. At lex Ecclesiastica in quibusdam tollit hanc libertatem. Et determinat certos gradus, in quibus non liceat contrahere: Determinat certa impedimenta, quæ dirimant matrimonium. Inter quæ impedimenta, est sacer Ordo clericorum. Sed de hoc alibi latius.

\* \* \*

## CAPUT QUINTUM.

*An sacer Ordo sit Sacramentum.*

1. **I**N sacro Ordine duo spectanda sunt. Primò, externa actio, qua ordinantur ministri Ecclesiæ. Quæ vocari solet sacra ordinatio. Secundò, interna potestas, quæ confertur per externam actionem. Quæ vocari solet potestas Ordinis. Alij vocant characterem Ordinis. Augustinus, ut infra videbimus, vocat jus dandi Baptismum. Hoc posito, quæstio est, *An sacer Ordo sit Sacramentum?* Quod etiam dupliciter potest intelligi. 1. An ordinatio sit actio Sacramentalis? 2. An potestas Ordinis sit proximus effectus Sacramentalis, proveniens ex actione Sacramentali? Tunc gaslib. 2 cap. 4. Catholici affirmant. Tibi patrocinantur Lutherani & nonnulli Calvinistæ: Nobis Scriptura, & Consensus Ecclesiæ. Unde duplex sumi potest argumentum.

2. Primum est: Tria requiruntur & sufficiunt ad Sacramentum novæ legis, ut Catholoci & adversarij fatentur. 1. Externa ceremonia, vel ritus, vel signum, vel symbolum: quæ omnia idem valent. 2. Institutio Christi. Nam externa ceremonia non est apta pro Sacramento, nisi à CHRISTO sit insti-

instituta vel deputata. 3. Promissio gratiæ; quæ debet esse annexa externæ ceremoniæ à Christo institutæ. Nam Christus in institutione Sacramenti, solet promittere gratiam illis omnibus, qui dignè & legitime usurpant externam ceremoniam, ab ipso institutam. At hæc tria reperiuntur in sacra ordinatione, ut patet ex scriptura, 1. Timoth. 4. 14. *Noli negligere gratiam, quæ data est tibi per Prophetiam cum impositione manuum Presbyterij.* Et 2. Timoth. 1. 6. *Admonete, ut resuscites gratiam Dei, quæ est in te per impositionem manuum mearum.* Ubi aperte fit mentio gratiæ, quæ datur Ministris Ecclesiæ per impositionem manuum, tanquam pex externam ceremoniam à Christo institutam. Nam illa ceremonia non potest institui ab Apostolis, quia illi non habebant potestatem instituendi ceremoniam, per quam gratia infallibiliter conferretur legitime accedentibus.

3. Accedit consensus Ecclesiæ. Qui colligi potest ex duplici capite. Primo ex Augustino lib. 2. contra Parmenianum, cap. 13. Ubi disputans contra Donatistas asserentes, Baptismum quidem non amitti per hæresin, sed tamen sacrum Ordinem amitti, sic scribit: *Nam illud, quod quidam eorum veritate convicti dicere cœperant. Baptismum quidem non amittit, qui recedit ab Ecclesia, sed jus tamen dandi amittit: multis modis apparet frustra & inaniter dici. Primò, quia nulla ostenditur causa, cur ille, qui ipsum Baptismum amittere non potest, jus dandi amitte-*

*mittere possit. Utrumq; enim Sacramentum est: & quadam consecratione utrumq; homini datur: illud, cum baptizatur; illud, cum ordinatur: ideoq; in Catholica Ecclesia utrumque non licet iterari. Hæc postremam partem probat ex praxi Catholicorum; quia sicut is, qui recedit ab Ecclesia Catholica, & postea ad eam redit, non solet iterum baptizari; ita etiam non solet iterum ordinari. Et postea subjicit: *Sed si nos malè facimus, ipsi explicent, quomodo Sacramentum baptizati non possit amitti, & sacramentum ordinati possit amitti: quoniam dicunt. Recedens ab Ecclesia, Baptismus non amittit, jus dandi tamen amittit. Si enim utrumque Sacramentum est, quod nemo dubitat, cur illud non amittitur, & illud amittitur? Neutri Sacramento injuria facienda est.**

4: Hic tria asserit Augustinus. 1. Sacrum Ordinem esse Sacramentum. 2. Non minus esse Sacramentum, quam Baptismus. 3. Neminem dubitare de hac re. Unde sequitur, quod mihi probandum est, omnes fideles, quotquot vixerunt tempore Augustini, certo credidisse, sacrum Ordinem esse verum Sacramentum, sicut Baptismus est. Cur igitur & tu non credis, Antoni? Cur à communi consensu Catholicæ Ecclesiæ temerè recedis? Nimirum, ostendis te Apostatam ac hæreticum esse: Et quidem deteriorem, quam erant Donatistæ, qui in isto articulo à Catholicis non dissentiebant. Tametsi enim putarent, hoc discrimen esse inter Baptismum & Ordinem,

Z

quod

quòd Baptismus amitti non possit, Ordo autem amitti possit; fatebantur tamen utrumque esse verum Sacramentum.

5. Idem Ecclesiæ consensus colligitur ex Concilijs. Primo ex Concilio Chalcedonensi (quod fuit unum ex quatuor primis generalibus & Oecumenicis,) act. 15. can. 2. Ubi statuit pœnam in Episcopos, qui accipiunt pecuniam pro ordinatione Clericorum. Rationem addit, quia cēsentur vendere gratiā Dei, quæ vendi non potest. Supponit ergo gratiam Dei conferri per sacram Ordinationē, ac proinde sacram Ordinationem esse Sacramētum. Idē facit Cōciliū Braccarense 2. can. 3. his verbis: *Placuit, de ordinatione Clericorum, Episcopi munera nulla accipiāt, sed sicut scriptum est, q̄ gratis donante Deo accipiunt, gratis dent. Non aliquo precio gratia Dei, & impositio manū venundetur.*

6. Deinde ex Concilio Florentino & Tridentino, ubi sacer Ordo expressè numeratur inter septem Sacramenta novæ legis. Nec obstat, quod tu impudenter objicis; *Hæc duo Concilia non fuisse legitimè celebrata; non fuisse generalia; non fuisse à tota Ecclesia acceptata & approbata; fuisse in multis ex diametro antiquis Ecclesiæ Concilijs contraria.* Mera hæc calumnia est: eoq; major & intolerabilior, quòd in tui creatione ad Archiepiscopatum Spalatensem, cum juramento promiseris receptionem Concilij Tridentini, ut bene notant Theologi Colonienfes in sua censura.

7. Sed audiamus, quid à communi Ecclesiæ



clesiæ sententia pertraxerit te in errorem Lutheranorum. Præcipua argumenta, quæ adfers, sunt quatuor. Primum est : Si Ordo est Sacramentum imprimens characterem, indelebilem, sicut Baptismus, debent illi convenire hæc tria. 1. ut semper fortietur suum primum & proximum effectum in quocunque homine, quantumvis fide & indignè accedente, id est, ut cuicumque accedenti conferat potestatem Ordinis. 2. ut qui semel ordinatus est, & accepit potestatem Ordinis, nunquam possit illam amittere. 3. ut semper valide possit ea uti, etiamsi indignè utatur. At hæc tria non conveniunt sacro Ordini : Ergo sacer Ordo non est Sacramentum. Minorem probas autoritate Cypriani, Dionysii Areopagitæ, Hieronymi, Gelasij, Augustini, Leonis, & aliorum Patrum, de quibus sigillatim dicendum est.

8. Ex Cypriano lib. 1. epistol. 4. citas hæc verba : *Sollicitè ac religiosè considerantes in ordinationibus Sacerdotum, non nisi immaculatos & integros Antistites eligere debemus, qui dignè & sanctè Deo sacrificia offerentes, audiri in precibus possint, quas faciunt pro plebis Dominicæ incolumitate, cum scriptum sit: Deus peccatorem non audit, sed si quis Deum coluerit, & voluntatem ejus fecerit, illum audit. Propter quod plena diligentia, & exploratione sincera, oportet eos ad Sacerdotiū deligi, quos à Domino constat audiri. Nec sibi plebs blandiatur, quasi immunis à contagione delicti esse possit, cum Sacerdote peccatore communicans,*

Z 2

& ad

*& ad injustum & illicitum prepositi sui Episcopatum, consensum suum commodans: cum per Oseam Prophetam comminetur, & dicat censura divina: Sacrificia eorum, tanquam panis luctus, omnes qui manducant ea, contaminabuntur. Docens scilicet & ostendens, omnes omnino ad peccatum constringi, qui fuerint prophani & injusti Sacerdotis sacrificio contaminati. Quod idem in Numeris manifestari invenimus, quando Chore, Dathan, & Abiron, contra Aaron Sacerdotem sacrificandi sibi licentiam vendicaverunt.*

9. Ex hoc loco Cypriani sic argumentaris: Si Ordo esset Sacramentum tale in suo genere, qualis est Baptismus, jam Sacerdos etiam indignissimus, eo initiatus, sacrificium legitimum & sanctum conficeret. At non conficit ex sententia Cypriani. Primò, quia Cyprianus dicit, panem ab eo consecratum, esse panem luctus. Secundò, dicit plebem ab huiusmodi sacrificijs debere abstinere: & nisi abstineat, contaminari. Tertiò, confert Episcopum indignè ordinatum cum Chore, Dathan, & Abiron, qui non fuerunt Sacerdotes, sed meri usurpatores officij Sacerdotalis.

10. Resp. Malè interpretaris Cyprianum. Erat illi proposita quaestio, an liceret plebi communicare cum Martiale & Basilide Episcopis, qui peccato idololatriæ & alijs facinoribus erant contaminati? Aliqui affirmabant; alij negabant. Respondet Cyprianus, non licere. Et ex hac occasione, simul explicat, quales debeant esse Episcopi ac Sacerdotes, ut à

Deo

Deo exaudiantur. Hoc posito, facile diluuntur, quæ objicis. Ac primò, non dicit Cyprianus, panem ab Episcopo consecratum esse panem luctus, ut tu falsò illi affingis; sed citat testimonium Osee Prophetæ cap. 9. v. 4. ubi de Israelitis, qui falsos Deos adorabāt, sic loquitur: *Non libabunt Domino vinum, & non placebunt ei. Sacrificia eorum, quasi panis lugentium: Omnes, qui comedent eum, contaminabūtur: quia panis eorum anima ipsorum, non intrabit in domum Domini.*

II. Sensus hujus loci consistit in duabus propositionibus. Una est: panis lugentiū, qui reperitur in domo alicujus mortui, secundum legem Moysaicam, immundus & contaminatus est, & qui comedunt talem panem, sunt etiam immundi & contaminati (Num. 19. 14.) Altera: sicut panis lugentium mortuum contaminatus est; sic etiam sacrificia & libamina populi Israelitici contaminata sunt. Et sicut illi, qui comedunt de pane lugentium mortuum, fiunt immundi & contaminati; sic etiam, qui comedunt de sacrificijs, & bibunt de libaminibus populi Israelitici, fiunt immundi & contaminati. Scis causam Antoni. Nam populus Israel, tempore Osee Prophetæ, ex vna parte agnoscebat verum Deum, & ex altera colebat falsos Deos, iuxta illud 3 Reg. 18. 21. *Usquequo claudicatis in duas partes? Si Dominus est Deus, sequimini eū: Si autem Baal, sequimini illum.* Sacerdotes autem tametsi offererēt sacrificia, sub prætextu colendi Deum, non tamen

legitimè offerebant, ex triplici defectu. Primo, quia claudicabant in duas partes, ut dixi. Secundò, non offerebāt ad honorē Dei, sed ad propriā utilitatē: nimirum, ut ex vino, pane, & pecoribus, q̄ populus in sacrificium illis dabat, possent bibere & epulari. Et hoc est, quod dicit Oseas loco citato: *panis eorum, anima ipsorum*. Tertiò, non offerebant Hierosolymæ in tēplo, qui locus erat designatus pro sacrificiis, sed alibi, contra expressum Dei mandatum. Et huc spectat illud Oseæ: *Non intrabit in domū Domini*. Igitur ex hoc triplici defectu, sacrificia eorū nō placebant Deo, sed censebātur immunda & contaminata: & qui comede-bant ex illis, fiebant etiam immundi. & contaminati, quatenus erant participes peccati.

12. Ex hac duplici propositione, altera de pane lugentiū, altera de sacrificiis Israëlitarū, deducit Cyprianus tertiam propositionem, q̄ est huiusmodi: Sacrificium, q̄ offerunt Martialis & Basilides Episcopi, nō placet Deo, ex parte offerentiū; quia ipsi sunt peccato idolatriæ, & aliis flagitiis cōtaminati: & populus, qui sponte communicat cum huiusmodi Episcopis, quos scit esse flagitiosos, sit particeps peccati illorū, p̄sertim cum possit habere bonos Episcopos, si vellet. Et per hanc propositionē respondet ad quæstionem, q̄ illi erat proposita. Dixi *ex parte offerentiū*, quia ex parte rei oblate est alia ratio. Nam si Martialis & Basilides offerebant verū sacrificiū Eucharistiæ secundū ritum Catholicorū, & institutionē Christi, non poterat esse defect⁹ ex parte rei

terei oblata, sed tñ ex parte offerentium, qui erant indigni ppter peccatum idololatrię. Et similiter populus non poterat cõtaminari ex eo pñcile, quia erat particeps illi' sacrificii oblati, sed q̃a erat particeps peccati offerentiũ.

13. Quod addis, Cyprianũ conferre Episcopos indignè ordinatos cũ Chore, Dathan & Abiron, qui nō erant Sacerdotes, sed usurpatores officii sacerdotalis, distinguendum est. Confert illos quoad peccatũ; non quoad potestaté. Nam sicut Chore, Dathan, & Abiron, in eo peccabant, q̃ indignè ambirent Sacerdotium; sic mali Episcopi in eo peccāt, quòd indignè accipiunt Sacerdotium. At in eo differunt, quòd illi, tametsi ambirent Sacerdotium, non tamen adepti sunt; ac proinde non habebant potestatem sacrificandi. Hi v. non solũ ambiunt, sed etiam impetrāt sacerdotium; ideoq; habent potestaté Ordinis, tametsi indignè accipiant, & indignè utantur. Hęc sufficiāt de primo Cypriani testimonio.

14. Secundò, ex eodẽ Cypriano li. 4. epist. 2. post medium, citas hęc verba: *Episcopatum tenere non posset, etiã si Episcopus prius factus, à Coepiscoporum suorum corpore, & ab unitate Ecclesie descisceret; cùm Apostolus admoneat, ut invicẽ nosmetipsos sustineamus, nec ab unitate, quam Deus constituit, recedamus, & dicat: Sustinentes invicem in dilectione, satis agentes servare unitatem Spiritus, in conjunctione pacis. Qui ergo nec unitatem Spiritus, nec conjunctionem pacis observat, & se ab Ecclesia vinculo, atque à Sacerdotum collegio separat, Episcopi nec potestatem potest*

*habere, nec honorem, qui Episcopatus nec unitatem voluit tenere, nec pacem.* Hinc infero, potestatem Ordinis separari posse ab Episcopo legitime ordinato, si fecerit schisma.

15. Resp. Non loquitur de potestate Ordinis, sed jurisdictionis. Nam potestas Ordinis amitti non potest, ut expresse docet Augustinus lib. 2. contra Parmenianum, c. 13. Ratio Augustini est, quam superius attigi, quia sicut Episcopus, qui recedit ab Ecclesia, & postea redit, non solet iterum baptizari, sic etiam non solet iterum ordinari: Ergo signum est, quod sicut Baptismus non amittit, ita nec sacrum, Ordinem amiserit.

16. Quod si contendas Cyprianum putasse, potestatem Ordinis auferri posse ab Episcopo per hæresin: Jam contendis illum errasse cum Donatistis, quos loco citato refutat Augustinus. Dicebāt Donatistæ, Baptismus à Sacerdote vel Episcopo hæretico collatum, non esse validum. Ut defenderent hunc errorem, assumebant alium, nempe Sacerdotem vel Episcopum, quando sit hæreticus, amittere potestatem Ordinis, & ideo non posse valide baptizare: ac proinde, qui ab illo baptizati essent, ab alio Catholico rebaptizari oportere. Vide ne injuriā facias & Cypriano, & tibi ipsi. Cypriano quidem, si dicas illum errasse cum Donatistis. Tibi, si asseras potestatem Ordinis à te ablatam esse, quando separasti te ab unitate Ecclesiæ; & Schisma, non dico Anglicanum, sed Antonianum amplexus es, quod ab Anglicano diversum est.

17. Ter-

17. Tertiò ex Dionysio Areopagita in epist. ad Demophilum citas hæc verba: *Quod si Sacerdotum Ordo illustrandi vim habet, profectò penitus abhærret à Sacerdotum Ordine atque facultate, is, qui illustrandi vi non est præditus, ac multo magis etiam is, qui illustratus non est. At mihi quidem videtur audax & temerarius, si quis ea sibi sumat, quæ sunt propria Sacerdotum, neq; metu & pudore à divinorum tractatione præter captum ac meritum deterreatur; putatque Deum ignorare, quæ ipse sibi est conscius, & sperat se decepturum eum, qui à se falso nomine appellatur Pater, audetq; scelestus suas, ut ita dicam, maledictiones, (neque enim preces dixerim) in divinis mysteriis, Christi imitatione proferre. Non est iste Sacerdos, non est, sed inimicus fallax, irrisor sui, lupusq; in gregem Domini ovina pelle armatus. Unde infer, hominem imperitum non esse capacem Sacerdotii: ac proinde, etiamsi ordinetur, non tamen fieri verè Sacerdotem.*

18. Respondeo. Pervertis sensum Dionysii. Non enim absolute asserit, homines imperitos, etiamsi ordinentur, nullo modo fieri Sacerdotes; sed non fieri tales, quales esse oportet. Quod verissimum est. Sicut etiam Apostolus, (1. Tim. 3. 1.) non absolute asserit, nullum fieri Episcopum, nisi irreprehensibilem, sobrium, prudentem, ornatum, pudicum, hospitalem, doctorem: Sed ait hujusmodi qualitates seu virtutes requiri in Episcopo, si suo officio debeat satisfacere. Igitur duo spectanda sunt in Sacerdote. 1. Potestas Ordinis.

Z 5

2. Suff-

2. Sufficiens dispositio ad exercitium illius potestatis. Qui utrumque habet, perfectus Sacerdos est: qui prius tantum sine posteriori, Sacerdos quidem est, non tamen in suo genere perfectus. Et hoc sensu intelligendus est Dionysius.

19. Quartò adducis Hieronymum (in cap. i. ep: ad Galat.) asserentem, promotos ad Sacerdotium modis illegitimis, non esse verè ordinatos. Verba Hieronymi sunt hæc: *Tertium Apostolorum genus, quod ab homine, non à Deo, est, cum hominū favore & studio aliquis ordinatur: ut nunc videmus plurimos, non Dei iudicio, sed redempto favore vulgi, in sacerdotium subrogari.* Respōdeo. Hieronymus nō dicit, quod tu dicis. Non dicit eos, qui favore hominū ordinantur Sacerdotes, non verè ordinari: Sed, non vocari ad Sacerdotium à Deo, sed ab homine. Hoc non obstat, quo minus verè ordinentur. Nā hæc duo distinguenda sunt. 1. Deus vocat, seu interius excitat hominem ad sacrum Ordinem suscipiendum. 2. Deus in susceptione sacri Ordinis operatur. Hoc posterius potest disjungi à priori. Sicut fit etiam in Baptismo. Nam Judæus, qui propter solam spem lucri temporalis, indignè accedit ad Baptismum; non censetur à Deo vocari ad suscipiendum Baptismum; & tamen Deus operatur in Baptismo, quem ille suscipit: Non quidem dādo illi gratiam, qua indignus est, sed conferēdo characterem. Idem dico de sacro Ordine. Sicut ergo potest aliquis verè baptizari, etiā si

à Deo



à Deo nō sit vocatus ad Baptismum; ita potest etiam verè ordinari. Et in tali casu, Deus non dicitur autor Sacramēti, quoad accessum, sed quoad effectum seu characterem.

20. Quintò ex eodem Hieronymo (in cap. 4. epist. ad Ephes.) adducis hæc: *Ut qui Pastor est, esse debeat & Magister: nec in Ecclesiis, quamvis sanctus sit, Pastoris sibi nomen assumere, nisi possit docere, quos pascit.* Respondeo. Aliud est, aliquem ordinari Sacerdotem, & accipere potestatem Ordinis: aliud, fieri pastorem & Doctorem populi. Hieronymus non dicit, Magisterium & doctrinam esse necessariam conditionem, sine qua nemo possit consecrari Sacerdos; sed sine qua nemo possit fieri pastor ovium, & per se instruere populum in fide ac pietate. Quod verissimum est.

21. Sextò eundem Hieronymum citas (in cap. Sophoniæ,) ubi sic ait: *Sacerdotes, qui Eucharistia serviunt, & sanguinem Domini populis ejus dividunt, impiè agunt in legem Christi, putantes Eucharistiam imprecantis verba facere, non vitam: & necessariam esse tantum solennem orationem, & non Sacerdotum merita.* Hinc infer malos Sacerdotes non verè consecrare Eucharistiam, ac proinde potestatem Ordinis auferri per peccatum. Respondeo. Si ita pergis Antoni, turbabis totam Ecclesiam. Nam si mali Sacerdotes amittunt potestatem Ordinis per peccatum, necesse est, & te, & reliquos omnes Sacerdotes, per primū peccatū, quod post susceptos Ordines perpetrastis, amisisse.

fisse potestatem Ordinis, & non amplius esse Sacerdotes. Unde ulterius sequitur, toties commississe vos Sacrilegium, quoties Eucharistiam conati essetis consecrare; quoties absolutionis Sacramentum impendere; quoties sacros Ordines conferre. Et quis obsecro erit securus in conscientia, si cogitet se nunquam verè accipere Eucharistiam, vel absolutionē, vel sacros Ordines, si accipiat à Sacerdote vel Episcopo in peccato mortali existente: Schismaticus es, Antoni.

22. Porro Hieronymus, quem adducis, longè abest à tuo errore. Cùm enim ait: *Sacerdotes impie agere, qui putant Eucharistiam imprecantis verba facere, non vitam*: nō loquitur præcisè de consecratione panis & vini Eucharistici, quasi asserat, panem & vinum non consecrari per verba consecrationis, sed per bonam vitam Sacerdotis, quia constat hoc falsum esse: sed loquitur de Eucharistia, id est, de gratiarum actione, quæ exhibetur Deo à Sacerdote per oblationem sacrificii Eucharistici. Est ergo hic sensus: Sacerdotes impie agūt, qui putant se Deo gratiarum actionem exhibere per solam consecrationem, etiamsi malè vivant. Quem sensum aliis verbis explicat D. Thomas 3 p. quæst. 82. art. 5. ad 1. cùm ait: *Hieronymus improbat errorem Sacerdotum, qui credebant se dignè posse Eucharistiam consecrare ex hoc solo, quod sunt Sacerdotes, etiamsi sint peccatores.*

23. Septimo citas Gelasium ( apud Gratianum

tianum cap. Sacrosancta. i. quæst. i.) ubi ait: *Sacrosancta religio, quæ Catholicam continet disciplinam, tantam sibi reverentiam vendicat, ut ad eam quilibet, nisi pura conscientia, non audeat pervenire. Nam quomodo ad divini mysterij consecrationem cælestis Spiritus invocatus adveniet, si Sacerdos, qui eum ad se deprecatur, criminosis plenus actionibus reprobetur.* Hinc etiam infero, Eucharistiam à malo Sacerdote invalidè consecrari. Addis D. Thomam 3. p. q. 82. art. 5. ad 2. distorquere Gelasii verba, quasi dicta sint contra eos Sacerdotes, qui se dignè putant consecrare Eucharistiam, ex eo, quòd sint Sacerdotes, tametsi peccatorum sordibus immundi sint. Respondeo. Falsum est, Antoni. Non dicit hoc D. Thomas de verbis Gelasii, sed Hieronymi, ut paulo antè ostendi. Gelasium aliter interpretatur. Nempe Spiritum sanctum non advenire ex merito mali Sacerdotis, sed ex virtute Christi, cujus verba profert Sacerdos. Hanc interpretationem, quæ bona est, dissimulasti; & aliam, mala fide, in ejus locum substituísti. Sed Apostatæ non aliter docentur à suo Magistro.

24. Octavo citas Augustinum (in Dial. 65. quæstionum, quæst. 64.) ubi ait: *Apostolorum sunt genera quatuor: à Deo, non per hominem: à Deo, sed per hominem: per hominem tantum: & ex se. A Deo etenim missus est Moyses. A Deo per hominem, Jesus Nave. Per hominem tantum, sicut nostris temporibus, multi favore vulgi in sacerdotium subrogati sunt. Ex se autem, sicut sunt ipsi*  
Pseu-

*Pseudopropheta.* Ex quo concludis, Sacerdotes, qui favore vulgi ordinati sunt, non esse verè ordinatos. Respondeo. Augustinus non est autor illius Dialogi, ut nosti. Deinde jam antè ad similem Hieronymi sententiam respòsum est. Nec opus est hîc repetere.

25. Nono citas Leonem Papam (epist. 95.) asserentem, promotos contra canones non suscipere Ordinem; ac proinde Ordinem non esse Sacramentum. Verba Leonis sunt hæc: *Nulla ratio finit, ut inter Episcopos habeantur, qui nec à Clericis sunt electi, nec à plebibus expetiti.* Et ibidem: *Quis ambigat non esse eis tribuendum, quod non docetur fuisse collatum?* Respondeo. Hæc verba non habentur epist. 95. sed 90. ad Rusticum Narbonensem Episcopum. Nec integrè à te citata sunt. Integrè sic habent: *Nulla ratio finit, ut inter Episcopos habeantur, qui nec à Clericis sunt electi, nec à plebibus expetiti, nec à provincialibus Episcopis, cum Metropolitanis iudicio consecrati.* Unde cùm saepe questio de malè accepto honore nascatur, quis ambigat, nequaquam istis esse tribuendum, quod non docetur fuisse collatum? Hæc verba, Antoni, si quem tangunt, tē tangunt. Nam si Angli hoc tempore quærent ex Leone Papa: An Marcus Antonius debeat inter Episcopos haberi, cùm in Anglia nihil constet de ipsius ordinatione; responderet sine dubio; nulla ratio finit, ut inter Episcopos Angliæ habeatur, qui ab Episcopis Angliæ cū Metropolitanis iudicio consecratus non est: nisi doceat, alibi honorem Episcopalem sibi col-

collatum esse. Hoc doce, & cessabit quæstio. Sed, si docere id nō posses, an ideo valebit hæc consequentia: Antonius non est legitimè ordinatus; Ergo ordinatio non est Sacramentū? Absit Non pendet natura Sacramenti à defectu unius hominis.

26. SECUNDUM ARGUMENTUM: Simoniaci; quando ordinantur, nihil accipiunt; & hæretici, quando ordinant, nihil conferunt: Ergo Ordo non est Sacramentum. Antecedens probas ex Patribus. Primò ex Gregorio lib. 7. epist. 110. ubi sic habet: *quicumque Sacerdotium studet pretij datione mercari, non officium, sed nomen attendit: non esse, sed dici tantum Sacerdos, concupiscit.* Respondeo. Gregorius non loquitur de effectu Ordinationis, sed de intentione illius, qui Simoniacè ordinatur. Intentio illius duplex est. Una, ut habeat titulum, honorem, & dignitatem sacerdotij; non autem, ut re ipsa præstet officium, quod à vero Sacerdote exigitur. Altera, ut possit fieri Sacerdos sine prævio examine de doctrina & moribus. Utramq; intentionem explicat Gregorius. Priorem quidem, verbis jam citatis. Posteriores verò his sequentibus: *Quid scilicet? quid per hoc aliud agitur, nisi ut nulla de actu probatio, nulla sollicitudo de moribus, nulla sit de vita discussio: sed ille solummodo dignus, qui dare pretium suffecerit, aestimetur?* Non negat tamen Gregorius, quin Ordinatio sit valida.

27. Secundò ex Ambrosio lib. de dignit. Sacerdotal. cap. 5. ubi sic scribit: *Ergo gratiam,*  
*cum*

cum ordinareris, non suscepisti, quia gratuito eam non meruisti. Et ideo frater, si gratiam non accepisti, quomodo Episcopus effici potuisti? Aurum dans perdidisti, & gratiam sanctam non acquisisti. Hic per gratiam ut tu interpretaris, intelligit potestatem Ordinis, quam accipit Simoniacè ordinatus. Respondeo. Vera interpretatio est hæc. Ambrosius instituit colloquium inter se & alium Episcopum Simoniacè ordinatum; his verbis: Interrogo tamen fratrem & Coepiscopum nostrum, quia & ego Episcopus sum, & cum Episcopo loquor. Dic ergo mihi paulisper frater Episcope, cum dares pecuniam, quid accepisti? Gratiam Episcopalem accepi. Ergo interrogo te: hæc gratia, cur tali vocabulo nuncupatur? Respondet: cur, inquis? ut reor, pro eo, quod gratis datur, ideo gratia vocitatur. Ergo si gratia gratis datur, & auro non aestimatur, à te cur gratia pecuniis comparatur? Respondet: Non, inquit, mihi daretur, si pecuniis non emeretur: Nec Episcopus fuisset ordinatus, si pecunias non dedissem. Ergo, ut apparet, ex responsionibus tuis, gratiam cum ordinareris, non suscepisti, quia gratuito eam non meruisti. Et ideo frater, si gratiam non accepisti, quomodo Episcopus effici potuisti? Nam & ad Discipulos suos Dominus dicit: Gratis accepistis: gratis date. Cur ergo gratuitam existimasti te pretio possidere gratiam? nam ut video, aurum dans perdidisti, & gratiam sanctam non acquisisti: Adhuc tamen semel adjiciens, fratrem perquiro Episcopum, ne quid de approbamentis veridicis nos prætermisisse videamur. Quis dat, frater, Episcopalem gratiam, Deus, an homo? Respon-

des

*des sine dubio: Deus. Sed tamen per hominem dat Deus. Homo imponit manus: Deus largitur gratiam. Sacerdos imponit supplicem dextram: & Deus benedicit potenti dextra. Episcopus initiat Ordinem, & Deus tribuit dignitatem. O justitia, ô aequitas! Si homini pecunia datur, qui nihil in Ordine amplius operatur; nisi solum servitium, quod ei creditur; cur Deo totum negatur, qui ipsum Ordinem tibi largitur?*

28. In hoc colloquio proponit Ambrosius tres potissimum quæstiones Episcopo Simoniacè ordinato, ut eum capiat. Prima est, *quid accepisti in Ordinatione? Accepi gratiam Episcopalem.* Altera, *cur vocatur gratia? Quia gratis datur.* Tertia, *quis eam dat? Deus per ministerium hominis.* Et ex responsione ipsius, dupliciter illum capit. Primò, *si gratia Episcopalis datur gratis; ergo illam non accepisti, quia non accepisti gratis, sed pecuniam numerasti.* Secundò, *si Deus illam dat cur pro eo numeras homini pecuniam, & non Deo? Gratiòse autem ludit in vocabulo gratiæ.* Nam tametsi Episcopus Simoniacus, per gratiam intelligat dignitatem & potestatem Ecclesiasticam; Ambrosius tamen, ut reducat illum ad sanam mentem, intelligit etiam gratiam Sacramentalem, præsertim cum ait: *Homo imponit manus: Deus largitur gratiam.* Alludens ad illud Apostoli 2. Tim. 1. 6. *Admoneo te, ut resuscites gratiam Dei, quæ in te est, per impositionem manuum mearum.* Item, cum ait: *Aurum dans perdidisti, & gratiam sanctam non acquisisti.* Hinc tria colligo ex sen-

rentia Ambrosij. Primò, Simoniacè ordinatum non accipere gratiam Sacramentalem: *Gratiam sanctam non acquisisti.* Secundò, accipere tamen potestatem Ordinis: *Cur Deus totum negatur, qui ipsum Ordinem tibi largitur?* Tertiò, Sacrum Ordinem esse Sacramentum: *Homo imponit manus: Deus largitur gratiam.*

29. Tertiò objicis autorem operis imperfecti, (Homil. 53. apud Chrysost.) ubi asserit, *hos ordinari à Deo; injustos autem minime.* Et Clementem lib. 8. Constit. Apostolic. cap. 1. ubi similiter asserit, *Episcopos imperitos, non esse Episcopos, nec à Deo consecratos, sed ab hominibus.* Respondeo. Confundis omnia. Nam hic agitur de Simonia: & probandum tibi est, Simoniacè ordinatos, non esse verè ordinatos. At hi duo autores, quos citas, nihil dicunt de Simonia, sed de imperitia & malitia eorū, qui accedunt ad Ordines. De quibus jam supra dictum est in primi argumenti solutione. Eò te remitto.

30. Quartò objicis Tharassium Patriarchā Constantinopolitanum in epist. ad Adrianium Papam (apud Gratianum cap. Eos qui. 1. quæst. 1.) qui ait: *Quamquam* (Simoniacè ordinatus) *nomine sacerdotium sortitus est; sed in eum falsò nomen istud conferri, re ipsa comprobatur.* Itē: *Cō-*  
*peritissimum quoque est, in ipsis sancti Spiritus gratiā non esse, aut sacerdotij sanctificationem; & quod nō acceperunt, non habent.* Respondeo. Verum est, quod dicitur in hoc posteriori testimonio, Si-

monia-



moniacos in Ordinatione, non accipere gratiam sanctificantem. Prius testimonium non habetur apud Gratianum loco à te citato. Nec etiam in Epistola Tharasilj ad Adrianum, quæ extat tom. 3. Conciliorum.

31. Quintò ex Gregorio VII. (Lib. 6. Regist. ad ep. 5. in Decret.) objicis hæc verba: *Ordinationes, quæ interveniente pretio, vel precibus, vel obsequio alicujus personæ, impenso; vel quæ non communi consensu cleri & populi, secundum canonicas sanctiones fiunt, & ab his, ad quos consecratio pertinet, non comprobantur, infirmas & irritas esse dijudicamus.* Respondeo. Hæc verba invenio apud Gratianum, cap. Ordinationes. 1. quæst. 1. sub nomine Gregorij IV. Sed non nihil mutata. Nam ubi tu dicis, *Infirmas & irritas esse dijudicamus*; ipse sic recitat, *Falsas esse dijudicamus.* Porro, tuam citationem nō potui reperire. Quod ad rem attinet, quid mirum est, irritas esse ordinationes, quæ non approbantur ab ijs, ad quos pertinet consecratio?

32. Hæc de priori parte secundi argumenti, in qua falsò contendis, Simoniacos non ordinari validè, id est, nihil accipere in Ordinatione. Catholici docent cum D. Thoma in 2. 2. q. 100. art. 6. ad 1. Simoniace ordinatoros accipere quidem characterem, seu potestatem Ordinis, propter efficaciam Sacramenti; non tamen accipere gratiā sanctificantem, neq; Ordinis executionem; sed ipso jure suspensos esse, ut nō liceat ipsis exercere pote-

Aa 2 statem

2. Sufficiens dispositio ad exercitium illius potestatis. Qui utrumque habet, perfectus Sacerdos est: qui prius tantum sine posteriori, Sacerdos quidem est, non tamen in suo genere perfectus. Et hoc sensu intelligendus est Dionysius.

19. Quartò adducis Hieronymum (in cap. i. ep. ad Galat.) asserentem, promotos ad Sacerdotium modis illegitimis, non esse verè ordinatos. Verba Hieronymi sunt hæc: *Tertium Apostolorum genus, quod ab homine, non à Deo, est, cum hominū favore & studio aliquis ordinatur: ut nunc videmus plurimos, non Dei iudicio, sed redempto favore vulgi, in sacerdotium subrogari.* Respōdeo. Hieronymus nō dicit, quod tu dicis. Non dicit eos, qui favore hominū ordinantur Sacerdotes, non verè ordinari: Sed, non vocari ad Sacerdotium à Deo, sed ab homine. Hoc non obstat, quo minus verè ordinentur. Nā hæc duo distinguenda sunt. 1. Deus vocat, seu interius excitat hominem ad sacrum Ordinem suscipiendum. 2. Deus in susceptione sacri Ordinis operatur. Hoc posterius potest disjungi à priori. Sicut fit etiam in Baptismo. Nam Judæus, qui propter solam spem lucri temporalis, indignè accedit ad Baptismum; non censetur à Deo vocari ad suscipiendum Baptismum; & tamen Deus operatur in Baptismo, quem ille suscipit: Non quidem dādo illi gratiam, qua indignus est, sed conferēdo characterem. Idem dico de sacro Ordine. Sicut ergo potest aliquis verè baptizari, etiā si  
à Deo

à Deo nō sit vocatus ad Baptismum; ita potest etiam verè ordinari. Et in tali casu, Deus non dicitur autor Sacramēti, quoad accessum, sed quoad effectum seu characterem.

20. Quintò ex eodem Hieronymo (in cap. 4. epist. ad Ephes.) adducis hæc: *Ut qui Pastor est, esse debeat & Magister: nec in Ecclesiis, quamvis sanctus sit, Pastoris sibi nomen assumere, nisi possit docere, quos pascit.* Respondeo. Aliud est, aliquem ordinari Sacerdotem, & accipere potestatem Ordinis: aliud, fieri pastorem & Doctorem populi. Hieronymus non dicit, Magisterium & doctrinam esse necessariam conditionem, sine qua nemo possit consecrari Sacerdos; sed sine qua nemo possit fieri pastor ovium, & per se instruere populum in fide ac pietate. Quod verissimum est.

21. Sextò eundem Hieronymum citas (in cap. 1. Sophoniæ,) ubi sic ait: *Sacerdotes, qui Eucharistia serviunt, & sanguinem Domini populis ejus dividunt, impiè agunt in legem Christi, putantes Eucharistiam imprecantis verba facere, non vitam: & necessariam esse tantum solemnem orationem, & non Sacerdotum merita.* Hinc infero malos Sacerdotes non verè consecrare Eucharistiam, ac proinde potestatem Ordinis auferri per peccatum. Respondeo. Si ita pergis Antoni, turbabis totam Ecclesiam. Nam si mali Sacerdotes amittunt potestatem Ordinis per peccatum, necesse est, & te, & reliquos omnes Sacerdotes, per primū peccatū, quod post susceptos Ordines perpetrastis, amisisse.

fisse potestatem Ordinis, & non amplius esse Sacerdotes. Unde ulterius sequitur, toties commisisse vos Sacrilegiū, quoties Eucharistiam conati essetis consecrare; quoties absolutionis Sacramentum impendere; quoties sacros Ordines conferre. Et quis obsecro erit securus in conscientia, si cogitet se nunquam verè accipere Eucharistiam, vel absolutionē, vel sacros Ordines, si accipiat à Sacerdote vel Episcopo in peccato mortali existente: Schismaticus es, Antoni.

22. Porro Hieronymus, quem adducis, longè abest à tuo errore. Cū enim ait: *Sacerdotes impie agere, qui putant Eucharistiam imprecantis verba facere non vitam*: nō loquitur præcisè de consecratione panis & vini Eucharistici, quasi asserat, panem & vinum non consecrari per verba consecrationis, sed per bonam vitam Sacerdotis, quia constat hoc falsum esse: sed loquitur de Eucharistia, id est, de gratiarum actione, quæ exhibetur Deo à Sacerdote per oblationem sacrificii Eucharistici. Est ergo hic sensus: Sacerdotes impie agūt, qui putant se Deo gratiarum actionem exhibere per solam consecrationem, etiamsi malè vivant. Quem sensum aliis verbis explicat D. Thomas 3 p. quæst. 82. art. 5. ad 1. cū ait: *Hieronymus improbat errorem Sacerdotum, qui credebant se dignè posse Eucharistiam consecrare ex hoc solo, quod sunt Sacerdotes, etiamsi sint peccatores.*

23. Septimo citas Gelasium ( apud Gratianum

tianum cap. Sacrosancta. 1. quæst. 1.) ubi ait: *Sacrosancta religio, quæ Catholicam continet disciplinam, tantam sibi reverentiam vindicat, ut ad eam quilibet, nisi pura conscientia, non audeat pervenire. Nam quomodo ad divini mysterij consecrationem cælestis Spiritus invocatus adveniet, si Sacerdos, qui eum ad se deprecatur, criminosis plenus actionibus reprobetur*: Hinc etiam infero, Eucharistiam à malo Sacerdote invalidè consecrari. Addis D. Thomam 3. p. q. 82. art. 5. ad 2. distorquere Gelasii verba, quasi dicta sint contra eos Sacerdotes, qui se dignè putant consecrare Eucharistiam, ex eo, quòd sint Sacerdotes, tametsi peccatorum sordibus immundi sint. Respondeo. Falsum est, Antoni. Non dicit hoc D. Thomas de verbis Gelasii, sed Hieronymi, ut paulo antè ostendi. Gelasium aliter interpretatur. Nempe Spiritum sanctum non advenire ex merito mali Sacerdotis, sed ex virtute Christi, cujus verba profert Sacerdos. Hanc interpretationem, quæ bona est, dissimulasti; & aliam, mala fide, in ejus locum substituísti. Sed Apostatæ non aliter docentur à suo Magistro.

24. Octavo citas Augustinum (in Dial. 65. quæstionum, quæst. 64.) ubi ait: *Apostolorum sunt genera quatuor: à Deo, non per hominem: à Deo, sed per hominem: per hominem tantum: & ex se. A Deo etenim missus est Moyses. A Deo per hominem, Jesus Nave. Per hominem tantum, sicut nostris temporibus, multi favore vulgi in sacerdotium subrogati sunt. Ex se autem, sicut sunt ipsi*  
Pseu-

*Pseudopropheta.* Ex quo concludis, Sacerdotes, qui favore vulgi ordinati sunt, non esse verè ordinatos. Respondeo. Augustinus non est autor illius Dialogi, ut nosti. Deinde jam antè ad similem Hieronymi sententiam respòsum est. Nec opus est hîc repetere.

25. Nono citas Leonem Papam (epist. 95.) asserentem, promotos contra canones non suscipere Ordinem; ac proinde Ordinem non esse Sacramentum. Verba Leonis sunt hæc: *Nulla ratio finit, ut inter Episcopos habeantur, qui nec à Clericis sunt electi, nec à plebibus expetiti.* Et ibidem: *Quis ambigat non esse eis tribuendum, quod non docetur fuisse collatum?* Respondeo, Hæc verba non habentur epist. 95. sed 90. ad Rusticum Narbonensem Episcopum. Nec integrè à te citata sunt. Integrè sic habent: *Nulla ratio finit, ut inter Episcopos habeantur, qui nec à Clericis sunt electi, nec à plebibus expetiti, nec à provincialibus Episcopis, cum Metropolitanis iudicio consecrati.* Unde cum saepe questio de malè accepto honore nascatur, quis ambigat, nequaquam istis esse tribuendum, quod non docetur fuisse collatum? Hæc verba, Antoni, si quem tangunt, tètangunt. Nam si Angli hoc tempore quærent ex Leone Papa: An Marcus Antonius debeat inter Episcopos haberi, cum in Anglia nihil constet de ipsius ordinatione; responderet sine dubio: nulla ratio finit, ut inter Episcopos Angliæ habeatur, qui ab Episcopis Angliæ cū Metropolitanis iudicio consecratus non est: nisi doceat, alibi honorem Episcopalem sibi col-

collatum esse. Hoc doce, & cessabit quæstio. Sed, si docere id nō posses, an ideo valebit hæc consequentia: Antonius non est legitimè ordinatus; Ergo ordinatio non est Sacramentū? Absit. Non pendet natura Sacramenti à defectu unius hominis.

26. SECUNDUM ARGUMENTUM: Simoniaci; quando ordinantur, nihil accipiunt; & hæretici, quando ordinant, nihil conferunt: Ergo Ordo non est Sacramentum. Antecedens probas ex Patribus. Primò ex Gregorio lib. 7. epist. 110. ubi sic habet: *quicumque Sacerdotium studet pretij datione mercari, non officium, sed nomen attendit: non esse, sed dici tantum Sacerdos, concupiscit.* Respondeo. Gregorius non loquitur de effectu Ordinationis, sed de intentione illius, qui Simoniacè ordinatur. Intentio illius duplex est. Una, ut habeat titulum, honorem, & dignitatem sacerdotij; non autem, ut re ipsa præstet officium, quod à vero Sacerdote exigitur. Altera, ut possit fieri Sacerdos sine prævio examine de doctrina & moribus. Utramq; intentionem explicat Gregorius. Priorem quidem, verbis jam citatis. Posteriores verò his sequentibus: *Quid scilicet? quid per hoc aliud agitur, nisi ut nulla de actu probatio, nulla sollicitudo de moribus, nulla sit de vita discussio: sed ille solummodo dignus, qui dare pretium suffecerit, aestimetur?* Non negat tamen Gregorius, quin Ordinatio sit valida.

27. Secundò ex Ambrosio lib. de dignit. Sacerdotal. cap. 5. ubi sic scribit: *Ergo gratiam,*  
*cum*

cùm ordinareris, non suscepisti, quia gratuito eam non meruisti. Et ideo frater, si gratiam non accepisti, quomodo Episcopus effici potuisti? Aurum dans perdidisti, & gratiam sanctam non acquisisti. Hic per gratiam ut tu interpretaris, intelligit potestatem Ordinis, quam accipit Simoniacè ordinatus. Respondeo. Vera interpretatio est hæc. Ambrosius instituit colloquium inter se & alium Episcopum Simoniacè ordinatum; his verbis: Interrogo tamen fratrem & Coepiscopum nostrum, quia & ego Episcopus sum, & cum Episcopo loquor. Dic ergo mihi paulisper frater Episcope, cum dares pecuniam, quid accepisti? Gratiam Episcopalem accepi. Ergo interroga te: hæc gratia, cur tali vocabulo nuncupatur? Respondet: cur, inquis? ut reor, pro eo, quod gratis datur, ideo gratia vocitatur. Ergo si gratia gratis datur, & auro non aestimatur, à te cur gratia pecuniis comparatur? Respondet: Non, inquit, mihi daretur, si pecuniis non emeretur: Nec Episcopus fuisset ordinatus, si pecunias non dedissem. Ergo, ut apparet, ex responsionibus tuis, gratiam cum ordinareris, non suscepisti, quia gratuito eam non meruisti. Et ideo frater, si gratiam non accepisti, quomodo Episcopus effici potuisti? Nam & ad Discipulos suos Dominus dicit: Gratis accepistis: gratis date. Cur ergo gratiam existimasti te pretio possidere gratiam? nam ut video, aurum dans perdidisti, & gratiam sanctam non acquisisti: Adhuc tamen semel adjiciens, fratrem perquiro Episcopum, ne quid de approbamentis veridicis nos pratermisisse videamur. Quis dat, frater, Episcopalem gratiam, Deus, an homo? Respon-

des



*des sine dubio: Deus. Sed tamen per hominem dat Deus. Homo imponit manus: Deus largitur gratiam. Sacerdos imponit supplicem dextram: & Deus benedicit potenti dextra. Episcopus initiat Ordinem, & Deus tribuit dignitatem. O justitia, o aequitas! Si homini pecunia datur, qui nihil in Ordine amplius operatur, nisi solum servitium, quodei creditur; cur Deo totum negatur, qui ipsum Ordinem tibi largitur?*

28. In hoc colloquio proponit Ambrosius tres potissimum quaestiones Episcopo Simoniacè ordinato, ut eum capiat. Prima est, *quid accepisti in Ordinatione? Accepi gratiam Episcopalem.* Altera, *cur vocatur gratia? Quia gratis datur.* Tertia, *quis eam dat? Deus per ministerium hominis.* Et ex responsione ipsius, dupliciter illum capit. Primò, *si gratia Episcopalis datur gratis; ergo illam non accepisti, quia non accepisti gratis; sed pecuniam numerasti.* Secundò, *si Deus illam dat cur pro eo numeras homini pecuniam, & non Deo?* Gratiòse autem ludit in vocabulo gratiæ. Nam tametsi Episcopus Simoniacus, per gratiam intelligat dignitatem & potestatem Ecclesiasticam; Ambrosius tamen, ut reducat illum ad sanam mentem, intelligit etiam gratiam Sacramentalem, præsertim cum ait: *Homo imponit manus: Deus largitur gratiam.* Alludens ad illud Apostoli 2. Tim. 1. 6. *Admoneo te, ut resuscites gratiam Dei, quæ in te est, per impositionem manuum mearum.* Item, cum ait: *Aurum dans perdidisti, & gratiam sanctam non acquisisti.* Hinc tria colligo ex sen-

rentia Ambrosij. Primò, Simoniacè ordinatum non accipere gratiam Sacramentalem: *Gratiam sanctam non acquisisti.* Secundò, accipere tamen potestatem Ordinis: *Cur Deus totum negatur, qui ipsum Ordinem tibi largitur?* Tertiò, Sacrum Ordinem esse Sacramentum: *Homo imponit manus: Deus largitur gratiam.*

29. Tertiò objicis autorem operis imperfecti, (Homil. 53. apud Chrysost.) ubi asserit, *justos ordinari à Deo; injustos autem minime.* Et Clementem lib. 8. Constit. Apostolic. cap. 1. ubi similiter asserit, *Episcopos imperitos, non esse Episcopos, nec à Deo constitutos, sed ab hominibus.* Respondeo. Confundis omnia. Nam hîc agitur de Simonia: & probandum tibi est, Simoniacè ordinatos, non esse verè ordinatos. At hi duo autores, quos citas, nihil dicunt de Simonia, sed de imperitia & malitia eorû, qui accedunt ad Ordines. De quibus jam supra dictum est in primi argumenti solutione. Eò te remitto.

30. Quartò objicis Tharasium Patriarchâ Constantinopolitanum in epist. ad Adrianum Papam (apud Gratianum cap. Eos qui. i. quæst. 1.) qui ait: *Quanquam* (Simoniacè ordinatus) *nomine sacerdotium sortitus est; sed in eum falsò nomen istud conferri, re ipsa comprobatur.* Itē: *Cōpertissimum quoq; est, in ipsis sancti Spiritus gratiâ non esse, aut sacerdotij sanctificationem; & quod nō acceperunt, non habent.* Respondeo. Verum est, quod dicitur in hoc posteriori testimonio, Simonia-

moniacos in Ordinatione, non accipere gratiam sanctificantem. Prius testimonium non habetur apud Gratianum loco à te citato. Nec etiam in Epistola Tharasilij ad Adrianum, quæ extat tom. 3. Conciliorum.

31. Quintò ex Gregorio VII. (Lib. 6. Regist. ad ep. 5. in Decret.) objicis hæc verba: *Ordinationes, quæ interveniente pretio, vel precibus, vel obsequio alicujus personæ, impenso; vel quæ non communi consensu cleri & populi, secundum canonicas sanctiones fiunt, & ab his, ad quos consecratio pertinet, non comprobantur, infirmas & irritas esse dijudicamus.* Respondeo. Hæc verba invenio apud Gratianum, cap. Ordinationes. 1. quæst. 1. sub nomine Gregorij IV. Sed non nihil mutata. Nam ubi tu dicis, *Infirmas & irritas esse dijudicamus*; ipse sic recitat, *Falsas esse dijudicamus.* Porro, tuam citationem nō potui reperire. Quod ad rem attinet, quid mirum est, irritas esse ordinationes, quæ non approbantur ab ijs, ad quos pertinet consecratio?

32. Hæc de priori parte secundi argumenti, in quâ falsò contendis, Simoniacos non ordinari validè, id est, nihil accipere in Ordinatione. Catholici docent cum D. Thoma in 2. 2. q. 100. art. 6. ad 1. Simoniace ordinator accipere quidem characterem, seu potestatem Ordinis, propter efficaciam Sacramenti; non tamen accipere gratiā sanctificantem, neq; Ordinis executionem; sed ipso jure suspensos esse, ut nō liceat ipsis exercere pote-

Aa 2 statem

statem Ordinis, quam acceperunt. De qua re vidē Extravag. *Cum detestabile*.

33. Sequitur altera pars ejusdem argumēti, in qua contendis, irritas esse Ordinationes, quæ fiunt ab Episcopis hæreticis. Ac primò citas Innocentium I. epist. 20. ubi sic scribit: *Arianos, ceterasque hujusmodi pestes, quia eorum laicos conversos ad Dominum, sub imagine pœnitentiæ, ac sancti Spiritus sanctificatione, per manus impositionem suscepimus, non videtur Clericos eorum cum Sacerdotij aut ministerij cujusciam suscipi debere dignitate. Quoniam quibus solum Baptisma ratum esse permittimus, quod utique in Nomine Patris & Filij & Spiritus sancti perficitur, nec Spiritum sanctum eos habere ex illo Baptismate, illisque mysteriis arbitramur: Quoniam cum à Catholica fide eorum autores desciscerent, perfectionem Spiritus, quam acceperunt, amiserunt, nec dare ejus plenitudinem possunt, quæ maximè in ordinationibus operatur, quæ per impietatis suæ perfidiâ potius, quam per fidem dixerim, perdiderunt.* Ubi inquis, agnoscit differentiam inter Baptismū & Ordinem, quòd baptizati ab Arianis, habeantur pro baptizatis: Ordinati autem ab Arianis, non habeantur pro ordinatis. Respondeo. Illa verba non habentur epist. 20. quam tu citas, sed epist. 18. quæ est ad Alexandrum Episcopum, cap. 3. Neque nobis contraria sunt. Non enim asserunt ordinatos ab Arianis Episcopis, nō esse validè ordinatos, aut cum redeunt ad Ecclesiam, iterum ordinandos esse; sed non debere suscipi cum sacerdotij aut ministerij

sterij cujuspiam dignitate, id est, non esse illis permittendum, ut locum & gradum obtineant inter Sacerdotes, quando redeunt ad Ecclesiam, Vide Gabrielem Vasquez 3. part. disp. 243. cap. 1.

34. Secundò citas eundem Innocentium (epist. 27. ad Episcopos Macedoniæ) ubi sic scribit: *Ventum est ad tertiam questionem, quæ pro sui difficultate, longiorem exigit disputationem. Cum nos dicamus ab hæreticis ordinatos vulneratum per illam manus impositionem habere caput, ubi vulnus infixum est, medicina est adhibenda, quæ possit recipere sanitatem; quæ sanitas post vulnus secuta, sine cicatrice esse non poterit. Atque ubi pœnitentiæ remedium necessarium est, illic Ordinationis honorem locum habere non posse decernimus. Nā si, ut legitur, quod tetigerit immundus, immundum erit, quomodo ei tribuetur, quod munditia ac puritas consuevit accipere? Sed è cōtrario asseritur, eum, qui honorem amisit, honorem dare non posse, nec illum aliquid accepisse: quia nihil in dante erat, quod ille posset accipere. Ac quiescimus, & verū est. Certè quia quod non habuit, dare non potuit, damnationem utiq; quam habuit, per pravam manus impositionem dedit: & qui particeps effectus est damnato, quomodo debeat honorem accipere, invenire non possum. Respondeo. Hæc verba habentur epist. 22. cap. 3. (tom. 1. concilior.) nec aliud ex ijs colligi potest, quàm ordinatos ab hæreticis, non habere honorem & dignitatem in Ecclesia. Quod sic probat: Episcopi hæretici, qui alios ordinant, non habent honorem.*

in Ecclesia, cum sint præscisi ab Ecclesia: Ergo non possunt alijs dare honorem in Ecclesia, Rectè. At non negat Innocentius, quin sicut ipsi habent Characterem Ordinis, sic alijs cum conferre possint.

35. Tertiò citas Nicolaum I. (epist. 9. ad Michaellem Imperatorem) ubi de Gregorio Syracusano Episcopo schismatico, qui Photium ordinaverat, sic scribit: *Gregorius ergo, qui canonicè ac Synodicè depositus, & anathematizatus erat, quemadmodum posset quenkumque provehere vel benedicere, ratio nulla docet. Igitur nihil Photius à Gregorio percepit, nisi quantum Gregorius habuit: Nihil autem habuit. nihil dedit.* Respondeo. Non invenio Epistolam Nicolai ad Michaellem, tom. 3. concilior. ubi tamen habentur epistolæ Nicolai ad diversos. Nihilominus verba, quæ citasti, eodem sensu explicanda sunt, quo verba Innocentij. Nimirum: *Nihil habuit, nihil dedit*, id est, non habuit honorem & dignitatem Episcopi in Ecclesia: Nō ergo potuit dare. Quod verissimum est.

36. Post citata hæc Patrum testimonia (quæ ais videri asperiora, & ad terrendos malos Sacerdotes amplificata) perplexus es. Et duo asseris. Unum est, Sacram Ordinationem sæpè ex aliquo defectu, vel personæ ordinantis vel ordinatæ, irritam & inanem esse: Et qui sic ordinati sunt, non esse verè ordinatos. Alterum, nihilominus eorum ministeria non esse penitus irrita. Utrumque confirmas ex Chrysostomo homil. 2. in posterior. ad Timor. ubi

ubi ais, illum docere, etiam non ordinatos à Deo & malos & indignos, valide Baptismum conferre, Eucharistiam conficere, ac alia ministeria peragere. Quod tamen spectat ad Ordinationem internam, eam à solo Deo peragi, & non omnes, qui ab hominibus ordipantur externè, etiam à Deo ordinari internè. Mox addis: Hi ergo si quid efficiunt, non vi Ordinis interioris, sed ex speciali divina providentia efficiunt, ne salus patiatur animarum.

37. Audi Antoni. Tu quidem meritò perplexus es, quia deserta via veritatis, in varias ambages incidisti: Nec facilè, nisi ad viam redeas, elabendi facultas est. Sed Chrysostomo injuriam facis. Verba ejus loco citato, sunt hæc: *An ignoras, quid sit Sacerdos? Angelus utiq; Domini est. Non ex seipso loquitur. Si despicias, non illum despicias, sed Deum, qui illum ordinavit. Sed unde, inquires, constat Deum fuisse illius ordinationis autorem? Nempe, nisi tu habeas hanc opinionem, spes tua inanis facta est. Nam si nihil per illum operatur Deus, neque lavacrum habes, neq; mysteriorum particeps es, neq; benedictionibus fruëris. Non ergo Christianus es. Quid ergo? Deus omnes ordinat, etiam indignos? Non omnes quidem ille ordinat, per omnes tamen ipse operatur, salutem populi moliens, non illorum intuens merita. Et infra: Quid enim non agit Deus salutis nostræ causa? Quid non loquitur? Per quem non operatur? Si enim per Judæam operatus est, & per Prophetas, quibus dicturus est: Non novi vos; perq; illos, qui Demones in Nomine suo ejecerunt; non magis per Sacerdotes divino ministerio famulantes operabitur?*

38. In hac tota sententia nihil est, quod difficultatem habeat, nisi illa verba: *Non omnes quidem ille ordinat, per omnes tamen operatur; quæ tu perperam intelligis.* Non enim sensus illorum est, aliquos non esse verè ordinatorum Sacerdotes, & tamen validè præstare ea, quæ sunt officij Sacerdotalis: nec præstare, vi Ordinis, sed ex speciali Dei providètia, (quod tuum commentum est.) Sed non omnes Sacerdotes, qui habent characterem, habere etiam gratiam Ordinationis: ac proinde, non omnes, quoad integrum effectum Ordinationis, à Deo ordinatorum esse, Deum tamen per illos, ratione characteris, multa operari. Quod confirmat duplici exemplo. Uno Judæ proditoris, qui certè habuit characterem Ordinationis, juxta illud, Act. 1. 20. *Episcopatum ejus accipiat alter*: non tamen habuit gratiam Sacramentalem, quia *fur erat & proditor.* (Joan. 12. 6. & cap. 13. 2.) Altero, quorundam aliorum, qui in nomine Dei prophetabant & Dæmonia ejiciebant; & tamen erant mali ac Deo ingrati. Et quidem, quatenus prophetabant & miracula faciebant, Deus per illos operabatur: quatenus verò erant impij, non censebantur perfectè à Deo ad hoc officium vocati esse.

39. TERTIUM ARGUMENTUM, quo probas Ordinem non esse Sacramentum, multis verbis otiosè inculcas. Summa est hæc: Ex scriptura apertè constat, Baptismum & Eucharistiam esse Sacramenta, à Christo instituta:



stituta: At non constat apertè, Ordinem esse Sacramentum à Christo institutum: Ergo. Respondeo. Primò falsum est, non constare id ex Scriptura. Jam suprà ex scriptura ostensum est, Ordinem esse Sacramentum. Sed esto, non constet ex Scriptura: An ideo Sacramentum non est? Sufficit nobis, constare ex Traditione. Si respuis Traditionem, quomodo probabis Symbolum Apostolorum, quod in Ecclesia legitur, Apostolicum & canonicum esse? Beatam Mariam, semper virginem mansisse? Baptizatos ab hæreticis, rebaptizandos non esse? Et quæ similia sunt. Si autem admittis Traditionem, cur in hac questione, An Ordo sit Sacramentum, non admittis?

40. Sed urges: Canonistæ docent, Summum Pontificem solo verbo posse facere Sacerdotem & Episcopum. Nec ullus Catholicorum audet contra illos mutire. At si sacer Ordo esset Sacramentum, non sufficeret solum verbum, sed opus esset externa ceremonia, sicut fit in aliis Sacramentis. Respondeo 1. Falsum est, quod de Catholicis assumis. Hi enim generatim docent cum D. Thoma 3. part. q. 60. art. 4. ad 2. Omnia Sacramenta novæ legis constare rebus & verbis, tanquam materia & forma, quæ sunt partes essentielles. Et multi speciatiim docent, impositionem manuum, quæ est externa ceremonia, esse materiam essentialem Sacramenti Ordinis, ut Bonaventura, Scotus & Paludanus in 4.

dist. 24. Altissiodorensis in Summa, par. 4. Petrus Soto, lect. 5. de Sacrament. Ord. Martinus Ledesmius in 4. quæstio. 36. artic. 4. ad 1. Bellarminus libr. de Sacrament. Ordinis, cap. 9. Henriquez cap. 6. & plures alij. Ergo hi saltem non concedunt Pontificem solo verbo posse facere Sacerdotem vel Episcopum. Nam si impositio manuum est de essentia Ordinis, non potest conferri Ordo sine manuum impositione. Respondeo secundò. Canonistæ non loquuntur de tota ordinatione, sed de sola forma; & tantum volunt dicere, cum sic loquuntur, non esse necessarias absolutè tot orationes, unctiones, ac ceremonias; sed sufficere manuum impositionem, quam Apostoli nunquam omittebant, cum verbis quibus significetur, tradi potestas sacerdotalis: Proinde ex sententia Canonistarum non sequitur, sufficere verbum sine aliqua ceremonia, sed requiritur saltem manuum impositio, quæ in scripturis passim exprimitur. Sicut & è contrario, cum dicitur in scripturis, & in ipso Concilio Tridentino sess. 14. capit. 3. de extrema unctione, Sacerdotes ordinari per manuum impositionem; non intelligimus, ita solum sufficere manuum impositionem, ut non requiratur aliquod verbum, declarans potestatem, quæ datur.

4<sup>o</sup>. Iterum urges: Petrus Damiani Episcopus Ostiensis, in relatione suæ Legationis Mediolanensis (apud Baronium tom. 11. Annual.

nal. Anno Christi 1059. num. 59. ) idem sentit, quod canonistæ, nempe Ordinationem solo verbo perfici posse. Sic enim scribit : *His itaque tali modo reconciliatis decretum est, ut non mox passim omnibus redderetur officium, sed ijs duntaxat, qui & literis eruditi, & casti, & morum gravitate viderentur honesti : Cateris autem sufficeret, quod Sancta Ecclesia per divinam gratiam essent rursus inserti, à qua catenus fuerant diræ sententia falsè præscissi : Illi etiam ipsi, quibus ministrandi licentia redditur, non ex male mercata veteri Ordinatione, admissum reparantur officium, sed ex illa potius beati Apostolorum Principis efficacissima auctoritate, qua in beatum Apollinarem repente usus est, dicens : Surge, accipe Spiritum Sanctum, simulque Pontificatum.* Ex his verbis duo colligis. Primò, Petrum Damiani docere, Ordinationes Simoniacè factas, nullas esse. Secundò, eundem clericos Simoniacè promotos solo verbo, auctoritate Papali, ordinasse.

42. Respondeo. Neutrum ex illis verbis colligitur. Ego potius hæc colligo. 1. Mediolani multos Simoniacè fuisse ordinatos, antequam Petrus Damiani eò veniret, ad reformandum clerum Mediolanensem. 2. Aliquos ex illis fuisse doctos, castos, & honestis moribus præditos : alios non item. 3. Prioribus redditum esse officium, seu redditam licentiam ministrandi; non autem posterioribus. 4. Licentiam  
non

non esse redditam, vi Ordinationis, quæ fuerat Simoniaca: sed autoritate Petri Apostoli. Ubi per licentiam, quæ reddita est, non intelligit potestatem Ordinis, ut tu falsò interpretaris; quia illa potestas non erat illis ablata: Sed intelligit licentiam utendi potestate Ordinis. Itaque sensus est: Ex illis omnibus qui Simoniacè erant ordinati, aliquos accepisse licentiam utendi sacro Ordine; alios non item. Omnes tamen validè fuisse ordinatos. Jam quod ad factum S. Petri Apostoli attinet, quo S. Apollinarem uno verbo Episcopum fecisse dicitur, eodem modo intelligendum id est, quo antea de Canonistis dictum est; non negari scilicet, quin & manus eidem B. Petrus imposuerit, & verbis, quæ recensentur, potestatem, quam signo conferebat, expresse; & si Petrus Damiani verborum tantum faciat mentionem.

43. **QUARTUM ARGUMENTUM:** Si dicamus Ordinem esse Sacramentum, & præterea Episcopatum esse distinctum Ordinem à presbyteratu; emergent inextricabiles & insolubiles difficultates. Velenim dicendum erit, Episcopatum & presbyterium esse duo Sacramenta, vel unum. Si duo sunt, multiplicatur numerus Sacramentorum. Si vnum, quomodo sunt distincti Ordines? Respondeo. Nimis frigidè, Antoni. Multa sunt mysteria fidei Christianæ, præsertim mysterium Trinitatis, Incarnationis, prædestinationis, Eucharistiæ, ex quibus emergunt multò majores

jores difficultates, quàm ex Sacramento Ordinis: an ideo neganda sunt? Nullo modo. Intellectus in captivitatem fidei redigendus est. Et quæ non possumus humano ingenio penetrare; divina fide credenda sunt. Nam *fides*, teste Apostolo, *est argumentum rerum non apparentium*. Esto igitur: emergant aliquæ difficultates circa Sacramentum Ordinis; non ideo negandum est, Ordinem esse Sacramentum. Alioquin pariratione, neganda esset realis distinctio personarum in una Deitate; Hypostatica unio duarum naturarum in Christo; æterna hominum prædestinatio ad gloriam; præsentia corporis Christi in Eucharistia. Quod absit.

44. Porro difficultates, quas prætendis, non sunt tanti momenti, ut explicari non possint. Nam si dixerò, Episcopatum & Presbyteratum esse duos Ordines specie distinctos, & similiter duo Sacramenta specie distincta, sub eodem genere Ordinis; quid difficultatis hinc emerget? Multi hoc dicunt, & probabiliter defendunt. Addo, ex tua sententia; plures oriri, non dico difficultates, sed absurditates. Recitabo aliquot, quas tu admittis. Sunt autem hujusmodi. 1. Ordo non est Sacramentum, sed mera ad ministerium deputatio, sine ullo charactere aut impressione. 2. Potest aliquis ex laico immediatè fieri Episcopus, & non necesse est, ut prius fiat Sacerdos. 3. Melius est, si necesse sit, ex laico immediatè fieri Episcopum, quàm Lectorè, Ostiarium, Exorcistam, 4. Im-

4. Impositio manuum non est à Christo instituta, sed tamen ab Apostolis usurpata. 5. Sacer Ordo amitti potest, & iterari. Unde, qui nunc Sacerdos aut Episcopus est, potest cras non esse: Et postquam desijt esse, potest iterum ordinari. 6. Nullus ritè ordinatur, in quo gratia præstò non sit. 7. Ordinatio si sit legitima, semper confert gratiam: non ex opere operato, sed ex sola deputatione, per legitimam auctoritatem facta. Hæc & similia, quæ antiqui Theologi censent absurda esse; tibi, homini novatori, placent vel maximè. Sed duo ex te quæro. Primò, an Episcopus, qui committit peccatum mortale, retineat potestatem Ordinis nec ne? Si retinet, potest validè conferre Ordinem, quod suprà negasti. Si non retinet, necesse est, vel te non amplius Episcopum esse, vel si adhuc es, nūquam peccasse mortaliter, ab eo tempore, quo Episcopatum suscepisti. Quid dicis de teipso? Secundo, an possis ostendere ex Scriptura, quòd Deus, extra Sacramētum, det alicui gratiam, ad solam alterius hominis deputationē? Vel, quòd Christus instituerit, ut aliquis solo verbo deputantis, ordinetur in Sacerdotem, sine ulla externa cerimonia? Et, si hoc instituerit, quare Apostoli non servarint hanc institutionem, sed manuum impositionem adhibuerint?

CAPUT SEXTUM.

*An Augustinus duo tantum agnoscat Sacramenta?*

1. **T**U affirmas lib. 2. cap. 4. nu. 33. his verbis : *Si de vero & maxime proprio Sacramento sit sermo, Augustinus duo tantum agnoscat Sacramenta, quæ clarè & expresse pateant à Christo esse instituta. Sic enim loquitur epist. 118. Unde Sacramentis numero paucissimis, observatione facillimis, significatione præstantissimis, societatem novi populi colligavit : Sicut est Baptismus Trinitatis nomine consecratus ; Communicatio corporis & sanguinis ipsius ; & si quid aliud in Scripturis canonicis commendatur.*

2. Theologi Parisienses in sua censura dicunt, hanc tuam propositionem esse falsam, & in beatum Augustinum contumeliosam. Et sic est. Quod dupliciter ostendo. Primo generatim, ex verbis illius jam citatis. Nam si agnosceret duo tantum Sacramenta, Baptismum & Eucharistiam ; frustra, post illa duo enumerata, addidisset : *Et si quid aliud in Scripturis canonicis commendatur.* Debuisset ex tua sententia dicere : *Et præter hæc duo, nullum aliud in Scripturis canonicis commendatur.* Eodem modo loquitur Concion. 1. in Psal. 103. *Munus, inquit, Sacramentorum in Baptismo & Eucharistia, & in cæteris sanctis Sacramentis, quale munus est?*

3. Sc-

3. Secundò speciatiim. Nam præter Baptismum & Eucharistiam, agnoscit quinque alia, quæ etiam nos agnoscimus. Agnoscit Confirmationem, lib. 2. contra liter. Petilianum, cap. 104. cum ait : *Sacramentum chris-matis in genere visibilium, Sacramentum est Sacrosanctum, sicut ipse Baptismus.*

Agnoscit Ordinem, libr. 2. contr. Epistol. Parmeniani, cap. 13. ubi confert illum cum Baptismo, his verbis : *Utrumque Sacramentum est, & quadam consecratione utrumque homini datur: illud, cum baptizatur; istud cum ordinatur, ideoque in Ecclesia Catholica utrumque non licet iterari.* Alibi similia habet, ut suprâ visum est.

Agnoscit Pœnitentiam, lib. 1. de adulterin. conjug. cap. 26. & 28. *Eadem est, inquit, causa Baptismi & Reconciliationis, sine quibus Sacramentis homines credunt, se non debere exire de corpore.*

Agnoscit Matrimonium, libr. 1. de nupt. & concupisc. cap. 10. *Hujus Sacramenti res est, ut mas & femina connubio copulati, quamdiu vivunt, inseparabiliter perseverent.*

Agnoscit Extremam unctionem, Ser. 215, de temp. *Quoties aliqua infirmitas supervenerit, Corpus & sanguinem Christi, ille qui agrotat, accipiat: & inde, corpusculum suum un-gat, ut illud quod scriptum est, impleatur in eo: Infirmatur aliquis, inducat presbyteros, & orent super eum, ungentes eum oleo, &c.*

4. Vides, Antoni, Augustinum non duo tantum,



tantum, ut tu falsò illi imponis, sed plura Sacramenta agnoscere. Et quidem propriè. Nam expressè dicit, *Confirmationem esse Sacramentum, sicut est Baptismus*. At Baptismus est propriè Sacramentum, quod nemo negat: Ergo & Confirmatio. Similiter Pœnitentiam confert cum Baptismo, asserens eandem esse Baptismi & Reconciliationis causam. Idem affirmat de Ordine.

CAPUT SEPTIMUM.

*De Monachis & Apostatis.*

1. **M**ULTA asseris de Monachis & Apostatis libr. 2. c. 12. quæ partim falsa, partim inter se pignantia sunt. Ea breviter percurram. Primò asseris, votum simplex & solenne, esse unum idemque votum essentialiter, ejusdem valoris & obligationis, (num. 17. itaque coram Deo, votum simplex & votum solenne, unicum essentialiter, & idem votum est, ejusdem prorsus valoris, ejusdemque obligationis. Et num. 41. *Votum ex solennitate nihil acquirit, quod essentialiter, dum simplex esset, non haberet.*) Hanc assertionem revocas alibi, ut paulò post patebit.

2. Secundò asseris, votum simplex & solenne, non aliter differre; quàm quòd alterum externum sit, (num. 31. *Si loquamur de quo-*

Bb

canon.

cung, voto in genere, simplex votum est, quod privatim Deo fit interne inter hominem & Deum solum: Solemne verò erit, si hoc ipsum internum, etiam publicè fiat, & actu externo coram alijs declaratur. Et num. 32. *Votum simplex voco id, quod est internum: Solemne verò, quod prater ea externe fuerit manifestatum.* Et num. 35. *Differunt, ut internum & externum; conceptum & prolatum; cogitatum & explicatum.*) Hæc assertio est nova, contra communem Theologorum sententiam.

3. Tertiò asseris, votum internum, non esse votum, sed propositum; nec obligare coram Deo, (num. 19. *In posteriori verò, [id est, in voto personali & permanente, quale est votum Religiosorum] facile mihi persuadéo, ex sola interna deliberatione, & plenissima etiam electione, votum quod de se jam plenum & perfectum esse deberet, pro pleno & perfecto à Deo nondum haberi sed quamdiu internum est, potius propositi, quam voti rationem habere.* Et num. 31. *Vota monachandi, simplicia sunt, quamdiu in interno homine latent, inter ipsum & Deum solum: & hæc, dum ita simplicia sunt, adhuc hominem non obligant, etiam coram Deo.* Et ibidem in fine: *tantum igitur abest, ut in voto simplici, hoc est, purè interno religionis, necessaria sit Papalis dispensatio, ut ne dispensatione quidem indigeat, quæ vovit; sed sit in libertate ipsius id exequi, & non exequi.* Et n. 32. *In personali & permanente voto, aggressio illa, & vita susceptio, per quam ego so-*  
lam

*tam id ex simplici solenne facio, est essentialis huius voto, quia per illam hoc votum, votum est, & sine ea coram Deo votum non est, sed tanquam merum propositum.*) Hæc assertio est etiam nova, & destruit duas præcedentes. Nam in prima dixisti, *votum simplex & solenne non differre essentialiter.* Hic dicis, differre essentialiter: Et solenne differre à simplici, per susceptionem vitæ religiosæ, tanquam per differentiam essentialem. Rursum in prima dixisti, *votum simplex & solenne esse ejusdem valoris & obligationis.* Hic dicis, *simplex non obligare coram Deo, nec habere rationem voti, sed tantum propositi.* Præterea in secunda dixisti, *simplex solum differre à solenni, sicut internum ab externo.* Hic dicis, differre, sicut propositum à voto, sicut non obligans ab obligante. Scandalosa hæc sunt, & magnam fenestram aperiunt ad perfidiam.

4. Quartò asseris, externam vôtî professionem plus obesse Ecclesiæ, quàm prodesse, (num. 29.) *Si quis ex me querat, plusne profuerit, an obfuerit veræ religioni, externa hac professionis additio; dicam ei: Apud me clarum esse, longè majus esse detrimentum inde secutum, quàm emolumentum.*) Hæc assertio est falsa, & in sacros Religiosorum Ordines contumeliosa. Lege Platum de bono status Religiosi, & invenies, quantum boni contulerint in Ecclesiam Patres Dominicani, Franciscani, Benedictini, & alij passim. Et qui hoc tempore fortius defendunt Ecclesiam, quàm Religiosi? Qui

nervosius oppugnant hæreticos, Apostatas, scribendo, disputando, concionando, quam Religiosi? Quòd autem nonnulli ex illis, ut Lutherus, Bucerus, Petrus Martyr, Pellicanus, Ochinus, Oecolampadius, & tu Marce Antoni, hæretici & Apostatæ facti estis; magnum quidem detrimentum est: sed vestræ perfidiæ, non externæ votorum professioni, imputandum. De quo tamen ipso detrimento, meritò potest dubitari, an non plus profuerit Ecclesiæ, quàm obfuerit. Vobis quidem, tanquam privatis hominibus, obest vel maximè, quia facit vos reos æternæ damnationis; sed Ecclesiæ non parum prodesse, certissimum est. Vestra enim paucorum defectio & Apostasia, excitat multos alios, tum ad diligentem cautelam in posterum; tum ad majorem fidei explicationem & propugnationem. De qua re vide Augustinum, si vis, in lib. de vera Religione.

5. Quintò asseris duos esse effectus voti solennis, qui turbant Ecclesiam, (numer. 37. *Duos sunt præcipui effectus voti solennis, quos nostri Romana doctrina Theologi ponunt & defendunt: & tamen, sicut novi sunt, & olim in Ecclesia inauditi, ita multas inducunt in Ecclesiamurbationes, & multa incommoda, atque animarum damna non contemnenda. Alter effectus est inhabilitatis ad matrimonium; alter verò Apostasia, si Monasterium deseratur.*) Hæc assertio est falsa & contumeliosa, Falsa dupliciter. Primò

mò , quia Apostasia non est effectus, sed transgressio voti solennis. Nam solennitas voti non est causa Apostasie ; sed quasi destruitur & enervatur per Apostasiam. Secundò, qui inhabilitas ad matrimonium non turbat Ecclesiam, sed malitia Apostatarum ; qui cum voverint perpetuam castitatem, postea non fervant, quod voverunt. Hinc scandala & alia incommoda oriuntur.

6. Sextò asseris, votum solenne non dirimere matrimonium subsequens, ac proinde, si Monachus contrahat matrimonium, validdè contrahere. Num. 43. *Concludimus hanc voti solennitates Monachorum, impedire quidem ac vetare, ne matrimonium contrahatur; contractum tamen post illas, ex eis non dirimi, sed esse ratum, firmum, & validum, tam in Monacho quàm in Moniali; sicut post votum simplex.*) Hæc assertio est Lutherana, & ab Ecclesia damnata in Concilio Tridentino, Sess. 24. can. 9. Et merito. Nam antiqui Pontifices & Concilia statuerunt, votum solenne Religiosorum non solum impedire, sed etiam dirimere matrimonium, ut Concilium Toletanum primum, cap. 16. Turonense secundum, can. 16. Gregorius I. lib. 1. epist. 40. Alexander III. cap. Meminimus, qui Clerici vel voventes. Bonifacius VIII. cap. unic. de voto, in 6. Verba Bonifacij sunt hæc : *Præsentis declarandum duximus oraculo sanctionis, illud solum votum debere dici solenne, quantum ad post contractum*

*matrimonium dirimendum, quod solennizatum fuerit per susceptionem sacri Ordinis, aut per professionem expressam vel tacitam, factam alicuius Religionibus, per Sedem Apostolicam appro-*  
*atis.*

7. Septimò asseris, Monachos, si post vota solennia contrahant matrimonium, non peccare contrahendo matrimonium, sed solum peccare recedendo à vita monastica, (num. 38. *At verò Monachus & votireus est, & promissæ fidei. Quòd si uxorem ducat, malum non facit, quòd uxorem ducat, sed quòd uxorem ducendo à vita monastica, quam professus est, recedat.*) Hæc assertio falsa est. Nam voluntas contrahendi & consummandi matrimonium, repugnat voto perpetuæ castitatis, ut per se constat : Ergo talis voluntas mala est. Quod tripliciter confirmo ex tuis verbis. Primo, quia *vita Monachorum*, ut tu ibidem loqueris, *essentialiter & substantialiter includit cælibatum & continentiam* : Ergo qui vovet vitam monasticam, eodem actu essentialiter & substantialiter vovet cælibatum & continentiam. Ergo voluntas recedendi à vita monastica, essentialiter & substantialiter includit voluntatem recedendi à cælibatu & continentia. At prior voluntas est mala, ut tu fateris : Ergo & posterior. Malum igitur est, velle recedere à cælibatu & continentia, quam vovisti : At hæc voluntas recedendi à cælibatu essentialiter includitur in voluntate contrahendi & consummandi  
 matri-

matrimonium, post votum solenne. Secundò, quia, ut ibidem loqueris, *idem est Monacho uxorem ducere, quod Monachatum deferere*. At Monachus peccat Monachatum deferendo: Ergo peccat uxorem ducendo. Tertiò, *Monachus, qui ad nuptias appellit animum, is voti sui desertor, fidem suam irritam facit*, (verba tua sunt.) At Monachus sine dubio peccat deferendo suum votum, & irritam faciendo suam fidem: Ergo etiam peccat animum ad nuptias appellendo.

8. Octavo asseris, Monachum, si deferat suum statum, non magis peccare contrahendo matrimonium, quàm continentiam servando, (num. 38. *Idem prorsus peccatum erit Monacho, si à monachatu recedat, etiamsi abstineat à conjugio, & in cœlibatu perfectissime cum plenissima continentia perseveret; ac si uxorem ducat*. Rationem addis, quia votum monachale, non versatur immediatè circa cœlibatum & continentiam, sed circa regulam monasticam.) Hæc assertio est falsa, sicut præcedens. Primò, quia si Monachus deferat suum Ordinem, & nihilominus velit servare continentiam; nullo modo peccat in eo præcisè, quòd velit servare continentiam, quia ex hac parte vult servare, quod per votum Deo promissit. At peccat volendo contrahere & consummare matrimonium, quia ex hac parte non vult servare, quod Deo promissit. Ergo non est par ratio. Secundò, quia servando continentiam, non facit se inhabilem ad re-

sumendam vitam monasticam. At contrahendo matrimonium, facit se inhabilem. Qui autem facit se inhabilem ad id servandum, quod ex voto tenetur servare, peccat. Ergo Monachus peccat matrimonium contrahendo, non autem continentiam servando: Nec verum est, quod ais, *votum monachale non versari immediatè circa cælibatum & continentiam.* Nā Monachus, dum vovet, vel expressè vovet vitam monachalē, vel expressè castitatē, paupertatem & obedientiam, quæ tria constituunt vitam monachalem. Si posterius, captus es. Si prius, æquè captus es. Nā vita monachalis, ut paulò antè dicebas, essentialiter & substantialiter includit cælibatum & continentiam.

9. Nonò asseris, vel videris asserere, Monachos non fieri Apostatas, si post vota solennia deserant suum statum in Summa capitis: *Solenne votum est salubre, nec eius desertio verè facit Apostasiam.*) Hæc assertio similiter falsa est, & in totam Ecclesiam contumeliosa: Atq; ad hoc solum à te posita, ut suscipias patrociniū Lutheri, & similium Monachorum, qui statum Monachalem turpiter deseruerunt, (de te nihil dicam: relinquo te tuæ conscientię.) Certè ex communi totius Ecclesiæ consensu, & ex ipsa Etymologia vocabuli, Apostasia idem est, quod defectio: & Apostata idem, quod defector, desertor, transfuga. Cōfule Calepinum. At Monachus, qui post vota solennia recedit à suo statu, quid aliud est, quàm defector, desertor, & transfuga à suo Ordine?



10. Decimò asseris, Ecclesiam nihil juris habere in Monachum desertorē, (n. 45. *Quid si propria auctoritate, sine causa legitima, quis Monachus professus, fiat desertor? Hic sane peccat contra Deum & damnationem habet; sed Ecclesia nihil habet contra illum, in foro externo.*) Hæc assertio est contra scripturam. Nam Ecclesia potest quemlibet Christianum in externo foro reprehendere, punire, & etiam excommunicare, si delinquat & contumax sit. Matth. 18. 17. *Si Ecclesiam non audierit, sit tibi sicut Ethnicus & Publicanus.* Et 1. Cor. 4. 21. *Quid vultis? in virga veniam ad vos, an in Spiritu māsuetudinis?* Et 2. Cor. 13. 10. *Hæc absens scribo, ut non præsens durius agam, secundum potestatem, quam Dominus mihi dedit.* Et 2. Thess. 3. 14. *Si quis non obedit verbo nostro, per epistolam hunc notate, & non cōmisceamini illi.* Cur hîc excipis Monachum, sui status desertorem? Dicam, Antoni. Tuam causam ubique agis. Desertor es: Transfuga es: Peccatum non agnoscis: puniri non vis, Sed contra Deum non valet tergiversatio.

11. Undecimò asseris, Monachos nō posse esse Clericos, seu sacris Ordinibus initiatos. (n. 51. *Ex hoc ipso evidenter colligitur, Monachos, qui monachatum cum clericatu confuderunt, jam neque esse veros Monachos, neque veros Clericos. Clericatus enim cum monachatu pugnat, & sunt incompatibilia.*) Hæc assertio est contra perpetuam Ecclesiæ praxin. Nam Benedictini, Frāciscani, Dominicani, Carthusiani, & alij Religiosi, semper habuerunt, & adhuc habent Sa-

cerdotes sui Ordinis, qui simul & Monachi, & Sacerdotes sunt. Et tu audes, Antoni, hanc praxin tot seculis servatam & confirmatam, jam tandē carpere & accusare? Nimirum, hoc tantū sectari te video, ut sicut desertor es Ordinis, ita etiam desertor sis doctrinæ, quam Ecclesia Catholica proficitur.

12. Omitto alias assertiones, æque absurdas, quæ propè infinitæ sunt. Et hîc finio. Si, quod vehementer opto, redibis ad Ecclesiam, ex qua digressus es, erit mihi occasio gaudij ac consolationis. Sin animum obstinaveris, perpendam illud Apostoli: *Tu autem fide stas: noli altum sapere, sed time.* Item, *Vide bonitatem & severitatem Dei: in eos quidem, qui ceciderunt, severitatem: in te autem bonitatem Dei, si perman- seris in bonitate, alioqui & tu excideris.*

F I N I S.

















